

Harry Potter

UJARALLU

INULNARTOQ



J. K. ROWLING

HARRY POTTER

*Suialaannguaq Ligustervængimi qilaap qernariip
ataani orpikkat ungaluliat tulliiaarluarsimasut
atuarlugit ingerlaarpoq, soorlu tamaani silarsuarmi
tupinnarnerpaamik pisoqassanngikkaluartoq.....
massakkorpiag inuit nuna tamakkerlugu katersuup-
put nipikisaarlutik Harry Potter inuummersoqqul-
lugu skåleertarlutik. "Harry Potter ataqqiniarlugu
immiartukkavut nungunniartigit - nukappiaraq
toqunneqarsinnaanngitsoq pillugu."*

Harry Potterip angajoqqaavi eqqumeeqisumik
pisoqarneratigit ajunaarput, Harry Potter suli
inoorlaajusoq. Harryp meeraanermini alliartorfi-
gai akkani sukangasooq ajanilu taakkulu ernerat
nukatsitaaqisoq. Harrymillu malersuigajooq.
Aqqanilinnik ukioqalerami Hogwartsip
angakkuarnermut ilisiinnermullu atuarfia-
niit allagarseriataarpoq, taamaalillunilu
Harryp inuunera allanngorujussuarpoq.

Immikkorluinnaq pigin-
naasaqarnini paasivaa.

Ikinngutitaartorpōq
aammali peqqarnitsorsuar-
mik akerartaarluni - tassalu
angakkorsuaq Voldemort,
Harrymik toqutsiniartoq.
Voldemortilli paasivaa Harry nukap-
piaraasoq imaaliallaannaq toqun-
neqarsinnaanngitsoq.

Harry Potter™

- ujarallu inuunartoq

Atuakkiortoq: J. K. Rowling.

Kalaallisuunngortitsisoq: Stephen Hammeken

Harry Potter and the Philosopher's Stone

© J. K. Rowling 1997

Published by agreement with Christopher Little
Literary Agency, London

First published by Bloomsbury Publishing Plc,
Great Britain 1997

Harry Potter, names, characters and related indicia
are copyright and trademark Warner Bros. © 2000

Atuakkiorfik © 2002

Kalaallisuumngorútsisoq: Stephen Hammeken

Saqqaa: Mary GrandPré

Ilusilersuisoq: Søren P. W. Olsen

Naqiterneqarfia: Northaven Book

Ilusaa siulleq, naqitaq siulleq

ISBN 87-558-1768-8

Atuakkiorfik • Postboks 840 • 3900 Nuuk

Tlf. 32 21 22 • Fax 32 25 00

E-mail: greenpub@atuakkiorfik.gl

Nittartagaq: www.atuakkiorfik.gl

Tamatigut ininimigisassaq

Atuakkamik matumininga immikkoortuinilluunniit
nuutiteraluni allatulluunniit assitilluni, aamma
radiokkut TV-kkulluunniit aallakaatisilluni, saq-
qunmiussuisoqarsinnaa: unngilaq naqiterisitsisarfik
allakkatigut akuersisinatinnagu. Tamatumininga
pineqanngilaq ugulaarilluni issuaasinnaaneq atua-
kap eqqartorneqarnerani allaaserineqarneranilu.

Imai:

Kapitalit siulliat	
<i>Nukappiaraq toqunneqarsinnaanngitsoq</i>	4
Kapitalit aappaat	
<i>Igalaq tammartoq</i>	24
Kapitalit pingajuat	
<i>Allakkat eqqumiitsut</i>	40
Kapitalit sisamaat	
<i>Matuersaatiniik paarsisoq</i>	58
Kapitalit tallimaat	
<i>Aqqusineq Diagonalstræde</i>	76
Kapitalit arfernat	
<i>Qmuttuitsut aallartarfianiit ni trekvartimit aallarneq</i>	111
Kapitalit arfineq aappaat	
<i>Nasaq agguaassisartoq</i>	141
Kapitalit arfineq pingajuat	
<i>Nakorsaasianut professori</i>	163
Kapitalit qulingiluaat	
<i>Unnuakkut sakkuaanneq</i>	178
Kapitalit qulingat	
<i>Iluartut Ulluata unnukkua</i>	202
Kapitalit aqqarnat	
<i>Quidditch</i>	223
Kapitalit aqqaneq aappaat	
<i>Tarrarsuut takorruuisitsisartoq</i>	240
Kapital 13-iat	
<i>Nicolas Flamel</i>	266
Kapitalit 14-iat	
<i>Norbert Uumasorujuk</i>	282
Kapitalit 15-iat	
<i>Orpippassuit inerteqqutaasut</i>	299
Kapitalit 16-iat	
<i>Matukkut nakkartartukkut</i>	323
Kapitalit 17-iat	
<i>Angut marlunnik kiinalik</i>	354

Nukappiaraq toqunneqarsinnaanngitsaq.

Aappariit Dursleykkut Ligustervænget normu 4-meersut tulluusimaarutigaat inuttut nalinginnaalluinnartuunertik. Aappariit tassaapput eqqumiitsunut paasissaalluanngitsunullu akuliunnissamut kingullerpaajullutik pasillerneqarsinnaasut. Inooriaatsip nalinginnaasup saniatigut iliuuseqarnis-saq akuerisinnaanngilluinnarpaat.

Dursley suliffeqarfissuarmi Grunningsimi pisortaavoq. Suliffeqarfissuaq qillerusiorfiuvoq. Angutaavoq angisooq pualasooq qungaseqanngingajattoq kakkivissamigullu umikkaarsuaq. Nulia arnaavoq saluttoq qaamasoq, qungasiali inunnut nalinginnaasunut naleqqiullugu marloriaam-mik takineruvoq, qungatsimilu taamaattuunera iluaqutigi-sarpaa eqqaamiuni naatsiiviup ungalui orpikkat qulaallugit piffissarujussuaq atorlugu marsertaramigit. Aappariit ernee-raqarput Dudleymik atilimmik. Aappariit isumaqarput ernertik silarsuarmi asseqanngitsaq.

Dudleykkut pisuujupput suullu tamaasa pigineqarsinnaa-sut pigalugit, ilanngulluguli isertugaateqarput, annilaanga-ginerpaasaallu tassaavoq isertugaatimik paasineqarnissaa. Isuma-qarput ilaqutariit Potterikkunnut tunngasoq paasine-qarpat anigorsinnaanaviarnagu. Potterip nulia Dursleyp nulia qatanngutigaa ukiorpassuarni takusimanngisaa.

Dursleyyp nulia qatannguteqanngitsutut pissusilersortarpoq, qatanngutaami taanna uialu atorsinnaanngitsoq ilaqutariit Dursleykkunnut nallersuussinnaanngillat. Aappariit Dursleykkut qiaammertarput eqqarsaatigileraangamikku eqqaamiutik qanoq oqassanersut Potterikkut pulaariataassa-galuarpata. Ilaqutariit Dursleykkut ilisimavaat Potterikkut aamma erninnguaqartut taannali takusimanngisaannarpaat. Nukappiaraq aamma ilaqutariit taakku takorusuttanngin-nerannut pissutaaqataavoq tassami ajortorujussuussagaluar-poq Dudley nukappiaqqamik taamaattumik pinnguaqateqa-lissagaluarpat.

Aappariit Dursleykkut sisamanngornermi avaanngunar-tumi. uagut oqaluttuatta aallartiffiani, itermata, silami quli-simasumiit siulittuutigineqanngilaq, nunami tamarmi eqqu-meeqisunik paasissaalluanngitsunik pisoqarumaarteq. Dursley atisalersuutigaluni niperujoorpoq qilernerusamilu avaanngunarnersaat atugassamisut aalajangiullugu. Nulia oqalorusaartuarpoq ernini Dudley nilliaqisoq issiavianut portusuumut ingitinniarsariitigalugu.

Taakku arlaannaataluunniit uppissuaq kajortoq igalaak-kut isaqqialalluni sarsuttoq takunngilaat.

Nalunaaqutaq qulit qeqqanut Dursleyyp mappini tiguaa nuliani uluaatigut pattalaarlugu Dudleylu inuulluaqqullugu kuninniarsarigaluarlugu uniorpaa, taamaalisormi Dudley kamassuataarmat issingigassaatinilu iikkamut miloriullugit. "Inupiluaraatiga", Dursley illaatigaluni oqarpoq, illumillu anilluni. Biiliminut ikivoq illumullu aqqusinikkut isaarissak-kut kinguporsorluni.

Aqqusernup sangoriarnerani siullermi siullerpaamik eqqumiitsumik malugisaqarpoq - qitsuup aqqusernup nalu-naaqutaa atuaraa takugamiuk. Dursleyyp paasinngeqqaara-

luarpaa qanoq pisoqarnersoq - taava niaqqi sangutippaa qanoq pisoqarnersoq takulluarumallugu. Ilumut qitsuk sanimukaarnilik aqqusernup sangoriaaniippoq, kisiannili nunap assinganik tigumiaqqajanngilaq. Sunaana eqqarsaatisimaga? Qaamarnup-una iseriattup qasertup qoqassisi-magaa. Dursley aappasaanik uisorerpoq qitsullu nakkuser-lugu. Qitsuup akillugu nakkuppaa. Dursley sangulluni ingerlaqqikkami narluinnarlu ingerlalerami qitsuk biilip tar-rarsuutaatigut tunummüt marserpaa. Maanna uninngalluni aqqusernup nalunaarsuutaa atuarpaa allassimasoq "Ligustervænger" - naamik aqqusernup ilisarnaataa isigin-naarpaa; qitsuimmi aqqusernit nalunaarsuutaat atuarsin-naanngilaat. Dursleyp niaqqi ileqimisaarpaa aalajangerlu-nilu qitsuk puigorniarlugu. Illoqarfiup tungaanut ingerlaar-nermini alla eqqarsaatiginngilaa qillerutinik amerlasuunik pisiffigineqarnissani kisiat, neriutitigamiummi aqagu qille-ruterpassuarnik tunisinissani.

Kisianni illoqarfiup avatinnguanut pigami qilleruterpas-suarnik tunisinissaminik eqqarsaatai allamik taarserneqar-put. Biilerpassuit pisarnermissut ullaakkut ingerlasut kigaa-qalutik ingerlalerмата, naggataatigullu unillutik takunngit-soorsinnaanngilaa inuit amerlaqisut eqqumeeqqissaartunik atisaqartut. Inuit uliguallit. Dursleyp nuannarinngilluinnar-pai inuit eqqumiitsunik atisalersorsimasut - atisat inuusuttut ilaasa atussallugit nuannarisaat! Eqqarsarpoq immaqana atisat tamakku mutinnngorsimasut. Inussani biilip aquutaa-nut pattalaarpai inuillu eqqumiitsut arlallit eqqannguamini nikorfasut isiginnaalerpai. Imminnut isussuupput kamappa-seqalutik. Dursleyp mamiatsalluni paasivaa inuit taakku inuusuttuunngitsut; Eqqarsaatigilaariaruk angut inna qor-sooqqinmik uligualik namminerminiit utoqqaanerusinnaa-

voq! Ila imminut puigornerami! Taava Dursley isumassar-sivoq, immaqaana inuit taakku inunnik ikiuinirlutik fiis-tertitisisut - imaassinnaavoq inuit eqqumiitsunik atisalersor-simassasut siunertat arlaannut aningaasanik katersuiniarlutik... Aap, taamaassimassaaq. Taava biilit ingerlaaqqilerput minutsillu arlaqanngitsut qaangiummata Dursley Grunningsip biilinuut unittarfianut unippoq. Eqqarsaatai qillerutiniileqqipput.

Dursley allaffimmini inissiat quleriit qulinngiluaanni tamatigut igalaaq tunullugu issiasarpoq. Igalaakkut itsuartsinnaalluni issiasimasuugaluaruni ullaq taanna qillerutit eqqarsaatigisinnaasimanavianngikkaluarpai. Uppiit ulluk-kut qaammaruttornerani sarsuasut takunngilai, inuilli aqqu-sinermi angallattut uppiit isiginnaarpaat. Nikorfapput qanitik ammarlugit isiginnaajutigalutik uppiillu qulininni niaq-qutik qulaallugit timmisut tikkuartuutigalugit. Ilarpassuisa uppiit unnuakkut takusimanngisaannarpaalluunniit. Dursleyli uppinnik takusaqanngivilluni ullaap tungaa alaf-fimminiippoq. Sulisut assigünngitsut tallimat suanngappai. Pisariaqavissunik arlalinnik oqarasuaatikkut oqaloqatigin-nippoq oqaloqatiginninnerminilu arlaleriaryluni suaartarluni. Neriffissap tungaanut nuannaaqaaq, neriffissanngormallu nissuni aalatikkusulerpai aqqusernullu illuatungaanutkarni-arluni iffiorfimmuut poor'lusiniaryluni.

Inuit uliguallit puiguissimavai iffiarfiup eqqaani taamattut takugamigit aatsaat eqqaalerlugit. Sanioqqukkamigit kama-qaluni isiginnaarpai. Naluaa sooq, kisianni inuit taakku annilaajummersippaat. Inuit taakku aamma nikorfapput kamassimarpaseqalutik isussullutik, kisianni aningaasivim-mik angalaarullugu tuneqqusaarummik ataatsimilluunniit takusaqanngilaq. Poor'lumik ataasersuarmik pisereerami

inuillu taakku sanioqquteqqikkamigit oqaloqatigiinnerisa ilamerngi tusaalerpai.

"Ilaqutariit Potterikkut, ilumoorpoq, aamma uanga tamanna tusarpara..."

"Aap, ernerat, Harry...."

Dursley uneriatarpaq. Naalarululerpoq. Isussuuttut kingumut qiviarpai oqarfiginialerlugillu, taamaatiinnarpaali.

Arpalluni aqqusineq ikaarpaa, allaffimminukapallalluni, allattuni qatimaalaarfigalugu akornusersorneqarnissani eqqarsaatigissanngilluinnassagaa, oqarasuaat tigullugu angerlamullu normut toortalerlugillu allamik isumataarpaq. Oqarasuaat ileqqippaa kakkivissamigullu umini tagiartorlugit tamaviannguat eqqarsaatigaluni... naamik, namminequna kukkusooq. Potter atiuvoq nalinginnaalluinnartoq.

Qularinngilluinnarpaa inuppasuit Potterimik naggatillit ilaat aamma erneqassasut Harrymik atilimmik. Maanna eqqarsaatigilluariamiuk eqquissumik oqaatigisinnaanngilaa jornguni ilumut Harrymik ateqarnersoq. Aammami nammineq nukappiaraq takunngisaannarpaa.

Imaassinnaavormi Harveymik atilik. Imaluunnit immaqa Harold. Nuliami tamatuminnga annilaartinnissaa pisariaqanngivippoq. Qatanngutaa taaneqaraangat eqqissiveerutarpaq. Aammami tamanna pillugu isornartorsiorsinnaanngilaa - nammineq taamaattumik qatannguteqartuugaluaruni.. kisiannimi.. taakkumi inuppasuit uligualisaartut!

Ualip sinnerani qillerutit eqqarsaatiginissaat ajornartorsitutingaatsiarpaa, nalunaaqutarlu tallimanut allaffik qimakamiuk suli allanik ima eqqarsaateqartigaaq, matukkut anillakkami angut aqqusinikkut sanioqquttoq aporlugu.

"Utoqqatserpunga", qatimaluppoq, utoqqannguaq miki-soq naalluni orloqqajarmat. Taava Dursleyp takuaa angut

mikisunnguamik tungjuartumik aappaluartumik uligualik aammalu taamatut aporneqarnini sunnguamilluunniit ajorinngivikkaa. Akerlianik, angut qungujorujussuarpoq oqalummallu nipitungaarmat inuit sanioqquttut isikkuserpaat. "Umannguaaq-aa soqutigissanngilat. Ullumikkut akornuserneqarsinnaangilanga! Qilanaarit, Nalunngisat kiisami qimaguppoq! Muggleriugavit ulloq ullumikkutut nuanner-soq qiimmattaatisariaqarpat!"

Taava angutip utoqqaap Dursley eqitaarpaa qimagulluni-lu.

Dursley qerruteqqasutut nikorfavoq. Ilisarismanngilluinnakkaminit eqinneqarsimavoq! Aamma isumaqarpoq angutip utoqqaap Mugglerimik taasimagaani. Oqaaseq taanna qanoq isumaqarsimassagaluarnepoq. Annilaartorujussuuvoq tuaviinnarlu biiliminukarluni. Angerlamut ingerlatilluni isumalluarluni imminut uppertinnialeraluarpoq takorluuisoraluni. Takorluuineq pitsaanerutikkaluarpaa pisimasut eqqumiitsorpassuit pisimaneraninngarnit.

Illup tungaanut apuukkiartortilluni takusaa siullesq tasaaavoq qitsuk ullaag taanna takusani. Takusaata nuannaarnerulersinngivippaa. Maanna qitsuk naatsiiviup qarmaata qaani issiavoq. Isumaqarluinnavip-poq qitsuk taannaasoq; isaata sinaasigut ilisaraa.

"Peerit!" Dursley suaarpoq.

Qitsuk illuaallanngivip-poq. Akerlianik isikkuserpaa mersernarpaluttumik. Qitsuit taamaaliortarnerat nalinginnaanerluni? Dursley eqqarsarpoq. Illu parnaarussaarlugu iserpoq, imminut eqqissisarniaatigaluni. Suli aalajangersimavoq nuliaminut pisut oqaatiginiarnagit.

Nuliata ulloq nuannersumik nalinginnaasumillu atorsi-

mavaa. Ulloqqeqsioramik nuliata eqqaamiumik panimminnik ajornartorsiutaat eqqartorpaa aamma oqaluttuaralugu Dudley oqaatsimik nutaamik ilikkarsimasoq. "(piumanngilang..)" Dursley pissusilersorniarsarivoq soorlu susoqarsimanngitsoq. Dudley innartinneqareermat inimut iserpoq nutaarsiassallu kingulliit angumereqqarlugit.

"Naggataatigut nalunaarutigissavarput timmissanik ilisimatuut nunami tamarmi oqaatigimmassuk uppiit ullumik-kut eqqumiitsumik pissusilersorsimasut. Naak uppiit unnuakkut piniartaraluartut ullukkullu qaqutigut takuneqartarlutik hundredenik amerlanerusunik nalunaarutigineqarpoq uppiit ullaassamiit ulappussimasut. Iisimatuut nassu-iarsinnaanngilaat timmissat pissusilersornerisa allanngorsi-manerat."

Nutaarsiassanik atuartup isiginnaartut qungujunngit-suunngilai. "Eqqumiissusia. Maannalu tullinnguuppoq Jim McGuffin silassamik atuaasusaaq. Jim, uppinnik paatsivee-rusimaarlutik timmisunik piffissami tulluuttumi takoqqissaa-gut?"

"Naluara, Ted", silassamik atuaasartoq akivoq, "tamanna akisinnaanngilara, kisianni oqaluttuarisinnaavara ullumik-kut uppiit kisimik paatsiveerusimaanngimmata.

Ungasissumiit qanittumiillu isiginnaartartut sianerlutik oqa-luttuarput ippassaq siulittuutigisimasattut siallerujussuarsi-manatik ullorissallu anarpassuinik takusimallutik. Immaqa inuit ukioq manna siusinaarlutik Sankt

Hansisiorsimassapput - aatsaalli taanna sapaatip akunnera-ni tullermi nalliussissavarput, ikinngutikka! Kisianni un-nuaru ullaassarulu siallernissaa ilimasaarutigaara."

Dursley issiavimmini ornavaffilimmi issiavoq tupigut-sangaarluni. Tuluut Nunaanni tamarmi ullorissat anaat?

Uppiit ullukkut qaammaruttornerani sumi tamaani timmio-
raartut? Sumi tamaani inuit eqqumiitsut uligualisaartut?
Taavalu ilaqutariit Potterikkut pillugit isussualunnerit...

Nulia inimit iserpoq tiitorfinnik marlunnik nassarluni.
Allatut ajornaqaaq. Allatut ajornartumik nuliani oqaluttuut-
tariaqarpaa. Eqqissiveerulluni quersoriarpoq. "Asasara
Petunia. Qanittukkut qatanngutit tusarfigaajuk?"

Soorlu ilimageriigaatut Petunia Dursley annilaajummer-
poq uinilu avoqqaarlerpalulluni isigalugu, tassami isumaqa-
tigiissimapput qatannguteqarnera sianiginngitsuusaartassal-
lugu.

"Naamik", sakkortuumik akivoq, "soormi?"

"Tassaana nutaarsiassani eqqumiinnerpaanik tusagaqar-
nartartoq", hr. Dursley qatimaluppoq. "Uppiit... ullorissat
anaat... aamma ullumi illoqarfimmi inunnik eqqumiitsor-
passuaqarpoq....".

"Taavami?" Petunia Dursley massuavoq.

"Isumaliuinnartungaana immaqa..... qatanngutit ila-
qutaalu pineqartut."

Nulia qinngorlerluni tiimik najoqqaalerpoq. Dursley
eqqarsarpoq nuliani oqaluttuuttariaqarnerlugu ateq Potter
taaneqartoq tusaasimallugu. Aalajangerpoq taamaaliornia-
rani. Akerlianik soqutiginningsuusaarpalaavillugu oqarpoq.
"Taanna ernerat - Dudleyp ukioqatigingajappaa ilaa?"

"Ilimanarpoq", Petunia Dursley sukangasuumik akivoq."

"Qanormaanna ateqarpa? Howard imaluunniit taamatu-
kanneq?"

"Naamik, Harry. Ateq tusarniitsoq nalinginnaasoq,
uanga aperissagumma taama isumaqarpunga."

"Ilumut tamanna qularnanngilaq," Dursley annilaajum-
merluni oqarpoq. "Isumaqaataalluinnarpunga".

Eqqartugartik unnuk taanna eqqaaqqinngilaa, taava innarput. Nuliata uffarfimmiinnerani uia sinittarfiup iga-laavanukarpoq naatsiivimmullu itsuarluni. Qitsuk suli tasa-ma. Aqqusineq atuarlugu isiginnaarusaarpoq soorlu arlaan-nik nakkutilliisoq.

Takorluuisoq-una? Qanoq ilillutik pisut tamarmik Potterikkunnut attuumassuteqarsinnaappat?

Paasineqassagaluarpas inunnik taamaattunik ilaqutaqarne-rat - aah naamik, eqqarsaatiginerluunniit artorpaa.

Ilaqutariit Dursleykkut innarput. Petunia Dursley inger-laannaq sinilerpoq uiali eqqumavoq assorsuarlu eqqarsaate-qarluni. Sinilinnginnermini imminut tuppallersarluni eqqar-saataa kingulleq tassaavoq, naak Potterikkut akuliusimaga-luarlutik nammineq nuliilu akornusersortariaqanngikkaa-tik. Ilaqutariit Potterikkut nalunngilluinnarpaat Petuniamit namminerminillu qanoq isigineqarlutik...

Takusinnaanngilluinnarpaa nammineq Petunialu qanoq pisoqaraluarpalluunniit akuliunneqarnissartik. Aatsaarpoq sanimullu saalluni - taakku susassarinnngilaatsik...

Kisiannili taamatut eqqarsarami kukkungaatsiarpoq.

Dursley eqqissiveqarnani sinilersimagaluarpog, qitsulli silami naatsiiviup qarmaata qaaniittoq qasunngilluinnar-poq. Inuusaliatut uninngaqqissaarpoq uisoringivillunilu Ligustervængep tungaanut aqqut nakkutigalugu. Biilip matua tassanngaannaq matugaluarmat qitsuk qisuarianngi-laq. Aamma soqutiginnngilaa uppiit marluk qulaakkaluar-manni. Aatsaat unnuap qeqqalivissoq aalarialaarpoq.

Angut aqquserngup sangoriaatigut qitsuup qasusuilluni nakkutigisaatigut pisulluni takkuteriataarpoq. Ima tasaan-gaannartigisumik takkuteriataarpoq allaat isumaqarnarlu-ni soorlu silaannarmiit pisseriataarsimasog. Qitsuup pa-

miua iperartortutut aalalerpoq isaalu ikersisimanceran-
nguanngorput.

Angut taamaattoq siornatigut tamaani takuneqanngisaan-
narsimavoq. Angutaavoq angisooq, saluttoq aammalu
utoqqarujusoorpasipppoq nujai umiilu qaalloriit najoqquta-
rissagaanni; nujai umiilu ima takitigaat allaat qitequtaanut
killillutik. Atisai takisuujupput, uliguani tunguusaq nunak-
kut kalikalaarpaa kimmikkaanillu støvleqarpoq sipernilim-
mik. Isai tungujortut isaruaasa tunuanni qaamasuupput qil-
larillutillu, qingaa takisuujuvoq peqingallunilu allaanngilaq
ikinnerpaamik marloriarluni napisimasoq. Angutip atia tas-
saavoq Albus Dumbledore.

Albus Dumbledorep ilisimarpasinngilaa illoqarfiup ilaani
angutip namminermisut ittup tikilluaqqusaaffiginngisaanni
ingerlanini. Malittarisassat allanneqanngitsut malillugit a-
ngummut tunngasut tamarmik tulluutinnngillat - atisaaniit
støvliinut kimmikkaanut sipernilinnut. Kisianni Albus
Dumbledorep qanoq isigineqarnini eqqarsaatiginagu allar-
luinnarmik sammisaqarpoq. Uliguami kaasarfiini ujaasivoq,
aammali nalunngippasippaa isigineqarluni. Niaqqi kiveria-
taarpaa qitsullu toqqarlugu nakkutilerlugu, taassuma
aamma aqqusernup illuatungaanniit suli nakkukkaani.
Arlaannik pissuteqarluni qitsummik takunini quiatsaatigaa.
Illarnermik ilummuualarpoq qatimalullunilu. "Taama
imminut oqarfigisimasariaqaraluarpunga."

Kiisami kaasarfimmini ujakkani nassaaraa.
Kaasarfimminiit ammussaa allaanngivipppoq ikittaat silviu-
soq. Silaannarmut kivippaa seqqortillugulu. Aqqusinermi
quleq qaninneq seqquallaatigaluni qamipppoq.
Seqqorteqqippaa - qulliip tullia qamipppoq eqqaanilu suna
tamarmi taartuinnanngorluni. Ikinnerpaamik aqqaneq mar-

loriarluni Qamittaaat seqqortippaa aqqusinermi tamarmi qaamanerit mikisuaqqat marluinnangornissaasa tungaanut. Taakkulu tassaapput qitsuup isai suli namminermi nak-kutilliisut. Tamatuma nalaani Dursleykkut igalaakkut itsu-arsimasuugualarpata Petunia Dursley marsernermik sungi-ussisimaqisoq aqqusernup sinaani sunnguamilluunniit taku-saqarsinnaasimanavianngikkaluarpoq.

Dumbledorep Qamittaaat kaasarfimminut ikeqqippaa aqqusinikkullu ingerlaqqilerluni normu 4-p tungaanut. Normu 4 angugamiuk naatsiiviup qarmaanut qitsuup sa-nianut ingippoq. Saniminiittoq isiginngilaa erininarsinngit-sorli oqaluffigilerpaa.

"Nuanningaarami maani takullutit, professor McGonagall."

Qitsuk qiviarpaa qungujunniarlugu, kisiannili taanna tammarsimavoq. Akerlianik arnaq mersernarsaaqisoq issia-voq qitsuup tammartup isaasa sinaanni ilisarnaataasa assinginik kipparissunik isarualik. Aamma taanna qaligua-qarpoq qorsooqqissumik. Nujai qernaariit tunuani qilersi-mapput tupaallappaseqisutullu isikkoqarpoq.

"Qanoq ilillutit nalunngiliuk uangaasunga?" Aperivaa.

"Asasara professoriaa, qitsummik taama issiaqqissaartigi-sumik uninngaqqissaartigisumillu takusimanngisaannar-punga."

"Ilimmi aamma avatitit qerattarsimassagualarput naat-siiviup qarmaani ulloq naallugu issiasimasuugaluaruit," professor McGonagall akivoq.

"Ulloq naallugu? Ullorsiorlutillu fiusternissamut taarsiul-lugu? Ilimagaara maanngarninni fiustertut assigiinngitsut aqqaneq marluk missaat naammattoorsimassallugit."

Professor McGonagall kamappalulluni kiinarsorpoq.

"Ah, aap, tamarmimmi iluunngarmik nuannapput,"
naammagittaappalulluni akivoq.

"Isumaqarnarsinnaagualarpoq mianersornerussasut; kisianni taamaanngilaq - Mugglerinut allaat paasisimavaat arlaannik pisoqartoq. Nutaarsiassanik aallakaatitani ilannguppaat." Ilaqutariit Dursleykkut inaata igalaavata taartup tungaanut saappoq. "Tamaasa tusarpakka. Uppippassuit paatsiveerusimaartut... ullorissat anaat...aap, sianiitsuunngillat. Pinngitsoornatik arlaannik malussarsimassapput. Ullorissat anaat pavani Kentip eqqaani allaat - eqquinaatigisinnaavara tassaassasoq Dedalus Diggle. Taanna silatunerpaanut ilaangisaannarnikuuvoq."

"Assuarisariaqanngilatit", Dumbledore ikinngutinnerpaluttumik akivoq. "Ukiuni kingullerni aqqanilinni taama nuannaarutissaaleqisimatigaluta pisimasoq nuannaarutigisariaqarparput." Nalunngilara", professor McGonagall nar-rassimarpalulluni oqarpoq. "Kisianni pisariaqanngilaq nunamut tunngajunnaarnissaq. Inuit mianersorunnaarput. Ulluklut qaammaruttortoq aqqusinerni ingerlaarput, aamma Muggleritulluumiit atisalersorsimanngillat. Tamanna malugineqarpoq."

Dumbledorep tungaanut sakkortuumik qissimippoq, soorlu utaqqillugu taassuminnga oqaluttuunneqarnissani, taannali nipangersimaannarpoq. Taava nangippoq. "Ajussagaluqaq Mugglerit uatsinnut tunngasut tamaasa paasisimasuugualarpatigut ulloq taannarpiaq "Illit-nalunngisat-kinaasup" kiisami tammarsimanerata nalaani. Ilaa tam-mavissimavoq, Dumbledore?"

"Taama isikkoqavippoq," Dumbledore akivoq.
"Qujasutissaqagaagut. Sikumik citronilimmik Citronsorbet-imik perusuppit?"

"Sumut atugassara?"

"Citronsorbet. Tassa Mugglerit kinguleqqiutaat uanga pinngitsoorsinnaajunnaagara."

"Qujaannarpunga," professor McGonagall ilasseraannani oqarpoq. Isumaqqanngilaq piffissanngortoq sikutornissamut. "Soorlu oqartunga naak Illit-nalunngisat-kinaasoq tammarsimagaluartoq..."

"Asasara professoriaa. Inuup illittut ittup isumatuup taasuma angutip atia eqqorlugu taasinnaasariaqaraluarpaa. Taanna oqaaseq "Illit-nalunngisat-kinaasoq" sumut atussagatsigu. Ukiuni aqqanilinni inuit kajumissaartarsimagaluarpakka atia eqqortoq taasaqqullugu tassaasoq: Voldemort."

Professor McGonagall tupannermik qisuariarpoq, kisiannili Dumbledorep siku citronsorbet ammarniarlugu ulapputigiamiuk aapparmi qisuariarnera maluginngilaa.

"Paatsiveerunnarpallaaqaaq taanna taajuaratsigu Illit-nalunngilat-kinaasoq-mik." Takusinnaanngilara sooq Voldemortip atia taassallugu taama ulorianartiginersoq."

"Nalunngilara paasisinnaanngikkit," professor McGonagall oqarpoq isumatsappalungajalluni nersorinnipasingajallunilu. "Kisiannimi illit aamma allaanerugavit. Tamarmik nalunngilaat illit kisivit Illit-kinaasoq - ajunngilarmi - Voldemortip annilaangagigaatit."

"Ingasattumik nersorparma," Dumbledore eqqissisimalluni oqarpoq. "Voldemort nukinik peqarpoq uanga pigilersinnaanngisannik."

"Tassaana assuarnaatsuunerit pissutiginnarlugu nukiit taakku atornavianngikkitit."

"Nuannaarutigaara manna taarmat. Madam Pomfrey siutequtikka nutaat nuannarinerarlugit oqarfigimmangali aatsaat taama aappillertigaanga."

Professor McGonagallip Dumbledore qissimippaa oqarlunilu. "Tusatsiakkanut allanut naleqqiullugit uppiit pissusilersornerat suunnigilaq. Nalunngiliuk inuit qanoq oqalutut? Sooq tammarsimansoq? Suullu kiisami unitsissimanneraa?"

Allaanngivippoq oqaatigerusutani kiisami oqaatigigaa; ulloq naallugu naatsiiviup qarmaata manngeqisup nilleqisullu qaavani issianeranut ullorlu naallugu utaqqineranut pissutaasoq. Isai qitsuup isaatut allatulli sakkortuseriataarput. Nalinginnaq tusakkat ingasavissut naammaginiarsimagunannigilai qanorlu oqartoqarnera isummerfiginiarnagu Dumbledoremit ilumoortumik oqarfigineqartinnani. Kisiannili Dumbledorep sikutoqqilersimasup akinngilaa.

"Oqarput," anusinngujuilluni nangippoq, "Voldemort ippassaq unnukkut Godricip qooruani ilaqutariit Potterikkut ujarai takuneqarsimasoq. Tusakkat oqaatigaat Lily aamma James Potter.... toqusimasut.

Dumbledorep niaqqi sikitippaa. Professor McGonagall anertikkalerpoq.

"Lily aamma James... ilumoornavianngilaq....uppererusunngilara... åh, Albus..."

Dumbledorep talini siaarpai tuviatigullu pattalaarlugu. "Paasisinnaavara...paasisinnaalluinnaarpara..." oqarpoq.

Professor McGonagallip nipaa sajuppoq nangipporlu. "Kisianni oqaatigineqartut taakkuinnaanngillat. Oqaatiginerarpaat ernertik Harry toqoriaraluarsimagaa. Taamaaliorsimanngilarli. Nukappiarannguaq toqussinnaasimanngilaa. Kialluunniit naluua qanoq pisoqarsimansoq, kisiannili aamma oqartoqarpoq Voldemortip Harry Potter toqoriaraluarlugu iluatsinngitsooramiuk pissaaneerussimasoq. Tamannalu pissutigalugu tammartoq."

Dumbledore nikallungalluni sikippoq.

"Ilu...ilumoorpa?" professor McGonagall ittoqerluni oqarpoq. "Taama suliaqareertigaluni... inuppassuit toqo-reerlugit...taava nukappiarannguarluunniit toqussinnaasimanngilaa? Tupinnaraluassusia. Eqqarsaatigilaariarsiuk nukappiarannguup unitsissinnaasimagaa. Kisianni Harry qanoq ililluni iluatsitsisinnaasimava?"

"Tamanna eqqoriaannarsinnaavarput," Dumbledore oqarpoq. "Immaqa eqqortoq paasinngisaannassavarput."

Professor McGonagallip kakkissarfik putoortuliaq kaasarfimminiit amuppaa isimilu atai allarterlugit.

Dumbledore sakkortuumik solummippoq nalunaaqutarlu kuultiusoq kaasarfimminiit ammullugu misissoqqissaarlugulu. Nalunaaqutaavoq eqqumiitsorujussuaq; Aqqaneq marlunnik tikkuuteqarpoq kisitsisitaqaranili. Kisitsisinut taarsiullugu ulloriaruartaqarpoq nalunaaquttap kiinaasaata saneraatigut kaavittunik. Qularnanngilaq nalunaaquttap qanoq isumaqarnera Dumbledorep paasisimassagaa, tassa-mi nalunaaqutaq kaasarfimminut ikeqqippaa oqarlunilu. "Hagrid kingusinaarpoq. Naatsorsuutigaara taassuma maaniinnissannik oqaluttuussimassagaatit, taamaappa?"

"Aap," professor McGonagall oqarpoq. "Kisianni naatsorsuutiginngilara illit sooq allamiinnak maaniinnerlutit oqaluttuussinnaassagimma."

"Maannarpunga Harry akkaanut atsaanullu angerlaanniarlugu. Taakku massakkut ilaqutatuailerpai."

Taama isumaqarsinnaanngilatit. Inuit maani najugallit ilaa eqqarsaatiginngilatit? Professor McGonagall nillerpooq pissillunilu normu 4 tikkuaatigalugu. "Dumbledore - taamaaliorsinnaanngilatit! Ulloq naallugu nakkutigaaakka. Inunnik uatsinnut naleqqiullugit taama allaanerutigisunik

allanik nassaarsinnaanngilatit. Aamma taassuminnga erne-qarput - ernerat takuara aqqusineq naallugu anaanani isim-missaraa mamakujunnik piumalluni nilliaatigaluni. Harry Potter ilumut taakkununngaanniarpiuk?"

"Illu taanna massakkut Harrymut isumannaannersaa-voq," Dumbledore aalajangersimarpalulluni oqarpoq. "Akkaavata atsaatalu perorpat sunik tamanik nassuiaassin-naanngussavaat. Allakkatigut nassuiaappakka."

"Allakkat?" Professor McGonagall uperinnippasinnani oqarpoq naatsiiviullu qarmaanut iigarluni. "Tusaalaariarit, Dumbledore. Isumaqarpit taakku tamaasa allakkani nassuiarsinnaassallugit? Inuit taakkua paasisinnaanngisaannassa-vaat! Ullut arlaanni tusaamasanngortussaavoq - suli uumal-luni tusaamasarsuanngussaaq. Tupigutsaatigissanngilara ullumi ulloq Harry Potterip ulluatut suaarutigineqassappat. Harry pillugu atuakkiortoqassaaq aamma silarsuarmi meeqqat tamarmik atia ilikkassavaat!"

"Taamaalluinnarpoq," Dumbledore oqarpoq isarussanilu qulaallugit ilungersorpaluttumik isiginnaalerluni.

"Taamatut pisoqarnera meeqqap kialluunniit paatsiveeruti-tissavaa. Suli pisussinnaalernani oqalussinnaalernanilu tusaamasanngorneq! Kingorna eqqaamasinnaanngisaminil-luunniit tusaamaneqalernerq! Takusinnaanngiliuk pitsaane-russasoq arlaanni ilisarisimaneqarfiginngisamini alliartorpat angisuunngornissami pisimasumillu oqaluttuunneqarsin-naanngornissami tungaanut?"

Professor McGonagallip qarni aatsartippaa soorlu arlaan-nik oqaaseqarniarluni, kisiannili oqaaseqartinnani eqqar-saqqeqqaarpoq. Taava oqarpoq. "Aap, soorunami. Ilumoorputit. Kisiannili nukappiaraq qanoq ilillutit ma-angaatissaviuk, Dumbledore?" Misissuerpasilluni qaliguar-

sua nakkuppaa, soorlulusooq pasipilullugu nukappiaraq qaliguarsuata ilaani toqqorsimassagaa.

"Hagridip aggiutissavaa."

"Isumaqarpit...silatusaernerussasoq Hagrid suliassamik taama pingaaruteqartigisumik tunigaanni?"

"Uanga inuunerma Hagridip assaanut tunniunnissaa nangaassutiginavianngilara," Dumbledore oqarpoq.

"Oqanngilangami naakkittartuunngitsoq," professor McGonagall ajualalluni akerlilivoq. "Kisianni pikataanera miserratigisinnaagunanngilat. Imaaqqajartarpoq - tusaagit, sunaana?"

Nipanneq kipitinneqarpoq perpalunnermik nipaatumik. Nipi tusaasaat nipittoriartuinnarpoq. Aqqusinerlu marseraluarpaat biilit qulliinik takussasoralutik. Nipi tusaasaat nipi-toorujussuanngorpoq, qilammullu qiviamik takuaat motorcykilerujussuaq qutsissuminngaanniit takkuttoq saniminnullu aqqusernup sinaanut tulluni.

Motorcykili angisoorsuugaluarpoq kisiannili inuttaanut naleqqiullugu suunani. Inummut nalinginnarmik angissusilimmut naleqqiulluni marloriaammik anneruvoq minnerpaamillu tallimariaammik silinnerulluni. Isumaqartoqarsinnaavoq taama angitigisinnaanissaq inerteq-qutaassasoq, ilanngullugulu aamma inuttut nujuartatut isikkoqarpoq takisoorsuarnik tukattunik qernertunik nujaqarluni, umiatalu kiinaa tamangajaat asseqqavaa. Assai puulukip quttoraatut angitigingajapput isigaalu motorcykilertartut støvliinik assukkorsimasut aarluarsuaqqatut angitigipput. Talliminik angisoorsuarnik nukittoqisunillu kissumiarpaa naalungiarsuk imusaq tæppenik imuneqarsimasoq.

"Hagrid," Dumbledore eqqissiallalluni oqarpoq. "Kiisami takkupputit. Suminngaannit motorcykili una nissikkakku?"

"Atugaraana, professor Dumbledore," Anguterujussuaq oqarpoq motorcykiliminillu mianersortunnguamik niulluni. "Inuusuttup Sirius Blackip ajunngisaarluni atukkiukkamiuk. Aamma Harry nassarpara aajuna, professor."

"Ajunngitsumik ingerlava?"

"Aap, professori. Illu aserungajavissimavoq, kisiannili annippara Mugglerit takkussuutsinnagit. Bristol qulaallugu timmigatta sinilerami."

Dumbledore professor McGonagallilu siumut peqipput Hagridip tigumiaa qanimut qimerloormiarlugu. Nukappiaraaq qap kiinaaraa tippit akornanni takussaaqqa-larpoq. Sinnaarippoq. Qernarinnik nujaqarpoq qaanilu takusinnaavaat eqqumiitsumik qileroqartoq innaallannertut nunamut tuttutut isikkulimmik.

"Tassa tassuuna...?" professor McGonagall isussuppoq.

"Aap," Dumbledore oqarpoq. "Qileroqartuartussaavoq."

"Qanoq iliuuseqarfigisinnaanngiliuk, Dumbledore?"

"Taamaaliorsinnaasuugaluarumaluunniit taamaaliorna-vianngilanga. Qileqqut iluaqutaalluarsinnaapput. Uanga nammineq seeqquma saamerliup qulaatigut qileroqarpunga, tassaavorlu Londonimi nunap iluatigut qimuttuitsut acqu-taasa assingat. "Ajunngilaq uannut tunniutiinnaruk, Hagrid. Naammassipallanniartigu."

Dumbledorep Harry kissumissiuppaa ilaqutariillu Dursleykkut illuata tungaanut sangulluni.

"Inuull... inuulluaqqusinnaavara, professori?" Hagrid aperivoq. Niaqorsuani inuup nujuartap niaquatut isikkulik peqippaa Harrylu aparujussuarlugu. Taava qeqqippoq qim-mitullu ikilersimasutut nillerluni.

"Shhh," professor McGonagall kamappalulluni oqarpoq. "Mugglerit tamaasa itertilerpatit."

"U-u-utoqqatserpunga," Hagrid qiaatigaluni oqarpoq taavalu kakkissarfik toortarnilik ammuppaa kiinnilu taassuminnga asserlugu. "Kisianni ar-artu-artungajappara. Lily aamma James toqoreerput - Harrynguarlu nallinnartoq Mugglerini najugaqassalluni."

"Aap, tamanna nalunngilara. Tamanna alianaraluaqaaq kisiannili eqqissisariaqarputit, Hagrid. Taamaalinngikkuit takkuttoqariaannaavoq taavalu takuneqassaagut," professor McGonagall isussuppoq Hagridilu taliatigut sallaatsumik pattalaarlugu Dumbledorep nunamineq ivigalik aqqusaarlugu nummer 4-p matuanut ingerlaarnerani.

Mianersoqqissaarluni Harry matup alloriusaata sanianut ilivaa, allakkat uliguarsuarmi kaasarfianit ammullugit Harryllu tippiisa akornannut mangullugit. Taava ilaminut iterpoq. Minutsi ilivitsoq pingasuullutik nukappiaraq natup silataatungaaniittoq nakkuppaat. Hagridip tuii sajukulaarput, professor McGonagallip isai paatsiveerullutik uisorersarput Dumbledorellu isai sakkortugaluqisut erseqqarluttutut isikkoqalerput.

"Aah," Dumbledore kiisami oqarpoq, "tassa naammassivoq. Maaniittariaqarunnaarpugut. Ingerlaannarniarta nallittorsiortunullu peqataajartorluta."

"Aap," Hagrid nimaartumik nipeqarluni oqarpoq. "Uanga Siriusip motorcykilia utertinniarpara. Sinilluaritsi professor McGonagall aamma professor Dumbledore."

Hagridip motorcykilini ikkivigaa isinilu qullilisut atsipaa-minik tagiartorlugit. Motoori aallartippaa nipitoqisumillu sukkalisaarluni silaannarmut taaqisumut aallaruni.

"Takoqqissajunnarsivugut, professor McGonagall," Dumbledore oqarpoq sikiffigalugu. Professor McGonagall akilluni kakkippaq.

Dumbledore sanguvoq aggerfimminullu Ligustervæng-imut sangoriap tungaanut uterluni. Sangoriamut pigami unippoq Qamittaallu tigullugu. Ataasiarluni seqqortippaa taava aqqusernup qullii aqqaneq marluk tamarmik ikipput aqqusinerlu tamaat orangiamik qalipaatilimmik qaammar-tillugu. Maanna erseqqissumik qitsuk nimeruaartoq aqqu-vernup isuanut aanngartoq takusinnaavaa. Aamma ungaa-varaq normu 4-p saavani matup silataani majuartarfiit qullerpaartaanniittoq takoqqalaarsinnaavaa.

"Harry iluatsitsilluarniarna," qatimaluppoq. Sangulluni aallarpoq, uliguani nermuppaa qimagullunilu.

Suialaannguaq Ligustervængimi qilaap qernariip ataani orpikkat ungaluliat tulliiaarluarsimasut atuarlugit inger-laarpoq, soorlu tamaani silarsuarmi tupinnarnerpaamik pisoqassanngikkaluartoq. Harry Potter iternani tippimini assallappoq. Assaaqqaminik allakkat tigumiarpai eqqissillu-nilu sinilluni, nalulluinnarpaa immikkorluinnaq ittuunini, tusaamasaanini aammalu naluaa Dursleyp nuliata matu ammarlugu immuit puujaasat silamut ililerpagit nillianera-nik itertinneqarumaarluni... aamma naluaa ukiuni tulliuttu-ni naammagittarluni illorminit Dudleymit pituttorneqarta-rumaarluni ajanneqartarumaarlunilu. Ilisimasinnaanngilaa massakkorpiaq inuit nuna tamakkerlugu katersuummata nipikisaarlutik Harry Potter inuummersoqqullugu skåleer-tarlutik. "Harry Potter ataqqiniarlugu immiartukkavut nungunniartigit - nukappiaraq toqunneqarsinnaanngitsog pillugu."

Igalaaq tammartog

Ukiut qulingajaat qaangiupput aappariit Dursleykkut iter-mata jorngortillu matup silataani nassaaralugu; ukiulli taak-ku qaangiutereersimagaluartut Ligustervænget annertuneru-sumik allanngorsimanngilaq. Seqineq nuivoq naatsiivillu paarilluakkat taakkorpiaat qinngorfigalugit nummer 4-milu matup allagartaa messingiusoq qillarissisillugu. Ullaap qaarnanga inimut appakaappoq, ini allanngorsimanngilaq taamanikkut unnukkut Dursley tassani issiammat nutaarsiassanillu uppinnik eqqumiitsunik eqqartuisunik isiginnaarluni. Taamaallaat amusarissap qaavani assit takutippaat ukiut ingerlasimasut. Ukiut qulit matuma siorna amusarissap qaavaniissimagaluarput assit arlalissuit taakkulu takutissimavaat skumfiduserujussuartut isikkulik aappaluttoq qaquaartoq teqqialinnik assigiinningsunik nasalik - kisiannili Dudley Dursley maannakkut meeraaraajunnaarpoq, maannalu meeraaqqap assii ilaneqarsimapput nukappiaqqap perorsimasup qaamasullu assinginik, ilaat marlunnik assakaasulimmik cykilerluni assingi, ilaat karrusselerluni assingi, ataatani computerimik spilleqatigalugu assingi ilaallu anaanaminit pakkunneqarluni kuninneqarlunilu assingi. Aamma takuneqarsinnaanngilaq illumi nukappiaqqamik allamik najugaqartoqartoq. Kisianni Harry Potter suli illumi najugaqarpoq.

Massakkorpiaq siniffimmini sinippoq iternissaalu aanara-laarsuanngorpoq. Ajaa Petunia eqqumavoq nipaalu qataaja-qisoq ullaakkut nipit akornusersuisut siullersaraat.

"Makigit! Makinniarit! Massakkorpiaq!"

Harry qisuariarluni iterpoq. Ajaa matukkut kasuttoqqip-poq.

"Massakkut makigit!" Qataajaqivoq. Harryp tusaasinnaa-vaa igaffimmut iserpallattoq, taavalu siatsiviup kissarsuum-mut ilerpallannerata nipaa tagiuppallanneq tusaavaa.

Assallappoq sinnattunilu eqqaaniarsaralugu. Sinnattua sin-nattut nuannersut ilagisimavaat. Silaannakkut motorcykiler-luni sinnattorsimavoq. Soorluuna siornatigut arlaleriaqaluni sinnattorisareeraa.

Maanna ajaa matup silataanut peqqippoq.

"Makereerpit?" aperivoq.

Aap, piariingajalerpunga," akivoq.

"Taavami tuaviulaarniarit. Siatsivimmi baconeqarpoq taakkulu nakkutigilaarniakkit. Sissuissavatit ilittooginapput, tusaavit? Suut tamarmik ajunnginnerpaamik ingerlassapput tassami Dudley inuuissiormat."

Harry anersaamivoq.

"Qanoq oqarpit?" Ajaa kamalluni aperaaq.

"Oqanngilanga, oqanngilanga..."

Dudleyp inuuia - qanoq ililluni puorsimasinnaavaa?

Harry kigaatsunnguamik siniffimminiut aqqarpoq alersinilu ujalerlugit. Siniffiup ataani nassaarai atillugillu aasiak alersip iluaniit peeqqaariarlugu. Harryp aasiaat sungiusimavai, tas-sami majuartarfiit ataanni inimi toqqorsivimmi tamakkor-passuaqarmat, tassanimi sinittarami.

Atisalersoreerami torsuusaq aqqusaarlugu igaffimmukar-poq. Nerrivik Dudleyp tunissutisiassarpassuisa ataanni ersi-

gunnaangajassimavoq. Takusinnaavaa Dudleyp kissaatigi-sani computeri nutaaq tunissutisariissagaa aamma TV nutaaq, puiornagulu cykili sukkaniulluni atortagaq nutaa-vik. Sooq Dudley cykilimik sukkaniulluni atortakkamik kissaateqarsimanersoq Harryp paasisinnaanngilaa. Dudley pualasuujuvoq timersornissanilu nuannarinngivippaa - taamaallaat "timersortarpoq" meeraqatimi arlaat ajattaraangamigit annersikkaangamigillu. Harry Dudleymut tilluutitut atortarpoq, tassa tigusarineqaraangami aatsaat. Naak tamanna toqqaannartumik takuneqarsinnaanngikkaluartoq Harry sukkasoorujussuarmik arpallaqqissorujussuavoq.

Immaqa tamanna pissuteqarpoq inimi tamalaanik toq-qortaasivimmi taartumi ineqarneranik, kisianni Harry miki-suujuaannarsimavoq. Aamma piviusumit mikinerusutut alunnerusutullu isikkoqartarpoq Dudleyp atisakui ator-aannartariaqaramigit. Dudley illuminiit sisamariaammik anneruvoq. Harry kiinaqarpoq sallukujuumik, qernertunik nujaqarluni qaammarissunillu qorsunnik qalipaatilinnik iseqarluni. Taassuma saniatigut seeqqoqarpoq saanertuunik. Ammallorissunik isaruaqarpoq mattutissiamik nipittartumik nipitissimasunik. Dudleyp qinngamigut tillukkaangani isaruai aserortarsimagamik. Harryp imminermini nuannarisatuaa tassaavoq qaamigut qileruni amitsoq. Taanna innaallannertut nunamut tututut tassa kallerup inneratut isikkoqarpoq. Eqqaamasinnaasani tamaat qilerorisimavaa; ajanilu Petunia apereqqaarsinnaaleramiuk apeqqutaa siulleq tassavoq qanoq ililluni qileroq taanna pinngorsimanersoq.

"Biilip ajunaarnerani angajoqqaatit toqummata," akivaa. "Apeqqutunik taamaattunik apeqqutilliusassanngilatit."

Apeqqutilliinak - tassalu malittarisassaq siulleq ilaqtariit Dursleykkut inuuneranni nipaatumu.

Harryp puulukimineq bacon siatsivimmi mumileruttoraakkaa Vernon iggavimmut iserpoq.

"Illaarniarit," ullaakkut kamappalulluni taama ilassivaa.

Sapaatip akunneranut ataasiarluni akkaa Vernon aviisi atuakkani qulaallugu isigaluni suaartarpoq Harry nujaajaa-sumut kipiitikkiartortariaqartoq. Harry klassimini nukappia-raqatiminut allanut naleqqiulluni nujaajartikulaarneruvoq, kisianni nujaajartikkaluaraangalluunniit iluaqutaaneq ajorpoq. Nujai sukkasoorujussuarmik illaagassaanatik naaqqit-tarput.

Harry manninnik siatsileruttortoq Dudley anaanani ilagalugu igaffimmut iserpoq. Dudleyp ataatani assingaa-tsiaarpaa. Kiinaqarpoq silitumik aappaluttoq qaquaartumik, qungaseqanngingajalluni, mikisunik tungujortoq qaamasu-nik iseqarluni, qaamasunik torsusuunik nujaqarluni niaqua-ni ammalortumi illaarluarsimasunik. Aja Petunia akulikitsu-mik oqartarpoq Dudleyp qalipaasorsuup Rafaelip inngililii assigigai. Harryli isumaqarpoq Dudleyp puuluki nujaasalik assignerugaa.

Harryp puuguttat baconimik manninnillu siatanik imallit nerrivimmut inissippai. Tamanna ajornanngitsuinnaanngi-laq, tassami soorlu naluneqanngereersutut tunissutissat ner-riviup qaani sumi tamaaniipput. Dudley tunissutisiassani kisillugit ulappusersimavoq isikkualu kigaatsunnguamik nuannaarpasikkunnaarpoq.

"36-t," oqarpoq, angajoqqaanilu avoqqaarerpalullugit isi-galugit. "Siornamut naleqqiullugit marlunnik ikinnerupput."

"Asasara, aja Marthap tunissutaa ilanngutinngilat. Takuuk, anaanamit ataatamillu poortugarsiassavit angisuup ataaniippoq."

"Aap, taavami oqaannarta 37-usut," Dudley oqarpoq.

Kiinaa aappillilivissimavoq. Harryp takusinnaavaa Dudley tusaamasaassutsiminik kamakkiartuaartoq. Tuaviørnerpaamilu nerisassani neripallappai Dudleyp nerri-vik uppiteqinammagu.

Aja Petuniap ulorianartorsioqqajaaneq malugilluarsinnaa-gamiuk tuaviinnaq oqarpoq. "Aamma eqqarsaatigaarput ullumi illoqarfiliablerutta tunissutissanik sulì marlunnik pisin-iarluta. Tamanna qanoq isumaqarfigaajuk, asak? Tunissutissat allat marluk. Ajorissanngiliuk?"

Dudley sivikitsumik eqqarsarpoq. Eqqarsarneq taassu-munnga imaannaanngitsorujussuuvoq. Kiisami kigaatsumik oqarpoq. "Taavami syvogtrediveniit amerlanerusunik peqa-lissaanga, eeh, takulaariarlara, ima amerlatigilissapput..."

"39-t, asasara," aja Petunia oqarpoq.

"Aah," Dudley imminut oqimaagerpasilluni ingippoq unissutisiassanilu qaninneq tigullugu. "Taavami ajunngi-laq."

Akkaa Vernon nuannaarluni illarpoq.

"Inupiluaqqap piumasami pinissaa isumagiuarpaa. Soorlu ataataa aamma taamaattoq. Nukappiaratsialaavutit, Dudley!" Dudley ikinngutinnerpaluttumik nujai aalaterpai.

Taamalisorlu telefoni sianerpoq aja Petunialu nikuippoq telefoni tiguartorlugu, akkaa Vernon Harrylu Dudleyp ammarterinerani isiginnaartut. Cykili sukkaniunnermi ator-tagaa, videoliuut, timmisartuaraq ungasianiit aqullugu tim-misittagaq, computerspillit 16-it allarpassuillu Dudleyp tunissutisiarisimavai. Nalunaaqutaaqqap kuultip puuata poortuutaa pappiaraq aserorterlugu puiaaleruttortoq aja Petunia telefonikkut oqaluussisimalluni uterpoq. Kamappallunilu isumatsassimarpaluppoq.

"Nuanniitsunik nutaarsiassaqaarpunga, Vernon," oqarpoq.

"Fru Figgip nissuni napolisimavaa. Paarisinnaanngilaa."

Harryp tungaanut ussersorpoq.

Dudleyp ugguarpalulluni qarngi ammarpaa, kisianni Harry eqqissiallappoq. Ukiut tamaasa Dudley inuuissioraangat angajoqqaavisa Dudley ikinngutaasalu ilaat ulloq naallugu angalaaqatigisarpaat. Nuannaariartarfik pinguaaterpasualik neriniartarfillu hamburgerisortarfik ornittarpaat filme-riartarlutillu. Ukiut tamaviisa Harry arnamut utoqqarmut taassumunnga paatsiveqanngitsumut qanittumiittumut qimattarpaat. Harryp tassaniinnissani nuannarinngivittarpaa. Illu tamarmi qalatanik qungulersunnittarpoq fru Figgillu Harry pinngitsaalillugu qitsuutimi assinginik isigin-naartittarpaa.

"Taavami qanoq iliussaagut?" Aja Petunia oqarpoq Harrylu mersernarpasilluni isigalugu, soorlu pasipilullugu ajutoornertik taassuma piliarisimagaa. Harryp nalunngikkaluarpaa fru Figg nalligisariaqaraluarlugu, kisiannili tamanna ajornanngitsuinnaanngilaq, tassami nioq naffakoq pissutigalugu ukioq ilivitsoq utaqqisariaqassaaq Tibbyp, Snehvidep, hr. Poteprinsip Pjuskillu assinginik isiginnaarnissaminut.

"Immaqa Marthamut sianersinnaavugut," akkaa Vernon nangaarpaluttunnguamik siunnersuuteqarpoq.

"Tamanna iluaqutaanavianngilaq. Marthap nukappiaraq akaarinngivippaa."

Ilaqutariinni Dursleykkunni Harry eqqartorneqartarpoq soorlu akornanniinngitsutut - imaluunniit sorpajuttut oqaluserisaminnik paasinnissinnaanngitsutut, soorlu siuteqqutut assigisaattulluunniit.

""Soormi qanormaanna-ateqarpa, ikinngutit - Yvonne attavigigutsigu?"

"Mallorcaliarnikuuvoq," aja Petunia kamalluni akivoq.

"Kisimiissinnaalluaraluarpunga. Iissi ingerlaannaritsi," Harry isumalluarpasilluni oqarpoq (taava periarfissaqalissagaluarpoq fjernsynikkut sumilluunniit isiginnaarnissaminut imaluunniit Dudleyp computerianik atuinnissaminut).

Aja Petunia allaanngivippoq citronimik ilivitsumik iiseq-qammersoq.

"Taava illu uterfigissagaluarparput sequmissimasoq?" Qatimaappoq.

"Illup qartinnissaa sinnattorisinnaanngilaraluunniit." Harry oqarpoq, kisiannili soqutigineqanngilaq.

"Immaqa uumasuusivissuarmut ilagisinnaagaluarparput," aja Petunia kigaatsunnguamik oqarpoq, "biilimiitiinnarlugulu...."

"Biili nutaaviuvoq. Kisimiilluni biilimiissanngilaq nakkutigineqarani."

Dudley nipitoorsuarmik qissaserpoq. Eqqornerusoq unaavoq; qiasuusaarpoq, ukiorpassuit qaangiuppulli iluamik qiammat, kisianni nalunngilaa anaanami piumasaminik sunik tamanik tunissagaani kiinni iloqissiortillugu nillia-leruni.

"Asasaaranngua, qiassanngilatit. Inuuissiornerit anaa-nap nukappiaqqamut pinniitsumut aserortinnavianngilaa!" Uippallerluni nilliavoq tallinilu tamanut tamaanga siaartil-lugit ussersorluni.

"Uanga.... ilaa -nissaa kissaa-ti-ginngi-lara!" Dudley manittortuusaarluni nilliavoq. "Su-ut ta-maa-sa a-se-rortar-pai!" Allanit takuneqartinnani Harryp tungaanut nuannaa-pilulluni kiinarsorpoq.

Maanna matukkut sianertoqarpoq. "Aah, eqqanaralut-tuaq. Tassa takkutereerput!" Aja Petunia uippallerluni oqar-poq. Aammami tamanna ilumoorpoq. Sivitsorianngitsoq

Dudleyp kammaginerpaasaa Perry Polkiss anaanani aapparalugu igaffimmeeriikatappoq. Perry nukappiaraavooq sallukujooq teriarsuup kiinaata assinganik kiinalik. Dudleyp nukappiaqqat tillualeraangagit talii tunuinut pisillugit najummisarpai. Dudley ingerlaannaq qiasuusaarunnaarpoq.

Akunnerup affaa qaangiummat Harry iluatsitsinini upperpiarsinnaanagu ilaqutariit Dursleykkut biiliisa issiaviini tunorlarni issiavoq inuunermini siullerpaamik uumasuuvissuarmukarluni. Ajaa akkaavalu periarfissamik allamik pitsaanerusumik nassaarsimasinnaanngillat, aallartinnatilli akkaa Vernonip Harry eqqaminut pisillugu oqarfigaa.

"Mianersoqqussavakkit," oqarpoq kiinnilu angisooq aappillersimasooq Harrymut qanillisivillugu.

"Mianersoqqussavakkit nukappiaraq-aa.

Nukappiarapiluusaaruit, sunnguamilluunniit ilioruit maanamiiit juullip tungaanut inimi toqqorsivimmiissaatit."

"Sunavianngilanga," Harry oqarpoq, "ilumoorlunga oqassaanga..."

Kisiannili akkaa Vernonip Harryp oqaasii uppererpasingilai. Kimilluunniit upperineqanngisaannarpoq.

Eqqumiitsoq unaavooq Harryp eqqaani eqqumiitsunik pisoqakulammat, ilaqutariillu Dursleykkut Harry tamakku-nunnga pisuussuteqanngitsoq oqaluttuutissallugit iluaqutaanngilaq.

Ilaanni aja Petuniap qatsutivissimavaa Harry nujalerisumiit angerlaraangat nujaajartissimaneranik takuneqarsinnaasannginnera. Qiuut igaffimmiittoq tiguaa nujaalu ima naatsigisumik killorlugit nujaarutivillugu allaat.

Taamaallaat siuani nujai attunngilai qilerupalaava isertorniarlugu. Dudleyp Harryp nikanarsagaanera quiasuutigeqaa. Harry siniffimmini nalalluni sinissaarulluni annilaangalluni

eqqarsaatigisariaqarsimavaa atuarfimmi atuaqatimi takup-
panni qanoq oqassanersut. Angigisaminik atisaqarnini isa-
russanilu nipittartunik nipititat pissutigalugit illaruaatigine-
qareerpoq. Aqaguanili ullaakkut iterami tarrarssuutikkullu
imminut takugami nuannaarutigeqisaanik nujai tukattut
takisuut naaqqereersimapput. Aja Petuniap qiuussuarnik
nujaajanngikkallarmanili isikkuni ateqqissimavaa. Tamanna
pissutigalugu ineeqqami toqqorsivimmi sapaatip akunnera-
ni ilivitsumi parnaarunneqarsimavoq, naak nassuiarniarsa-
rigaluaraa nutsami naaqqinneri nammineq qanoq iliuuse-
qarfigisinnaanagit.

Ulloq alla aja Petuniap tujuuluk kusanaaqisoq atitinniar-
sarisimagaluarpaa (Dudleyp tujuulukua kajortoq orangia-
nik angisuunik toornilik). Atitinniarlugu tamaviaaleralut-
tuinnarnerani tujuuluk milliartuinnarpoq. Naggataatigut
ima eqitsigaaq allaat inuusap tujuuluatut atsigilerluni.
Allatut ajornartumik aja Petunia nassuertariaqarpoq
Harrymut pinngitsaaliilluni atitissallugu iluaqutaanngitsoq.
Taamatut pisoqarmat Harryp tuppalliutigeqisaanik pillarne-
qanngilaq.

Akerlianik sakkortuumik pineqarpoq ullut arlaanni atu-
arfiup igaffiata qalianiilluni naammattoorneqarami.
Dudleyp kammalaatipalaavisalu pisarnermittut malersorsi-
mavaat. Naggataatigut tupaallaatigeqisaanik illup qaliani
pujoorfiup sanianut periataarpoq. Aappariit Dursleykkut
atuarfiup pisortaanit naammagittaalliummik allagarsipput.
Allassimavorlu Harry atuarfiup qalianut qallorsimasog.

Kisiannili malersortini qimarratiginiarsarisimavai (soorlu
akkaa Vernonimut ineeqqap toqqorsiviup matuaniit silam-
mut taama suaartartoq) atuarfiup igaffiata matuata silataani
eqqaaviit tunuinut toqqorluni. Harry allamik nassuiaatissa-

qanngilaq oqarami pissinnermini anoraasuap illup qaavanut tingissimassagaani.

Ullumili ajortumik pisoqassanngilaq. Suut tamaasa eqqarsaatigissagaanni Dudley Perryllu ulloq naallugu ilaginissaat allamit pitsaaneruvoq. Tassami atuariartussanngilaq, ineeqqami toqqorsivimmiinnani imaluunniit fru Figgisipinaani qungulersunnitsumiinnani.

Akkaa Vernon biilertilluni aja Petuniamut massuavoq. Suut tamaasa massuaatigissallugit nuannaraa. Qillerusiorfimmi suleqatini, Harry, naalakkersuisut, Harry, aningaaserivik aamma Harry eqqartugannaarivai. Ullaaq mannali motorcykilit eqqartorpai.

"...nipiliortorsuullutik silanngajaarlutik takkuttarput, inuusuttupiluit taakku," oqarpoq motorcykilertumit qaangerneqariaramik.

"Motorcykilimik sinnattorama," Harry oqarpoq sinnattoriartakkani eqqaalerlugu, "timmisinnaasoq."

Akkaa Vernonip biili tungiminnut aqqusernup illuatu-ngaatigut ingerlasoq apungajavippaa. Issiavimmini sangual-lappoq rupiïarujussuartullu kakkivissamigut umilittut isikkoqalerluni nilliasorsuuvoq. "MOTORCYKILIT TIMMISINNAANGILLAT."

Dudley Perrylu illakulupput.

"Nalunngivippara," Harry oqarpoq. "Sinnattuinnaavoq."

Kisianni oqaaseqarnini peqqissimissutigaa. Ilaqutariit Dursleykkut nunannarinngisaannut ilaavoq Harryp pissu-sissamisuunngitsunik eqqartuisarnera soorlu motorcykilinik timmisinnaasunik, soqutiginnigilaallu sinnattumi filmi-ni luunniit titartakkani pisimasuusutut oqaluttuarigaluarpagit. Tamanna sunik tamanik apersuutigisartagaanut naleqqiul-lugu ajornerujussuuvoq. Akkaava ajaalu isumaqarput nia-

qua eqqarsaaterpassuarnik ulorianartunik ulikkaartoq.

Ulloq taanna arfininngornermi seqinnarissuuvoq ilaquta-
riippassuillu uumasuuvissuarmiipput. Aappariit
Dursleykkut Dudley Perrylu isaarissap eqqannguani siku-
nik angisuunik sukkulaamik qallikkanik pitsippaat.

Sikuerniap arnap qungujulalluni Harry aamma aperaa
sutorusunnersoq. Sikuerniarfiup sanianiit piaartumik qima-
gutitinneqarsimanngimmat akkaavata ajaatalu allatut ajor-
nartumik sikumik pitsittariaqarpaat. Sikuerniarfiup sikuu-
taanik akikinnerpaamik pitsippaat. Tamanna ajorpiangi-
laq, Harry isumaliorpoq sikulu aluttorpaa gorilla niaqqumi-
gut kumittoq isiginnaajutigalugu. Isumaliorpoq Dudleymut
assingusorujussuusooq taamaallaat Dudleyp qaamasunik
nujaqarnera eqqaassanngikkaanni.

Qangarsuarli Harry taama ullaatungaani nuannertigisu-
mik misigisaqarpoq. Ilami qanillivallaannginnissaat mianer-
suutigaa, Dudleyp Perryllu qatsussilersutut isikkoqartut
pinnguaatertik nuannaringaagartik tassa imminerminik
malersuineq naalliutsitsinerlu aallartinnginniassammassuk.
Naatsiivissuup neriniartarfiani ullo-qeqqasiorput, Dudleylu
pølsitukkani kartoffelsalatitukkanilu annikigalugit kamale-
qimmat Dudleyp nerisassaralui sinnikut Harryp nerivai,
akkaa Vernonillu Dudley nerisassaanik allanik amerlaner-
nik pitsippaa.

Harryp kingorna eqqarsaatiga suut tamarmik ingerlallu-
arpallaarnerat siumut takorlooreersimasariaqaraluarlugu.

Nerereeramik uumasut paarmortut illuannut iserput.
Taqqamani nillataarpoq taarlunilu; uumasullu inaat igalaa-
nik assersimasut immikkoortiterput. Igalaat tunuanni sisa-
mavillit pulateriaarsuillu assigiinngitsorpassuit avalequteeq-
qat ujaraaqqallu qulaallugit ingerlasut takusinnaavaat.

Dudley Perryllu pulateriaarsussuit isaruaasallit toqunartul-
lit pulateriaarsuillu allat nukittuut silittullu pythonslangit
takorusuppaat. Dudley erninnaq illumi pulateriaarsuit
annersaat nassaaraa. Taanna akkaa Vernonip biiliinut mar-
loriarluni nermussinnaagaluarpog imalu singartitertigalugu
allaat eqqaavimmi spandimüssinnaalersillugu - kisianni
massakkorpiaq taamaaliornissaminut piumassuseqarpasin-
ngilaq sinikkami.

Dudley nikorfavoq qinngani igalaarsuarmut tutsillugu
pulateriaarsuup tattai kajortut qillarissut nakkullugit.

"Aalariartiguk!" Ataatani kappialalluni qinnuvigaa.
Akkaa Vernonip igalaaq kasuttorpaa, kisiannili pulateriaar-
suk aalariaallanngilarluunniit.

"Aammalu!" Dudley naalakkiivoq. Akkaa Vernon sak-
kortunerulaartumik kasuttoqqippog, kisiannili pulateriaar-
suk siniinnarpoq.

"Manna qasunaq," Dudley oqarpoq ingerlaqqillunilu.

Harry igalaap saanut qeqqippog pulateriaarsullu isigillua-
lerlugu. Tupigissanngilaa pulateriaarsuk avaangusunner-
mik uppilluni toqusimappat. Allanik ilassaqaanngilaq taa-
maallaat inuit sianiitsut igalaamik kasuttortut ullorlu naal-
lugu akornusersuisut. Maani ineqarneq ineeqqami toqqor-
sivimmi ineqarnermit ajornerussaqaq. Ineeqqami toqqorsi-
vimmi aja Petunia kisimi akornusersuisinnaasarpoq matu
kasuttoraangamiuk; aammami illup sinnerani angalaarsin-
naatitaavoq.

Pulateriaarsuup isini qernertut sapanngatut isikkullit
ammariataarpai. Kigaatsumik, kigaatsuararsuarmik niaqqi
kivippaa isimi Harryp isaanut naligülemmissaasa tungaanut.

Isiminik qamitsiffigaa.

Harry tupigutsappog. Taava tunummut qiviarpoq mar-

serneqarsoraluni. Isigineqanngilaq. Taava pulateriaarsuk qiviarpaa akiniarlugulu isiminik qamitsiffigalugu.

Pulateriaarsuk akkaa Vernonip Dudleyllu tungaannut ileqilariarpoq, isinilu qilaamut saatillugit paasinartorujussuarmik. Allaanngilaq Harry oqaluttuunniaraa akkaa Vernonip Dudleyllu pissusilersornerat qatsullugu.

"Nalunngeqaara," Harry tusarsaanngingajattumik oqarpoq, naak qularigaluarlugu pulateriaarsuup tusaasinnaagaa-ni. "Paasisinnaalluarpakkit qasunarsorigukkit."

Pulateriaarsuk niaqquminik sikisaarpoq.

"Suminngaanneerpit?" Harry aperivoq.

Pulateriaarsuk pamiuminik igalaami allagartaaqqap tungaanut ussersorpoq. Harryp allagartaq atuarpaa..

Boa Constrictor, Brasilia.

"Brasilia nuannerpa?"

Boap allagartaq tikkuuqqippaa Harrylu atuaqqippoq.

Pulateriaarsuk una uumasuusivissuarmi inunngorpoq.

"Aah, sunaaffa taamaappoq. Tassa

Brasiliamüissimanngisaannarpit?"

Pulateriaarsuup niaqqi ileqimisaartuleraalu Harryp tunuaniit nipitoorsuarmik suaartartoqarpoq pulateriaarsuk Harrylu tupatsillugit: "DUDLEY! QAAGIT PULATERIAARSUK TAKUUK! QAAGIT TAKUUK SULERNERSOQ!"

Dudleyp sukkasinnaanini tamaat Harryp pulateriaarsuullu tungaannut ingerlavoq.

"Illuarit," oqarpoq Harrylu najungasuisigut toorujussuarlugu. Harry tupaallangaarami natermut manngertumut betoniusumut orluvoq. Pisut tulliit sukkangaarmata kialluunniit iluamik takunngilaa qanoq pisoqarnersoq. Siullermik Perry Dudleylu igalaamut iigarlutik nikorfapput

kinguninnguutigullu annilaanganermik nipitoorsuarmik nil-
liallutik tunummut pissillutik.

Harry anertikkarluni nikuippoq; pulateriarsuup inaata
igalaava peqanngilaq. Pulateriarsuup silarsuullu avataaniit-
tut akornanni igalaaverussimavoq. Pulateriaarsuk angisoor-
suaq natikkut sukkaqisumik nimeruaarpoq pulateriaarsuul-
lu illuaniittut inuit tatammupput anisarfinnukaallutillu.

Pulateriaarsuup sukkaqaluni sanioqqummani Harryp
uppernarsaatigisinnaasoraa nipaatumik seersaartumik nipi-
mik imaattumik tusaalluni: "Brasilia, aggerpunga...qujanar-
suaq, amigo."

Pulateriaarsuit inaanni uumasunik paarsisoq annilaaru-
jussuarsimavoq.

"Naammi igalaq?" Arlaleriaqaluni utertarpaa, "naak iga-
laaq?"

Uumasuusivissuup pisortaata aja Petunia utoqqatserfige-
qattaarlugu tiimik uunaqisumik sukkulimmik sassaallerfi-
gaa. Perry Dudleypa paasissaanngitsumik paatsiveqanngit-
sumillu imminnut qalliinnarlutik oqalunniarsaripput.
Harryp takusinnaasai naapertorlugit pulateriaarsuk allamik
iliorsimanngilaq sanioqqukkamigit pinnguarpalulluni si-
ngernii keertiartuusaarlugit. Kisiannili tamarmik akkaa
Vernonip biiliinut ilaallutik angerlarmata oqaluttuaq allaal-
luinnarpoq. Pulateriaarsuup Dudleyp niuata illua tamaat
kiillugu katatsingajassimavaa Perryly oqarpoq pulateriaar-
suup qimilluni toqoriarsimagaani. Ajornerpaavorli Perry
ima eqqissitigimmat oqarsinnaanngorlunilu: "Harryp oqa-
loqatigaa, ilaa Harry?"

Akkaa Vernon utaqqivoq Perryyp aninissaata tungaanut.
Aneriarmat Harry saassuppaa. Ima kamatsigaaq allaat
oqarsinnaajunnaaraluarluni. Pilluni pilluni taamaallaat ima

oqarsinnaalerpoq: "Ingerlagit - toqqorsivimmut - tassani-
ginnassaatit - unnukkorsiussanngilatit." Taama oqarlunilu
issiavimmut aqullaarpoq aja Petuniallu tuaviinnaq cognacis-
saanik angisuumik aalliuppaa.

Kingusinnerujussuakut Harryp toqqorsivimmi taartumi
kisimiilerami kissaatigingaaraluarpaa nalunaaqutaaraqarsi-
manissani. Naluaa qassinngornersoq, taamaattumillu ilisi-
masinnaanngilaa ilani illumi sinittut. Sinilersinnagimmi
taqissorluni igaffimmukarsinnaanngilaaq neriartorluni.

Ilaqutariit Dursleykkunni ukiuni qulingajanni najugaqar-
simavoq. Ukiut qulit naalliunnartut ajortullu. Qaatukkamili
najugaqarfigilersimavai, naalungiarsuugallaramili angajoq-
qaani biilerlutik ajunaarmatali. Angajoqqaani ajunaarmata
biilimiinnini eqqaamanngilaa. Ilaannikkut eqqaaniarsua-
taartaraluarpaa akunnerpassuit kiserliorluni toqqorsivim-
miilerangami, taamaallaalli eqqumiitsunik eqqaatsiagaqar-
tarpoq. Innaallanneq qorsummik qalipaaticilik sakkortoqisoq
qaamigullu uuneq annernaqisoq. Ajunaarnerusimassaaq,
eqqarsarpoq, naak nassuiaruminaakkaluartoq qaamaneq
qorsuk suminngaanneersuusimassanersoq. Angajoqqaani
eqqaamasaqarfiginngivippai. Akkaavata ajaatalu angajoq-
qaavi eqqartunngisaannarpaat Harrylu piumaffigineqarpoq
eqqartussanngikkai. Assinginik illumiittoqanngilaq.

Mikinerugallarami Harryp sinnattoriuarsimavaa eqqarli-
mi nalusami ilaat aalluni tikiutissasoq, tamannali pisiman-
ngisaannarpoq. Ilaqutariit Dursleykkut tassa ilaqutatuari-
vai. Kisiannili maluginiartarpaa aqqusinermi takornartat
ilaannikkooriarlutik ilisarisaraanni. Aamma ilisarinnittut
tassaajuarput inuit eqqumiilluinnartut. Ilaanni aja Petunialu
Dudleylu pisiniaqatigalugit inuaraarakasiip portusuumik
tunguusaasamik nasallip ilassisimavaa sikiffigalugulu. Aja

Petuniap kamattorsuulluni Harry aperaa angut ilisarisisim-
neraa taavalu nukappiaqqat niivertarfimmiit annippai pisi-
niaqqaannguarani. Ilaanni bussimut ikiltermat arnap utoq-
qaap arnaqquassaatur isikkullip qorsuinnavinnik atisallip
nuannaarluni aalateriffigaa. Angutip nujaqanngitsup taki-
soorujussuarmik aappaluttumik kavaajallip ilaanni ornissi-
mavaa assamminillu eqillugu oqaranilu ingerlaqqilluni.
Inuit eqqumiitsut taakku tupinnaqutigaat silaannarmut
tammartaramik Harryp ilisarineruniarlugit arpalluni ornik-
kaangatik.

Atuarfimmi Harry isertukkaminik oqaloqatissaqanngilaq
ikinnguteqaranilu. Tamarmik nalunngilaat Dudleyp inupi-
luaraataasa Harry Potter eqqumiitsoq angigisaminik atisa-
lik aseqqukunillu isarualik uumissugarigaat. Kinaluunniit
Dudleyp inupiluaraataasa iliuuserisaannut akuliukkumana-
vianngilaq.

Allakkat eqqumiitsut

Pulateriaarsuup Boa Constrictorip qimaanera Harryp sivi-sunerpaamik pillagaaneranik kinguneqarpoq. Pilluni pilluni toqqorsivimmiit aniguimmat aasaanerani meeqqat atuangingiffeqarnerat aallartereersimavoq Dudleyllu videoliuutini aseroreersimavaa, timmisartuaraatitaani ungasianiit aquttazaq sequmereersimallugu cykililu sukkaniuut misileqqaaraniuk arnaq utoqqaq fru Figg ajaappiarluni aqqusinikkut ikaariartoq aporsimallugu.

Harryp ukiup atuariup naammassinera nuannaarutigaa, ajoraluartumilli Dudleyp inupiluutaasa eqqissittisinaanngilaat. Taakku ullut tamaviisa pulaartarput. Perry, Dennis, Malcolm Gordonilu tamarmik angisoorsuupput sianeeqalutillu; kisiannili Dudley soorunalimi ittorivaat anginerpaallunilu sianiinnersaammat. Tamarmillu Dudleyp nuannarilluagaa iluareqaat, tassalu Harrymik malersuineq.

Tamanna pissutigalugu Harryp piffissami ilarujussua Dursleykkut illuata ungaseqisaaniittarpoq. Ungassissumut angalaarujootarpoq eqqarsaatigalugu atuangingiffik naappat qanoq pisoqassanersoq. Siunissaq neriuuteqarfigilaarpaa, tassami septembarimi Dudleylu atuarifimmut nutaamut nuuttussaapput. Dudley akkaa Vernonip atuarifikuanut atuarifimmut, Smeltingsimut, Perry Polkissip aamma atuarifigi-

saanut nuuttussaavoq. Harry Stonewall Highimi kommunep atuarfianut nuuttussaavoq. Tamanna Dudleyp quiagiluinnaarpaa.

"Atuanngiffiup kingorna ullormi atuarfimmi siullermi Stonewallimi atuartut nutaat anartarfimmut pissunneqartarput niaquilu anartarfiup iluanut misunneqartarlutik," Dudleyp Harry oqaluttuuppaa. "Majuaqatigalunga sungiusarlutit misilikkusunngiliuk?"

"Qujaannarpunga," Harry oqarpoq.

"Anartarfinnguakkuluk illit niaqqunnik taama maajunnartigisumik misutsiffigineqarnissani misilinnikuunngilaa - taamaaliorutta aseruinnassavarput." Taama oqarlunilu Harry qimaavoq Dudleyp ajualatsinneqarnini sulii paasinngikkaa.

Ilaanni juuli qaammataagaa aja Petuniap Dudley Londoniliaappaa Smeltingsimi atuartut uniformiannik pisiniullugu. Harry fru Figgimut qimanneqarpoq. Arnaq taanna pisarnertut ajortiginngilaq, tassami amatooq qitsuitimi ilaannut naalluni niuuarsimavoq. Tamanna pissutigalugu pisarnermisut qitsuitini asavallaanngilai. Harry fjernsynimik isiginnaarnissaanut akueraa sukkulaamillu kagisortillugu. Kagisugaa allaanngivippoq ullorpassuarni uninngasimasooq.

Unnuk taanna Dudley atuarfimmi uniformitaani atorlugit tulluusimaarluni ingerlaarusaarpoq. Smeltingsimi atuartut nukappiaqqat aappaluttut kajortunik jakkeqarput, orangianik seeqqutik tikillugit qarleeraqarlutik saattukujunillu ivikkanik sanaanik nasaqarlutik boorsimaat nasaannik taaneqartartunik. Aamma atuarfiup ajaappiaanik ajaappiaqarput akerortuunik, atuartitsisutik isiginngikaangata imminnut anaartaatigisartakkaminnik. Anaartaanneq kingusinnerusukkut inuunermi unammillernissamut sungiu-

saatitut atorreqartartussatut isigineqartarpoq.

Akkaa Vernonip Dudley qiimmassimaarluni isiginnaarpaa qiasunngorpaluttumillu nipeqarluni nalunaarutigalugu pisoq taanna inuunermi usorsisimaarnarnersaasoq. Aja Petunia qissaserpoq oqarlunilu paasilluarsinnaanagu nammineq Dudleyutini angutinngorsimammat inuusuttoq kusanartoq. Harryp oqaaseqarnissani qunugaa. Malugaa allaanngivissoq najungasuni marlussuit napisimallugit illarusukkaluarluni nununermik.

Aqaguani Harry igaffimmut iserami tipersuaq naavaa. Allaanngivippoq tipi igaffimmi erruivimmiuttumi imiisivimminngaanneersoq. Ornippaa takuniarlugu sumik imaqarnersoq. Imiisiviup iluani imermi qaserujuttumi atisani ipertuut takuai.

"Suunuku?" Aja Petunia aperaa.

Petunia ipummerpoq, soorlu taama pisarteq Harry sapiiserluni aperigaangat.

"Atuarfimmi uniformissat nutaaq," akivoq.

Harry imiisivimmut aappassaa alakkaqqippoq.

"Åh," oqarpoq, "isumaqaraluarama taama masatsigissanngitsoq."

"Sianiitsuusaarunnaarniarit," aja Petunia qatimaluppoq, "Dudleyp atisakuisa ilaat misuppakka. Stonewallimi qaserunik atisaqartussaavusi. Uku naammassigukkit allat uniformiisulli kusanartigilissapput."

Harryp tamanna uppererpianngilaa, kisiannili nalunngilaa naammagittaallioraluaruni iluaqutaanavianngitsoq. Nerisariup issiavianut ingippoq eqqarsaatiginaveersaarlugulu Stonewall Highimut atuariatoqqaaruni qanoq isikkoqarnissani. Ilimanarluiinnarpoq nagguaatsup amiata nutaanngitsup atisaliarineqarsimasup assinganik atisaqartu-

tut isikkoqarnissaa.

Dudley akkaa Vernonilu igaffimmut iserput qinngatillu eqippaat Harryp atuarfimmi uniformissaata tikka naagamikku. Akkaa Vernonip pisarnermisut aviisi atualerpaa Dudleyllu ajaappiartaani Smeltingsimeersoq nerrivimmut nipitoqisumik anarruppaa. Ajaappiani pigisamisut nuannerperpaatut isigilereersimavaa.

Tusaavaat allakkat matumi allakkat nakkartitsisarfiatigut nakkartinneqarpaluttut.

"Allakkat aakkit, Dudley," akkaa Vernon aviisip tunuaaniit oqarpoq.

"Harryp aasinnaavai. Oqarit aalleqqullugu."

"Harry allakkat aakkit."

"Dudley oqarfiginiaruk nammineq aallersinnaasoq."

"Ajaappiannik anaaqiuk, Dudley."

Harry ajaappiamit anaaneqartinnani tuaviinnaq allakkanik aallerpoq. Allakkat pingasut matup iluatungaani allungiartorfimmiipput. Allakkat postkortit akkaa Vernonip qatanngutaanit maanna Isle of Wightimi feriatumit Marthamit, allakkat allat kajortumik puullit, akiligassanik imaqarunartut kiisalu - allakkat Harrymukartut.

Harry allakkat tiguai tupigutsaqalunilu nakkutilerlugit. Uummataa tasisaartutut angisuutut sajukulaarpoq. Inuutilluni allagarsisimanngisaannarpoq. Kiaana aamma taama pisimagaa? Ikinnguteqanngilaq ilaquataqaraniluunniit ilaquitariit Dursleykkut eqqarsaatigissanngikkaanni. Atuakkanik atorniartarfimmut atorniarnermut allagartaqanngilaq, taamaattumillu utertitsitseqqusilluni allagarsinngisaannarluni. Taamaakkaluartorli maanna allakkanik tigumiaqarpoq. Adressia ima erseqqitsigaaq kimut nassiuneqarnersoq paatsuugassaanani.

Hr. H. Potter
Tummeqqat ataanni toqqorsivimmi
Ligustervænget 4
Little Whinging
Surrey

Allakkat puussaataat pergamentimik silittumit (ameq allagassiaq) sungarpaluttumit sanaajuvoq, adressialu pilikkimik qorsummik allassimalluni. Frimærkeqanngilaq.

Harry assammunik sajuttunik allakkat puuat mumippaa takullugulu mumingani aappaluttumik naqitsiseqartoq. Naqitsimmut naqinneqarsimavoq ilisarnaat ataqqinarpasisoq: Liiveq, nattoralik, qappik pulateriaarsullu naqinnerup H-p avataannut inissinneqarsimasut.

"Tuaviormiarit nukappiaaraq!" Akkaa Vernon igaffimmiut suaarpaluppoq. "Sunaana utaqqiviuk? Misissorpiuk allakani qaartartoqarnersoq?" Quiasaarnini illaatigerpalluppa.

Harry igaffimmut uterpoq allagarsiani isigiarsinnarlugu. Allakkat akiligassartallit postkortilu akkaa Vernonimut tunniuppai, kigaatsunnguamik ingilluni allakkallu sungaartumik puullit ammarterlugit aallartillugit.

Akkaa Vernonip allakkat akiligassartallit ammapiloorpai, narrutsallunilu solummilluni taavalu postkorti atuallerlugu.

"Martha napparsimalersimavoq," aja Petunia oqaluttuuppaa. "Sapikkaminik nerisimagami..."

"Ataata!" Dudley oqariataarpoq. "Ataata, Harry allagarsisimavoq!"

Harry allakkat pertiterpai. Allakkat allakkat puussaata assinganik pergamentimik issusuumik sungaartumik sanaajupput. Akkaa Vernonip Harry allagarsiaanik arsaapiloorpaa.

Uangaana allagarsiakka!" Harry oqarpoq allagarsianilu tigoqqinniarsaralugit.

"Kia allaffigissagamisit?" Akkaa Vernon qatimaluppoq allakkallu atualerlugit. Kiinaata qalipaataa sukkasoorujus-suarmik allanngorarpoq aappaluttumiit qorsummut, soorlu-lu tamanna naammanngitsoq sekuntialunnguit ingerlaneranni kiinaa ima qarsortigaaq issingigassatut pisoqqatut issorsimasutut isikkoqalerluni allaat.

"P-P-Petunia!" Anertikkarpoq.

Dudleyp allakkat tigoriaraluarpai atuarniarlugit, kisianni-li akkaa Vernonip allakkat Dudleymut ingalassimatippai. Aja Petuniap allakkat alapernaappaseqaluni tiguai titarnerillu siulliit atuarlugit. Piffissap sivikitsuaqqap ingerlanerani allaanngivippoq inuuserlilersoq. Assammi illuanik toqqusaani tiguaa ipingajassimasutullu nipeqarluni nillerpoq.

"Vernon! Aah, eqqanaraluttuaq, Vernon!"

Imminnut isikkupput allaanngilarlu Dudley Harrylu eqqaminniittut puigorsimagaat. Dudleyp puiorneqarneq sungiusimannginnamiuk ataatani ajaappissaminik anaavaa.

"Uanga aamma allakkat atuarusuppakka," nipituuliorluni piumasaqarpoq.

"Uanga atuarusuppakka," Harry kamalluni oqarpoq, "Uangamiuna allagarsiakka."

"Anigitsi, marluullusi!" Akkaa Vernon nillerpoq allakkallu allakkap puussaannut ikillugit.

Harry uninngaannarpoq.

"ALLAKKAT QAAKKIT!" Nilliavoq.

"ANIGITSI!" Akkaa Vernon nipitoorsuarmik suaarpoq nukappiaqqallu marluutillugit pukusuisigut tigoriarlugit igaffimmiit anisillugit. Anisereeramigit igaffimmut matu matorluppaa. Harry Dudleylu matup matuersaaserfiatigut

alakkarterniarlutik erniinnaq nipaatumik paalerput.
Dudley ajugaavoq, Harrylu pallorpoq isarussani siutimi
illuani nivingasut matup ataanut siutini tutsillugu amma-
nikkut naalaarnialerluni.

"Vernon," aja Petunia nipini sajutsillugu oqarpoq, "aaju-
na qaatiguuliornera takuuk. Qanoq ilillutik nalunngilaat
sumi sinittarnersoq? Isumaqarpit illorput nakkutigisima-
gaat?"

"Nakkutigisimagaat - isertortukkut alapernaarsorsima-
gaat - imaluunniit malersorsimagaatigut," uia silaarutaasar-
luni kamaqaluni oqalorujuppoq.

"Qanormi iliussaagut, Vernon?" Allaffigissavagut oqarfi-
galugillu nuannarinngikkipput... "

Harryp akkaa Vernonip skuui qernertut qillersarluakkat
igaffiup naqqani uteqattaartut takusinnaavai.

"Naagga," nipangersimasinnarluni naggataatigut oqar-
poq.. "Naagga, soqutiginningsuusaaginnassavarput.
Akissutisinnikkunik... aap, tamanna pitsanerussaaq.... ili-
uuseqassanngilagut."

"Kisiannimi..."

"Taakku ilaannik maani ineqartitsinianngivippunga,
Petunia! Tigugatsigu neriorsuivugut tamakkuninnga uloria-
nartunik pisoqarnissaa pinngitsoortinniassallugu!"

Unnuk taanna akkaa Vernon sulereerluni angerlarmat
siornatigut iliuuserisimannngisaannakkaminik iliuuseqarpoq.
Harry toqqorsivimmu iserfigaa.

"Naak allagarsiassakka?" Akkaa Vernon matuklut nin-
neqisuklut pilluni pilluni putoqqummat aperaa. "Kiaana
allaffigigaanga?"

"Allaffigineqanngilatit. Allakkat kukkusumik ilinnut
atsiorneqarsimapput," akkaa Vernon oqarpoq. "Allakkat

ikuallappakka."

"Kukkusumik atsiorneqanngillat," Harry kamalluni oqarpoq, "toqqorsivimmut maanga aamma atsiorneqarsimapput."

"NIPANGERIT!" Akkaa Vernon nillerpoq aasiaallu marlussuit tupallutik qilaamiit nakkarput. Marlorialluni ilummut anersaarpoq kiinnanilu saamarpasinnerulersillugu; qungujunnissani ilungersuutigerpasippaa.

"Takussavat Harry - toqqorsivik-una pillugu oqaloqatigerusuppakkit. Ajat uangalu eqqarsarpugut maani sinittarfeqaannarnissannut angivallaalersimagunartutit...eqqarsarpugut ilinnut iluarnerussasoq Dudleyp sinittarfiata aappaanut nuukkuit."

"Sooq?" Harry aperivoq.

"Sussa aperinak, nukappiarapiluk-aa!" Akkaava sakkortuumik oqarpoq. "Pisattatit nassarlugit massakkorpiaq majuarit!"

Ilaqutariit Dursleykkut illuat sisamanik sinittarfeqarpoq. Ataaseq akkaa Vernonip aja Petuniallu sinittarfiat; ataaseq pulaartut inaat (akkaa Vernonip qatanngutaata Marthap atornerusartagaa); ataaseq Dudleyp pinnguaasa, sinittarfiani inissaqanngitsut, inigisaat.

Harry pigisani toqqorsivimmiittut tamaasa majuunniarlugit ataasiaannarluni majuartarfikkut majuartariaqarpoq. Siniffimmut ingippoq eqqanilu isiginnaalerlugu. Inip iluaniittut suut tamarmik aseqqukuupput. Videoliuut nutaangajassuaq qamuteeqqap sorsuutip Dudleyp eqqaamiumi qimmianik apuiffiginikuusaata qaavanut iginneqarsimavoq. Teqeqqumiippoq Dudleyp fjersynia siullerpaaq. Taassuma igalaartaa tuckerlugu aserorsimavaa isiginnaagannaani taamaatimmat. Aamma sinittarfimmiippoq timmissat inerujus-

suat qangali papikuujummit inigineqarsimasoq. Dudleyp timmiaq allaaseeqqamik luftbøsemik atuarfimmi taarsersimavaa, taannalu massakkut ilisivimmiippoq isui tamarmik najunngarsimallutik Dudleyp ingiffigisoorsimammagu. Iisiviit allat atuakkanik ulikkaarput. Inimi taakku kisimik attorneqarsimanngisaannartutut isikkoqarput.

Tummeqqat ataanni tusaasinnaavaa Dudley qiaatigaluni anaanamitut oqaluppaluttoq:

"Taqqamaneeqqunngilara....ini taanna atorfissaqartippara. Aniseqqinniaruk..."

Harry anersaaruluppoq siniffimmullu siaarluni nallarluni. Ippassaq maani inimiikkusulluni suna tamaat iliuuserisinnaasimagaluarpaa massakkorpiarli allagarsiani tigumiarlugit toqqorsivimmut utertinneqarusunnerugaluarpoq.

Aqaguani ullaakkut nerrivik kaajallallugu issiasut tamarmik nipaaqaat. Dudley tuparujussuarsimasutut isikkoqarpoq. Nilliasimavoq ataatanilu ajaappissaminik anaalerlugu, piaarluni meriarsimalluni, anaanani isimmitsarsimallugu saaniluutinilu naasuusiviup qalianut igalaajusumut igalaaqputullugu milorujussimallugu. Taamaakkaluartorli inini tiguaqqissimanngilaa. Harryp ippassaammat tamatuma nalaani pisimasut eqqarsaatigai peqqissimillunilu allakkat matup eqqaani ammarsimannginnamigit. Akkaa Vernon aja Petunialu imminnut aliasuppaluttumik qissimittuarput.

Allakkat takkummata akkaa Vernonip Dudley allakkanik aallersippaa Harrymut ilungersorluni ajunngisaarniarpaluluni. Tusaavaat Dudley silarliup matuata tungaanut aqqu-taani suut tamaasa atuarfimmi ajaappissaminik anaartarpalukkai. Taava nillerpaluttoq tusaavaat: "Aamma allamik takkuttoqaqqippoq! Hr. H. Potterimut, Ligustervængemi inimut minnerpaamut nummer 4-amiittumut...."

Akkaa Vernon nillitigaluni issiavimminit pissippoq Dudleyllu tungaanut arpalluni Harryp malikkaani. Akkaa Vernonip allatut ajornartumik Dudley pinngitsaalillugu allakkanik arsaartariaqarpaa, tamannalu imaannaanng-
qaaq tassami Harryp tunuaniit toqqusassisimammagu. Minutsit marlussuit akersuuttoqareermat tamarmillu ajaap-
pissamik anaartarneqareermata akkaa Vernon anertikkarluni nikutserpoq Harryp allagarsiai assammi illuanik tigumi-
arlugit.

"Toqqorsivimmut iserniarit - naami, ininnut iserniarit."
Harrymut anertikkarluni oqarpoq. "Aamma illit Dudley, tamarit, ingerlaniarit!"

Harry initaamini uteqattaarusaarpoq. Arlaata paasisimavaa toqqorsivimmiit nuussimanini, aamma paasisimagunarpaat allakkat siulliit tigusimanngikkini. Imatut isumaqarpoq attaveqarfigeqqinniaraanni, ilaa taamaagunarpoq?
Tullianillu Harryp allakkat siulliulluni tiguniarpai. Pilersaaruteqalerpoq.

Nalunaaqutaq itersaasartog aqaguani ullaakkut nalunaaqutaq arfinermut itersaalluni sianerpoq. Harryp tuaviinnaq qamippaa nipiliorpallaarnaveersaarlunilu atisalersorluni. Illumi itertitsinissani piumanngikkaluaqaa. Nipaarsaarluni qullernik ikitaqarani tummeqqakkut aterpoq.

Ligustervængep tungaanut sangoriamukarniarpoq allakerisartog tassani utaqqiniarlugu. Tassani allakkat nr. 4-mukartut namminerminut tunniunneqarnissaat qinnutiginiarpaa. Isaarissamut matumukarnermini nipaarsaaqaluni torsuusakkut taartuklut ingerlaarnermini uummataa sak-kortuumik kassuttarpoq.

"AAAAAARGH!"

Harry qangattariarluni natermut tuppoq - allungiartor-fimmi sunaagaluarnersoq tutisimavaa - uumasooq!"

Qulleq erniinnaq ikinneqarpoq, Harryllu annilaarutigeqi-saminik paasivaa tutisani taanna sunaagaluarnersoq tassaa-soq akkammi kiinaa. Akkaa Vernon siniffik-puumini matup saniani niaqqi matup tungaanut saatillugu sinissimavoq. Paasinarpoq qulakkeerniarsimagaa Harryp pilersaarutimi-nik iluatsitsinnginnissaa. Harry akunnerup affaata missaani appisaluuppaa taavalu naalakkerlugu tiilioriartoqqullugu. Harry isumatsassimalluni arriitsunnguamik igaffimmukar-poq tiilioreremallu allakkisartoq takkutareersimavoq. Allakkat toqqaannartumik akkaa Vernonimut torsuusami nalasumut nakkarsimapput. Harryp tamatumuuna allakkat pingasorsuit takusinnaavai pilikkimik qorsooqqissumik allannilimmik qaatiguuliorneqarsimasut.

"Piumasaraara...." aallartippoq, akkaa Vernonilli isigitil-lugu allakkat pingasut tamaasa sequtserpai.

Ulloq taanna akkaa Vernon suliaartunngilaq. Angerlarsimaannarpoq allakkanullu nakkartitsisarfik matu-miittoq qisummik kikiattorlugu asserlugu.

"Paasissavat," aja Petunia nassuiaappaa qarni kikissanik ulikkaartoq, "allakkat inuttaanut apuussinnaanngikkunik-kik nassiussisarunnaassapput."

"Qularaara taama ajornanngitsigissasoq Vernon."

"Ilumut. Inuit taakku sila qarluanngitsumik eqqarsartaa-seqarput, Petunia. Assiginngilaatigut." Akkaa Vernon aki-voq sandkagelu aja Petuniap aatsaarpiaq tunniussaa kikiaa-soralugu kaattariaraluarlugu.

Taamaattoq tallimanngornikkut allakkat aqqaneq marluk Harrymukartut takkupput. Allakkanut nakkartitsisarfikkut nakkartinneqarsinnaanngimmata matup ataatigut ilummut

ajanneqarsimapput, ilaallu allaat tikeraat anartarfiata igalaa-vararakasiatigut ilummut nakkartinneqarsimallutik.

Akkaa Vernon suliartoqqinngitsoorpoq. Allakkat ikualla-reeramigit kaatani kikissallu tiguai illup saavata tunuatalu matui qisunnik assersorniarlugit - tamatumalu kinguneraa kinaluunniit isersinnaananilu anisinnaajunnaarmat. Silaqarluannngitsutut sulersuataarpoq erinarsuutigaluni. "Angerlarsimaffik, angerlarsimaffik اساسارا," nipimininnguamillu tusaraangami tuparujussuuartarpoq.

Arfininngornermi pisorpassuaqarpoq. Harrymut allakkat 24-t illumut takkupput. Peqititersimallutik manniit aqqaneq marluk Dursleykkut pissaasa iluinut toqqorneqarsimallutik immummik agguaasartumit puuallatsinneqarsimasumit igalaakkut tunniunneqarput. Tamatuma kingorna akkaa Vernonip allakkerisarfimmut immuliorfimmullu kamaatas-sarsiorluni sianeqattaarnerani aja Petuniap allakkat neqinut aserorterivimmini kaavitillugit aserorterpai.

"Kiarsuumuna allaffiginissat taama ilungersuutigitigi-gaa?" Dudley Harry tupigusulluni aperaa.

Sapaammi ullaakkut akkaa Vernon qungujulalluni nerri-vimmut ullaakkorsiorfissaminut ingippoq, kisiannili takune-qarsinnaalluarpoq qasutarpaseqisoq.

"Sapaammi allakkisartoqarneq ajorpoq," pilluarpasilluni nalunaaruteqarpoq, aviisiutini mamalaaajimik tanittoorlugu. "Ullumikkut allagapalaanik taakkuninnga takusaqassanngilagut..."

Igaffimmi silaannarissartarfiup matuaraatigut suunersup akkaa Vernon pukusuatigut sakkortoqisumik nakkarfigaa. Tassaaku allakkat nakkartut. Sekundini tulliuttuni allakkat

43-t missil-itut sukkatigalutik nakkaapput. Ilaqutariit Dursleykkut eqqortinnginniassagamik niaqqutik peqippaat, Harryli pissippoq allakkat arlaat tiguniarlugu.

"Anigitsi! ANIGITSIII!

Akkaa Vernonip Harry qitiatigut tiguaa torsuusamullu igeriullugu. Aja Petunia Dudleylu talitik niaqqumik qulaanut pisillugit niaqqutik illersorniarlugit qimaammata akkaa Vernon malinnippoq igaffimmullu matu matoruloorlugu. Matup silataaniit tusaasinnaavaat allakkat taqqamani natermut torarpaluttuarnarat.

"Tassa naammaleqaaq," akkaa Vernon oqarpoq, eqqissisi-manarpaseqaluni kakkivissamigut umimi ilaat nutsuutigalugit. "Aallassaagut.. Minutsit tallimat qaangiuteqqissaarpata maani piareersimassuusi. Pisariaqartitaannasi poortoriartoriarsigit, qaa! Oqaaseqassanngilasi. Tuaviorniaritsi!"

Arlaannaataluunniit akerlilernissaa qunugaa. Tassami qununarpaseqaaq kakkivissamigut umimi affai nutsussimammagit. Minutsit qulit qaangiummata tamaviaaqalutik silammut matukkut anillapput biilimullu ingerlaqqillutik. Maanna sukkalisaaqalutik biiliinnaat aqquataatigut ingerlapput. Dudley qiaatigaluni tunorlermi issiavoq. Angutaata kinguarsarmatik isassimavaa fjernsynini, videoni computerinilu tas- kiminut poortormialermagit.

Tamassa aallarataarput. Ingerlapput ingerlapput. Aja Petunialluunniit sumukarermik apeqqutiginnissaa qunugaa. Akkaa Vernon ilaannikkooriarluni aqqusinnermut allamukar- tumut sanguriapiloortarpoq aqqusernullu paarlattuanut ingerlalersarluni.

"Angussanngilaatigut.... angussanngilaatigut," oqalor- juppoq, sangunini tamaasa taama oqartarluni.

Ulloq naallugu biilerput, arlaannulluunniit neriniarlutik

imerniarlutilluunniit uninngillat. Unnulermat Dudley uippal-
lernermik paatsiveerutivissimavoq. Inuuleramili aatsaat
taama misigisaqarpoq. Perlilerpoq, fjernsynimi takusassaralu-
ani minnerpaamik tallimat takunngitsoorsimavai, aamma
computerimini uumasut silaannarsuarmit qaartinnissaannik
periarfissinneqarsimanngilaq.

Kiisami akkaa Vernonip biili unitsippaa illoqarfissuup ava-
tikanniani akunnittarfiup ersinarpasissup silataanut. Dudleyp
Harryllu akunnittarfimmi ini ataaseq avippaat. Inimi sinif-
fimmi oqorutit tipillutillu oqussunnipput. Dudley erniinnaq
qannguilerpoq, Harryli eqqumaniarpoq. Igalasserfimmu-
t ingippoq biilillu sanioqquttut qulliisa qinngorsimani amili-
maartut nakkullugit. Issiavoq itisuunik eqqarsaateqarluni...

Aqaguani ullaakkut cornflakesit pisoqqat skinkillu qillertu-
usarnisat iffiat qaqortut sikatsitalerlugit ullaakkorsiutigaat.
Ullaakkorsiornertik naammassileraallu akunnittarfiup pisor-
taa arnaq ornillugit takkuppoq.

"Utoqatserpunga, kisianni ilarsi H. Potterimik ateqarpa?
Allakkat imaattut hundredit arlallit akunnittarfiup saaffigin-
nittarfiani tiguagut."

Taava allakkat takutippai ima pilikkimik qorsooqqissumik
allannilimmik qaatiguuliorneqarsimasut.

Hr. H. Potter

Ini 17

Railview Hotel

Cokeworth

Harryp allakkat tigoriarpai, kisiannili akkaa Vernonip
Harryp talia illuarteriataarpaa. Akunnittarfiup pisortaata
nakkuppai.

"Uanga allakkat isumagiumaarpakka," akkaa Vernon oqarpoq, nikuillunilu akunnittarfiup saaffiginnittarfianut arnaq ingerlaqatiginarlugu.

"Pitsaanerussanngila massakkut angerlarutta, asasara?" Akunnerit arlallit qaangiummata aja Petunia mianersortunnguamik siunnersuivoq, kisianni uiata tusaanngilaa. Kialluunniit ilisimanngilaa qanoq pilersaaruteqarnersoq. Orpippassuit akornannut ingerlappai biilimiillu anillalluni, sumut tamaanga qinerpoq, niaqquni ileqimisaartorpaa, biilip aquttarfianut ingeqqilluni biileqqilerlunilu. Aamma taama pisoqarpoq narsaatip assallatsikkap qeqqanut unimmata, ikaartarfiup qeqqanut pimmata kiisalu illorsuup biilnut unittarfiusup qullerpaartanut pimmata.

"Ataata silaarutivissimavoq, ilaa?" Dudleyyp ualeq taanna anaanani aperaa. Akkaa Vernonip biili sissamut unitsissimavaa tamaasalu biilip iluanut parnaarullugit qimallugillu.

Siallilerpoq. Sialorujussuit biilip qaavanut toralerput Dudleylu manittulerpoq.

"Ullumi ataasinngorneruvoq," anaanani oqarfigaa. "Fjernsynikkut aallakaatitassiat nuannersut tamarmik ataasinngornikkut takutinneqartarput. Arlaannut fjernsynerfigisinnaasannut iserusukkaluarpunga."

Ataasinngorneq. Harry eqqaasaqarpoq. Ataasinngorneruppat - qularutissaanngilaq Dudleyyp sapaa-tip akunnerata ingerlanerani fjernsynikkut aallakaatitassiat sorliit isiginnaarneqartarnersut nalunngikkai - taava aqaguanani marlunngornerussaaq tassalu Harry aqqanilinnik ukioqalissaaq. Inuuissiorneri soorunami nuannerpiarneq ajorluarput - siorna angajoqqaarsiaasa atisatoqaanut naatiffisaanik tunivaat aammalu akkaa Vernonip alersitoqaanik

tunillugu. Kisiannimi - ullut tamaasa aqqanilinnik ukioqalertoqarneq ajorpoq.

Akkaa Vernon qungujorujussuarluni uterpoq. Poortugaa takisooq amitsorlu tigumiarpaa, nuliamilu aperigaluarmani sumik pisisimanersoq akinngilaaluunniit.

"Pitsaalluinnartumik nassaarpunga," oqarpoq. "Qaagitsi! Tamassi biilimit anigitsi!"

Sila nillertorujussuuvoq. Akkaa Vernonip immami qaar-sorujussuartut isikkoqartoq tikkuarpaa. Qaarsup qaavaniip-poq illupalaannguaq, takorloorneqarsinnaasut minnersaralugulu nallinnarnersaat. Qularnanngilluinnarpoq tassani fjernsynimik nassaarnissartik naatsorsuutigissanngikkaat.

"Unnugu anorersuarnissaa ilimasaarutigineqarpoq!" Akkaa Vernon nuannaarluni oqarpoq assanilu pattallugit. "Aamma angutip uuma umiatsiaminik atukkerusuppaatigut."

Angut utoqqaq kiguteqanngitsoq tusiapilluni tungaannut ingerlavoq ajorniarpasissumillu qungujulluni umiatsiaq iputtariaq pisoqaq imaani qasersumi pitussimasoq tikkuarlugu.

"Taquassagut isumagereerpakka," akkaa Vernon oqarpoq, "umiatsiamut issoraanniaritsi!"

Umiatsiami issianeq nuanninngivippoq. Imaq nilleqisoq umiatsiap quleruaanut serpartarpoq, sialuillu nilleqisut kuuinnartullu pukusuinut torarput, anorilu sakkortuallaartoq kiinaannut annernaqaluni. Akunnertut arlalittut misiginartut qaangiummata kiisami qaarsorsuarmut pipput, tassani akkaa Vernonip pangallattarluni, quaattarlunilu illuara-palaannguup tungaanut ikiorlugit ingerlappai.

Illupalaannguup ilua ilimagisamit ajorneruvoq. Qeqquarsunnippoq, anori qisuttaatigut quppatigut siorsup-

poq, kissarsuullu ammaannartoq qaminngavoq sunngua-
milluunniit qisussaqarnani. Illupalaannguaq marluinnarnik
initaqarpoq.

Akkaa Vernonip inunmut sisamanut taquai tassaapput
kissit poortat ataatsit bananillu sisamat. Kissarsuut
ammaannartoq kukunniaraluarpaa, kissilli puukui pujoor-
titsiinnarput eqiterlutillu suujunnaarlutik.

"Ajussanngikkaluaqaaq allagapalaat nassiussat ilaat
maanna pigisuugalarutsigit," qimarpalulluni oqarpoq.

Nuannaartorujussuuvog. Erseqqippoq qularutiginnigivik-
kaa kialluunniit anorersuartumi ornissinnaanngikkaatik.
Harryp akkani isumaqatigivippaa naak eqqarsaat taanna
taassumatut nuannaritiginngikkaluarlugu.

Unnuarormat anorersuaq eqqaanni sakkortusiartuinna-
poq. Mallit qaarsumut qaarneri illupalaannguup iigaatigut
isaapput anorillu sakkortuup igalaat neeqqulutsippai. Aja
Petunia inip aappaani tippinik isuguttammik kajuusartunik
simerninissimasunik marlunnik nassaarpoq Dudleylu sofa-
mi oqunnikumi siniffiliorlugu. Nammineq uinilu inip aap-
paani madrasimut maneeqisumut nallarput, Harryli allatut
ajornartumik nateq maavaarnersiorlugu nallarpoq tippit
saannersaat ajornersaallu qipiliullugu.

Unnuaruleriartornerani anorersuaq sakkortusiartorpoq.
Harry sinissinnaanngilaq. Qjjanermik uulikulaartuinnaa-
vog natermilu pequlialluni sapinngisamik ilorrisimaarner-
paaffigisinnaasaminik nallavissarsiorluni. Aqajarua quluar-
poq kaannermik. Dudleyp qannguina unnuap qeqqata
missaani aallartittoq kallerpalunnersuup tusarsaajunnaar-
sippaa. Dudleyp nalunaaqutaaraata taartumi qaammartar-
tup paffiani pualasuumiittup sofallu saneraatigut nivinnga-
taartup Harry oqaluttuuppaa minutsit qulit qaangiuppata

aqqanilinnik ukioqalissasoq. Sekundilersuutaata ingerlane-
rani isiginnaarpaa inuuissiornissani qanilliartuinnavissoq.
Eqqarsarpoq inuuissiornini arlaannit eqqaamaneqassaner-
soq. Aamma namminerminut allattoq eqqarsaatigaa - taan-
na massakkorpiaq sumüppamitaava?

Suli minutsit tallimat. Harryp silami neeqquluppalluttooq
tusaavaa. Neriuppoq qalia nakkassanngitsoq, naak immaqa
nakkarpat nallaviat kissarnerulissagaluatoq. Suli minutsit
sisamat. Immaqa illu Ligustervængemiittoq uterpata allak-
kanik ulikkaassooq. Immaqa allakkat ilaannik tigusinissani
taamaalilluni iluatsissavaa....

Minutsit pingasut qaangiuppata inuuissiussaaq.
Maliunerlutik qaarsumut qaarpallattut? Aamma (suli
minutsit marluk) sunaana nipi tusarniitsoq tutsiuttoq?
Qaarsorsuaq imaanut kivilersoq?

Aqqanilinnik ukioqalernissaanut suli minutsi ataaseq.
Sekundit 30-t...tyvit...qulingiluat - immaqa Dudley itersar-
tariaqarpaa uumisaarniaannarlugu - pingasut - marluk -
ataaseq -

BAAANG.

Illupalaannguaq tamavimmi sajukulaarpoq, Harrylu
nikueriataarpoq. Matu nakkutilerpaa.
Silataatungaaniittoqarpalluppoq. Iserniartumik kasuttorto-
qarpoq!

Matuersaammik paarsisoq

BAANG! Matu sakkortuumik kaanneqaqqippoq. Dudley pikeriarluni iterpoq.

"Kinaana qamutilittoq?" Sianiippalulluni aperivoq.

Akkaa Vernon uivertorujussuulluni inip aappaaniit pisiinnaq nukappiaqqat inaannut iserpoq. Aallaammik tigu-miarpoq - maanna paasivaat poortugaq takisooq, amitsoq biilimiit anilluni ingerlareerluni uterami nassataa sumik imaqarnersoq.

"Kinaana?" Nillerpoq. "Mianersoqussavakkit - sakko-qarpunga."

Sivikitsukullammik nipaqaangilaq. Taava -

BAANG. Pisorpallappoq.

Matu ima sakkortutigisumik eqqorneqarpoq qiversartu-minit kaanngarluni qoqianngunaannartumillu nipeqarluni inimi natermut nakkarluni.

Inorujussuaq matserfimmi nikorfavoq. Kiinaa nujaanit takisoorsuarnit tukattunit umissuarnillu tiggusimasunit takussaanningajappoq. Isaali nujarsuisa umissuisalu tunuanni sapanngatut qernertutut qillaallattarput.

Anguterujussuaq tattuteqaluni illupalaannguamut peqerujussuarluni iserniarsarivoq niaqquni qilaamut attuutin-nginniassammat. Peqippoq matulu kivillugu qiversartuinul-

lu ikkullugu. Silami anorersuaq qasukkaallappoq. Inimiittut saappai tamaasalu isikkuserlugit.

"Tiitugasannik tunisinnaavisinga, imaluunniit qanoq? Angalanera atoruminartutut oqaatigisinnaanngilara."

Sofap tungaanut alloriarpoq, tassani Dudley annilaarujussuarsimalluni issiasoq.

"Illuaamilaarit, pualakummallak," takornartaq oqarpoq.

Dudley nillerpoq anaanamilu tunuanut qimaalluni, taanna annilaangaqaluni akkaa Vernonip tunuanut toqqorsimasoq.

"Tassa aajuna Harry!" Inorujussuaq oqarpoq.

Harry inorujussuup kiinaa umissuarnit ersinngingajat-toq isiginnaarpaa takullugulu isai qillertut isaasa teqeqquanni milliartortut. Inorujussuup qungujuffigaa.

"Kingullermik takugakkit meeraaraannaavutit," inorujussuaq oqarpoq. "Kakkaak ataatat assingaaarakku, kisianni anaanaavit isai isigaatit."

Akkaa Vernon eqqumiitsumik nipeqarluni nipiliorpaluppoq.

"Piumasaraara massakkorluinnaq illuararput qimassagit," oqarpoq. "Maani aserorterinnarputit."

"Aah, nipangerit, Dursley, puulukersuaq," inorujussuaq oqarpoq akkaa Vernonillu aallaasia tiguniarlugu assani isaallugit. Aallaasaa tiguaa isuisigullu illuttut tigoriarlugu najunngarlugu, najunngarmagu allaanngivippoq kummimik sanaaq. Taava teqeqqumut miloriuppaa.

Akkaa Vernon aamma eqqumiitsumik nipilioqqippoq, soorlu terissatut tummarneqartutut nipeqarluni.

"Kisianni, tassa - Harry," inorujussuaq ingerlaqqippoq ilaqtariillu Dudleykkut ersiortut tunullugit.

"Nuannersumik inuuissiornissannik kissaappakkit. Ilinnut

tunissutissaqarpunga. Immaqa ingiffigisoorsimasinnaavara, taamaattorli mamassaaq."

Kavaajami qernertup kaasarfianiit ilorlermiit poortugaq eqitersimasoq ammuppaa. Harryp assamminik sajuttunik ammarpaa, iluaniipporlu kaagerujussuaq sukkulaartalik nipeqqaaluttoq, qaavatigut sikassaammik qorsummik ima allassimasoq: Harry, inuinni pilluarit.

Harryp inorujussuaq qummut isigaa. Qujanarluni oqarniaraluarpoq, kisiannili oqaasissai anillakkumanngillat. Akerlianik oqarniarsuarluni oqarpoq, "kinaavit?"

Inorujussuaq illarpoq.

"Usi, imminut ilisaritinngitsoorpunga. Rubeus Hagrid, matuersaammik paarsisoq nunaassuarmilu Hogwartsimi pisortaasoq."

Assapiluunerujussuani isaappaa Harryllu talia issuttuullugu. "Naak taanna tiitugassara?" Oqarpoq assanilu tagiartorlugit. "Allamik nakuunerusumik peqarusi aamma soorunami naaggaarnavianngilanga?"

Taava takulerpaa kissarsuut ammaannarteq kissillu puuat eqitersimasoq paaginnarlu. Sorlummippoq kissarsuullu ammaannarteq nillertoq qulaallugu peqilluni. Takusinnaanngilaat sulerinersoq, sekundilli marlussuit qaangiummata tunuaqqimmat inneq naaralaarlualereersimavoq. Kialaaq inimut nilleqisumut siaruappoq inilu qaammarsarlugu. Harryp malugisinnaavaa timini qasukkariartuaarteq, soorlu kissartumik uffareersimalluni uffarfimmiit niusimasoq.

Inorujussaq sofamut ingeqqippoq, oqimaangaarmat sofa ingiffia kappialasutut nipiliorpoq. Kaasarfimminiit assigünngitsorpassuarnik qalluilluni aallartippoq. Uunnaavik kanngussammik sanaaq, pølsit poornikut, kissarsuummut

qaqilerut, ermutsit arlallit kigarnikut aammalu puiaasaq imerpalasumik qillertumik imalik. Puiaasap imaanit aarlo-russerulooriarluni tiiliorluni aallartippoq.

Pølsit qaqilerummut takisuumut kappunneqarput, erini-narseriannigitsorlu pølsinik siatarsunni inimut siaruaappoq. Inorujussuup pølsit innerup nalaanut kaavitimmagit arlaan-naalluunniit oqaaseqanngilaq; kisianni Dudley qisuariarpoq pølsit angisuut arfinillit piareermata. Akkaa Vernonip erni-ni mersernarpaluttumik isigaa: "Tunniussaani nerissanngi-latit, Dudley."

Inorujussuaq naakkittaappasilluni illarpoq.

"Naamik, ernerit pualasoorsuaq puallarsaqqittariaqanngi-laq. Eqqissiinnarit, Dursley."

Pølsit Harrymut isaappai. Harry ima kaatsigaaq allaat isumaqarluni mamarnerusunik nerisimanngisaannarluni. Inorujussuaq isigiunnaarsinnaanngilaa. Kisiannili qanoq pisoqarneranik nassuiaanneqannginnini sivitsormat oqar-poq. "Utoqqatserpunga, kisianni suli naluara kinarpiaaner-sutit."

Inorujussuaq tiimik aarlorussivoq assammilu tunuanik qanini tagiartorlugu.

"Hagridimik taaginnannga," oqarpoq, "allat tamarmik taama taasarpaannga. Aamma soorlu oqartunga, matuer-saammik paarsisuuvunga Hogwartsimeersoq - ilaa Hogwarts nalunngilat?"

"Naagga," Harry oqarpoq.

Hagrid tupigutsangaartutut isikkoqarpoq.

"Ajuusaaraluarpunga," Harry oqapallappoq.

"Ajuusaarpunga?" Hagrid qatimaarujussuarpoq ilaqutariil-lu Dursleykkut tunummut saallugit mamiatsappaseqaluni, taakkua iikkamut qunullutik tunuporsorput. "Taakkuukua

ajuusaartariaqartut! Nalunngilara allagarsiassatit tigunngikkittit, kisianni isumaqanngikkaluarama isertugaq ilinnut toq-qortussagaat. Isumaqaraluarama Hogwarts pillugu suut tamaasa nalunngikkittit, uuminassusersua. Angajoqqaavit ilikkakkatik suminngaanniit ilikkarsimassagaat ilimagaajuk?"

"Suut ilikkakkatik?" Harry aperivoq.

"SUUT ILIKKAKKATIK? Hagrid suangasangaarluni oqaluppoq. "Naamik. ingasappallaaqaaq."

Pissiinnarluni nikuippoq kamattorsuanngorlunilu. Ilaqutariit Dursleykkut maanna teqeqqumut attuussarput.

"Ilumut oqaluttuunniarpisinga nukappiaqqap SUUT TAMAVIISA nalugai?"

Maanna Harry isumaqarpoq inorujussuaq ingasattajaarpallaartoq. Namminermi atuarsimavoq karakteriilu taama ajortiginngillat.

"Sorpasuit ilisimavakka," Harry akerlilivoq, "matematikki allallu nalunngilakka."

Kisiannili Hagridip tusaangitsuusaarpaa. "Uagut silarsuarput pillugu ilisimasassat pivakka. Illit ungalu silarsuarput - angajoqqaavit silarsuaat."

"Silarsuaq suna?"

Hagrid allaanngivippoq qaalersoq.

"DURSLEY!" Qatimaappoq.

Akkaa Vernon qarsorsimavoq qanoq isumaqaraluarnersumillu isussulluni soorlu ima nipilimmik "øhbløbøh."

Hagridip nujuartatut isikkoqarluni Harry nakkuserpaa.

"Kisiannimi ataatat anaanallu pillugit tusagaqarsimassuutit," oqarpoq. "Tassami tusaamasaapput illillu tusaamasaavutit."

"Qanoq! Uanga... anaanaga ataatagalu tusaamasaarpianngillat, ilaa?"

"Tassa naluat... ilisimasaqanngilatit... "Hagridip nutsani nutsuppai Harrylu tupaallappaseqaluni nakkuserlugu.

"Tassa naluat kinaanerlutit?" Naggataatigut oqarpoq.

Akkaa Vernon oqalussinnaanngoqqissimavoq.

"Tassa naammaqaaq. Nipangerit!" Naalakkiivoq.

"Unittariaqarputit! Inerteqqutigissavara nukappiaraq sumilluunniit oqaluttuunneqassasoq."

Angut Vernon Dursleymit sapiinnerusoq ingerlaannaq aqullaarsimassagaluarpoq Hagridip isai massakktu takusuugaluarunigit. Inorujussuaq oqalummat, nipaa qamangaanneersoq kamappaluttorujussuuvoq.

"Ilaa oqaluttuutinnngisaannarsimavat? Dumbledorep naalungjarsuk ilinnut tunniukkamiuk allagai pillugit oqaluttuutinnngisaannarsimavat? Taamanikkut ilaavunga, nammineq isinnik isigaara Dumbledorep allakkat tippit akornannut iligai, Dursley! Illillu ukiuni taakkunani tamanna Harrymut isertuussimavat?"

"Suna isertuunneqarsimava?" Harry ilungersorluni oqarpoq.

"OQARNAK. OQAATIGINISSAA INERTEQQUTI-GAARA! Akkaa Vernon quarsaaqaluni nilliaavoq.

Aja Petunia annilaanganermit anertikkarpoq.

"Tassa, marluullusi nipangerniaritsi," Hagrid narrutsalluni oqarpoq. "Harry - angakkuuvutit."

Illupalaanguamiittut nipaarutivipput. Taamaallaat imaq anorilu tusarsaapput.

"Suugama?" Harry anertikkarluni aperivoq.

"Angakkoq, soorunami," Hagrid oqarpoq sofamullu ingeqqilluni. Sofa siornatigornit sulii kappialarpalunneruvoq natermullu aqullaartutut isikkoqarluni. "Aamma ilanngullugu oqaatigisinnaavara, angakktu pikkorinneraanut ilaasutit

- soorunami sungiusalaariavit. Taamaattunik angajoqqaq-artillutit sungiusaqqaartariaqassaait. Maanna isumaqar-punga massakkut piffissanngortoq allagarsiavit atuarnissaan-nut."

Harryp assani isaappaa allakkat puui sungarpaluttut pilik-kimik qorsooqqissumik qaatiguuliornillit tiguniarlugit, imalu qaatiguuliorneqarsinapput: Hr. Potter, Nateq, Qaarsumi illu-palaannguaq, Imaq. Allakkat puuat ammarpaa allakkallu atualerlugit.

Hogwartsip ilisiinnermut angakkuersaarnermullu atuarfia

Atuarfiup pisortaa: Albus Dumbledore

Merlinip kingoraartaanit,

angakkuarsaarsinnaaneq annerpaaq,

Mugwump-i akuerisag.

Silarsuaq tamakkerlugu Angakut Kattuffiannut ilaasortaq.

Asasara Hr. Potter

*Nuannaarutigalugu ilinnut nalunaarutigerusupparput, illit
Hogwartsip ilisiinnermut angakkuarnermullu atuarfiani atua-
lersinnaanissamut piukkunnaateqareeravit aallartissinnaallutil-
lu. Ilanngullugit nassiuuppagut ilinniagassat allattorsimaffii
atortussatillu allat.*

*Semesteri siulleg aallartissag septembarip aallaqqaataani.
Uppiutivit tikinnissaa naatsorsuutigaarput kingusinnerpaamik
julip 31-ani.*

Ikinngutinnersumik inuulluaqqusillunga

Minerva McGonagall

Pisortap tullia

Apeqqutit nalliuttorsiorluni qummoroortaatitut Harryp niaquani qaffakaapput. Naluaa suna aallarniutigalugu apeqqutigissanerlugu. Minutsit marlussuit qangiummata oqarniar-suarluni oqarpoq. "Qanoq isumaqarpa uppiutigata utaqqi-gaat?"

"Uangarajussuaq, eqqaasaqalerpunga," Hagrid oqarpoq, qaanilu ima sakkortutigisumik patillugu, patitsinerata ner-sussuaq angutiviaq nunamut uppitissinnaallugu allaat. Kaasarfippassuarmi kisissaanngitsut arlaanniit uppi-k ammuppaa - uppi-k uumasuvik, kisiannili tukalaartoq. Aamma saniatigut allaffissiaq imusaq allaallu suluk ammuppai. Oqqani anillatsillugu allappoq. Harry naqinner-nik killormut sammisunik atuarsinnaagami atuarpaa ima allassimasoq:

Asasara hr. Dumbledore.

Allakkat Harrymut apuuppakka. Aqagu ilagissavara atortus-sai pisiariniarlugit. Sila sussaannigilaq. Neriuppunga ajunngit-sutit.

Hagrid

Hagridip allagannguaq imuaa uppimmullu tunniullugu. Taassuma siggumminik kiilluartiterpaa. Taava inorujussuaq matumukarpoq uppillu silamut anorersuartumut anisillugu. Uterpoq ingillunilu soorlu taamaaliornera pissusissamisui-nartoq, oqarasuaatikkut sianernertut pissusissami-suinnartigaluni.

Harryp oqqani ammasoq malugeriasaarpaa tuaviorlunilu oqqani matupallappaa.

"Atagu, sumut killippunga?" Hagrid oqarpoq, kisiannili

akkaa Vernon maanna pimoorullugu aalajangersimavoq aku-liunniarluni. Kissarsuutip ammaannartup qaamaneranut alloriarpoq, kiinaa qasertuinnaavoq aatsaat taamallu kamatsigaaq.

"Aallaqqunngivippara," oqarpoq.

Hagrid sordummigarpoq.

"Takorloorsinnaangilara illit Muggleriugavit qanoq ilillutit unitsissinnaagit," oqarpoq.

"Suna?" Harry soqutiginnippalulluni oqarpoq.

"Muggleri," Hagridip oqaatsini uterpaa. "Taakku pissaa-nermik ilisimasaqanngitsut taama taasarpagut. Nalligaakkillu ilaqutariinni Mugglerini uanga naapittarsimasama takorlu-uisinnaanngissuseqarnersaanni alliaartorsimagavit."

"Paarileratsigu neriorsuivugut tamakku asuleerutit unitsinniarlugit," akkaa Vernon oqarpoq. "Neriorsuivugut pissaa-neq iluaniittoq sunaluunniit peerniarlugu. Angakkoq, ha! Qanoruna isumalik?"

"Tassa nalusimanngilarasi?" Harry oqarpoq. "Nalunngilarasi angakkuusunga?"

"Nalunngikkipput," aja Petunia qataajaqilluni oqariataarpoq. "Nalunngikkipput! Soorunami nalunngilarput. Qanormi illit aamma angakkunngussanngilatit qatanngutigapilluaatsoq, tassa illit anaanat, taamaattuusimappat? Meeraalluni illit allagarsiattut ittunik allagarsivoq kingornalu tammarluni - tassunga atuarfiliarniarluni - aasakkullu atu-annigifiup nalaani angerlartarpoq kaasarfini naratsit piaraan-nik ulikkaartut. Tiitorfiit terianngortittarpai, uangalu kisima takusinnaavara qatanngutigapilluaatsoq, silaqarpia-saanngitsoq! Kisianni ataatama anaanamalu tan-ngassimaarutigisarpaat; tassami qatanngutigapilluaatsoq Lily eqqartortuartaarpaat!"

Anersaartorniarluni nipangerallarpoq oqaasissarpassuani oqaatigitinnagit. Soorluuna oqaluttuarinissaa ukiorpasuar-ni nunusimagaa.

"Taava taanna Potter atuarfunmi naapippaa qimaappullu katinniarlutik. Taava illit meerartaaraatsit, uangalu soorunami nalunngilara illit minnerpaamik taama ajortigisumik perorumaartutit - taakkutulli eqqumiitsigisumik pissusissamisuunngitsigisumillu. Taava kingusinnerusukkut angajoqqaatit qaartinneqarput uagullu allatut ajornartumik illit paarisariaqalerpatsigit!"

Harry tungertut qaqortigilerpoq. Imminut pinngitsaalilluni qaatutsippoq oqarlunilu. "Qaartinneqaramik? Kisiannimi oqartuarsimavusi angajoqqaakka büilerlutik ajunaartut!"

"BIILERLUTIK AJUNAARTUT!" Hagrid suaarpoq kamaqalunilu pissippoq, ilaqutariit Dursleykkut teqeqqumut tunuarterput. "Qanoq ililluni büilimik ajutoornipalaap Lily aamma James Potter piuneerussinnaagamikku? Tamanna assuarnangaartuuvoq akuerineqarsinaanngitsoq! Harry Potterip nammineq oqaluttuassartaniluunniit naluaa, aali silarsuarmi meeqqat tamarmik taanna eqqartoraat."

"Kisianni sooq taama pisoqarpa? Qanoq pisoqavikkami?" Harry tamaviaarluni aperivoq.

Hagrid kamakkunnaarpoq. Ernumarpassileriatarpoq.

"Uanga tamanna piareersimaffigisimanngilara," nipaatsumik aalaterneqarpalulluni oqarpoq. "Nalulluinnarpara suna naatsorsuutigisimanerlugu Dumbledorep atassuteqarfigini-arnissat ajornartorsiutitaqarsinnaasoq mianersoqqussutigimmagu. Iisimanngilara tamanna ilinnut isertuussimagaat. Harry, immaqa uanga nassuiaanissamut piukkunnarnerpaanngilanga - kisianni arlaat taamaaliortariaqarpoq - Hogwartsiliarsinnaanngilatimmi meerannguugallaravit

qanoq pisoqarsimaneranik paasisaqartinnak!"

Inuit pingasut teqeqqumiittut narrunartutut qissimippai.

"Atagu, pitsaanerpaavoq ilisimasakka ilinnut oqaluttuari-gukkit - kisianni eqqaamassavat, suut tamaasa ilisimanngin-nakkit. Aamma eqqumiitsorpassuaqarpoq uanga paasinngi-sannik..."

Ingippoq, innerlu sivikitsumik isiginnaaqaarpaa nangil-luni oqaloqqitsinnani: "Suna tamarmi aallartippoq - angum-mik ateqartumik - kisianni uppernanngilarluunniit illit tusarsimannginnakkuluunniit; silarsuarmi tamarmi inuit tamarmik ilisarisimavaat..."

"Kina?"

"Aap, takussavat - atia oqaatigissallugu nuannarinngilara, tamanna pinngitsoorsinnaagukku; manna ajornanngit-suunngilaq. Kialluunniit saperpaa."

"Sooq?"

"Ila uuminakasik, Harry, taanna inuit suli ersigaat. Ingasak, manna ajornanngitsuunngilaq. Tusaassavat, ilaan-ni angakkoqarpoq ajortorsuannhortumik. Ajoqqeriarfissaarulluni ajortunngorpoq. Suli ajorneruvoq. Suli ajornerujussuanngorpoq. Atia tassaavoq..."

Hagridip oqaasissani iivai, oqarniaraluarpoq kisiannili oqariarsinnaanani.

"Allassinnaanngiliuk?" Harry siunnersuivoq.

"Naamik, utertarsinnaanngilara. ajunngilarmi - Voldemort." Hagrid sajukulaarpoq.

"Oqaatigeqqinnianngilara. Kisianni angakkoq taanna ukiut tyvit matuma siornatigut ilassarsiorluni aallartippoq. Aamma iluatsippaa - ilaasa akerlilersornissaa ersigaat, allat pissaanera iluaqutigaat, ilami oqarfiggissavakkit, pissaane-qangaalerpoq. Taamani ullut taartuupput, Harry. Kikkut

tamarmik naluaat kikkut tatigissanerlugit. Kialluunniit angakkoq ilisiitsorluunniit takornartaq ajunngisaarfiginissaa qunugaa... ajorluinnartunik pisoqartarpoq. Suut tamaasa tigualeraluarpai. Soorunami akiuuttoqarpoq - taakkulu periaatsit ajornerpaat atorlugit toquppai.

Isumannaannersanut ilaavoq Hogwarts. Isumaqarpunga Dumbledore tassatuaasoq 'Illit-kinaasoq-nalunngilat-mik' annilaangalersitsisinnaasoq. Taassuma taamanikkut atuarfiup saassunnissaa qunugiuaannarsimavaa."

"Kisianni tusassavat. Ataatat anaanallu tassaapput angakut uanga ilisarisimasama pikkorinnersaat ilisiitsullu pikkorinnersaat. Hogwartsimi atuaramik atuarfimmi ilinniarlut pikkorinnersaraat. Eqqumiilaaraluarpoq 'Illit-kinaasoq-nalunngilat' taamanikkulli imminerminut ilanngutitinniar simanngimmagit; kisianni ilisimasimassavaa Dumbledoremut qilersorsimavallaartut aammalu Taartoq sunnguamilluunniit attuumassuteqarfiginiannngikkaat.

Kingusinnerusukkut sunnerniarlugit misilikkaluarpaa... illit inooreersutit. Immaqa isumaqarsimagaluarpoq kimigii-serfigisinnaassallugit; immaqa toqunniaannarsimassavai. Nalunngisatuarput tassaavoq ukiut qulit matuma siornatigut iluartut ulluata unnuaani nunaqarfissinnut takkummat. Taamani illit ataasiinnarmik ukioqarputit. Illussinnukarpoq taava - taava...."

Hagridip kakkissarfik ipertooq kasarfimminiit amuaa pujortumilu siggartaatip siggarneratut nipitutigisumik kakkilluni.

"Utoqqatserpunga," oqarpoq. "Kisianni alianaqigami - ataatat anaanallu ilisarisimavakka, aamma inunnik taakku-natut inugitsigisunik nassaassaqaanngilaq - kisianni - nalunngilat kiap toqukkai. Taavalu - taavalu paasisaanngitsut

annerpaartaraat - illit ilanngullutit toqoriaraluarpaatit.
Nungunniassagassi illit ilanngullutit toqoriaraluarpaatit.
Imaluunniit toqoraanini nuannaqqissiutiinnarsimassavaa.
Toqunnissalli sapersimavaa!

Eqqarsaatiginikuunngisaannarpiuk qaanni ilisarnaatit
qanoq ilillutit pissarsiarisimanerit? Qileruunngilaq nalingin-
naasoq. Taama pisoqartarpoq ajortumik kimittuumillu a-
ngakkuarfigitikkaanni. Ataatat anaanallu toquppai, illorsilu
piuneerullugu - illilli suallanngilaatit, taamaattumik illit
tusaamasanngorputit, Harry. Inupalaaq taanna toqutsiniar-
luni aalajangereeraangat kinaluunniit annassinnaaneq ajor-
poq. Illit kisivit annapputit, Harry, aamma ukiuni 100-ni
ukunani ilisiitsut angakkullu pikkorinnerpaat tamaasa toqo-
reersimagaluarpai - McKinnon, Bones, Prewett - illillu taa-
manikkut annakkavit taamaallaat meeraaraavutit."

Maanna Harryp eqqaamasai naalliunnaqisumik annerna-
qisumillu takkussuupput. Hagridip oqaluttuarnerani qaa-
maneq eqqaaqqeriataarpaa. Aamma allamik amiilaarnarto-
rujussuarmik eqqaasaqarpoq; nipitoorujussuarmik peqqar-
niitsumillu illarpalunneq eqqaavaa."

Hagridip aliasupalulluni isiginnaarpaa.

"Uanga nammineq Dumbledorep naalakkiineratigut illu-
kumit ajunaarfiusumit tiguakkit. Taava akkavit ajavillu illu-
annukaappakkit."

"Taamaanngivippoq," akkaa Vernon oqarpoq. Harry
qisuariarpoq. Ilaqutariit Dursleykkut eqqaminiinnerat pui-
gorsimagaluarpaa. Akkaa Vernon sapiilleqqissimavoq assa-
nilu peqillugit Hagrid kamaqaluni nakkusersimavaa.

"Maanna tusarnaassavarma, nukappiaraq-aa," qatimaa-
laarpoq. "Akuerisinnaavara nalinginnaannginnerit; kisianni
tamanna sakkortuumik perorsaanerup naveersinerullu aaq-

qitsissinnaavaa. Angajoqqaatillu eqqaassagutsigit... aap, taakku eqqumütsorujussuupput, tamanna qularnanngilaq; aperissagummalu isumaqarpunga silarsuarmit maanngaanniit piuneerussaanissartik namminneq pisuussutigigaat pisassaralugulu. Pisassartik pivaat inuit eqqumütsut fiister-tartut angakkullu allat ilagereerlugit - uanga tupigutsanneqqaanga tusarakku qanoq pisimanersut. Nalunngittuarsimavara ajortumik naggateqarumaartut..."

Maanna Hagrid sofamiit pissippoq sialussiullu siaartartoq aseqqukoq aappalaartoq qaquaartoq kaasarfimminit ilorlermit ammullugu. Akkaa Vernonip tungaanut saatip-paa - soorlu panatut atuinnaraa - oqarlunilu:

"Mianersoqqussavakkit, Dursley - mianersoqqussavakkit - oqaatsimik ataatsimilluunniit oqaqqissanngilatit...."

Akkaa Vernonip qunusuillisaarnera tammarpoq inorujussuup sialussiutitoqaanit siaartartumit kapineqarnissani anni-laangaginermik. Iikkamut talulluarterpoq nipangerlunilu.

"Iluaallak", Hagrid oqarpoq anersaarulullunilu ingeqqil-luni. Tamatumuuna sofap qeqqa natermut tuppoq.

Kisianni Harryp akkani soqutiginnilaa. Suli apeqqutis-sarpassuaqarpoq - aammalu apeqqutimi akineqarnissaat erinitsaappaa.

"Qanormi Volde - piva - usi, utoqqatserpunga, Taanna - nalunngisat, qanoq piva?"

"Apeqqut pitsak, Harry. Silaannarmut tammaannarpoq. Tamanna pivoq unnuk taanna toqoriaraluaramisit, taama-tullu pisoqarnerata illit suli tusaamasaanerusunngortippaa-tit. Tamannali paasissaanngilaq. Takuat, tamatuma nalaani pissaaneqartorujussuannngorsimavoq - taavami sooq tam-massava?"

Ilaat oqarput toqusimasoq. Tamannali uanga isumaga

malillugu asuli oqarneruvoq. Qularaara inuttut toqusinnaanersaq. Allat oqarput arlaanni tasamani utaqqisoq piffissanngorpallu peqqarniitsumik pissaanilissuulluni uteqqikkumaartoq. Tamannali aamma upperinngilara. Inuit taassuma tapersersortai uatsinnut uteqqipput. Ilaat pissusilersorput soorlu sinnattorsimallutik aatsaat itertut; itersimanavianngikkaluarput uternissaminik eqqarsarsimasuugaluarpat.

Amerlanerusugut isumaqarpugut suli tasamaniittoq nukinili annaasimagai. Suliapalaani ajortut nangeqqissallugit sanngiuppallaalersimavoq. Tassami illit pissusilersornerpit suujunnaarsissimavaa, Harry. Unnuk taanna arlaannik pisoqarpoq - arlaannik, naatsorsuutigisimanngisaanik - uangalu nalulluinnarpara sunaasimanersaq. Kialluunniit ilisimanngilaa - kisianni illit arlaatigut navianarunnaarsissimavat."

Hagridip Harry kissalaartumik ataqqinningaarpasillunilu isigaa. Usorsisimaartussaagaluarluni nuannaartussaagaluarlunilu Harry isumaqarneruvoq paatsoortoqarsimassasq.

Qanoq ililluni angakkuusinnaagami?

Taamaattoqarsinnaanngilaq! Inuunini naallugu Dudleyp tiltuttagaatut aammalu aja Petuniap akkaa Vernonillu pisuutittagaattut inuusimavoq. Ilumut angakkuusimaguni, soormi ilani qangali narasinngortissimanngilai ineeqqamut toq-qorsivimmut mattunneqarami? Qanga silarsuarmi angak-kut annersaat ajugaaffigisimaguniuk, soormi taava Dudleyp arsatut isimmitsarsinnaajuarsimavaani?

"Hagrid," nipaatsumik oqarpoq, "isumaga malillugu kukkuvutit. Upperinngilara angakkuunera."

Kisianni Hagrid illarluni aallartippoq.

"Upperinngilinga? Annilaangaleraangavit nuannaale-raangavillu eqqumiitsumik pisoqartanngila?"

Harryp kissarsuut ammaannartoq sivikitsuaqqamik isiginnaarpaa. Massakkut eqqarsaatigeqqissaaruniuk taava..... pisut eqqumiitsut tamavimmik akkaanik ajaanillu kamatsitserujussuuartartut pisarsimapput nammineq eqqissi-veerukkaangami kamakkaangamilu... soorlu Dudleyp inupiluaraataanit tigusaagaangami arlaannik iliuuseqarluni annattarpoq... atuarnissani qunugigaangamiuk soorlu aja Petuniamit nujaajaasartunilluunniit nujaarutivilluni nujaajarneqarsimatilluni, ima pisoqartarpoq, nujai unnuap ingerlanerani naaqqittarlutik.... kingullermillu Dudleyp ajamma-
ni akiniaavoq, tassa pulateriaarsuk Brasiliamioq pulateriaarsuit inaannit qimaammat inuillu tatamitillugit.

Harryp Hagrid akillugu isigaa qungujullunilu. Hagridip akillugu qungujorujussuarfigaa. "Tassa takusinnaavat," inorujussuaq oqarpoq, "Harry Potter angakkuviuvoq - utaqqilaarit, Hogwartsimut piguit uitsatigineqarumaarputit."

Kisiannili akkaa Vernon akiuuteqqaarnani tunniutünnarnianngilaq.

"Oqarfigisorigaluarpakkit maaniiginnassasoq," qatimaaluppoq. "Stonewallip kommuneata atuarfiani atualissaaq, tamannalu qujaruttussaavaa. Allakkat eqqumiitsut allakkasi tamaasa atuareerpakka, nuannarinngilaralu piumasaqaate-qarassi eqqumiitsukujuppassuit pisiarissagai - ajaappiaq angakkuaat angakkuaatillu pillugit atuakkat aammalu..."

"Harry Hogwartsimut perusuppat, Mugglerip pualasuup ilitut ittup unitsissinnaanngilaa," Hagrid massuavoq. "Lily James Potterillu ernerat unitsissinnaanngilat! Silaqarpiarnavianngilatit taama isumalioruit.

Inunnguinnartorli atuarfiup atuartussanik nutaanik allattorsimaffianiilereerpoq. Silarsuarmi ilisiinnermik angakkuar-

nermillu atuariit akimannersaanni atuartussaviuvoq. Ukiut arfineq marluk qaangiunneranni ilisarsaajunnaassaaq. Inuusuttut allat pikkoreqatini atuaqatigilissavai. Tamanna immiini allannguutaalaassaaq. Aamma atuartitsisorilissavaa Hogwartsip atuartitsuini nallerneqanngisaannartoq, Albus Dumbled..."

"PILERSAARUTIGINNGILLUINNARPARA
UTOQQAPALAAP SIANIITSUP ANGAKKUARNER-
MIK NUKAPPIAQQAMIK ILINNIARTTTSINISSAA-
NUT AKILIUTEQARNISSARA," akkaa Vernon nillia-
voq.

Kisiannili maanna killissani qaangersimavaa. Hagridip sialussiut siaartagaq tiguaa niaqqunilu qulaallugu kaavitillugu. "MISILINNGISAANNASSAVAT...." nipitoorsuarmik nilliavoq, "UANGA - TUSAATILLUNGA - ALBUS DUMBLEDORE - AJUALLATSINNISSAA."

Taava sialussiummik siaartittakamik Dudley tikkuarpaa - qaamaneq tunguusaasaq qummoroortartut nipaattut nipeqarluni qaarpog. Nilliarpalunneq qataajaqersoq tusarsaa-voq sekundilu qaangiummat Dudley pississaalerpoq assaminik nuluni pualasooq patillugu. Puulukitut nilliavoq. Tunummut saammat Harry takuaa qarliisa nuluini quppakkut puulukip pamiua ersittoq.

Akkaa Vernon qatimaappog taavalu aja Petunia Dudleylu marluutillugit inip aappaanut nutsuppai. Matu tikikkamiuk unippoq Hagridilu annilaangarpaseqaluni qisimillugu. Taava inip aappaanut iserpoq, matulu qanngortillugu matupiloorneqarpoq.

Hagridip sialussiut siaartittagaq nakkuppaa uminilu ta-giartorlugit.

"Taamatut kamalertarnera ajorpoq," kanngusuppalulluni

oqarpoq, "aammami iluatsinngitsoorpoq.

Eqqarsaatigigaluarakkuuna nukappiaraq puulukinngortin-niarlugu, immaqali ima puulukiutigereersimavoq pamiuni kisiat amigaatigilersimallugu."

Harry uumisaarpaluttumik qissimippaa.

"Qujamasussagaluqaanga pisimasoq una Hogwartsimi kimulluunniit oqaatiginngikkaluarukku," oqarpoq. "Uanga, eeh - pissaanermik atueqqusaanngikkaluarpunga. Illit ornikkakkit allakkallu nassiukkakkit immannguaq taamaal-laak angakkualaaqusaavunga. Tamannaana pissutigalugu suliasamat angertunga..."

"Sooq pissaanermik atueqqusaanngilatit?"

"Hogwartsimi angakkussatut atuarnikuugaluarpunga, kisianni uanga - eeh - anisitaavunga, taama oqaatigilluaan-naraanni pitsaaneruvoq. Tassa ukiut pingasut qaangium-mata. Ajaappiaq angakkuaatiga napivaat allanillu iliorlutik. Kisianni Dumbledorep uninngatiinnarpaanga matuersaati-nik nakkutilliisunngortillunga. Inugissuuvoq taanna Dumbledore."

"Sooq anisitaavit?"

"Kingusippallaaleqaaq, aqagu ulapittussaavugut," Hagrid nipituumik aalajangersimarpaluttumillu nipeqarluni oqar-poq. Illoqarfiliassaagut atuakkat allallu pisiariartorlugit."

Kavaajarsuani qernertoq peerpaa Harrynullu miloriullu-gu.

"Ataani sinissinnaavutit," oqarpoq. "Soqutiginngilara eqi-tissagaluarpat. Imaassoraara kasarfiit ilaanni sininnartoqar-toq."

Aqqusineq Diagonalstræde

Aqaguani ullaakkut Harry ullaaralaaq iterpoq. Naak malugisinnaagaluarlugu qaammareersoq uinnianngilaq.

"Sinnattortungaana," imminut aalajangersimarpaluttumik oqarfigaaq. "Sinnattorpunga inorujussuup Hagridimik atilip ornikkaanga oqaluttuukkiartorlunga angakkut atuarianni atualissasunga. Uikkuma inimi toqqorsivimmi angerlarsimaffinniillunga itissaanga."

Nipitoorsuarmik kasuttorpaluttoqarpoq.

Aja Petuniaana matuklut kasuttortoq, Harry pakatsilluni eqqarsarpoq. Kisianni sulii uinngilaq. Sinnattuusimavoq nuannivissoq.

Tok. Tok. Tok.

Aap, aap," Harry tusarsaanngingajattumik oqarpoq. "Maannakkut makilerpunga."

Ingippoq Hagridillu qaatiguua oqimaatsoq nakkarpoq. Seqernup qaamanerata illuarapalaannguaq qaammartillugu qinngorfigisimavaa, sila qatsorsimavoq anorersuarunnarluni. Hagrid sofami uppikarsimasumi sinippoq uppiaqqallu kukii igalaamut kasuttorput. Avisimik siggummioqarpoq.

Harry tuaviinnaq makippoq. Nuannaangaarami soorlu ballonimik naamiittoqarluni. Tuaviinnaq igalaamukarpoq ammarlugulu. Uppik iserpoq aviisilu Hagridimut nakkartil-

lugu; taassumali tamanna itissutiginnigilaa. Taava uppik natermut tuppoq Hagridillu qaatiguua saassutilerlugu.

"Umaak, taamaaliornak!"

Harryp uppik peersinniarsarigaluarpaa, taassumali keeri-arpaa kavaajarlu tukkarlugulu sissorniarsaralugu.

"Hagrid!" Harry nipituumik oqarpoq. "Uppiuk...."

"Akilerniaruk," Hagrid sofamiit oqarpallappoq.

"Qanoq-aa?"

"Aviisip tunniunneranut akileqquvoq. Kaasarfiit misisso-riakkit."

Hagridip kavaajaa kaasarfiinnangajaarpasippoq.

Imaraalu matuersaatit, allunaasat, luftbøssit imassaas, aner-nerissaatit, tiit puussiaaqqat... naggataatigut Harryp aggor-simasorpaaluit nassaarai.

"Knutinik tallimanik tuneqiuk," Hagrid uernarpalulluni oqarpoq.

"Knutinik?"

"Aggorsimasuaqqat kanngussaasat pivakka."

Harryp aggorsimasat kanngussaasat mikisut tallimat nas-saarai uppiullu nissuni siaarpai, Harryp aningaasat ani-ngaasiveeqqamut amermt uppiup isigaanut aalajangersi-masumut ikiniassammagit. Taava igalaakkut ammasukku-tingivoq.

Hagrid nipituumik aatsaarpoq talinilu siaarlugit.

"Aallartariaqalerpugut, Harry. Ulapittussaavugut.

Londoniliartussaavugut atuarfimmilu atugassatit pisiaralugit."

Harry nikorfavoq angakkuarnermullu atortut aningaasat assamminiittut qimerloorlugit. Eqqarsaateqalerpoq nuan-naarneranik innarliisumik.

"Øh, Hagrid?"

"Mm?" Hagridip stövlersuani atiniaatigalugit oqarpoq.

"Aningaasaateqanngilanga - aammami tusaavat akkaa Vernon ippassaq unnukkut qanoq oqartoq.

Angakkuarnermik ilinniarnissara akilernianngilaa."

"Tamanna eqqarsaatigissanngilat," Hagrid oqarpoq ni-kuiitigaluni nutsanilu kumiitigalugit. "Immaqa isumaqarpu-tit angajoqqaatit qimagussimasut kingornussassaqaartin-gvivillutit?"

"Kisiannimi illuat sequminneqarpoq..."

"Kuultiutitik illuminiitinnigilaat, nukappiaraq-aa! Kisianni Gringottsiliaqqaassaagut. Angakut aningaaseriviannut. Pølsitorniarit, nilloraangamik ajoriinnagassaaneq ajorput - aamma unga illit inuunni kaagimik ussiinissamut naag-gaarnavianngilanga, tunineqassaguma...."

"Angakut aningaaseriveqaramik?"

"Taanna ataaseq kisiat pigaat, Gringotts. Nissiaqqanit ingerlanneqarpoq."

"Harry pølsituleruttoarluni pølsitukkami sinnera nakkaa-vaa."

"Nissiaqqat?"

"Aap - aamma kinaluunniit aningaaserivimmi tillinniar-toq annertuumik peqqissimisussaavoq, ilumut taama oqarfi-gissavakkit. Nissiaqqat unammillinnngisaannassavatit. Nalilinnik aningaaserivimmiititaqarniaraanni Gringotts silarsuarmi isumannaannersaavoq - soorunami Hogwarts eqqaassanngikkaanni. Usi Gringottsimi aamma pisassa-qarpunga. Dumbledore kiffartuutissagakku Hogwartsip suliaanut attuumassuteqartumik." Hagrid pingaakujuppasi-lerpoq. "Piumaffigiuartarpaanga suliaasat pingaarutillit suli-areqqullugit. Aallutit - Gringottsimiit assigiinngitsunik aal-lertillunga - takussagit, nalunngilaa tatigisinnaallunga.

Tassa, piareerpit? Ilaginiangga."

Harry Hagrid qaarsup tungaanut malippaa. Qilak nuia-qanngilaq, imarlu seqinermi qillerpoq. Akkaa Vernonip attartugaa umiatsiaq suli taleqqavoq, kisiannili anorersuarnerata kingorna umiatsiap naqqa immangaatsiarsimavoq.

"Qanoq ilillutit maanga pivit?" Harry aperaaq, eqqami-nullu qinerluni allamik umiatsiaqarnersoq takuniarlugu.

"Timmillunga," Hagrid akivoq.

"Timmillutit?"

"Aap, kisianni uunga ilaalluta utissaagut.

Oqarfigineqarpunga nassaarigukkit pissaanermik atuissanngitsunga."

Umiatsiamut ikipput. Harry Hagrid nakkuppaa eqqarsaatiginiarsarivaalu inorujussuaq qanoq ililluni timmisimasanersoq.

"Kisianni ajoraluaqaaq ipussagatta," Hagrid oqarpoq Harrylu ilisarnaamminik uumisaarpalluni qissimillugu.

"Imaattoq - umiatsiaq sukkatitissagalarukku tamanna Hogwartsimi oqaatigissanngilat, ilaa?"

"Soorunami taamaaliornavianngilanga," Harry pissaanermik annerulaartumik takorusulluni utaqqisinnaanngitsoq oqarpoq. Hagridip sialussiut siaartartoq aappaluttoq qaquaartoq kaasarfimminiit ammuteqqippaa, umiatsiaq taassuminnga marloriarluni anaalerlugu, taavalu nunap tungaanut aallaannaqaat.

"Sooq Gringotts ujajaaffigalugu misilinneqassanngila?" Harry aperivoq.

"Angakkuarnerit - serratit," Hagrid oqarpoq oqaluutigalunilu aviisi siaarlugu. "Oqartoqartarpoq uumasorujotarpoq aningaaseriviup aningaasanut toqqorsivianik nakkutillisuunik. Taava aamma toqqorsiviit taakku ujarneqaaqqaarta-

riaqarput - Gringottsip aningaaserivia Londonip ataani miilini hundredinik arlalinnik takissuseqarpoq. Nunap iluani samanerujussuaq inissisimavoq. Arlaannik iluatitsitsillutit tillittuugaluaruit qimaaniarlutillu taava qimaaniartillutit perlerlutit toqussaati.

Harry Hagridip aviisimik atuarnearni oqaatsit taakku eqqarsaatigai. Aviisi atuagaa ateqarpoq Siulittuisartut tusaa-taat. Harryp akkaa Vernonimit ilikkarsimavaa, inuit aviisimik atualeraangamik akomusersorneqarusunneq ajortut, kisiannili nipangersimaannarneq saperpoq. Siornatigut taama apeqquitsaqartigisimanngisaannarpoq.

"Angakkuarnermik Naalakkersuisoqarfik pisarnertut paatsiveerutitsitsillunilu tukatsitsivoq," Hagrid nipikitsuliorpoq aviisilu qupperarlugu.

"Ilumut Angakkuarnermik Naalakkersuisoqarfeqarami?" Harry piumassuserinnngisaminik aperivoq.

"Soorunami," Hagrid oqarpoq. "Dumbledorep naalakkersuisuunnissaa piumasarisimagaluarpaat, kisiannili Hogwarts qimakkumasimanngilaa." Taamaattumik utoqqaq Cornelius Fudge naalakkersuisutut atorfinitsippaat. Taanna sianillu-annngitsuuvoq. Ullut tamaviisa uppinnik Dumbledorem nassitsisarpoq suliassanut assigünngitsunut siunnersortikkusulluni."

"Kisiannimi naalakkersuisoqarfik taamaattoq sulerisar-pa?"

"Aap, takuat, naalakkersuisoqarfiup pingaarnerpaatut suliassaraa Muggerit paasitinneqannginnissaat nuna tamak-kerlugu ilisiitsoqarneranik angakkoqarneranillu."

"Sooq?"

"Sooq?" Umannguaq-aa qaatugit. Paasigunikku taamaat-toqartoq taava tamarmik ajornartorsiutinut tamanut aacqis-

sutissanik eqqumiitsunik nassaarnialissapput. Naamik, pitsaernerpaavoq allanit ilisimaneqalinnginnissarput."

Maanna umiatsiaq talittarfimmuut sallaatsumik talippoq. Hagridip aviisini pertiterpaa, marluullutillu majuartarfikkut ujaraasukkut majuarput aqqusernup tungaanukarlutik.

Sanioqquttut Hagrid nakkuppaat Hagrid Harrylu qimut-tuitsut unittarfianukarlutik illoqarfeeqqakkoormata. Inuit alapernaannerat Harryp tupiginngilaa. Hagrid allanit marloriaammik anneruinnarani aamma suut nalinginnaasut tamaasa tikkuartorpai soorlu biilit unittarfiini akiliisarfiit parkometerit, ima oqarluni: "Haa takuuk, Harry. Una qanoq isumaqarfigaajuk? Ila Mugglerit nassaarsiorarterat tupinnaq, ilaa?"

"Hagrid," Harry anertikkarluni oqarpoq, malinnaaniarluni arpattariaqarami. "Oqartutit-una Gringottsip aningaaserviani uumasorujooqartoq?"

"Aap, taama oqartarput," Hagrid akivoq. "Tiaavulu, uanga aamma tamaviaarlunga uumasorujuutitaarusukkaluaqaanga."

"Tumut?"

"Nukappiaraagallaramali uumasorujuutitaarusulerpunga -tassa maanna apuuppugut."

Qimuttuitsut unittarfiannut apuussimapput. Qimuttuitsoq Londoniliartussaavoq minutsit tallimat qaangiuppata. Hagridip Mugglerit aningaasaannik taasaminik ilisimasaqanngitsup aningasat pappialat Harrymut tunniuppai bilit-sisiniarniassammat.

Qimuttuitsunut ikimmata inuit silanngajaartutut isikkuppaat. Hagridip issiaviit marluk issiavigivai cirkusillu tupiatut isikkulimmik sungaartumik qalipaatilimmik nuersaalluni ulapippoq.

"Harry, suli allagarsiatit tigumiarpigit?" Aperivoq nuer-sakkaminilu qillat kisilerlugit.

Harry allakkat puussaat kaasarfimminiit ammuppaa.

"Ajunnigilaq," Hagrid oqarpoq. "Atorfissaqartitatit tamar-mik allattorsimassapput."

Harry pappiara siaarpaa. Taanna ippassaq unnukkut allakkat tigugamigit malugisimanngikkaluarpaa. Atuarpoq:

Hogwartsip ilisiinnermik angakkuarsaarnermillu atuarfia

Uniformi

Ukumi siullermi atuartut atorfissaqartippaat:

1. *Uliguat nalinginnaasut pingasut (qernertut)*

2. *Nasaq amitsukujooq nalinginnaasooq (qernertoq) ullukkut atugassaq.*

3. *Aaqqatit illugiit illersuutitallit (uumasorijuuq amianik assigisaanilluunniit)*

4. *Uliguaq ukiorsiut (qernertoq, selvinik qarsorsalik)*

Eqqaamallugu ilinniartut tamarmik atiisa atortuinut mersuun-neqarnissaat

Atuakkat

Ilinniartut tamarmik atuakkanik ukuningga peqassapput:

Serranermut ilitersuut nalinginnaasooq (aallarterlaa-nut), *atuakkiortoq Miranda Goshawk*

Ilisiinnerup oqaluttuarisaanera, *atuakkiortoq Bathilda Bagshot*

Angakkuarnerup isumaa, *atuakkiortoq Adalbert Waffling*

Allanngorsinnaanermik ilitersuut aallarnerlaanut, *atuakkiortoq Emeric Switch*

Naatitat pupiillu eqqumiitsut tuusintit, *atuakkiortoq*

Phyllida Spore

Imigassat nakorsaasiallu eqqumiitsut, *atuakkiortoq*

Arsenius Jigger

Uumasut tupinnartut piaqqiorfilu, *atuakkiortoq Newt*

Scamander

Taarnerp nukii, imminut illersorsinnaanermik ilitser-
suut, *atuakkiortoq Quentin Trimble*

Atortussat allat

1 *Ajaappiaq angakkuaat*

1 *Uunnaavik (aqerlumiit manngertumit sanaaq, angissuseq
nalinginnaasooq normu 2)*

1 *Imertarfiiit taamaaqqatigiit igalaaminermiit kusugaasamillu
krystallimit sanaat*

1 *Qinngussuaq ulloriarsiut*

1 *Oqimaaluttat kanngussat marluk*

*Ilinniartut aamma nassarsinnaavaat uppik ataaseq IMA-
LUUNNIIT qitsuk ataaseq IMALUUNNIIT naraseq*

ANGAJOQQAANUT EQQAASITSISSUTIGIS-
SAVARPUT ILINNIARTUT UKIUMI SIULLER-
MI NAMMINNEQ NERISASSAMINNIK NAS-
SASSANNGIMMATA.

"Taakku tamarmik Londonimi pisiarineqarsinnaappat?"

Harry tupigusulluni nipituumik aperivoq. "Aap, nalunngik-
kaanni sumi ujassanerlugit," Hagrid oqarpoq.

Harry siornatigut Londonimiinngisaannarsimavoq. Naak
Hagridip aqputaa ilisimarpasikkaluaraa malunnarpoq
assartuutit nalinginnaasut atorneri sungiusimanngikkai.

Assiaquttani ungalunilu kiggittarpoq, aammalu qimuttuitsunut nunap iluatigoortaatinut ilaaleramik issiaviit mikival-laarnerat qimuttuitsullu kigaappallaarnerat naammagittaalliutigaa.

"Muggerit qanoq ilillutik angakkuarnertaqanngitsumik inuusinnaappat?" Elevatorimiit nungullarnikumiiit qimuttuitsut nunap iluatigoortaait unittarfianniit aqqusernup tungaanut ilaaffigisimasaminniit anillutillu oqarpoq. Maanna aqqusernarmiilerput angallaffioqisumi. Aqqusernup sinai illugiillutik niuertarfippassuaqarput.

Hagrid ima angitigaaq inuit siuliini pisuttut sanioqqutile-raangatik avissaartariaqartarlutik allaat, soorlu Morsasip Imaq Aappaluttoq ikaarmagu. Harry Hagridip tunuatu-ngaaninniarsarivoq. Aqqutaani sanioqquppaat atuagaarniarfiit, nipilersuutaarniarfiit, burgerinik neriniartarfiit fil-mertarfiillu, kisiannili Harry aqqutaani takusaqanngilaq ajaappissanik angakkuaatinik pisiniafimmik ataasiinnarmilluunniit. Aqqusineq tassaaginnarpoq aqqusineq nalinginnaasoq nalinginnarnik inuppasualik. Ilumut ilumoorsinnaanerpa angakut kuultiuterpasuinik samani samanerujussuaq atiminni toqqorsivinni toqqortaartoq? Ilumut angakkuarnermik atuakkanik ilisiitsullu sanigutaannik tuniniaavimmik niuertarfeqarpa? Immaqa massakut pisut tamarmik salloqittaataapput ilaqutariit Dursleykkut uumisaarniarlugu piliaat? Harry taama eqqarsassagalarpoq nalunngitsuugaluaruniuk ilaqutariit Dursleykkut quiasaarsinnaassusermik annikitsunnguamilluunniit pigisaqanngitsut, akierlianilli suut tamarmik piviusuunngitsutut misigisimanarput. Kisiannimi Hagridip nassuiaatereerpaa suut tamarmik qanoq nassuiarneqarsinnaasut, Harryllu sooq taamaannersoq nalugalarlugu Hagrid tatigaa.

"Aajuna," Hagrid oqarpoq unillunilu. "Uunnaavik Ussiitsoq! Silarsuarmi tusaamasaavoq."

Imerniartarferujuttut pikataarpassittutut isikkullip silataani nikorfapput. Hagrid unissimanngitsuugaluarpas tikkuarlugulu Harryp malugisimanaviannngikkaluarpa imerniartarfimmik taamaattoqartoq. Inuit sukkasuumik sanioqquttarpaat, aammalu kialluunniit imerniartarfipalaannguaq qissiminneq ajorpaa. Isigisartagaat tassaapput atuagaarniarferujussuaq aqqusernup illuatungaaniittoq nipilersuutaarniarfilu illuatungaaniittoq. Allaanngivippoq Uunnaavik Ussiitsoq takusinnaannngikkaat. Harryp malugisoraa nammineq Hagridillu kisimik imerniartarfik takusinnaagitsik. Kisianni pisimasoq eqqumuitsoq tamanna sulii apeqqutiginnngikkaaluunniit Hagridip imerniartarfimmut iseqatigereerpaa.

Tusaamasaagaluqaluni taaqaaq ajukkunnarpasillunilu. Teqeqqumi arnat utoqqaat marlussuit issiapput immiartorfeeqqanillu likøritorlutik. Ataaseq pujortaammik takisuumik pujortaatitorpoq. Anguteeqqap portusuumik nasallip imerniartarfimmi imigassanik pisiniartitsisoq nujaqanngivisoq mamakujuttutut skumfidusitut eqingasulissimasutut isikkulik oqaloqatigaa.

Harry Hagridilu isermata oqaloqatigiinnerit tamarmik kipipput. Tamarmik inorujussuaq ilisarismarpasippaat. Aalateriffigaat qungujulaffigalugulu imigassaarniartullu immiartorfik tunniuppaa ima oqarluni: "Pisartakkat soorunami pissavat, Hagrid?"

"Massakkuunngitsoq, Tom. Maannarpunga allarlunnaq pillugu," Hagrid oqarpoq assassuanilu Harryp tuiinut inisillugu. Harry aqullaangajappoq.

"Ukorsiiaa," imigassamik tuniniaasoq oqarpoq Harrylu nakkutilerlugu. "Ila tupinnaraluttuaq tassaanerpa - naamik

taamaassinnaangilaq....?

Uunnaavimmi Ussiitsumi isersimasut nipaarutivipput. Allaangilaq isersimasut tamarmik anersaartorunnaarsimasut.

"Ila ukorsii, tupinnaraluttuaq," imigassamik tuniniaasutoqaq isussuppoq, "Harry Potter.... ajukkunnaraluaqaagut."

Nerriviup tunuanit ininnaaminiit anillappoq Harryllu tungaanut tuaviinnaq ingerlalluni qullilillunilu assai tigu-vai..

"Angerlamut tikilluarit, Potter, angerlamut tikilluarit."

Harryp naluaa qanoq oqassanerluni. Tamarmik nakkup-paat. Arnatoqqap pujortaatitortup pujortaatini milluarsua-taarpaa naak qamereersimagaluartoq. Hagrid seqinertut qaammaritsigaaq.

Taava isersimasut tamarmik uummaqquittutut ipput. Issiaviit natermi nipiliorpallulerput, inuillu Harry ornippaat. Assai tiguaat tikilluaqqungaarlugulu.

"Doris Crockford, tuppalleqaanga kiisami ilassisinnaale-rakkit."

"Usorsisimaarteqaarma, Potter, uannut usorsisimaarnar-poq ilassisinnaagakkit."

"Qangali naapinnissat erinigiuarsimavara - puuallap-punga kiisami piviusunngormat."

"Nuannaqaanga Potter, assorsuaq nuannaarpunga. Atera tassaavoq Diggle, Dedalus Diggle."

"Siornatigut takunikuuakkit!" Harry oqarpoq, Dedalus Digglip natsani eqqissiveerulluni katammagu.

"Pisiniarfissuarmi immitsinnut aporatta ilassillunga sikiffi-gaarma."

"Eqqaamavaa!" Dedalus Diggle pilerpoq ajugaasimaarlunilu ilani isigalugit. "Tusarpisiuk? Eqqaamavaanga!"

Harryp tamaasa assammillugit ilasseqqittariaqarpai - Doris Crockford iperagassaanngivippoq.

Angut inuusuttoq qarsungasoq tungaannut aggerpoq. Annilaangarpaseqaaq; isai tamanut isigisaqattaarput.

"Professor Quirrel!" Hagrid oqarpoq. "Harry, professor Quirrel Hogwartsimi ilinniartitsisussavit ilagissavaat."

"P-P-Potter," professor Quirrel ittoqerluni Harryp assaa tigugamiuk oqarpoq. "Nuannaaqaanga naapikkakkit."

"Angakkuarneq qanoq ittoq ilinniartitsissutigaaq, professor Quirrel?"

"Im-im-imminut T-taartut Pissaanerinit illersorneq," professor Quirrel ittoqerluni akivoq. Allaanngivippoq oqaatigisami eqqarsaatiginissaa qunugigaaluunniit. "I-imaanngitsoq i-i-isumaqarama il-illit a-a-atorfissaqartissagit, Harry Potter!" Eqqissiveqanngitsumik illarpoq. "N-naatsorsuutigaara m-m-aanna a-a-atuarfimmi atortussannik p-pisiniassasutit?" U-uanga n-nammineq ullumi v-v-vampyrit pillugit atuagarsisussaavunga." Taakku eqqaaginnarlugit annilaajummerpasippoq.

Kisiannili isersimasut allat professor Quirrelip Harrymik oqaloqateqarnera kipitippaat. Minutsit qulingajaat atorlugit tamaasa qimarratiginiarsarai. Kiisami Hagridip ilani nipangersippai oqarluni. "Ingerlaqqittariaqarpugut - pisias-sarpassuaqarpugut, Harry qaagit."

Doris Crockfordip Harry naggataarutaasumik assammippaa, Hagridillu Harry imerniartarfik aqqusaarlugu ingerlappaa imerniartarfiup tunuani anisariap tungaanut. Silataani allamik takusassaqaanngilaq taamaallaat eqqaaviit aqqusinermilu asfaltitikkami naasupiluit.

Hagridip Harry qungujuffigerujussuarpaa.

"Oqarfigaakkimmi ilaa tusaamasaasutit, Harry. Professor

Quirrelimut allaat takunerit tanngassimaarutigaa ittuuku-juutigalugulu - aap, ittuukujuttuaannartuugaluarpog, kisi-annili massakkut pisarnermit aatsaat taama ittuukujutsi-gaaq."

"Taama ingasatsigisumik sajullunilu ittoqertarpa?"

"Aap. Nallinnaqaaq. Kisianni silatoorujussuuvoq.

Taamanikkut teori ingerlakkallaramiuk ajoquteqanngilaq, taavali ukioq ataaseq sulinngiffeqarpoq ilinniartitsissutigi-sartakkani eqqartuinnarnagit misilinniarlugit... oqartarput Orpippassuarni Qernertuni aammik milluaasartut naapissi-magai. Aamma ilisiitsoq utoqqarsuaq ajortoq misillerfigisi-magunarpaa, taamaattoqavissimanersoq naluara - taama-nikkulli allanngorami angerlaqqikkamilu pissusitoqqani ateqqinngilaa. Ilinniartut ersigai ilinniartitsissutigisanilu ersigalugu. Naanguna sialussiutiga siaartittagaq?"

"Aammik milluaasartut? Iliisitsut ajortut? Harryp niaqua-ni tamakku tamarmik inissaqanngingajapput. Harryp aarle-ritsannera Hagridip maluginngilaa, tassami eqqaaviit con-tainerit qaavini qarmasissiat kisillugit ulapputigigamigit.

"Pingasut qummut... marluk siumut..." tusarsaanngi-ngajattumik oqaluppoq. "Harry, tunummut allorialaarit." Sialussiutip siaartittakkap nuuanik illup iigaa pingasoriarl-u-ni anaasarpaa.

Qarmasissiat anaaneqartut sajulerput qissallallutillu. Maanna qarmani putunnguaq erserpoq - alliarporpoq alliar-torpoq, sekundialunnguillu qaangiummata isaafferujussuup kusanarsaakkap saavaniilerput. Angingaarmat Hagrid pe-qinnani isersinnaavoq. Isaarissap illuatungaani aqqusineqar-poq ujaqqanik nunniutinik qallersorneqarsimasumik. Allaanngivippoq aqqusineq naaffeqanngitsuusaartoq. Takuneqarsinaanngilaq sumut naanersoq.

"Tikilluarit," Hagrid oqarpoq, "Diagonalstrædimut."

Harry tupaallannera illaatigaa isaarissallu tungaanut ajal-lugu iseqatigalugu. Harry tuaviinnaq tunummot qiviarpoq. Isaaffik kusanarsaarlugu sanaaq aanngareersimavoq; maannalu tunuanni qarmaq anillaffissaanngitsoq kiserngoruppoq.

Seqernup qinngornerisa niuertarfiup qaninnerup silataani-ittut uunnaavippassuit kanngussaat eqqorpaat. Uunnaaviit - angissutsit tamarmik - kanngussaat, aqerlut manngertut, søl-vit - namminneq qalattartut - imminut patigussinnaasut! Allagartap niuertarfiup qulaani nivingasup suut pisiassaa-nersut erseqqissumik oqariartuutigaa.

"Aap, taamaattoq pinngitsoornak pissavat," Hagrid oqar-poq. "Siullermilli aningaasaatit tigusariaqarpagut."

Takusassaqangaarmat Harry arfineq pingasunik illu-giinnik iseqarnissi kissaatiginerugualuarpaa. Niaqqi sumut tamaanga tunummullu saateqattaarpaa suut tamaasa isigeq-qissaarniarlugit. Niuertarfiit, nioqutissat silammot inissin-neqarsimasut tamaasa, inuit pisiniarlutik ingerlaartut. Arnap pualasuup nakorsaataarniarfiup silataaniittup sanioqqumma-ta niaqquni ileqimisaartorpaa oqarlunilu: "Uumasorujuit tingui, pundimut 17 Seglimik akillit, kakkaak akisut, silaa-russimassapput..."

Siggartarpalaaq nipikitsoq niuertarfimmiit taartumiit tusar-saavoq. Niuertarfiup allagartaa ima allassimavoq: Eeylopip uppeerniarfia - uppiit assigiinngitsut, hornuglit, oqaluffinni uppiit, uppiit issittormiut sløruglillu. Nukappiararpassuit Harry ukioqatai niuertarfiup saniutinik takutitsivianut iga-laamut qinngatik tutsillugit isiginnaarput. "Takuuk," Harry nukappiaqqat arlaat oqartoq tusaavaa, "Nimbus 2000 nutaaq - maannamut sananeqartut sukkanerpaartaat!"

Niuertarfeqarpoq uliguaarniarfinnik; niuertarfiit qinngus-
suarnik atortussanillu sölvinik sanaanik tuniniaasut, Harry
assinginik takusimanngisaannarpoq. Igalaani takussaapput
poortukkat imangertat tinguinik nimerissallu isaannik imal-
lit; atuagarpassuit angakkuaatinik imallit; allaatit suluut,
allaffissiat imusat pergamentit, puiasaaqqat imerpalasunik
angakkuarnermut atortunik imallit aamma qaammassuup
assingi ammalortut...

"Aajunalu Gringottsip aningaaserivia," Hagrid oqarpoq.

Tikissimavaat illorujussuaq qaqqorik marmorimik sanaaq
niuertarfiaqqat qulaallugit kisimi takooqqusoq. Matup qilla-
rissakkap kanngussammik sanaap saniani nakkutilliisoq
aappaluttumik sungaartumillu uniformilik nikorfavoq.
Tassaavorlu....

"Aap, nissiarraq-una," Hagrid nipaatumik oqarpoq, ma-
juartarfikkut qaqqorissukkut majuarlutik ornikkamikku.
Nissiarraq Harryminngaanniit niaqqumik ataatsimik mikine-
ruvoq. Taartumik silatorpasissumillu kiinaqarpoq inngigis-
sunillu umeqarluni. Harryp maluginiarpaa takisoorujussuar-
nik assaqaarlunilu isigaqartoq. Isermata sikitsiarpoq.
Torsuusaaqqami matu alla siumorpaat. Tamatumuuna matu
taanna sölvinik qillarissakkamik sanaajuvoq. Ima allasima-
soqarpoq.

Takornartaq, mianersorit
angummi tupinnartumik pissaaneqarpoq
Suleqqaaratik atuisut
ileqqorluutiminnik akiliuteqartarput
Allat aningaasaataannik ujarleruit
tegeqquni illullu uiguini tamani
taava tillitooq, mianersorit, neriutigaarput

erlinnartuutinit taakkunanit amerlanerusunik nassaasasutit

"Soorlu oqartunga maani tillinniartut sianilluanngitsuussaput," Hagrid pilerpoq.

Nissiaqqat nakkutilliisut marluk matu sölviusoq ileqqo-rissaarlutik ammarpaat inersuarmullu marmoriusumut isertillugit. Nissiaqqat hundredit arlallit nerriviit tunuanni ulappupput. Allaffissat takisuut allaffigaat, aggorsimasut oqimaalutaavinnut kanngussannut oqimaalutarpaat ujaqqallu illernartut allisitsiutitik mikroskopit atorlugit misissorlugit. Matut amerlangaarmata Harryp kisinniaraluaramagit taa-maatiinnarpai, nissiararpassuillu aningaaseriviliartorpassuit aquppaat isaatillugit anileraangatalu ikiortarlugit. Hagrid Harrylu karsimukarput.

"Iterluarit," Hagrid nissiaqqamut karsimiittumut oqarpoq. "Maannarpugut Harry Potterip toqqorsivianit aningaasanik aallerluta.

"Matuersaateqarpit?"

"Aap, maani arlaanniippoq." Hagrid oqarpoq, kaasarfimilu imai nerriviup qaanut ilioralerlugit.

Nagguteeramerngit seqummakut nissiaqqap natsorsuuserivianut atuakkamut kuerartoorpai. Nissiaqqap qinngani eqippaa. Harryp assiaqut sanianiittoq isiginnaarpaa takullugulu nissiaqqap rubiinit aamarsuartut aamaartutut angitigisut oqimaalutarai.

"Aajuna," Hagrid kiisami oqarpoq, matuersaallu kuultiusoq takutillugu.

Nissiaqqap qimerloorluarpaa.

"Ajorpasinngilaq."

"Aamma professor Dumbledoremit allakkanik nassar-punga," Hagrid pingaakujulluni pilerpoq. "Taakku

Nalunngilat-kina boks nummer syv hundrede trettenimiit-toq pillugu allagaapput."

Nissiaqqap allakkat peqqissaarluni atuarpai.

"Aap," oqarpoq, allakkallu Hagridimut utertillugit.

"Isumagissavara arlaata toqqorsivinnut taakkununga marlunnukalerussi ilitersuutissagaasi, Griphook!"

Nissiaraq alla Griphookimik atilik takkuppoq siuannullu pilluni utaqqilerluni. Hagridip nagguteeramernit kaasarfiminut manngussuutereamigit Harry ilagalugu Griphook malippaa. Saaffiginnittarfimmiit matut anisarfippassuit ilaasa tungaannut ingerlapput.

"Sunaana taanna Illit-Nalunngilat boks nummer syv-hundrede tretten?" Harry aperivoq.

"Imaaliallaannarlunga akisinnaanngilara," Hagrid oqarpoq. "Tassaana isertugarujussuaq Hogwartsimut tunngasoq. Dumbledorep tatigimmanga oqaasissakka mianersuutinnikkukkit atorfiga annaasinnaavara."

Griphookip matumik aammaappai matulu najummillugu. Harryp naatsorsuutigisimagaluarpaa inersuit marmoriinnaat takussallugit, kisiannili tupaallappoq torsuusamut ninnittumut qaarsoq ikuttarlugu torsuusaliarineqarsimasumut iseramik. Ikkani ikumatitaliat naaralaartut nivingapput. Ingerlaffigisaat ammut sivingaqaq, natermilu qimuttu-itsuaqqanut aqquteqarpoq. Griphook siggarpoq qamuteeqqallu qimuttuitsut aqqutaasigut tungaannut ingerlapput. Qamutininut ikipput - Hagrid ikiniasuarpoq - taava aallaannaqaat.

Aallaqqaammut ingerlarusaaginnarput torsuusarpassuit annivissaarunnartutut misinnartut arlalissuit ingerlavigalugit. Harryp aqqutaa alanngaarniarsarigaluarpaa - imalu ingerlaarput, saamimmut, talerpimmut, talerpimmut, saa-

mimmut, torsuusaq qiterleq, talerpimmut, saamimmut - aqqutertilli naggataatigut nakkutigiunnaarpaa. Qamutit perpaloqisut namminneq sumukarnissartik nalorpasinngilaat, tassami Griphookip aqunngilai.

Harry isai imaliliorput silaannaq nillertoq tungaannaanut supoormat, taamaakkaluartorli isini ammatiinnarniarsarai. Piffissap ilaani isumaqaleraluarpoq torsuusat ilaata isuani innermik anersaartumik takusaqarluni, tunummullu qiviapallappoq uumasorujorarsoralugu. Takusaqanngilarli. Ammuinnaq ingerlarusaarput, arlaannilu qaarusuk kusugalik aqqusaaramikku nunap iluatigut taseq sanioqquppaat. Qaarusummi kusugarujussuit assigünngitsut stalakitit stalagmittillu qaarusuup qilaani nivingapput.

"Paasisimanngisaannarpara," Harry Hagridimut nillia-voq, stalakitit staglamitillu suut assigünngissutigineraat?"

"Stalagmitit 'm'-eqarput," Hagrid oqarpoq, "taannalu pil-lugu massakkorpiaq annertunerusumik oqaasissaqanngilanga. Qamuternermik merianngulerunarpunga."

Qamutit matuaqqap eqqannguanut kiisami unimmata Hagridip kiinaa qorsuinnanngorsimasutut isikkoqarpoq. Hagrid qamutiniit niuvoq iikkamullu sivikitsumik ajapertariaqarluni, tassami seeqqi sajupput.

Griphookip matuarannguaq parnaarsimasoq ammarpaa. Pujorujussuaq qorsummik qalipaatilik aniavoq, alikkareermallu Harry tupigusunnermik nillerpoq. Toqqorsivimmi kuultinik mõnterpassuaqarpoq, sөлvinik mõnterpassuaqarluni kanngussannillu mõnterpassuaqarluni (tassa taakku Knutinin taaneqartartut).

"Taakku tamaasa illit pigaatit, Harry," Hagrid qungujup-poq.

Tamaasa Harry pigai - uppernanngilarluunniit.

Ilaqutariit Dursleykkut tamanna ilisimasimannngilaat, ilisimauugualuarunikku pingasunut kisitsisinnagu arsaarsimasagaluarpaat. Qasseriartutik naammagittaalliutigisarpaat Harryp nerisaqartinnera qanoq akisutiginersoq? Aajukulu pisuussuterpasuit utaqqiuarsimavaat, maani Londonip aqquernisa inuttoorsuit ataanni.

Hagridip Harry ikiorpaa mõntit ilai taskiminut ikiorarmagit.

"Aningaasat kuultit tassaapput Galleonit," nassuiaavoq. "Galleonimut ataatsimut Sølvseglit sytteniusarput, Sølvseglimullu ataatsimut Knutit niogtyviusarlutik; tassa taama nalunannigsigaaq. Tassa, atuarnissavit immikkoortuinut marlunnut siullernut naammattumik peqalerunarpuit. Sinneri maani isumannangitsumi paaritittariaqarpagut." Taava Griphook saappaa oqarlunilu: Taava boksimumt syvhundrede trettenukassaagut. Ajornanngippallu masakkut kigaannerusumik ingerlasinnaavugut?"

"Qamutit sukkassusaat ataasiinnaavoq," Griphook aki-voq.

Suli nunap iluanut ammut ingerlaqqipput.

kkatsikkiartorput. Silaannaq nillertikkiartuinnarpoq, immullu ingerlapiloortarlutik. Qamutit kkoorput Harrylu qamutit sinaatigut akuniarlugu qunnerup naqqani taar-
1. Hagrid anertikkarpoq isumatsallu-
junnagu tunuatigut tigoriarlugu nusul-

oks nummer syvhundrede trettenu matuersaaserfeqan-
gilaq.

"Tunuaamigit," Griphook pingaartorsiorpaseqaluni oqarpoq. Matup qulaa inussaminik takisuunik mianersooqqis-

saarluni tagiartorpaa, matulu aalluni nunguppoq.

"Kinaluunniit Gringottsip aningaaseriviani sulisuunngit-soq taamaaleriaraluaruni, matukkut toqqaannartumik mil-lugutissagalarpoq. Nakkutilliisut taqqamunga iserunik aat-saat nassaarissagalarpaat," Griphook oqarpoq.

"Qanoq akulikitsigisumik toqqorsivinni inoqarnersoq misissortarpisiuk?" Harry aperivoq.

"Atagu, immaqa ukiut qulit qaangiukkaangata," Griphook akivoq peqqarniippasittumik qungujulluni.

Arlaannik immikkut illuinnartumik toqqorsivimmi isu-mannaallisagaaqisumi uani toqqorsimasoqassaaq, Harry isumaliorpoq pissangaqalunilu alakkarlugu illernartuutit kusanarluinnartut pisuussutillu allat tupinnartut takussaso-ralugit. Kisiannili takoqqaarlugu allaanngilaq toqqorsivik imaqqanngitsoq. Taava takulerpaa poortugaarannguaq iper-tooq pappiaqqamik kajortumik puulik toqqorsiviup iluaniit-toq. Natermiippoq, Hagridillu tiguua kaasarfimmilu ilorliit ilaannut manngullugu. Harry alapernaasertorujussuanngo-ralarpoq, malugisinnaavaali paasiniaalluni qasuttuisaartus-saanani.

"Qaagit. Qamutitut pisorpaluttorsuarnut ikiniarit; uter-nitsinnilu oqaluffigissanngilarma. Pitsaanerpaavoq qanera matoqqatikkekku," Hagrid oqarpoq.

Sukkalisaaqalutik ingerlareeramik Gringottsip silataanii-lerput uisorersarlutillu. Harryp nalulluinnarpaa nissuni sor-leq nikorfatigissanerlugu, tassami taskimik tigumiarpog aningaasanik ulikkaavissumik. Niuertarfik sorleq iserfigeq-qaassanerpaa? Naak aningaasat takornartat tigumiami qanorpiaq naleqarneri nalugalarlugu, nalunngilaa inuu-nermini takusimasaminut naleqqiullugit amerlanerujussuar-nik tigumiaqarluni - Dudleyp aningaasat pisartagaanut

naleqqiullugit amerlanerujussuarnik.

"Atuarfimmi uniformissat aallartissutigisariaqarparput," Hagrid oqarpoq Madam Malkinillu tungaanut sikilluni. Allassimavoq: Madam Malkin; Uliguat qaquguluunnit atu-gassat. "Tusaagit, Harry, ajorissavinga Unnaavimmu Ussiitsumukalaaruma ataasinnguartaartorlunga? Gringottsip qamutaanut ilaaneq iluaageqaara allatullu ajor-nartumik nakussassaasertariaqarlunga." Hagrid suli immannguaq merianngusutut isikkoqarpoq, taamaattumik Harry kisimiilluni Malkinip niuertarfianut iserpoq annilaa-ngalaarluni.

Madam Malkin arnaquassaajuvoq mikisoq sillakullak .qungujulaartoq tungujuartumik aappaluartumik qalipaati-limmik atisalik.

"Hogwarts, ilaa ikinngutiga?" Harry isiinnartoq aperi-voq. Oqqaniluunnit nammineerluni ammanngitsoorpaa. "Tamaasa maani pigaagut - aamma angut inuusuttoq alla massakkorpiag maaniippoq atisassaminik oqattaarsiartor-luni."

Niuertarfiup tunuani nukappiaraq asingasoq, immikkuul-larissumik kiinalik issiaveeqqami nikorfavoq, arnaquassaap allap uliguua qernertoq takisooq kukkilisilersoraa. Madam Malkinip Harry issiaveeqqamut allamut nukappiaqqap sanianiittumut inissippaa angissusialu uuttortalerlugu.

"Hej," nukappiaraq oqarpoq, "illit aamma Hogwartsimi atuassavit?"

"Aap," Harry oqarpoq.

"Ataataga niuertarfiup saniani niuertarfimmi allamiippoq atuagarsiniullunga, anaaagalu aqqusernup ilaanut allamu-karpoq angakkuarnermut atortussara ajaappiassara pitsaa-soq pisiartaarlugu," nukappiaraq oqarpoq. Qasunartumik

pingaakujuttumik nipeqarpoq. "Eqqarsarpunga kingorna saniutit sukkaniutit takunialerukkit nassarniarlugit.

Paasisinnaanngivippara sooq nammineerluta saniutigut uki-umi atuarfissatsinnut siullermut nassarsinnaannginnerigut. Ataataga pinngitsaaliniarpara taamaattumik piseqqullugu - taava saniut arlaatigut atuarfimmud isertortumik eqqunniar-pa."

Nukappiaq amiilaarnaqisumik Dudleymut eqqaanarpoq.

"Nammineq saniuteqarpit?" Nukappiaraq ingerlaqqilluni oqarpoq.

"Naamik," Harry oqarpoq.

"Quidditch pinnguaatigisarpiuk?"

"Naamik," Harry akivoq eqqarsaatigalugulu Quidditch sunarpiaanersoq.

"Uanga pinnguaatigisarpara - ataataga oqarpoq pinerlunerussasoq kollegianni unammisussatut toqqarneqanngik-kuma. Nalunngiliuk kollegiami sorlermi najugaqassanerlu-tit?"

"Naagga," Harry oqaqqippooq sianiitsutullu misigisimaler-luni.

"Aammami kialluunniit atuarfimmud pitinnani naluaa sumi najugaqassanerluni." Uangali nalunngilara Slytherinimi najugaqassallunga. Ilaquttakka tassani najuga-qartuarsimapput - takorlooriaruk Hufflepuffimi najugaqar-titaanissaq. Uanga isumaliorpunga tassani najugaqassaga-luaruma ingerlaannaq atuarfik qimanniarlugu, illit qanoq isumaqarpit?"

"Mmm," Harry oqarpoq neriukkaluarlunilu oqaloqati-giinnermut soqutiginarnerusumik ilanngussaqaarsinnaassal-luni.

"Ila ukorsii, angut una takulaariaruk!" Nukappiaraq oqa-

riataarpoq niuertarfiullu saavani igalaarsuarmut sikitsiarluni. Hagrid silataani nikorfavoq Harrylu qungujullugu, sikut vaffelit marluk angisuut tikkuaatigalugit, ussersorporlu isersinnaanani.

"Hagridiuna," Harry oqarpoq. Kiisami nukappiaraq nalusaanik oqaluttuassaqaarfigilerpaa. "Hagrid Hogwartsimi sulivoq."

"Sunaaffa," nukappiaraq oqarpoq, "tusaamavara. Kiffaavoq, ilaa?"

"Matuersaatinik nakkutilliisuvoq," Harry oqarpoq, misigilerporlu nukappiaraqatini nuannariunnaariartorlugu.

"Aap, ilumoorputit. Aamma tusarpara kinguarsimalaartuusooq - atuarfiup nunaataani illuaqqami najugaqannguat-siartooq. Taava aalakuuleraangami - akulikitsumik aalakoor-tarami - angakkuarniarsarisarpoq. Tamatumalu kingunerisaanik siniffini ikuallatsittoortarpaa."

"Uanga isumaqarpunga inutsialaasooq," Harryp aappani soqutigerpasinnagu oqarpoq.

"Taama isumaqarpit?" Nukappiaraq mitallerpasilluni oqarpoq. "Sooq ilagivaatit? Naak angajoqqaatit?"

"Toqugamik," Harry soqutigisaqarpasinnani oqarpoq. Oqaatigisani nukappiaqqamut itisilerusunngilaa.

"Sunaaffa, tamanna ajuusaarutigaa," aappaa oqarpoq nanertorneqarpasingaarnanili. "Kisiannimi uagut ilagaagut, ilaa?"

"Anaanaga arnaqquassaajuvoq ataatagalu angakkuulluni, tamanna pisoralugu?"

"Isumaqqanngivippunga allat silarsuatsinnut isertittariaqarigut." Imaluunniit, illit qanoq isumaqarpit? Allat uatsitut innigillat. Uatsinnut assingunissamut perorsarneqarsimanngisaannarput. Ilaasa Hogwartsiluunniit tusarsimanngi-

saannarpaat, aatsaallu tassanngaanniit allagarsigunik ateq taanna tusassallugu. Ilaa ingasak. Isumaqarpunga angakkut kinguaariitoqqat pigiinnarnissaat ataqqineqartariaqartoq. Qanorpiarmi illit naggateqarpit?"

Sulili Harry akerianngitsoq Madam Malkin akuliuppoq. "Tassa naammassivutit, uumaannguaaq," Harrylu issia-veeqqamiit oqiliallalluni pissippoq. Maanna periarfissaqalerpoq nukappiaraq naalliunnartoq qimassallugu.

"Hogwartsimi takussajunnarsivugut," nukappiaraq oqarpoq.

Harry anigami Hagridimillu sikumik tunisikkami oqaassisaaleqeaaq (siku sukkulaatilik hindbærilillu qaqqortarisani nakkalatserfigineqarsimasoq nerivaa).

"Suit?" Hagrid aperivoq.

"Sunngilanga," Harry salloqittaavoq. Unipput allagassiamik sulunnillu allaatinik pisinarlutik. Harry nuannaatsappoq puiaasaq pilikkimik imalik allatsillunilu qalipaataa allanngorartartoq nassaarigamiuk. Niuertarfik qimakkamiku aperivoq: "Hagrid, Quidditch sunaava?"

"Uumannguakasiik-aa, puiortuaannarpara qanoq ilisimasakitsigisutit - ila tupinnaraluassusia, Quidditch sunaasorluunniit naluviuk?"

"Sianiinnerusunngortinnaveersaarniannga, taama sianiit-siginngilanga," Harry oqarpoq nukappiarlu asingasoq Madam Malkinimi naapitani oqaluttuaralugu.

" - taava oqarpoq Mugglerit meeraat tikilluaqqusaasariaqanngitsut..."

"Illit Muggleriunngilluaasarputit.

Nalunngitsuugaluaruniuk kinarpiaasutit.... Eqqaamassavat, angakkuinni alliaartorsimaguni illit pillutit oqaluttuat tusartarsimassagai. Tassami nammineq takuat Unnaavimmi

Ussiitsumiittut takugamitsit qanoq pissusilersortut.
Nalulluinnarpaa suna eqqartornerlugu. Angakkut pikkorin-
nerpaat naapissimasakka ilaqutariinnit
Mugglerininngaanneersuupput - soorlu illit anaanat asser-
suutiginnartigu! Aamma eqqarsaatigeriaruk qanoq ittumik
qatannguteqarnersoq!"

"Kisiannimi Quidditch sunaagami?"

"Tassa uagut timersuuterput. Angakkut timersuutaat.
Taanna Mugglerit silarsuaanni arsaannertut pingaartigaaq.
Kikkut tamarmik Quidditch malinnaaffigaat. Silaannarmi
arsartoqartarpoq saniutillu ipuinik arsartoqartarluni. Arsat
sisamaapput - kisiannili malittarisassat nassuiarnissaat ajor-
nakusuulaarpoq."

"Slytherin aamma Hufflepuff suuppat?"

"Tassa atuarfimmi kollegiat ilaat atuartut najugaqarfii
marluk. Katillugit sisamaapput. Tamarmik oqartarput ilin-
niagasserituut poqiitsullu Hufflepuff najugaqarfigisaraat,
kisianni..."

"Hufflepuffimi najugaqarnissara eqqoriarsinnaavara,"
Harry nikallungarapasilluni oqarpoq.

"Hufflepuff Slytherinimut naleqqiullugu pitsaaneroqaaq,"
Hagrid sukannersumik nipeqarluni oqarpoq. "Angakkut
Taartumik illersuilersut tamarmik Slytherinimi najugaqarni-
kuupput. Illit-kinaasoq-nalunngilat taakkua ilagaat."

"Vol - eeh - Illit-kinaasoq-nalunngilat aamma
Hogwartsimi atuarnikuugami?"

"Aap ukiorparujussuit matuma siornatigut," Hagrid aki-
voq.

Harry atuarfimmi atuagassai niuertarfimmi Flourish &
Blottsimi pisiaraat. Atuagaarniarfimmi tassani atuagaasiviit
qilaaq tikillugu portussuseqarput, taakkulu atuakkanik

amminik ungalulinnik aqqusinermi pisuinnaat aqqutaanni ujarattatut angitigisunik ulikkaarput aammalu atuagaqarpoq siilkinik ungalulinnik frimærkitut mikitigisunik. Atuagaqarpoq eqqumiilluinnartunik ilisarnaatilinnik - aamma atuagaqarpoq qupperneru naqinneqanngitsunik. Taakku Dudleyp atuanngisannartup piumassagaluaqai.

Harryp atuagaq Vindictus Viridianip atuakkiaa Perloqqusinerit angakkuarnerlu (ikinngutit angakkuakkit akeqqatillu akiniariaatsinik nutaanik akiniakkit. Nutsanik katagaaneq, seeqqut nukillaarnerat, oqqanik qilersineq allarpassuillu) atualeruttora Hagridip pinngitsaalillugu peersippaa.

"Dudleymut ilisiissutissannik pitsammik nassaarusuinnartungaana."

"Oqanngilanga isumassarsiapalaasoq, kisianni Mugglerit silarsuaanni angakkuuqqusaanngilatit, taamaallaat pissutsit immikkut illuinnartillugit taamaalioqqusaavutit," Hagrid oqarpoq. "Aamma qanorluunniit pisoqassagualarpat atuaqqaartinnak angakkuarsinnaanavianngilatit. Atuarujussuaqqaartinnak allat killiffiat angunavianngilat."

Hagridip Harry uunnavimmik kuultimik kusanaqisumik piseqqunngilaa ("allattugaatinni allassimavoq aqerloq manngertuussasoq"), kisiannili angakkuarnermut atugassamut imerpalasumut uuttuut pitsassuaq pisiaraat. Aamma qinngussuaq ulloriarsiut kanngussak pisiaraat. Kingorna nakorsaataarniarfik soqutiginaqisoq pulaarpaat, tipikkaluar-mat tamanna soqutiginagu. Manniit oqulliillu oqussunnit-sut tikkanik tipeqarpoq. Natermiipput nappartat suugaluar-nersunik imerpalasunik sarajuttunik imallit; qummuattat naatitanik, sorlannik panertitanik nakorsaatinillu panertita-nik qalipaasikkanik imallit sumi tamaani iikkami ilisivin-

niipput. Qilaamiit allunaasani nivingapput timmissat meq-
qui qilertat, tulatorissat kukiillu. Hagdridip angut nerriviusap
pallunngaviup tunuaniittoq aperaa akuutissat assigiinngit-
sut Harrymut nassiussinnaanera, tamatumalu nalaani
Harry nammineerluni niuertarfinmi qimerluuilerpoq.
Aajuna nersutip qaamigut ataatsimik tuugaajusallip tuugaa-
va sœlvimik qalligaq 21 Galleonenik akilik aammalu aajuku
sullernit sikannertuut isivaraat uisorilasut (alussaateeqqa-
mut Knutit tallimat).

Nakorsaataarniarfiup silataani Hagridip Harryp allattor-
simasuutai qimerloorpai.

"Taava angakkuarnermut ajaappiassat amigaatigiinnaler-
parput - aamma soorunami inuuinni tunissutisiassat sul-
pisiarinngilara."

Harryp malugisinnaavaa aappillerluni.

"Pisariaqanngilaq...."

"Nalunngilara pisariaqanngitsoq pitsinnissat. Kisianni
tusaariarit. Uumasumik tunerusuppakkit, taamaattumimmi
pigisaqartariaqavipputit. Kisianni narasiussanngilaq; narat-
sit ukiut arlallit qaangiummatale mutiujunnaarput, ilavillu
illaruaatigiinnassavaatsit narasiuteqaleruit - uanga aamma
qitsuit nuannarinngilakka, tangajortittarpaannga.

Isumaliorpunga uppimmik tuniniarlutit. Meeqqat tamarmik
massakut uppittaarusupput. Uppiit iluaqutaasorujussuup-
put. Allakkisartissinnaavatit allanillu suliaqartillugit."

Minutsit 20-t qaangiummata Eeylopip Uppeerniarfia
qimappaat. Qimataat tarrajussimaqaaq suluppalulluni up-
piillu isaat ujaqqatut illernartutut qillaallattarput. Maanna
Harryp angallappaa timmissanut iniliaq uppimmik issittor-
miumik kusarnartumik imalik. Timmiaq arnaviaq sinillua-
qaaq niaqqi sulumminik assersimallugu. Hagrid qutsavigi-

gamiuk ittoqinngitsoorsinnaasimanngilaq isumaliorporlu professor Quirrelitut nipeqarluni.

"Taama suunngitsigisoq," Hagrid ittoorpasilluni oqarpoq. "Paasiinnarpara ilaqutariinni Dursleykunniikkallaravit tunissutisivallaartarsimanngitsutit. Atagu, massakkut taamaallaat Ollivanders amigaatigaarput - pisiniarfik taanna angakkuaammik pisiniarfissaqqissutuaavoq. Ollivanders pitsaanerpaanik peqarpoq."

Angakkuaat... tassa Harryp qilanaarinerpaasaa.

Niuertarfik kingulleq taanna mikisuararsuavoq upperatarsinnaasutullu isikkoqarluni. Matup qulaatigut naqinnernik qarsorsimasunik kuultinik allassimavoq Ollivanders: Ajaappissanik angakkuaatinik kusanartunik ukioq 382, kristusip inunngornera sioqqulluguli pilersuisoq. Ajaappiaq angakkuaat ataasiinnavik igalaami pujoralaaqisumi saqqummersinneqarsimavoq akitsimut aappallarissuuk qilipaatilimmut inissinneqarsimalluni.

Isermata niuertarfiup tunuatunganiit sianertoqarpaluppoq. Niuertarfiuvoq mikisuararsuaq tattuunnartoq. Sunnguamilluunniit pisataqanngilaq issiavik uppeqqaasooq iikkamut ajanneqarsimasooq eqqaasanngikkaanni.

Harry utaqqiniarluni ingippoq. Tamaaniinnermini eqqu-miitsumik malugisaqarpoq - allaanngivippoq atuagaateqarfimmi sukannersumi aalajangersimasunillu najoqqutalimmi isersimalluni; Apeqqutissarpassuaqaraluarluni apeqqutissanni apeqqutiginnitsoorpai eqqanilu isiginnaalerlugu.

Maanna takulerpaa ikani iikkap akiminiuttup nalaani illerfi-usaarpassuit amitsukujuut qaleriiaarluaqqissaarlugit inissinneqarsimasut. Qilaaq tikiivillugu qaleriiaarneqarsimapput tusinterpassuugunarlutik. Misigilerpaa pukusummini nutsani quinannarsisut. Inimi nipaanneq pujoralallumi

allaanngivippoq angakkuarnermik isertortumik ulikkaartut misinnartoq.

"Aluu," nipi sallaatsoq tutsiuppoq. Harry pissippoq Hagridilu tupannermik qisuariarpoq, tassami Hagridip tungaaniit neeqquluppallunneq eqqumiitsoq tusarsaavoq.

Angut utoqqaq saavanni nikorfavoq. Isersui angisuut qarsungasut inimi taartumi qaammatitut qinngorneqarput.

"Kutaa," Harry ittoorpasilluni oqarpoq.

"Aap kiisami. Taannaqami takunissat ilimagilerlugu taku-innaqaakkit, Harry Potter," angut oqarpoq oqaatsinilu aallartinnermisut nangillugit. "Isitit allaanngivippu anaanavit isai. Soorlumi ippassaannaq maanga isertoq ajaappiaq angakkuarnermut atortoq siullerpaq pisiariniarlugu. 10 1/4 tomitut takitigisoq, pallermit najunngaruminartumit sanaaq. Angakkuarnissamut ajaappiaq pitsassuaq."

Ollivanderip Harry qanillattorpaa. Harry kissaammigaluarpoq angut uisorissasoq. Isai selvitut qalipaattillit amiilaa-ri-larpai.

"Akerlianilli ataatavit ajaappiaq qisummik aappalaartumik mahognimik sanaaq piumaneruaa. Tomminik aqqanilinnik takissusilik. Qituttoq. Ninngunerulaartoq allanngorarnissamut piukkunnartoq. Oqaluttuukkakkit angajoqqavit suna piumanerugaat, taava nassuiaattariaqarpakkit ajaappiap angakkuaatip nammineerluni piginnittussani angakkoq ilisiitsorluunniit nassaa-saraa."

Ollivanderip Harry maanna ima qanillitigaa qinngamin-nik attuussinnaallutik allaat. Harryp tarrani Ollivanderip isaani angisuuni takusinnaavaa.

"Tassalu sumi...?"

Ollivanderip Harryp qaani qileroq inussaminik takisuumik attorpaa.

"Ajoraluartumik nassuerutigissavara ajaappissap angak-kuaatip uanga tunisama taamatut pisoqarnera, tassa illit qileruninnerit, pisuussutigigaa," nipaatumik oqarpoq. "13 tommer affarlu. Ajaappiaq tunisara taanna ninngusooru-jussuuvoq. Sakkoq taanna pissaanilissuuvoq assaallu kuk-kusut.... Nalunngitsuugalarukku ajaappiaq taanna pissuti-galugu qanoq pisoqassasoq, taava...."

Niaqqi ileqimisaartorpaa Harryllu oqiliallaatigeqisaanik Ollivanderip Hagrid takoriataarpaa.

"Rubeus! Rubeus Hagrid! Takoqqillutit nuanneq... Orpik manngertoq, tommit 16-it, najunngaruminartorujus-suaq, ilaa taamaappoq?"

"Taamaalluinnarpoq. Ilumoorputit."

"Ajaappiaq pitsassuuvoq. Kisianni tusarpara anisitaagavit ajaappiaq qeqqatigut napigaat, taamaappa? Ollivander oqarpoq tassanngaannarlu mersernarpasilerluni.

"Aap, taamaaliorput," Hagrid oqarpoq. "Kisianni qisuit naffakut marluk sulii pigaakka." Isumalluarpalulluni piler-poq.

"Kisiannili atornissaat qunugaat, ilaa?" Ollivander sak-kortuumik oqarpoq.

"Soorunami naamik," Hagrid tuaviinnaq oqarpoq. Harryp maluginiarpaa taama oqarnermini sialussiutini siaartartoq tigulluartiteraa.

"Hmmm," Ollivander oqarpoq Harrymullu saaqqitsin-nani Hagrid mersernartumik isigalugu. "Atagu, Potter. Takulaariarlara." Uttuut imusartagaq sölvinik kisitsisitalik kaasarfimminiit ammuppaa. "Angakkuassagaangavit tallit sorleq atortarpiuk?"

"Talerpiuvunga." Harry oqarpoq.

"Assat siaaruk. Aap, taamatut." Harry uuttortarpaa tuia-

niit tikianut, paffianiit ikusianut, tuianiit natermut, seeqqua-
niit unianut aammalu niaquata tunua ilanngullugu.
Uuttortaanermi oqarpoq: "Ollivanderip ajaappiai tama-
vimmik angakkuakkatut tupinnartumik sunniisarput,
Potter. Nersutit qaamikkut ataatsimik tuugaajusallit, enhjør-
ningit meqqui, uumasorujuit tattaat kimærillu nassui ator-
tarpagut. Ollivanderip ajaappiai tamavimmik assigiinngillat,
soorlulusooq nersutiniq qaamikkut ataatsimik tuugaajusa-
linnik, uumasorujunnik kimærinillu assigiinnik peqanngit-
soq. Aamma naatsorsuutigissavat Ollivanderip ajaappiaanit
allaanermik angakkuarniaruit inernera pitsaanerunavian-
ngitsoq."

Harry takuleriataarpaa uuttuut imusartagaq massakkor-
piaq sorluisa akorninik uuttortaasoq tigummineqarani nam-
mineerluni uuttortaavataartoq. Ollivander illerfiusat qaleri-
iaarsimasut ujaasiffigalugit ulapputigai uuttuullu tigummi-
unnaarsimallugu.

"Naammaqaaq," oqarpoq. Taama oqartorlu uuttuut imu-
sartagaq natermi imuvoq. "Atagu, Potter una misileriaruk.
Orpik qisussiassaq uumasorujuullu tattai. Tomminik quli-
ngiluanik takissuseqarpoq sulissutigalugu iluarpoq eqaallu-
nilu. Misileriaruk"

Harry ajaappiaq angakkuaat tiguaa (sianiilaartutut
misigisimavog) silaannakkullu aalatillugu. Ollivanderilli
ingerlaannaq arsaarpaa.

"Aajuna ajaappiaq ahornimik sanaaq nersutillu qaami-
gut ataatsimik tuugaajusallip nujaanik akulik. Tomminik
arfneq marlunnik takissusilik. Annernartumik anaasisar-
poq. Misiliguk..."

Harry misilippaa - ajaappiarlu silugutileruttoraalu
Ollivanderimit arsaarneqariikatappoq.

"Naamik, naamik - aajuna, qisuk manngertoq qernertoq kimærillu nassuanik akusaq, tomminik arfineq pingasunik affarmillu takissusilik. Misiliguk, qaa, massakkut!"

Harry misileqattaarpaa. Nalulluinnarpaa Ollivanderip sumik piumaffigineraani. Ajaappissat oqattaarneqartut atorsinnaanngitsutullu nalilerneqartut nerriviup uppeqqa-jaasup qaavani amerliartuaarput, Ollivanderili qasusuilluni illerfiusanit ajaappissanik nutaanik ammusuuiuarpoq. Ammussukkani amerliartuaartillugit nuannaarnera anneru-leriartuinnarpog.

"Pisiniartoq piuminaatsoq? Eqqissiinnarit. Nioqqutima akornanni ajaappissat kukkuneqannginnersaat nassaaris-saqqaarparput - immaqa imaaliorutta - uffami - una misile-riartigu allaanerugaluqaq - orpimmik kapinartulimmik sanaajuvoq kimærip nassuinik akusaq, tomminik aqqanilin-nik takissusilik, taanna pitsaalluinnarpog misileriaruk."

Harry ajaappiaq tiguaa. Kissarnera inussaminut sia-ruaattoq malugaa. Ajaappiaq niaqquni qulaallugu qangat-tarpaa angakkuariartuusaarlunilu. Ajaappissap nuuaniit innaallannerit aappaluttut kuultiusullu qummoroortarner-tut inimi siaruaapput. Akunnerminni isiginnaalerpaat innaallannerit silaannaap ujaraatut ikumasutut qitillutillu-sooq pissusilersortut. Hagrid qiimmattarpoq assanilu pattal-lugit Ollivanderilu suaarpoq: "Torrak! Aap, taamaassaaq, kusanaq. Ila tupinnaraluttuaq... tupinnarlunilu eqqu-miik..."

"Utoqqatserpunga," Harry oqarpoq, "kisianni sunaana eqqumügiiviuk?"

Ollivanderip Harry nakkuppaa isiminik annernartunik.

"Ajaappissat angakkuaatit tunisakka tamaviisa eqqaama-vakka, Potter. Ajaappissat ataasiakkaarlugit tamaviisa.

Pissutsit imaapput. Ajaappiavit sananeqaataa kimærip nas-sua nassunnit marloqiusaneersuuvoq. Tassa ajaappissanut marlunnut naammassimavoq. Eqqumiilluinnarpoq paasi-narsimmat illit ajaappissamut taassumunngarpiaq toqqarne-qarsimagavit, tassami ajaappissap uuma asserluinnaata - aap asserluinnaata qaanni qilerunitsippaatit."

Harry annilaarpoq.

"Aap, ajaappissap aappaa tomminik tretteninik affarmillu takissuseqarpoq. Tupinnaqaaq suut tamarmik aaqqittarma-ta. Ajaappissap angakkuaatip inuttassani angakkoq nammi-neq qinertarpaa. Iimagivara illit annertuumik suliaqarnis-sat naatsorsuutigissagipput, Potter. ... ilumoortumik oqas-sagaanni taamaappoq. 'Angut-taanna-oqaatigeqqusaanngit-soq' aamma suliarujussuarnik naammassisaqarpoq - sooru-nami ajorluinnartunik naammassisaqaraluarpoq, kisiannili suliai misinnangaartuupput."

Harry sajulerpoq. Qularivaa ilumut Ollivander nuanna-rinerlugu. Ajaappiartaani Galeoninik arfineq marlunnik akilerpaa niuertarfillu qimammassuk Ollivanderip ataqqin-nippalulluni niaqqi sikitippaa.

Ualeriivissoq seqinerlu pukkilivissimasoq Harry Hagridilu Diagonalstrædimut uterlutik apuupput ingerlaqqillutillu qar-makkoorlutik isaaffikkut anillutik. Unnaavimmut Ussiitsumut isermata inuerutivissimavoq. Aqqusinermullu anillaqqikkamik Harry oqaaseqanngivippoq.

Maluginngilaaluunniit poortukkanik eqqumiitsunik tigumi-arlutik qimuttuitsunut ikigamik inuit imminnut nakkussine-rat tupigusunnerallu pingaartumik Harryp uppiutaa Harryp saavani sinittoq takuleramikku. Paddingtonip qimuttuitsu-nut unittarfianut pigamik qimuttuitsunit niupput elevatorer-

lutillu aqqusinermukarlutik. Hagridip tuivimigut pattalaarmani aatsaat Harryp eqqani maluginiaqqilerpai.

"Qimuttuitsoq ilaaffissat aallartinnagu tamussernissatsinut piffissaqalaarpugut," oqarpoq.

Burgerinik nerisassaminnik pisivoq, cafeteriallu issiaviinut plastikiusunut ingipput neriniarlerlutillu. Maanna Harry qaatusaqigami isumaliorpoq silarsuaq ippassarnit allanngorerujussuusimasoq.

"Arlaannik ajortoqarpa, Harry? Sooruna nipaaqaat?" Hagrid oqarpoq.

Harry qularaa suna eqqarsaatigalugu nassuiarsinnaassanerlugu. Inuunermini nuannernerpaamik inuuissiorsimavoq - kisiannili... oqaasissani eqqarsaatigiitigalugit burgeriutini tamuavaa.

"Inuit tamarmik isumaqarput uanga immikkut ittuusunga," kiisami aallartippoq. "Unnaavimmi Ussiitsumiittut inuit tamarmik, professor Quirrel, Ollivander... kisianni angakkuarnermik sumilluunniit qaatusimasaqanngilanga. Qanoq ilillutik sapiitsuliornissarsuara ilimagisinnaavaat? Naluara qanoq pisoqarsimanersoq taamani Vol-eeh... taamani unnuakkut angajoqqaakka toqummata."

Hagridip Harry akimini issiasoq qanillivaa inussiarnarpa-luttumillu qungujuppoq.

"Ernumassanngilatit, Harry. Sukkasuumik ilikkassaqqaarputit. Hogwartsimi ilinniartut tamavimmik aallaqqaataaniit aallartittarput, illillu ingerlalluarumaarputit. Allatut pissusilersussanngilatit, imminut tatigiinnassaatit. Nalunngilara tamanna tusarlugu quiananngitsoq. Illit immikkut ittuujuar-simavutit, tamannalu ajornakusoortarpoq. Kisianni nalunngilara Hogwarts nuannarilerumaarit uanga nuannarilerpara sulilu ullumikkut nuannaralugu."

Hagridip Harry qimuttuitsunut Ligustervængep tungaanut ingerlasussamut ikiorpaa.

Aallalivissorlu allakkat puussai tunniuppai.

"Hogwartsimut billetissat," oqarpoq. "Septembarip aallaqqaataani King's Crossimiit aallasaatit - tamarmik billetimi allaqqapput. Ilaqutariit Dursleykkut sunnguamilluunniit ajornartorsiortitsissagaluarpata allaffigiinnassavarma uppiutit allakkisartoralugu - nassaarissaqqaarpaanga... erniinnaq takuss', Harry."

Qimuttuitsut unittarfimmiit aallaannaqaat. Harryp Hagrid takorusunnermik issiavimminiit nikuippoq qinngani igalaamut tutsillugu, kisiannili Hagrid tammareersimavoq.

*Qimuttuitsut aallartarfianiit
ni trekvartimit angalaneq*

Harryp piffissami kingullermi ilaqutariinni Dursleykkunniinnera nuanninngivippoq. Dudleyp Harry maanna ersigilluinnarpaa inimilu kisimeeqatigisinnaanagu, aamma akkaa Vernonip aja Petuniallu ineeqqamut toqqorsivimmut mattutissaarpaat, pinngitsaalillugu sorpassuarnik sulisissarlugu nilliaffigissarlugulu - eqqortumik oqassagaanni oqaloqatigissaavippaat. Annilaangasorujussuupput kamaqalutillu taamaattumillu aalajangersimallutik isiginngitsuusaartarnarlugu. Naak tamanna arlalitsigut pitsanngoriaataagaluar-toq ullut arlallit qangiummata nikallunganarsivoq.

Taamaattumik Harry iniminiüginngangajappoq uppiutitaa-ni aliikkutaralugu. Aalajangerpoq Hedvigimik atserniarlugu. Ateq taanna atuakkami "Pissaanerup oqaluttuarisaanera"-ni nassaarisimavaa.

Atuagaatai tamarmik assut soqutiginarput siniffimmilu nalarusaarluni unnuarsuarmut atuartarpoq Hedvig nammineq piumasaminik inimiit igalaakkut tingillunilu uteqqittar-toq.

Qujanaqaaq aja Petunia Harryp inaani pujoralaajaasarunnaarmat, tassami Hedvigip teriarpassuit toqutani anger-

laattarpai. Unnuit tamaasa innaraangami sinilinnginnermi-
ni Harryp ullorsiutini krydsilertarpaa. Septembarip aallaq-
qaataata tungaanut kisitsinera aallartippoq.

Aggustip ulluisa kingullersaanni eqqarsarpoq akkani
ajanilu aperiniarlugit qimuttuitsut unittarfiannut King's
Crossimut aqaguani aallartussamut qanoq ililluni ingerlas-
sanerluni. Taamaattumik inimut aterpoq ilaqutariit TV-
kkut eqquiniaaneq isiginnaaleruttoraat. Isersimanini paasi-
tinniarlugu querasarpoq Dudleyllu Harry takuinnarlugu
nilliasorsuulluni qimaavoq.

"Eeh, akkaa Vernon?"

Akkaa Vernon sorlummippoq tusarnaarnini paasitinniar-
lugu.

"Aqagu King's Crossiliartussaavunga Hogwartsimut
ingerlaqqittussaagama."

Akkaa Vernon sorlummeqqippoq.

"Biliussinnaavinga?"

Sorlummeqqimmat Harryp naatsorsuutigaa angertoq.

"Qujanaq."

Iniminut majualeruttortorlu akkaava oqalulerpoq.

"Eqqumiingaarami qimuttuitsunut ilaallutit angakkut
atuarfiannukalersutit. Tippit silaannakkoortaatit tamarmik
aseqqukuugamik?"

Harry oqaaseqanngilaq.

"Atuarfik taanna sumiippa?"

"Naluara," Harry oqarpoq. Tamanna massakkumut
eqqarsaatigisimanngilaa. Bilitsissani tiguaa qimerluulerlugu-
lu.

"Qimuttuitsunut ilaassuunga nalunaaqutaq aqqanermut
qimuttuitsunut unittarfimmiit ni trekvartimiit aallarlunga,"
atuarpoq.

"Asuli oqalunnak," akkaa Vernon oqarpoq, "qimuttuitsunut unittarfimmik ni trekvarteqanngilaq."

"Taama bilitsinni allassimavoq."

"Paasisinnaanngilara," akkaa Vernon oqarpoq.

"Tamarmik silaqarluarunnaarsimapput. Utaqqilaaginnarit, nammineq paasiumaarpas. Ajunngilarmi, King's Crossimut biiliukkumaarpatsigit. Aqagu Londoniliarnissarput iluatsin-nassavarput, Londoniliartussaannngitsuugaluarutta biiliun-navianngikkaluarpatsigit."

"Londonimut suniarpsi?" Harry aperaaq piffissaq kingulleq atorlugu akkani ikinngutinneraarfiginiarlugu.

"Dudley napparsimaviliassagami," akkaa Vernon qatimaluppoq. "Smeltingsimi atualertinnagu pamiua peertariaqaratsigu."

Aqaguani ullaakkut nalunaaqutaq tallimanngoraa Harry iterpoq, pissanganermillu sineqqissinnaanngilaq. Makiinnarpoq atisanilu nalinginnaasut atillugit, tassami qimuttuitsut unittarfianukarniannginnami angakkut atisaat atorlugit. Qimuttuitsunut ikiguni atisani taarsersinnaavai. Atuarfimmi atugassamisut allattukkani qimerlooqqippai qulakkeerniarlugu allattugaatini tamaasa pisiarisimanerlugit. Aamma qulakkeerpaa Hedvig inimini timmissanut inisiami isumannannginnersoq. Taava inimi pisulluni uteqattaalerpoq ilaqutariit Dursleykkut iternissaat utaqqillugu.

Akunnerit marluk qaangiummata Harryp kuffertersua oqimaatsoq Dursleykkut biilianniilereerpoq, aja Petuniallu Dudley kimigiuserfigalugu Harryp sanianut ingitippaa. Taava aallarput.

King's Crossimut pippuq aqqanermut qiteqquttoq. Akkaa Vernonip Harryp kuffertia qamuteeqqanut ikivaa qimuttu-itsullu unittarfianut kaamisarlugu. Harryp tupigusuutigaa

akkami taamaanneq ajoraluarluni imminerminut iluasaar-pallaarujussuarnera. Taava akkaava qimuttuitsut aallartarfiata am mukartarfiata nalaanut uneriasaarpoq qungujupa-larlunilu.

"Aap, tassa tikipparput aallartarfik perron ni trekvar-t. Ikiartorfissat uuma qeqqaniittussaagalarpoq kisianni suli sanallugu aallartissimannginguatsiarpaat, taamaappa?"

Soorunami ilumoorpoq. Qimuttuitsunut aallartarfimmut majuartarfiit aappaata nalaani allagartaq plastikusoq 9-mik allassimasoq nivingavoq majuartarfiillu aappaata nalaani allagartaq 10-mik allassimasoq nivingalluni. Majuartarfiit taakku akornanni allagartamik nivingasoqanngilaq. Allamik soqanngilaq taamaallaat iigaq billetautomatilik.

"Atuarmimmi nuannisaarniarna," akkaa Vernon suli peq-qarniippalunnerusumik qungujulluni oqarpoq, taava oqaq-qinnanilu ingerlaqqippoq. Harryp tunummut qiviarpaa takuaalu ilaqutariit biilerlutik aallartut. Pingasuullutik issi-apput illarlutillu. Harry panertoortutut misigilerpoq. Qanormi iliussava? Inuit eqqumiitsumik isigisalereerpaat Hedvig tigumiarmagu. Allatut ajornartumik qanoq iliornis-sani apeqquutigisariaqarpaa.

Bilitsilerisoq sanioqquttoq unitsippaa aallartarfiulli ni tre-kvartip sumiinnerata apeqquutiginnissaa qunugaa. Bilitsilerisup Hogwarts tusarsimanngisaannarpaa. Harryllu oqaatigisinnaanngimagu nunap suatungaannukassanerluni angut puffassimaalerpoq isumaqarluni Harry piaaraluni sia-niitsuusaartoq. Neriutaarutileruttorluni aperivoq qimuttu-itsoq aqqanermut aallartussaq sumi nassaa risinnaanerlugu, bilitseerniarli oqarpoq tamatuma nalaani qimuttuitsunik aallartussaqanngitsoq. Bilitsilerisoq ingerlaqqippoq kinguar-saasut eqqartuutigalugit. Harry imminut sakkortuumik

eqqissisartariaqarpoq paatsiveerutissanngikkuni.

Qimuttuitsunut unittarfiup nalunaaqutaa naapertorlugu suli minutsini qulini periarfissaqarpoq Hogwartsimut qimuttuitsup nassaarinissaanut, aamma nalulluinnarpaa qanoq iliussanerluni. Qimuttuitsut unittarfiani unittooqqa-voq ingerlariaqqiffissaarulluni kivissinnaanngisaminik kufferteqarluni, angakut aningaasaataannik ooriiteqarluni uppissuaateqarlunilu.

Hagridip oqaluttuutinngitsoorsimassavaa qanoq ililluni angakkuarluni perron ni tre kvart nassaarisinnaaneraa -soorlu Diagonalstrædi nassaarinialeramikku qarmasissiat pingajuannut kasuttornerattut ittumik.

Isumaliutigileraluarpaa ajaappiani angakkuaat tigussanerlugu bilitsinillu pisiniarfimmut automatimut perron 9-p 10-llu akornanni inissisimasumut anaarlutissanerlugu.

Taama eqqarsaleruttortoq angalaqatigiit sanioqqupput oqaasiilu imaattut tusaavai.

".... aamma Mugglerinik ulikkaarunarpoq. Taakku qimarratigiuminaaqaat..."

Harry tunummut qiviapallappoq. Oqaluttoq arnaavoq pualasooq. Niviarsiarannguaq tasiorpaa nukappiaqqallu sisamat ilagalugit, taakku tamarmik aappillarinnik nujaqarput. Tamarmik Harryp kuffertiatut ittunik tigumiarpur - aamma uppiuteqarput.

Uummataa kassuppalulerpoq. Harryp qamutini kuffertimik usilik taakku malillugit kaamisalerpaa. Unippur Harryllu aamma qanilligamigit unippoq oqaasii tusaasinnaaniassagamigit.

"Usi, perroni qanormaanna normoqarpa?" Meeqqat arnaat aperivoq.

"Ni trekvart!" Niviarsiaaraq mikisoq oqarpoq.

"Anaana, sooq ilaasinnaanngilanga?"

"Inuukkavit, Ginny, nipangerniarit. Aap, ajunngilaq, Percy, siulliunnarit."

Nukappiaq angajulliorpasissoq perron 9-p 10-llu tunaannut aallarpoq. Harryp isigeqqissaarpaa. Isini qaminaveersaaqqissaarpai annilaangagigamiuk pisussap takungitsoornissaa - nukappiararluk aallartarfiit, perronit taakku marluk akornanorpiaq pisorlu takornariarpassuit Harryp saannguanut pippit, takornariarluk kingulleq sanioqqummat nukappiararuk tammareersimavoq.

"Fred, maanna illit tullinnguupputit," arnaq pualasooq nukappiaraatimi ilaannut oqarpoq.

"Fredinngilanga Georgeuvunga," nukappiaraq oqarpoq. "Ilumut anaana, imminut anaanaalluartutut taasinnaavit immikkoortissinnaanngikkutsigulluunniit?"

"Utoqqatserpunga, George, asasara."

"Asuliuna pinnguurtunga. Uanga tassaavunga Fred," nukappiaraq oqarpoq ingerlaqqillunilu. Marluliaqataata niliaffigaa tuaviulaaqqullugu aammami tuaviorsimassaaq tassami imaaliillaannaq tammarpoq. Qanoruna iliorsimasut? Harry eqqarsarpoq.

Maanna nukappiaqqat qatanngutigii pingajuat sukkasuumik perronit marluk akornanni billetaumatip tungaanut aallarpoq - anguliivippaa - taava tassanngaannaq tammarpoq.

Harry ataasiinnarmik periarfissaqalerpoq arnarlu pualasooq ornippaa.

"Utoqqatserpunga," Harry arnamut pualasuumut oqarpoq.

"Aluu ikinngut," oqarpoq. "Siullerpaamik Hogwartsiliarpit? Ron aamma nutaraavoq." Ernimi kingullersaat nukar-

lersaallu tikkuarpaa. Nukappiaraavoq angisooq, tuattoq tal-leqqajuttoq. Aammali milaarpassuaqarpoq, angisuunik assaqarlunilu isigaqarpoq qingaalu takeqaluni.

"Aap," Harry oqarpoq, "kisianni imaakkamiaa - naluara qanoq iliorlunga...."

"Qanoq iliorlutit perronimukassanerlutit?"

Inussiarnerpalluni aperivoq. Harry sikippoq.

"Ernumassanngilatit," oqarpoq. "Allatut iliortariaqanngilatit, perron 9-p 10-llu akornannut iikkamukaannassaait. Unissanngilatit, aamma iikkamut apornissat annilaangagissanngilat. Tamanna pingaarnertut eqqaamaannassavat. Annilaangaguit arpaannarit. Qaa ingerlaniarit Ron misilitinnagu."

"Okay," Harry oqarpoq.

Qamutit kuffertimik usisut illuatungaanut saatippai qarmarluk perronit marluk akornanniittoq nakkutilerlugu.

Qajannaappaseqaaq.

Tungaanut aallarpoq. Inuit qimuttuitsunut aallartarfinnut perron 9-mukartut 10-mukartullu eqqaqquttarpaat. Harry sukkatsippoq. Billetautomati aportussanngorpaa aporuniullu ajutuuttussaavoq. Siumut orlerpoq arpaatigalunilu qamutit ajattalerlugit. Qarmaq qanilliaruinnavippaa - maanna uneriataarsinnaajunnaarpoq - qamutit nakkutigisinnaajunnaarpai - qarmamut alloriarneq ataasiinnanngorpoq - isini qamippai apornissanilu utaqqiinnalerlugu -

Sumik ajortumik pisoqanngilaq - arpattuarsinnarpoq - uippoq

Uikkami takuleriarpai qimuttuitsut nipitoorsuit ilaasunik ulikkaartut unittarfinni utaqqillutik uninngasut. Harryp allagartarsuaq ima allassimasoq takulerpaa:

Hogwartsiliartaat sukkasuuliaq, aallarfiisaq nalunaaqutaq

aqqanermut. Kingumut qiviarpoq takulerlugulu torsuusaa-
saq sukalimmik qilaanngusaasalik aatsaannguummat qar-
map billetaumatillip inigisaaniilersimasoq. Taassuma
qulaani allassimavoq: Perron ni trekvart. Aallarfissani nas-
saarisimavaa.

Qimuttuitsuniit aalarujussuaq aniavoq; aalap inuit qimut-
tuitsut aallartarfiani oqaloqatigeerujoortut asserpai, qitsup-
passuit assignngitsorpassuarnik qalipaattillit inuit niuisa
akornanni ingerlaartut takulerpai. Uppiit imminnut qarlor-
figipput nipiliomerisalu inuit oqalunnerat kuffertillu oqi-
maatsut nipiliomerat tusarsaajunnaarsippaat.

Qimuttuitsut qamutaat saarliit atuartunit ulikkaaereput.
Ilaasa igalaakkut ammasukkut ilaquttatik inuulluaqqusiar-
tortut oqaloqatigivaat ilaasalu issiaviit akornanni atuartut
paakujunnerat isiginnaarpaat. Harryp qamutit kuffertimi-
nik usisut perronimi kaamisarusaarpai qimuttuitsuni inis-
sarsiuutigaluni. Nukappiaq ammalortumik niaqulik sanioq-
quppaa oqartoq: "Aanaa, narasiutiga kataqqippara."

"Aaja, Neville," arnaq utoqqaq anersaaruluttoq tusaavaa.

Nukappiaraq nujarujussualik nukappiaqqat arlallit kater-
suuffigisimavaat.

"Qaa takulaariartigu, Lee, qaaniarit."

Nukappiaqqap matusartup tigumiami matua ammaqqat-
tilaarpaa ilaalu kaajallallugu katersuussimasut tamarmik
nilliasorsuupput sunaanersup matusartup iluaniittup nioru-
jussuani meqqorsualik anillatsimmagu.

Harry inuppassuit akornanni tamaviaarluni ingerlaniar-
suataarpoq naggataatigullumi iluatsitsilluni qimuttuitsup
tunuatungaani inimi allanik inoqanngitsumi inissippoq.
Siullermik Hedvig eqquppaa taavalu kuffertini eqqunniar-
saralugu. Qimuttuitsut tummeraaraatigut tamaviaavilluni

majuunniarsarigaluarpaa artulerluguli. Marlussoriarluni misileereerami kuffertini isikkaminut nakkaavaa.

"Ikiussavakkit?" Aperisoq tassaavoq marlulissat aappa-laartunik nujallit aatsaaginnaq takusaasa aappaat.

"Qujanaq," Harry anertikkarluni oqarpoq.

"Hej, Fred! Qaagit ikiortigut!"

Marlulissat ikiuinerisigut Harryp kuffertia kiisami qimut-tuitsuni ilaasut inaata teqeqquanut inissinneqarpoq.

"Qujanaq," Harry oqarpoq nutsanilu kiagunnergimik masattut tagiarlugit.

"Sunaana?" Marlulissat ilaat oqariataarpoq Harryllu qaa-vani qilerog kallerup innerata nunamut tuttrup assinga tik-kuarlugu.

"Uumangaa," marluliaqataa oqarpoq. "Illit tassaavit...?"

"Ilumut, taannaavoq, " marluliaq siulleg oqaaseqartoq oqarpoq. "Ilaa taamaappoq?" Harry saallugu pilerpog.

"Sunaana pivisiuk?" Harry aperaaq.

"Harry Potter," marlulissat ataatsikkut oqarput.

"Aaa, taannaasiit," Harry oqarpoq. "Utoqqatserpunga, aap, taannaavunga."

Nukappiaqqat marluk taakku isikkuserpaat, Harryllu malugilerpaa kiinnani aappillertoq. Taava Harryp eqqissial-laatigeqisaanik qimuttuitsup matuatigut ammasukkut nipi tutsiuppoq.

"Fred? George? Taqqamaniippisi?"

"Aggilerpugut, anaana."

Marlulissat Harry naggataamik isigeriarlugu qimuttuitsu-niit anipput.

Harry igalaap eqqaani issiavimmut ingippoq, tassan-gaanniillu allanit takuneqarsinnaanngingajalluni ilaqutariit aappaluttunik nujallit qimuttuitsut aallartarfianni nikorfasut

isiginnaarsinnaanngorpai. Aamma qanoq oqalunnerat tusaasinnaavaa. Arnaata kakkissarfini ammuppaa.

"Ron, qinnganniittoqarpoq."

Nukappiaqqat nukarlersaat qimaaniarsarigaluarpoq arnaatali tiguaa kakkissulerlugulu.

"Anaana, tassa - taamaatinniarit!" Anaanaminit qimaa-voq.

"Aaah, Ronnilaraq ungaavaraq, nammineerluni kakkissinnaanngitsoq!" Marlulissat aappaat uumisaarivoq.

"Nipangerit!" Ron oqarpoq.

"Percyuna sumut pisoq?" arnaat oqarpoq.

"Aajinnga aggerpoq."

Qatanngutigüüt angajullersaat tungaannut allorassaarluni aggerpoq. Hogwartsip uliguua qernertoq takisooq maligaa-sartooq atereersimavaa. Harryp takusinnaavaa sakissamigut sêlvimik qillarimmik kappoqquteqartoq P-mik naqin-nertalimmik.

"Anaana, piffissaqarpiangilanga," oqarpoq. "Saarlerni ilaasut inaat marluk ilitersuisut utoqqaanerit inigaat, taaku ornittussaavakka...."

"Ila ukorsü, ilitersuisunngoravit, Percy?" Marlulissat aappaat tupigusuttuusaarluni oqarpoq. "Tamatuminnga oqaluttuussimassagalaratsigut. Naluipparput ilitersuisunngorsimasutit."

"Ilumut, soorlu eqqartornikuugaa," marlulissat aappaat oqarpoq. "Ataasiarluni..."

"Imaluunniit marloriarluni..."

"Imaluunniit hundrederiarluni..."

"Imaluunniit atuannigffik tamaat."

"Nipangeritsi," Percy ilitersuisoq oqarpoq.

"Sooruna Percy kisimi nutaamik uliguartaarsimasoq?"

Marlulissat aappaat oqarpoq.

"Tassa ilitersuisunngornikuugami," anaanaat tulluusi-maarluni oqarpoq. "Ajunngilaq, ikinngutiga. Ingerlaannarit atuarluarinalu - apuukkuit uppimmik nassikkinga."

Percy uluaatigut kunippaa, taannalu ingerlaannaq pee-ruppoq. Taava marlulissat saappai.

"Ukorsiinnguiit - ukioq manna ileqqorissaassuusi. Uppimmik ataasiinnarmilluunniit nassinneqaruma oqalut-tuartumik anartarfik qaartissimagissi, imaluunniit...."

"Anartarfimmik qaartitsisimasugut?
Taamaaliunngisaannarpugut."

"Kisiannimi isumassarsiaq quianartuuvoq.
Imaassinnaavoq atorsinnaagipput."

"Quiananngilaq. Ron paarilluarniarisiuk."

"Annilaangassanngilatit. Ronnie naalungiarsuk annilaa-ngassutissaqanngilaq, uagut eqqaaniittussaavugut."

"Nipangerit," Ron oqarpoq. Marlulissatut angitugingajale-reersimavoq, qingaalu arnaata kakkissugaa sulii aappalup-poq.

"Anaana, tusaassuutit. Eqqoriaruk qimuttuitsuni aatsaa-ginnaq kina naapinneripput?"

Harry tuaviinnaq tunuarterpoq marsernini takuneqan-nginniassammat.

"Eqqaamassavat nukappiaraq taanna qernertunik nujalik qimuttuitsut unittarfianni eqqatsinni nikorfasoq?
Nalunngiliuk kinaasoq?"

"Kinaagami?"

"Harry Potter."

Harry maanna nivarsiaqqap mikisup nipaa tusaavaa.

"Anaana, qimuttuitsunukarsinnaavunga takusarlugu, anaana qaa takusarsinnaavara...?"

"Takoreerpat, Ginny, aammami nukappiarannguakkuluk uumasuusivissuarmi uumasutut isiginnaagassaanngilaq. Ilumut taannaava, Fred? Qanoq ilillugu paasivisiuk?"

"Aperigakku paasivara aamma qilerua takuara, qaavata qeqqinnaani - soorlu kallerup innera."

"Nukappiarannguakkuluk - taava tupigisassaanngilaq sooq kisimiinnersoq. Assut ileqqorippasippoq qimuttuitsut aallartarfiat sumiinnersoq apeqqutigigamiuk."

"Soqutaanngilaq ileqqorikkuni ileqqorinnikkuniluunniit. Isumaqarpisi eqqaamasinnaagaa nalunngisarsi - qanoq isik-koqarnersoq?"

Arnaat tassanngaannaq mersernarsivoq.

"Taama aperinissarsi inerteqqutigaa, Fred. Naamik, taamaaliussanngilasi. Tamakkuninnga eqqaasinneqarnissani massakut atualeqqaarfimmini atorfissaqartinnngilaa."

"Okay, eqqissigit, taamaaliussanngilagut."

Siggartaat siggarpaluppoq.

"Tuaviorniariisi," anaanaat oqarpoq nukappiaqqallu ping-asut qimuttuitsunut ikipput. Igalaakkut siumut orlerput anamik kuninniassammatik, najaallu qissaserpoq.

"Qiajunnaarlutit, Ginny. Uppinnik amerlasuunik nassikkumaarpatsigit."

"Aamma anartarfiup issiaviata matuanik Hogwartsimiit nassikkumaarpatsigit."

"George!"

"Asuliiginnartungaana, anaana."

Qimuttuitsut aallaannaqaat. Harry takuaa nukappiaqqat arnaat aalaterisoq, najaata qiaatigaluni illaatigalunilu qimuttuitsut malikkai sukkatsinnissaata tungaanut. Taava unip-poq aalaterillunilu.

Qimuttuitsut sangoriakkut sangummata unittarfillu qimal-

lugu niviersiaraq anaanaalu tammarput. Illut sukkasuumik sanioqquavaat. Harry pissanganermik erlunguummivoq. Naluaa siunissami qanoq pisoqassanersoq, kisiannili inuunereersimasaanut naleqqiullugu ajornerunavianngilaq.

Ilaasut inaannut matu ammarneqarpoq nukappiaqqallu aappalaartumik nujallit nukarlersaat iserpoq.

"Issiavik inoqarpa?" Aperivoq issiavillu Harryp akianiit-toq tikkuarlugu. "Allat tamarmik ulikkaavikkamik."

Harryp niaqqi ileqimisaartorpaa nukappiararlu ingippoq. Harry isiginnaarpaa kinguninngualu igalaaq isiginnaalerlugu, soorlu Harry soqutigerpasinnagu. Harryp takusinnaavaa qinngamigut sulì qernertortaartoq.

"Hej, Ron."

Marlulissat uteqqissimapput.

"Tusaassuusi, qimuttuitsut qamutaannut qiterlernukalerpugut - Lee Jordan matusartumi aasiaassuaateqarpoq."

"Ajunngilaq," Ron nipaatumik oqarpoq.

"Harry," marlulissat aappaat Harrymut oqarpoq. "Sulì ilassinnginnguatsiarpugut" Fred aamma George Weasleymik ateqarpugut aajunalu qatannguterput Ron. Kingusinnerulaartukkut takoqqissaagut."

"Baaj," Harry Ronilu oqarput. Marlulissat anigamik matu matuaat.

"Ilumut Harry Potteriuvit?" Ron oqartoorpoq.

Harry sikitsiarpoq.

"Isumaqaraluartungaana Fred Georgelu asulì taama oqartut uumisaaginnarniarlunga." Ron oqarpoq. "Aamma ilumut.....?"

Harryp qaava tikkuarpaa.

Harryp nutsani siorliit illuartippai qileruni takutinniarlugu. Ronip nakkuppaa.

"Tassa tassuuna 'Illit-nalunngilat'....?"

"Aap," Harry oqarpoq, "kisianni eqqaamanngilara."

"Eqqaamasaganngivippit?" Ron ilungersorluni aperivoq.

"Aap, qaamanerujussuaq qorsuk kisiat eqqaamavara, allamik naamik."

"Wow," Ron oqarpoq. Sivikitsumik Harry nakkuppaa. Taava isiginnaarunnaarpaa igalaamullu qiviarluni.

"Ilaquttatit tamarmik angakkuuppat?" Harry aperivoq. Harry isumaqarpoq Ron namminermisut soqutiginarfigi-soq.

"Aap taamaagunarpoq." Ron oqarpoq. "Kisianni anaana-ga illoqannguatsiarpoq naatsorsuusiortumik, taannali oqaluuserivallaarneq ajorparput."

"Taavami angakkuarneq ilisimasaqarfigingaatsiareerpat?"

Ilaqutariit Weasleykkut angakku kinguaariit pisoqqat ilagigunarpaat, madam Malkinimi nukappiaqqap asingasup pingaakujuttup eqqartugaasa ilaat.

"Tusarpara Mugglerini najugaqangaatsiarsimagaluartutit," Ron oqarpoq. "Qanoq ituuppat?"

"Sussaanngillat - tassa imaappoq tamarmik taamaanngikaluarput, kisianni akkaga, ajaga illoralu ajornernut ilaapput. Qanoq nuannertigissagualarpa ilittulli pingasunik angakkunik nukappiaqqanik qatannguteqarsimasuugaluaruma."

"Tallimat", Ron aliasuppalluni oqarpoq. "Uanga qatanngutinni Hogwartsimi atualertussat arfinilissaraannga. Taamaattumik maligassaqaqaanga. Bill Charlielu atuarfimmi naammassereerput. Bill atuaqatigiinni pikkorinnersaavoq Charlielu Quidditchimik unammisartut siuttoraat. Maanna Percy ilitersuisunngorpoq naallu Fred aamma George perulluliortaraluaqalutik atuarfimmi angusarissaar-

taqaat. Atuartunit allanit aamma quiagineqarput. Maanna kikkut tamarmik naatsorsuutigaat uanga qatanngutittulli ajunngitsigisumik angusaqassasunga, angusarissaassagama-lu isumaliortoqarnavianngilaq immikkut ittumik angusa-qarsimasunga. Taamaattussaasoriinnassavaat. Aamma nukarliugaanni nutaamik pisaarnissaq naatsorsuutigine-qarsinnaanngilaq, tassami qatanngutit tallimaapput kingor-nussiffissat. Billiep uliguatoqaa kingornuppara, Charliep ajaappiaa angakkuaat aammalu Percyp teriarsuaatikua kingornullugit."

Ron jakkimi iluanut kaatorpoq teriarsuatoqarlu qasertoq sinnaarik amnullugu.

"Scabbersimik ateqarpoq aammalu sumulluunniit atorsinnaanngilaq. Itertitassaanngingajappoq. Ataatama Percy siunnersuisunngormat uppissaanik tunivaa; akissa-qanngimmatali uanga aallaqqaammut Scabbers pivara."

Ronip siutai aappillerput isumaqalersimagunarlu oqaa-seqarpallaalerluni. Nipangerpoq igalaakkullu silammut isiginnaalerluni.

Harry uppimmut akissaqannginneq tupigusuutiginnilaq. Naatsumik oqaatigalugu nammineq Hagrid naapinnikkallaramiuk aningaasaateqarsimanngisaannarpoq. Tuaviinnaq ilaqutariit Dursleykkunni naapittakkani naalliunnartut oqaluttuaripallappai. Dudleyp atisakui namminermiut angivallaartut tunissutisinngitsoorlunilu inuuissioartarnini. Ron qiimmaallappoq.

... aamma aatsaat Hagridip angajoqqaannik oqaluttuum-manga angakkut Voldemortilu siornatigut tusarsimanngisaannaraluarpakka..."

Ron anertikkalerpoq.

"Sunaana?"

"Atia oqaatigaat!" Ron annilaarluni tupigusullunilu isus-suppoq. "Isuma qaraluarama illit kingullerpaajullutit qunu-suisaassasutit...."

"Imaanngilaq sapiitsuuniartunga kisianniliuna atia taa-sooriga," Harry oqarpoq, "Aamma sulii atiata taaqqusaannginera sungiutinngilara. Takusinnaanngiliuk qanoq isumaqartunga. Sulii ilikkagassaqaqaanga... eqqoriarsinaavara," nangippoq siullerpaamillu nammineq ernumagisaminik oqalulerluni. "Eqqoriarsinnaavara atuqatinni sianiinnerpaajussalunga."

"Tamanna ilimaginngilara. Atuartorpassuaqarpoq Mugglerikkormiusunik, taakkulu allatulli sukkatigisumik 'likkartarput.'"

Oqaloqatigiinneranni qimuttuitsut Londonip avataanut pisimapput. Maanna narsaatit nersussuaqarfiullutillu savaqarfiusut ingerlaffigilerpaat. Sivisuatsiaamik nipaqaratik issiapput nuna ingerlaarfitsik isiginnaarlugu.

Ataatsip qeqqata missaani inip silataani perpaluttoqarnera tusaalerpaat. Matuat ammarneqarpoq arnallu inussiarnersup qungujukkami ersamigut itersallip aperai qamutaa-nit piserusunnersut.

Harry ullaakkorsiorsimanngilaq pissipporlu pisiassat qimerloorniarlugit. Ronip siutai aappilleqqilaarput nipikit-sumillu oqarpoq nammineq taquarluni. Harryp arnaq tuniniaasooq annivigaa. Ligustervængemi najugaqarallarami mamakujuttusinissaminut akissaqarsimanngisaannarpoq maannakkulli kaasarfiu kuultinik sölvinillu ulikkaarmata piareersimavoq Chokofantit nassarsinnaasani tamakkerlugit pisiarinissaannut - kisiannili arnaq Chokofantiuteqanngilaq. Ajaappissanik angakkuaatinik lakridsinik, kaaginik uunnaavittut isikkulinnik, græskartær-

tenik, kuuleeqqanik marcipaninik sanaanik, skumtudsinik, platuglenik allanillu eqqumiitsorpasuarunik Harryp siornatigut takusimanngisaannagaanik tuniniaavoq.

Arlaannaalluunniit oqattaanngitsoorusunnginnamiuk assigiinngitsut tamaasa pisiarai arnarlu akilerlugu Sølvsøeglenik aqqanilinnik knutinillu arfineq marlunnik.

Harry mamakujuttorpasuarunik nassarluni iniminnut isermat tamaasalu issiavimmi sanianut issiavimmut kuimagit Ronip tupigusoqaluni nakkuppa.

"Kaassimassaqaatit?"

"Perlerpunga," Harry oqarpoq kaagilu græskarimik sanaaq, græskartærte, nerilerlugu. Ronip taqussani puuiarlugit aallartippai. Kilitat sisamaapput. Ilaat ataaseq tiguaa oqarlunilu. "Anaanama puigortuaannarpaa tinguaq mamarinngikkiga."

"Paarlaassinnaavugut," Harry oqarpoq græskartærtilu tigullugu. "Qanoq isumaqarpit...?"

"Qularnanngivippoq aamma illit mamarinavianngikkitt," Ron oqarpoq. "Soqutaarpasinnivippoq. Anaanaga taniinaraangami taniissutassani amerlaqimmata ulapipallattaqaaq," Ron tuaviinnaq utoqqatsissutissarsiorpoq.

"Ajunngilaq piumasannik tigusiinnassaattit," Harry, siornatigut allanik agguaqateqarnissamik periarfissaqarsimanngisaannartoq - aammami siornatigut namminerminit sumilluunniit perusuttumik naammattuugaqarsimanngisaannartoq, oqarpoq. Nuannavissumik misigisaqarpoq Ronilu marluullutik kaagit mamakujuttullu nerersuataaramikkitt (erniinnaq Ronip taquai puiorpaat).

"Una sunaana?" Harry oqarpoq platuglilu poorsimasoq takutillugu. "Uppimmit sanaajunngilaq, ilaa?" Harryp ileqorilersimavaa sunut tamanut sillimareernissaq.

"Aap uppimmit sanaajunngilaq, annilaangassanngilatit sukkulaaq taanna uppittut isikkoqaannarpoq." Ron oqarpoq. "Takulaariaruk puuata iluani qanoq ittumik qerata-suumik allagartaqarnerseq - Agrippap assinga amigaatigaa-ra."

"Suna?"

"Soorunami nalussavat suna eqqartorneriga. Platuglit puuisa iluini meeqqat katersortagaannik allagartanik qerata-suunik peqartuartarpoq. Tassalu oqaluttuarisaanermi arnaquassaas angakkullu tusaamasat assingi. Uanga hundredit sinneqartut pigaakka, kisianni suli Agrippa Ptolomæusilu amigaatigaakka.

Harry uppi sukkulaaq puuiarpaa allagartarlu nassaaralugu. Tassaannguatsiarporlu angutip kiinaata assinga. Affaannarmik isaruqarpoq, qingaa peqingasuuvooq angisooq, nujai umiilu takisuujupput qeersuut. Assilissap ataani ateq allassimavoq: Albus Dumbledore.

"Sunaaffa Dumbledore taama isikkoqarpoq!" Harry pilerpooq.

"Ilumut aatsaat Dumbledore takuiuk?" Ron oqarpoq.

"Aamma uanga uppimmik pisinnaavunga? Immaqa iluatsitsillunga Agrippap assinga pissavara - qujanaq..."

Harry allagartaq mumippaa atuarlugulu:

Albus Dumbledore, massakkut Hogwartsimi pisortaq. Amerlasuut isumaqarput ukiuni kingulliunerusuni angakkut annersarigaat. Dumbledorep tusaamasaassutigineruaa 1945-mi Taartup Angakkua, Grindelwald ajugaaffigamiuk, uumasorijuit aavata assigiinngitsunut aqqaneq marlunnut atorsinnaanera paasigamiuk aammalu minnerunngitsumik suleqatini Nicolas Flamel peqatigalugu kuultiliorni-arluni suliaqarnini tusaamasaassutigaa. Professor Dumbledorep soqu-

tigisai tassaapput nipilersugassarsuit tusarnaassallugit bowlernerlu.

Harryp allagartaq mumeqqippaa tupigusuutigeqisaminillu takulerlugu Dumbledorep assinga tammarsimasoq.

"Peqanngilaq!"

"Aap, ilimagisinnaanngilat ulloq naallugu tassaniinnis-saa," Ron oqarpoq. "Annilaangassanngilatit uteqqikku-maarpoq. Naamik aamma tassa Morgana peqqippara. Taanna ikinnerpaamik arfinilinnik assiutigaara.... pissavi-uk? Nammineq assinik katersisinnaavutit."

Ronip uppiit sukkulaatit ammartigassat soqutigerpaseqa-lugit isiginnaalerpai.

"Takanna piumasannguannik," Harry oqarpoq. "Kisianni Mugglerit silarsuaanni assit allagartaninngaanniit peerneq ajorput."

"Ilumoorpit? Aalanerluunniit ajorpat? Ron tupigutsa-ngaalerpoq. "Ila tupinnaq."

Harryp tupigusunnera annikillinngilaq Dumledorep assinga tamatumuuna qungujussimalluni allagartamut uteq-qimmat. Ronip naratsit nererusunneruai arnaquassaat a-ngakkullu tusaamasat isiginnaarnerininngarnit, Harrylli allagartat kiinallit alarsinnaajunnaarpai. Imaaliiallaannaq kiinnat assigiinngitsut arlallit pigilerpai: Dumbledore, Morgana, Hengíst Woodcroftimersoq, Alberic Grunnion, Paracelsus aamma Merlin. Allagartami kingullermi druidit palasiata arnap Cliodnap qinngamigut kumittup assinga takussaavoq. Taava poortaq eertanik amitsukujuunik assi-giinngitsorpassuarnik mamassusilinnik Bertiesinik imalik ammarpaa.

"Taakku mianersuutigissavatit," Ron mianersoqqusivoq. "Allassimappat assigiinngitsorpassuarnik mamassuseqartut,

taava tamanna ilumoortutut isigissavat. Nalinginnaasut sukkulaamik, marmelademik, pebermyntemillu mamassuseqarput aammali imaalluarsinnaavoq spinatinik tingummillu mamassusilinnik oqummerseriataartutit. Aamma George isumaqarluinnarpoq arlaanni eertatorsimalluni kak-kissunnitsumik."

Ronip eertaq amitsukujooq qorsuk tiguaa qimerloorluarlarlugulu kiillugu ilanngarlugu.

"Puuha - tassa uppernarsivat! Rosenkålisunnippoq!"

Eertat amitsukujuut assigiinngitsorpassuarnik mamassusillit nerillugit aliikkutaraat. Harryp usserpai immussuarsunnitsut, qaqqortariarsuarsunnitsut, tomatissunnitsut, jordbærisunnitsut, karrysunnitsut, ivigarsunnitsut, kaffissunnitsut ammassassuarsunnitsullu. Aamma Ronip usserusungisaa usserpaa, sunaaffa qasilitorsunnitsoq.

Nuna ingerlaffigisaat allanngoriartorpoq naggorissagaa-junnaariartorluni. Narsaatit naggorissarluakkat tammarput. Maanna takussaalerput orpippassuit, qoororsuit qorsuit qaamasut kuussuillu sangusaartut.

Inaannut kasuttortoqarpoq nukappiararlu ammalortumik kiinalik takkuppoq. Harryp eqqaamavaa qimuttuitsut aallartarfianni taanna takunikuullugu. Qiasunngusutut isikkoqarpoq.

"Utoqqatserpunga," oqarpoq, "naratsimik takusaqanngilasi?"

Ileqimisaartormata qissaserpoq. "Tassami annaavara! Qimaajuaannavippoq."

"Takkuteqqikkumaarpoq," Harry oqarpoq.

"Aap, taamaalluarsinnaavoq," nukappiaraq ernumarpasiluni oqarpoq. "Takussagaluarussiuk...."

Ingerlaqqippoq.

"Soormitaava taama annilaangatigisoq," Ron oqarpoq. "Naratsimik nassarsimasuugaluuruma tuaviinnaq tammaarusussagaluurpara. Uangali tamakkuningga oqaluttariaqanngilanga, uangami Scabbersiuteqarpunga."

Teriarsuaq Ronip sakiaani suli sinilluaqaaq.

"Toqugaluurpat malugineqarnavianngikkaluurpoq," Ron narruginnippasilluni oqarpoq. "Ippassaq pissanganarerusungortinniarlugu angakkuarlunga sungaartunngorteriara-luarpata, kisianni iluatsinngilata. Maannakkut takutissavakkitt..."

Kuffertimini ujarlerpoq ajaappiarlu angakkuaat atornikooqisoq ammullugu. Nungullarsimaqaaq nuuanilu qaqortoq sunaanersoq qillaallappoq.

"Enhjørningip nujai katalerput. Kisiannili takuuk..."

Ajaappiaq qangattaruttora inimut matu ammariataarpoq. Nukappiaraq naraseersertoq iserpoq tamatumuuna nivarsiaqqamik ilaqlarluni. Taanna Hogwartsip uliguaanik nutaamik atisisimavoq.

Arlarsi naratsimik takusaqanngila? Neville pini periarfeerukkamiuk," oqarpoq. Naalagaaniarpaluttutut nipeqarpoq, angisuunik siuaaqarpoq takisuunillu kajortunik nujaqlarluni.

"Oqaluttuutereerparput takusimanagu," Ron oqarpoq, nivarsiararli tusaangitsuusaappoq.

"Sunaaffa angakkuarnialerputit, takulaariartigu qanoq pisinnaatiginersutit."

Ingippoq Ronilu annilaarpasittorujussuuvoq.

"Suu, ajunngilarmi."

Quersorpoq.

"Seqinnersoq, naasut, immussualivik.

Teriarsuaq pualasooq sianiitsoq sungaartunngortiguk!"

Angakkuaatini kaajallatsippaa kisiannili susoqanngilaq. Scabbers qasertuujuarsinnarpoq sulilu sinnaareqaluni.

"Ilumut angakkuaatit eqqortuunerluni?" Nivarsiaraq oqarpoq. "Pitsaavallaanngilaq, ilaa? Uanga aamma nammineq angakkuaatinik ajornanngitsunnguanik misiliinikuu-vunga – sungiusarniaannarlunga – tamatigullu iluatsittarpara. Ilaquttakka allat angakkuarnermik paasisimasaaqanngillat taamaattumik uissuummeqaanga atuarfimmit allagar-sigama atuariatoqqusaallunga, isumaqarpungami atuarfik tassaasoq angakkuarnermik ilinniarfiit pitsaanersaat, aamma taamaattuusoq tusarnikuuara – atuakkavut tamaasa alann-gaarsinnaanngornikuuvakka. Neriuinnarpunga pikkoris-sunngorumaarlunga. Usi uanga ateqarpunga Hermione Grangerimik, ilissimi kikkuuvisi?"

Oqaatsini tamaviisa sukkasoorujussuarmik oqaatigai.

Harry Ron isiginnaarpaa eqqissiallaatigaalu Ron nam-minermisulli tupigusutsigimmat paasiinnarpaalu taanna namminermisulli sumilluunniit sulilannaagaqarsimanngitsoq.

"Ron Weasleymik ateqarpunga," Ron oqarpoq.

"Harry Potter," Harry oqarpoq.

"Ilumut Harry Potteriuvit?" Hermione nillerpoq.

"Tusaamaqaakkit paasissutissanik tunuliaqutissannik pissar-siornikuugama. Allaaserineqarputit atuakkani ukunani: Pissaanerup Nutaanerup Oqaluttuarisaanera aamma Taartup pissaanerata annerpaaffia milliartorneralu kiisalu Ukiut 2000-ssaanni angakkuarnermik pisimasut annersaat.

"Ilumooqqinnaarpit?" Harry paatsiveerusimaarluni aperi-voq.

"Uumangaa nalugakku? Illiusuugaluaruma suut paasine-qarsinnaasut tamaasa paasisimassagaluarpakka," Hermione

oqarpoq. "Arlassi nalunngilaa kollegiami sorlermi najuga-qassanerluni? Pissutsit paasiniaaffigakkitt neriuppunga Gryffindorimi najugaqassallunga. Soorluuna ineqarfigissallugu pitsaanerpaassasoq. Tusarpara Dumbledore tassani najugaqarsimasoq, isumaqarpungali Rawenclaw aamma ajorpallaarnaviannngivissoq.... Kisianni tassa Neville narasiutaa ujaqqittariaqarparput. Ilissi aamma atisasi taarsertiaqarunarpasi ernünnarmi apuutissaagut."

Taava anivoq nukappiaraq narasiuteqanngitsoq ilagalugu.

"Kollegiami sorlermiluunniit najugaqassagaluaruma neriussaanga niviersiaraq taanna najugaqatigissanagu," Ron oqarpoq. Angakkuaatini kuffertimut inisseqqippaa. "Aatsaat taamma angakkuarnermik ajortigisumik - Georgemuna taassuminnga ilinniartikkaminga. Ilimagilluinnarpara angakkuaat atorsinnaanngitsoq ilisimasimassagaa."

"Angajutit kollegiami sorlermi najugaqaramik?" Harry aperivoq.

"Gryffindorinimi," Ron oqarpoq.

Nikallungarpaseqqilerpoq. "Aanaanaga ataatagalu aamma tassani najugaqarsimapput, naluvaralu qanoq oqassagaluarnersut allamut inissinneqassaguma. Isumaqarpunga Ravenclaw ajorpallaarnaviannngitsoq, kisianni ajussagaluaqaaq Slytherimi inissittuugaluvaruma."

"Tassani Vol -, 'Illit-nalunngilat-kinaasoq' najugaqarnikuuvoq, ilaa?"

"Suu," Ron oqarpoq. Issiavimmini ügarpoq nikallungarpaseqalunilu.

"Umaak soorluuna Scabbers itingajalersoq," Ron qüimmassalaarniarlugu allamullu saasarniarlugu Harry oqarpoq nangillunilu. "Angajutit angajullit maanna atuarunnaaramik sulerippat?"

Harryp sivirusumik eqqarsaatigisimavaa angakkut suleri-sarnersut ilinniarnertik naammassigaangamikku.

"Charlie Rumæniamiippoq uumasorujunnik ilisimatusar-luni Billilu Afrikaliarpoq Gringotts sullillugu," Ron oqar-poq. "Tusarsimavammi Gringottsimi qanoq pisoqarsima-soq? Profetit Tusaataanni tamaat allaaserisimavaat, kisianni-li ilimaginngilara Tusaat taanna Mugglerit silarsuaanni saq-qummersartog. Toqqorsivik immikkut isumannaallisagaq ammarneqariarsimagaluarami."

Harry nakkuserpoq.

"Ilumut? Qanoq pineqarpat?"

"Sunegqanngillat. Tamannaana uissuumminartog.

Tillinniat tigusarineqanngillat. Ataataga oqarpoq Taarnerup Pissaanerata angakkuisa ilaat pissaanilissuaq tunuliaqutaasi-massasoq. Kinaluunniit iluatsitsilluni Gringottsimut tillinni-arnikuunngisaannarpoq. Tupinnaqutigaa li tilitaqarsiman-ngimmata. Maannalu kikkut tamarmik annilaangalerput isumaqartoqarmat 'Illit-kinaasoq-nalunngilat' tillinniarnemut pisuusoq."

Harryp nutaarsiassat eqqarsaatigai. Harry uulikullattaler-simavoq 'Illit-kinaasoq-nalunngilat' eqqaaneqaraangat. Naatsorsuutigaa angakkut silarsuaannut akuliukkiartor-nerminut tamanna ilaaginnartog, kissaatigigaluaqaali saju-kulaalinngikkaluarluni "Voldemort"-imik oqarsinnaalernis-sani.

"Quidditch-imik unammisartut sorliut tapersersorpigit?"

"Ilisarisimasaqanngivippunga," Harry nassuertariaqarpoq.

"Qanoq oqarpit?" Ron tupigutsangaarluni aperivoq.

"Taavami qilanaarutissaqalerputit. Quidditch silarsuarmi timersuutit pitsaanersaraat..." Taava Quidditchimi arsanut atorneqartartunut sisamanut tunngasut tamaasa arsaattullu

arfineq marluk qanoq inissisimasarnerat nassuialerpaa. Aamma angajuni sisamat ilagalugit arsaannerit tusaamasat isiginnaarsimasani oqaluttuarilerpai aammalu sanigutit ipui akissaqartuugalaruni pisiarissallugit pilerigisani eqqartulerlugit. Arsaannermi malittarisassat itinerusumik nassuialeruttorai inigisaannut matua ammaqquppoo. Tamatumuuna isertut tasaanngillat Neville, nukappiaraq naraseersertoq imaluuniit Hermione Granger.

Kisiannili nukappiaqqat pingasut iserput Harryllu nukappiaqqat qiterlersaat ingerlaannaq ilisarivaa. Tassaana madam Malkinip uliguaarniarfiani nukappiaraq qarsungasoq naapitaa. Tamatumuuna Harry soqutigerpasinneroqalugu isigivaa.

"Ilumoorpa?" aperivoq. "Qimuttuitsuni ilaasut tamarmik oqaluttuaraat Harry Potter maani issiasoq. Illinuna?"

"Aap," Harry oqarpoq nukappiaqqallu iseqatai marluk isigalugit. Tamarmik pualasuujupput peqqarniippaseqalutillu. Illugiillutik nukappiaqqap qarsungasup saniani nikorfapput paarsisuatut isikkoqarlutik.

"Usi, aajuna Crabbe aajunalu Goyle," nukappiaraq qarsungasoq oqamivoq Harryp taakkua nakkukkai takoriamiuk. "Uangalu ateqarpunga Malfoy, Draco Malfoy."

Ron quersorialaarpoq soorlu illassaraluani nunuinnaraa. Draco Malfoyip nakkuppaa.

"Isumaqarpit atera quianartooq? Aperisariaqanngilakkilluunniit qanoq ateqarnerisutit. Ataatama oqaluttuuppaanga ilaqutariit Weaslykkut aapplaartunik nujaqartut, milaqarlutik meeraqangaaramillu tamaasa akissaqartinngikkaat."

Harry saaqqippaa.

"Erniinnaq paasiumaarpaa angakut ilaqutariit ilaat alla-

nit pingaarnerusut, Potter. Mianersuutigissavat kikkut peqatigissanerlugit. Iitstersuukkumaarpakkit kikkut peqatigissaneritit."

Assani Harrymut isaappaa Harrylli assaa takunngitsuu-saarpaa.

"Uanga nammineerlunga aalajangersinnaakutsoorpara kikkut pingaaruteqarnerunersut kikkullu pingaaruteqannginnerunersut, qujaannarpunga." Harry ilasseraanngivilluni oqarpoq.

Draco Malfoy aappillinngilaq uluaalii qarsungaqisut aap-palaartoq qaquaartumik annikitsunnguamik serngoruller-put.

"Illiisuuguma mianersulaassagaluarpunga, Potter," Draco oqarpoq. "Ileqqorissaarnermik ilinnianngikkuit angajoqqaattut peqinuutit. Aamma taakku naluaat namminerminnut suna pitsaanerunersoq. Inupalaat Weasleykkutut Hagritidullu ittut akuliuffiginarukkit taakkutut ileriaannavutit."

Harry Ronilu nikuipput. Ronip kiinaa nujaatut aappalut-sigaaq.

"Oqaatsitit uteqqilaariakkit," oqarpoq.

"Ukorsiiaa, kamaanniarpisigut?" Malfoy kamassuataar-poq.

"Massakkorpiaq aninngikkuit suneqassanngilatit," Harry oqarpoq, nipaali kisimi sapiippasip-poq. Crabbe Goylelu tamarmik immikkut namminermi-niit Ronimillu annerup-put.

"Anerusunngeqaagut, ilaa nukappiaqqat? Ulloeqqqasioreerpugut maanili naammattunik mamakujo-qannguatsiarpoq."

Goylep uppiit sukkulaatit Ronip sanianiittut illigerpasillu-

git tigusinialeruttortoq Ron pissippoq sulili qanoq iliuuse-qarianngitsoq Goyle amiilaarnartumik nillerujussuarpoq.

Teriarsuup Scabbersip kigumminik mikisunik ipittunik Goyle assaatigut kiisimavaa kaanngartitassaajunnaarluni. Crabbe Malfoyilu tunuariarput Goylellu nilliasorsuulluni Scabbers issuttuuppa. Teriarsuaq kiisami naggataatigut nak-karmat igalaamullu tulluni nukappiaqqat pingasut arpaan-navik aniartorput. Immaqa isumaqarsimapput mamakujut-tut akornanni suli teriaqartoq imaluunniit qimaanerannut pissutaasimasinnaavoq pisuppaluttumik tusaasaqarnerat, tassami erininarserianngitsoq Hermione Granger iserpoq.

"Susoqartoruna?" Aperivoq mamakujuttut puukui nater-mi siammarsimasut isigütigalugit aammalu takuaa Ronip Scabbers pamiuatigut tigummigaa.

"Iisimajunnaarsimagunarpoq," Ron Harrymut oqarpoq Scabbersilu misissulerlugu. "Naamik - taamaannavianngilaa - sinileqqissimavoq."

Tamannalu salluunnigilaq.

"Malfoy nalunnigiliuk?" Ron aperivoq.

Harryp maanna madam Malkinimi naapinnertik oqalut-tuaraa.

"Ilaqutai tusaamavakka," Ron nikallungarapasilluni oqar-poq. "'Ilissi-nalunnigisarsi' tammarmat taanna illersorsima-galuarlugu siullernut ilaallutik uatsinnut uteqqipput. Uatsinnut uteramik oqarsimapput taassumarsuup angakku-arsimagaatik. Ataatama tamanna upperinngilaa. Oqarpoq Malfoyip angutaa pissutissaqarsimanngikkaluartoq Taarnermik tapersersuilemnissaminut." Hermionemut saal-luni oqarpoq: "Suniarpisigut?"

"Oqarfiginiaannarpassi uliguasi tuaviorlusi atissagisi. Aatsaaginnaq qimuttuitsut ingerlatitsisuat aperiartorpara

qaqugu apuutissanersugut akivorlu apuutilivissugut.
Paannikkassi? Taamaassimappat atuarfimmut apuutsinnata
ajornartorsiulissaasi!"

"Scabbersiuna paannittoq, uaguunngitsoq," Ron oqarpoq
niviarsiarlarlu qissimigaarlugu. "Anillassinnaavit atisatta
taarsernerini?"

"Soorunami anissaanga - maangaannarpunga ilakka mee-
raaqqatut pissusilersormata; arpaqattaarput pinnguarlutik
ilatillu natermut igeriuttarlugit," Hermione ajuallalluni oqar-
poq. "Aamma qinngat ipeqarpoq!"

Aniartormat Ronip kamaqaluni isiminik malittaraa.
Harry igalaakkut silammut qiviarpoq. Taarsilersimavoq.
Qaqqat orpippassuillu isiginnaarpai. Soorluuna qimuttuitsut
sukkaallinngitsulluunniit.

Ronilu kavaajatik peerpaat uliguarsuillu takisuut atillugit.
Ronip uliguuaa inuttaanut naappallaalaarpoq, taamaattumik
qarlii arpaatit uliguarsuup ataani ersipput.

Qimuttuitsuni nipi tusarsaalerpoq. "Minutsit tallimat
qaangiuppata Hogwartsimut apuutissaagut. Nassatasi
qimuttuitsuniitinnassavasi atuarfimmukaanneqassapput."

Harry pissangaqaaq malugaalu Ron milaaqqami tunuani
qarsorsimasoq. Mamakujuttuutimik sinneri kaasarfimmin-
nut manngussuuteriarlugit meeraqatitik torsuusami siulli-
niullutik imminnut ajattaattut annivigaat.

Qimuttuitsut maanna kigaallipput naggataatigullu univil-
lutik. Meeqqat tamarmik matup tungaanut siulliuniupput
qimuttuitsullu unittarfeeraannut anillapput. Harry unnuup
silaannaani nilleqisumi qianermik sajukulaarpoq. Taava
qaammartartoq ikinneqarpoq Harryllu nipi ilisarnartoq tus-
saalerpaa: "Atualerlaat! Atualerlaat maanngassapput! Ilaavit,
Harry?"

Hagridip kiinaa meqquissuaq atuartunut qungujussima-
voq.

"Maliinnassavassinnga - atualerlaanik suli tunussinniitto-
qarpa? Ingerlavissarsi sianigalugu! Atualerlaat malissavaan-
nga!"

Imminnut ajattaatigalutik orlusarlutillu aqqusineeraq
amitsoq sivingaqisoq atuarlugu Hagrid malippaat. Sanimut
illuttut isigisaat tamarmi taartuinnavissuuvoq Harrylu isu-
maliorpoq tamanna orpippassuuartigoorminnik pissute-
qartoq. Tamangajammik nipaarutivissimapput. Neville,
nukappiaraq naraseersertuartoq manittuutigaluni pisuppoq.

"Erniinnannguaq Hogwarts takussavarsi," Hagrid tunum-
mut saalluni nilliavoq. "Aqqusinermi uani sangoreerutta."

Taava meeqqat tamarmik nipitoorsuarmik nillerput:
"Ååååh!"

Aqqusineeraq atuarlugu tasersuup taartup sinaanut pisi-
mapput. Tasersuup akiani qaqqarsuup qaavani illussaarsua-
qarpoq ikummarissunik igalaalinnik, napasulialimmik qar-
mallu anillanganeri kusanartorsuarnik kusassagaapput.
Meeqqallu isigisartik alutorsaategaat.

"Umiatsiami ataatsimi sisamaannaasinnaavusi!" Hagrid
nillerpoq umiatsiarpasuillu tatsip sinaani pituttorsimasut
tikkuarlugit. Harryp Ronillu Neville aamma Hermione umi-
atsiaqatigaat.

"Tamassi inissippisi?" Hagrid umiatsiami kisimüttoq nil-
lerpoq. "Pituussaarniarsigit - SIUMUT!"

Taava umiatsiaarapassuit tatsimi qillarissumi ataatsikkut
aallarput. Atuartut tamarmik issiapput nipaqaratik tupiguso-
qalutillu illussaarsuaq qaqqap qaavaniittoq isiginnaarlugu.
Tatsip akiata sinaa qanilliaartortillugu illussaarsuaq portut-
sikkiartuinnavippoq.

"Maannakkut taqissaasi!" Hagrid suaarpoq umiatsiaaqqat siulliit tatsip akianut qaarsortalimmut pimmeta. Tuaviinnaq taqipput, umiatsiaaqqallu naasut nermussorlutik talliartortut akulikitsut ataatigut ingerlapput, sunaaffa qaarsup ammannersuata assiaqutaasigut. Sullorsuaq taartoq illussarsuup ataanukartoq ingerlavigaat, naggataatigullu nunap iluani umiarsualivimmut apuullutik nunamullu ikaarlutik.

"Hej uumaak, illit narasiutigaaajak?" Hagrid umiatsiaaqqanni qimataqarnersut misissuisoq oqarpoq.

"Trevor!" Neville oqiliallaqaluni ilisarsilluni nillerpoq tallinilu siaarlugit. Taava qaarsumi qaarusuliakkut tattorliuullutik ingerlapput naggataatigullu silaannarissumut masattunik ivigarsunnittumut anillassinnaanngorlutik. Maanna illussaarsuup saavaniilerput tummeraani ujaraasuni.

Tummeqqakkut illusaarsuup isaariaanut majuarput isaariarsuullu quassuttuumik sanaajusup sioraanut pillutik.

"Suli tamassi peqataavi? Uumaak narasiutit suli nakkutigaaajak?"

Hagridip assassuani kivippaa illussaarsuullu matorsuanut pingasoriarluni kasuttorluni.

Nasaq imaannaanngitsoq

Matu ingerlaannaq ammarpoq. Arnaquassaaq angisooq qernertunik nujalik qorsooqqissunik takisuunik nerutuunik atisalik saavanni qeqarpoq meeqqallu tikilluaqqullugit. Kiinaa mersernarpaloqaaq Harryllu eqqarsaataa siulleq tassaavoq arnaq taanna ajuallatsinnaveersaagassaasoq.

"Aajuku atualersussat, professor McGonagall," Hagrid oqarpoq.

"Qujanaq, Hagrid. Massakkumiit uanga isumagissavakka."

Matu ammarpaa. Torsuusarsuaq iserfigisaat angingaarmat ilaqutariit Dursleykkut illuat ajornanngitsunnguamik taassuma iluani inissinneqarsinnaagaluarpoq – sulilu qummut inissaqarlualuni. Inersuaq nanerussanik iikkami ujaqqanik granitiusunik sanaajusumi nivingasunik akuttoqatigüssaarlugillu nivinngarneqarsimasunik qaammaqqusersorneqarsimavoq, soorlu Gringottsip torsuusarsuini nanerussat taamatut nivingasut. Qilaava qutsippallaaqimmat sumik sanaajunersoq takujuminaappoq majuartarfissuilli marmorimik sanaat kusanartorsuit etagenut qutsinnerusunut attaviupput.

Professor McGonagall nateq qillarissoq ujaqqanik saattunik qallersorsimasoq aqqusaarlugu malippaat. Harryp inuit

hundredit arlallit nipaas matup talerperlermeersup iluanin-
ngaanneerpaluttut tusaasinnaavai – atuarfimmi atuartut sin-
neri ilinniaritsisullu taqqamani katersuussimassapput –
kisiannili professor McGonagallip atuartut aallarterlaat
inimut minnerusumut ingerlappai. Inimut isaapput ittuuku-
jullutillu annilaangarpasillutillu imminnut qaninniarlutik
qanoq pisoqarnissaa pissangallutik utaqqillugu.

”Hogwartsimut tikilluaritsi,” professor McGonagall aal-
larnüvoq. ”Tikilluaqqusummik nerersuarnissarput erniin-
naq aallartissaaq, kisiannili Inersuarimi issiavissassinnut
ingitsinnasi kollegianut assigiinngitsunut agguataarneqas-
suusi. Agguataarineq nalliuttorsiorpalaarneruvoq pingaaru-
teqartorujussuaq kollegiarsi maani Hogwartsimi angerlar-
simaffigilissagassiuk kollegiamilu ineqatisi ilaqutariittut isi-
gilertussaagassigit. Kollegiami najugaqatisi atuaqatigissavasi
kollegiami sinittarfinni sineqatigisarlugit sukisaarsartarfim-
milu sunngiffissinni sukisaarsaqatigisarlugit.

Kollegiat sisamat ateqarput Gryffindor, Hufflepuff,
Ravenclaw aamma Slytherin. Kollegiat tamarmik immikkut
ataqqinartumik oqaluttuassartaqarput kollegianilu tamani
angakkut arnaquassaallu tusaamasarsuit najugaqarsimap-
put. Hogwartsimi najugaqartillusi angusasi sapiitsuliornisilu
atuarfimmu kollegiassinnut pointinik tunineqarnissigut ilu-
aqutaasussaapput, akerlianilli malittarisassat unioqqutsik-
kussigit unioqqutitsisup kollegiaa eqqorneqassaaq – kolle-
gia pointinik ilanngaaffigineqassammat. Ukiup atuarfiusup
naanerani kollegia amerlanerpaanik pointinnattoq pokale-
mik nersornaasernerqassaaq, tassa nersornaammik ataqqi-
nangaartumik. Neriuppunga tamassi immikkut kollegiarsi
ataqqinartumik sinniisuuffigiumaarissi kollegiami sorlermi-
luunniit inissinneqaralarussiluunniit.

Kollegianut agguanneqarnissarsi minutsit marlussuit qaangiuppata aallartissaaq. Taamatut pisoqarnera atuartut allat isiginnaassavaat piumaffigissavassilu utaqqinissinni atisasi aaqqissuutilaassagisi."

Taamatut oqaaseqartilluni Nevillep uliguua eqitertoq Ronillu qingaa ipertooq qiviarpai. Harryp tuaviinnaq nut-sani illaalerpai.

"Aallartinnissatsinnut piareerutta uteqqissaanga," professor McGonagall oqarpoq. "Utaqqiisaa eqqissisimaniaritsi."

Inimiit anivoq Harrylu quarsaarpoq.

"Agguaassinermitaava qanorpiaq ingerlassava?" Ron aperivaa.

"Immaqa arlaannik misilinneqassaagut. Fred oqarpoq naalliunnartorujussuusartoq kisianni isumaqarpunga uumi-saaginnarluni taama oqarsimassasoq."

Harryp uummataa sukkatseriarujussuarpoq. Misilitsissaagut? Atuartut tamaasa isiginnaartoralugit? Kisiannimi sulii angakkuarnermik ilisimasaqanngilaq - qanoq iliussanerpooq. Tikiuteriiginnarluni taamatut pineqar-nissani naatsorsuutigisimanngilaa. Eqqissiveerulluni eqqani qinerpaa malugalugulu allat tamarmik aamma annilaarsi-masorujussuit. Oqartoqanngilaq taamaallaat Hermione Granger isussulluni sukkasuupilussuarmik angakkuaatit ilinniarsimasani oqaluttuaripallappai - sorlermita takutikku-sussanerpaa? Harryp tusarnaarnaveersaaraluarpaa.

Inuuleramili aatsaat taama annilaangatigaaq.

Taamanikulluunniit ilaqutariit Dursleykkunnut oqariartorti-taagami klassimini ilinniartitsisup nujaasai tungujortunngor-tissimallugit taama annilaangatigisimanngilaq. Matu nak-kutigeqqissaarpaa, ammariaannanngorpoq, ammarpallu professor McGonagall isissaaq Harrylu eqqartuussaattillugu.

Taava pisoqariataarpoq Harryp tupaatigeqisaanik tupang-aaramilu 1 meteringajammik qummut pissippoq - ilai nillialerput.

"Sunaana...?"

Anertikkalerpoq ilaalu tamarmik aamma taamatut anertikkalerlutik. Aliortukkat 20-t missaat inip iigaaninngaanniit puttullutik inimi timmioraalerput. Qaqqoreqalutik akimullu ersillutik imminnut oqaloqatigiutugalutik atualerlaallu soqutigerpasinngivillugit inimi timmipput. Allaanngivippoq imminnut oqqatilaartut. Aliortugaq mattuttutut mikisutut pualasuutut isikkulik oqarpoq: "Isumakkeerfigiuk suullu tamaasa puigukkit. Isumaqarpunga periarfisseqqissagipput..."

"Mattuffiup naalagaa, Peeves naammattorsuarnik periarfisseriinngilarput? Tusaamanerlunneqalersippaatigut aammami illit uattulli nalunngitsigaat aliortugaviunngitsog - ukorsiinnguut maani sulerivisi?"

Aliortukkap palasip pupiusaallip gamachiallillu atualerlaat takoriataarpai.

Akisoqanngilaq.

"Atuartut nutaat?" Mattuffiup naalagaa oqarpoq tamaasalu qungujulaarfigalugit. "Kollegianut agguarneqarnissarsi utaqqivarsi, ilaa?"

Ilaat nalornerpasillutik sikisaarput.

"Hufflepuffimi takunissarsi qilanaaraarput," mattuffiup naalagaa oqarpoq. "Tassaana uanga kollegiatoqara."

"Maanna malissinnaanngorparsinnga," nipi sakkortooq tutsiuppoq. "Nalliuttorsiorpalaartumik agguaassinissaq aalartileroq."

Professor McGonagall utersimavog aliortukkallu ataasiakkaarlutik iikkap illuatigut timmillutik tammararput.

"Tunuleriiaarniaritsi," professor McGonagall oqarpoq, "malillungalu."

Harry eqqumiigisaminik malugisoraa nissuni qituttuinanngorsimasut, atuartullu tunuleriiaalermata nukappiaq-qap qaamasunik nujallip tunuanut inissippoq. Ron tunuanut pivoq taavalu tamarmiullutik torsuusarsuarmut ingerlapput matorsuillu marloqiusat aqqutigalugit Inersuarmut isaallutik.

Harry ini taama eqqumiitsigisoq alutornartigisorlu takorloorsimanngisaannarpaa. Inersuaq naneruutinit tusintilippassuarnit nerrivissuit takisuut sisamat qulaanni nivangaannartunit qaammaqqusersorneqarsimavoq. Atuarfimmi atuartut annerit issaareersimapput. Nerrivinni takussaapput puuguttat inertarfiillu kuultiusut. Nerriviit takisuut tunuanini nerrivik alla sanimut inissinneqarsimasoq takussaavoq tassalu ilinniartitsisut nerriviat. Professor McGonagallip atualerlaat Inersuarmut eqquppai. Ingerlagamik ilinniartitsisut nerriviat tunullugu atuartullu nerrivii saallugit qeqqipput. Kiinnat 100-kkaat atuartut nutaat isikkuppaat. Kiinnat allaanngivipput nanerussat asingasut naneruuterpassuit qinngorfigisaat. Imminnut nakkussisorpassuit takorusunnagit Harry qummut qiviarpoq takulerpaalu qilaaq qernertuinnaq ullorissanik ikkussuiffigineqarsimasoq. Hermione isussuttoq tussavaa: "Angakkuarneqarsimavoq silami qilak assilillugu. Hogwartsip oqaluttuarisaanerani taamaaliortogarsimasoq atuarpara."

Upperiuminaappoq takusaat qilaaginnaammat tasaanngimmallu qilak ulloriarpassualik. Inersuaq ima tupinnarti-gaaq allaat qilammut ammaannarsinnaagaluarluni.

Harry tuaviinnaq ilani isigeqqilerpai professor McGonagallip nipaqaanngivilluni tummarfiusaq issiaveeraq

pingasunik niululik nukappiaqqat tullerïiaarsimasut saavan-
nut inissimmagu. Angakkup nasaa'inngigissoq issiaveeqqa-
mut inissippaa. Taanna nasaavoq ilaartornikoq, nungullarni-
koq ipertoqisorlu. Aja Petuniap illuminiütinnissaa sapivissi-
massagaluarpaa.

Immaqa nasaminngaanniit kaniina ammunniarpaat,
Harry puuallalluni eqqarsarpoq. Tamarmik nasaq nakkuti-
lerpaat aamma Harryp nakkuppaa. Sivikitsuinnarmik suna
tamarmi nipaalluinnaqqissaarpoq taava nasaq sajulerpoq.
Nasap saavani alinnera qaniusanngorluni ammarpoq –
nasarlu erinarsorluni aallartippoq.

*Immaqa isumaqarputit nasapalaajusunga
isigisalli ajortumik eqgartuutissanngilat
imminut nerissaanga illit nassaarigukku
nasaq uattut ittoq.*

*Nasat portusooq piginnaruk
bowleri qernertoq qillertoq
uangami Hogwartsip illernartuutaasa pingaarnersaraannga
nasaq agguaassisartoq kusanartoq.*

*Niaqqunmi isertukkatit tamaasa takuakka
kissaviarsuttut suut tamaasa isigaakka
taava atinnga paasillugulu
sumi najugaqalissanersutit.*

*Immaqa Gryffindorimut pissaatit
liivitut uummateqaruit
tassani sapütsut najugaqarput
sapüssuseqarluartut.*

*Hufflepuffimi inissarsisinnaavutit
inimigisaqarnak angusaqarniartuuguit
tatiginartoq pitsaasorlu ikinngutillu ikinngutaat
tassaavoq illup atorfissaqartitaa.*

*Ravenclawitoqaq inissaqartarpoq
silatuumut silattoriartuinnartumut
ilinniagaqarneq itisilerinerlu
kingunearluartarput.*

*Küsalumi Slytherin
naleqqunnerusinnaavoq
suulluunniit atorlugit
anguniakkaminik angusaqarniartumut.*

*Nangaaqinak, atinnga
pikkorliornak
Tatigilluaannannga, ajornavianngillat
angakkuarnikka.*

Nasaq erinarsorluni naammassimmat inersuarmi isersima-
sut tamarmik nuannaarlutik nillerrapput ersaattaallutillu.
Nasaq issiavinnut sisamaasunut tamanut sikisaarpoq nagga-
taatigullu nipaarulluni.

”Taava nasaq atiinnassarput? Ron Harrymut isussup-
poq. ”Fred toqussavara sallulluni oqarmat torullersuaq
paassagipput.”

Harry qarsungalluni qungujuppoq. Aap, tassami nasap
atinissaa soorlu ilimagisamit ajorpallaarnerunavianngitsoq.
Nammineq angakkuarnerminngaanniit pitsaanerussaaq.
Kissaatigingaaraluarpaali inuppasuit isigineranni taamatut

pisoqannginnissaa nasarmi piumasaqarpoq. Harry maanakkorpiaq sapiitsutut, piumassuseqartutut, silatuutut nalornigissuteqanngitsutullu misigisimanngilaq. Nasaq oqarsimasuugualuarpat inuit annilaangasut imminullu tatiginngitsut sumunnassanersut taava tassunngassagualuarpoq.

Professor McGonagall siumut ataatsimik alloriarpoq. Pappiara imusaq tigumiarpaa tassalu atuartut nutaat allat-torsimaffiat.

"Atisi taaneqarpata – kinguleqqiutisi siulliullugit taassavakka – siumut alloriassaasi nasarlu atillugu issiaveeqqamullu pingasunik niululimmut ingillusi. Nasap nalunaarfigissavaasi sumi najugaqassanersusi. Siullec sassartussaq tassaavoq Abbot, Hannah!"

Niviarsiaraq rottehalelik qaamasunik nujalik aappaluttunillu qaquartunik qalipaatilinnik ulualik orloqqajarluni sassarpoq, nasaq tiguaa atillugulu (nasaq angigingarmagu nasaq atimmagu isai tammarput), taavalu ingippoq. Sivikitsunnguamik susoqanngilaq.

"HUFFLEPUFF!" Nasaq suaarpoq.

Nerrivimmi takisuumi talerperlermi issiasut nuannattorsuupput ersaattaallutillu Hannah Hufflepuffermiut ikinngutini ingikkiartorfigimmagit. Harryp takuaa mattuttup puasuup aliortugaata aalateriffigigaa.

"Bones, Susan!"

"HUFFLEPUFF! Nasaq nilleqqippoq Susanilu Hannah-p eqqaanut ingikkiartorpoq.

"Boot, Terry!"

"RAVENCLAW!"

Nerriviit aappaanni issiasut tamatumuuna ersaattaapput. Atuartorpassuit Ravenclawimeersut nikuipput Terry akunnerminnut pisoq assamminniarlugu.

Brocklehurst, Mandy aamma Ravenclawimi najugaqartussaavoq, kisiannili Brown, Lavender Gryffindorimi najugaqartussat siullersaraat, nerrivimmillu saamerlermiit nilterrapput. Harryp takusinnaavai Ronip angajui nuannallutillu nilliasut.

Bulstrode, Millicent Slytherinimut inissinneqarpoq. Immaqa Harry imminut salloqittarsimassaaq kollegia taanna tusaamanerlukkamiuk eqqarsarporli tassani najugallit iluanngitsutut isikkoqartut.

Maanna naarlukkiartuaamisaalearpoq. Eqqaamalluarpaa atuarfitoqqamini eqaarsaaqatigiüttussat ilassarsiuleraangata qanoq pisoqartarnersoq. Kingullerpaajulluni toqqarneqartarpoq. Imaanngitsoq atorsinnaannginnami kisianni kikkullunniit Dudleyp ikinngutipalaavilu akerlilersorusunneq ajorpaat taamaattumillu Harry ilaserineq ajorlugu, aatsaat naggaterpiaatigut ilassarsiarisarpaat.

"Finch-Fletchley, Justin!"

"HUFFLEPUFF!"

Harryp maluginiarpaa nasap kollegiap atia ilaannikkut eqqarsaatigeqqaarnagu taasaraa ilaannikkulli piffissaq sivi-sunerusoq eqqarsarnissaminut atortaraa. Finnigan, Seamus - tunuleriiaaramik Harryp sanilia - issiaveeqqami minutsingajak issiareermat aatsaat nasaq aalajangerpoq Gryffindorimut pissasoq.

"Granger, Hermione!"

Hermione arpaannangajak issiaveeqqamut ingikkiartorpoq tuaviinnarlu nasaq atilluartiterlugu.

"GRYFFINDOR!" Nasaq nilllerpoq. Ron nipaatumik anertikkarpoq.

Harry ajuvissumik eqqarsalerpoq. Qanormita pisoqassava kollegiamut innersuunneqanngitsooruni? Qanoq issaga-

luarnerpoq issiaveeqqami nasaq atillugu issiaannaleruni qanorlu pisoqanngippat, taavalu professor McGonagall aggerpat nasaalu peersillugu oqarlunilu kukkusoqarsima-soq qimuttuitsorlunilu angerlassasoq?

Neville Longbottom, nukappiaraq naraseersertuartoq qaaqquneqarami issiaveeqqap tungaanut ingerlanermini pangallappoq. Nasaq sivisungaatsiartumik aalajangerneq sapilerualuarpoq. Nasaq kiisami oqarmat "GRYFFINDOR" Neville natsani peernagu arpaannaq nerrivimmukaraluarpoq illaatigineqaqalunilu uterpoq nasaq MacDougal, Moragimut tunniukkiartorlugu.

Malfoyip atini taaneqartorlu eqqissivilluni majuarpoq. Ingerlaannaq kissaatini pivaa. Nasap niaqua attuinnaraalu nasaq suaarpoq "SLYTHERIN!"

Malfoy imminut iluarisimaaqaluni ammukarpoq ikinngu-tini Crabbe aamma Goyle akuliuffigiartorlugit.

Maanna atualerlaat tunuleriiaarlutik inissititersimasut ikittuinnanngorput.

Moon...Nott...Parkinson... taava tulliuupput nivissat marlulissat, Patil aamma Patil... taava Perks tulliuuppoq, Sally-Anne... kiisalu...

"Potter, Harry!"

Harry siumut alloriarmat inersuarmi isussuppalunneq tusarsaalerpoq.

"Ilumut Potterimik oqartoqarpa?"

"Tassa taannaanerluni Harry Potter tusaamasaq?"

Atuaqatai oqaluppallupput.

Nasap Harryp isai asserlugit atitinneqannginnerani Harryp takusai kingulliit tassaapput inuppasuit qungatsitik tasillugit imminut nakkussisut. Taava natsap iluani taar-tuinnarsuarmi utaqqilerpoq.

"Hmmm," nipi sallaatsoq tusaalerpaa.

"Aalajangeruminaappoq. Assorsuaq aalajangeruminaappoq. Takusinnaavara sapiitsorsuusooq aamma silatungaatsiartoq. Pisinnaassuseqarpoq, ila ukorsii, pisinnaasarpassuaqarpoq - aamma takusinnaavara imminut malugitinneq nuannari-suugit. Sumuttoq inissillakkit?"

Harryp issiaveeraq tigulluartiterpaa eqarsarlunilu:

"Slytherinnimuunngitsoq, Slytherinnimuunngitsoq."

"Slytherin nuannarinngiliuk?" Nasaq oqarpallappoq.

"Ilumut taamaappa? Tassani ingerlalluarsinnaassagaluartutit qularinngilara. Illit niaqqunni tamanna takusinnaavara, aamma Slytherin tassaavoq illit tusaamasarsuanngornissan-nut ikiuutaalluarsinnaasoq, tamanna qularanngilaq - naa-mik taamaanngila? Kisiannimi tamanna qularinngikkukku taava oqaannassaanga GRYFFINDOR!"

Harryp tusaavaa oqaaseq kingulleq inersuarmut suaaru-tigineqartoq. Nasaq peerpaa Gryffindorillu nerrivianukar-luni. Eqqissiallattorujussuuvoq Slytherinimut inissinne-qannginnami. Toqqissiallangaarami malugerpianngilaa tamanit ersaartaanneqqarnerpaanini. Gryffindorimi ilitser-suisooq Percy nikuipooq Harrylu qamannga pisumik assam-millugu qatanngutaalu Weasleykkormiut marlulissat nilliap-put... Potter pivarput! Potter pivarput! Harry palasip alior-tukkap siusinnerusukkut takusami akianut ingipooq. Aliortukkap taliatigut pattalaarpaa, attormanilu Harry misigaaq soorlu tatsimut qerinnaannangajattumik nillissuse-qartumut iginneqaannarluni.

Nerrivimmit tassanngaanniit ilinniartitsisut sumi issianer-sut takulluarnerusinnaavai. Hagrid nerriviup isuata illuani issiavoq Harrylu qungujullugu kulluni kiviütigalugu. Harryp akillugu qungujuffigaa. Nerriviup qeqqata nalaani

issiavissuarmi kuultiusumi Albus Dumbledore issiavoq. Harryp ingerlaannaq ilisarivaa nallukattani uppiit sukku-laait poortaanneersuni takunikuugamiuk. Dumbledorep nujai qeersuut aliortukkat akisugunnerisut akisugupput. Harryp aamma professor Quirell takulerpaa, angut inuu-suttoq annilaangasoq Uunnaavik Ussiitsumi naapitaa. Eqqumiilluinnarpoq niaqqumigut aappillarissumik kangia-miut nasaannik turbanimik nasaqarami.

Maanna atuartut nutaat pingasut kisimik amigaataaler-put. Turpin, Lisa Ravenclawimut pisinneqarpoq, taava Ron tullinguuppoq. Kiinaa qorsuinnanngorsimavoq, qorsuk qaquaartoq. Harryp inussani nerriviup ataani paarlappai sekundilu ataaseq qaangiummat nillerpallanneq tusaavaat: "GRYFFINDOR!"

Ron nerriviannut aqullaajusaannarluni ingimmat Harry ilaalu ersaattaapput.

"Torrak, Ron, torrallaavipputit," Percy Weasley oqarpoq. Taama oqarnerata nalaani Zabini, Blaise Sytherinimut toq-qarneqarpoq. Professor McGonagallip allagartarsuaq atuar-tut atiinik allattuiffik imuaa ingerlaleramilu nasaq agguaa-sisartoq nassarlugu.

Harryp puuguttani kuulteq imaqanngitsoq isigaa. Maanna malugisinnaanngorpaa qanoq kaatsigaluni. Soorlu qangajorussuaq qimuttuitsuni issiasimasoq kaaginik græs-kartaertenik nerersuataarluni.

Albus Dumbledore nikuippoq. Atuartuutini qungujuffi-gai tallinilu taakkununnga siaarlugit takutinniarlugu kater-suussimanerat qanoq nuannaritigalugu.

"Tikilluaritsi!" Oqarpoq. "Ukiumut nutaamut Hogwartsimiiffissassinnut tikilluaritsi! Nerersuarnissarput aallartitsinnagu oqaaseqalaarusukkaluarpunga - oqaasissak-

kalu imaapput. Serparneq! Userarneq! Dingenot!
Attortaalineq! Tassalu oqaasissakka tamarmik, qujanaq."

Issiavimminut ingeqqippoq tamarmillu ersaartaapput
nipituumik nilliaatigalutik. Harryp oqaaserineqartut qanoq
isumaqarfigissanerlugit nalulluinnarpaa.

"Imaattoq .. silaminik silaqaraluarpa?"

Mianersorpasilluni Percy aperaa.

"Silanngajaarnersoq?" Percy oqarpoq.

"Piginnaanertoorsuaruna! Silarsuarmi angakkut annersa-
raat. Kisianni soorunami immannguaq silanngajaalaarpoq.
Naatsiaanik pissavit, Harry?"

Harry tupigutsangaarami oqqani katangajappaa.

Puugutarsuit nerrivimmi saavaniittut nerisassanik qammip-
put. Nerisassat taama mamarunartigisut taamalu amerlati-
gisut takusimanngisaannarpai. Nersussuit neqaat siatat,
kukkukuuvaqqat siatat, savaaqqat neqaat saaniminertallit
siatat, puulukip quttora, pølsit assigiinningsorpassuit,
baconit puulukillu siatat, naatsiit uusut siatallu, puulukit
aserortikkat siatat, eertat, guleruuat, miseqqat, ketchup
minnerunngitsumillu mamakujuttut pebermyntepastillit.
Harryp paasilluarsinnaanngilaa sooq taakku kingulliit ner-
rivimmut ilineqarsimanersut, aappaatigulli tupiginngilaa.

Oqartoqarsinnaanngilaaq ilaqutariit Dursleykkut Harry per-
limoortissimagaat, kisiannili taakkunaniikkallarami piuma-
sannguaminik tamussersunngisaannarsimavoq. Dudleyp
Harry mamarinerpaasaanik arsaartuartarsimavaa – naak
tamanna isumaqaraluartoq Dudley meriarnissami tungaa-
nut nerisariaqartartoq. Maanna Harry piumasannguaminik
iliorsinnaalerpoq. Puugutaminut tamalaanik niusivoq taa-
maallaat pebermyntepastillit pinnagit. Piumasannguaminik

nerivoq nerisaalu tamarnik mamarluarput.

"Mamarunangaaramik," Harryp neqi agguleruttora
palasip aliortugaa aliasuppasilluni oqarpoq.

"Imaattorsinnaanngilatit...?"

"Ukiuni 500-ngajanni ataasinnguamilluunniit nerini-
kuunngilanga," aliortugaq oqarpoq. "Soorunami nerisassat
pisariaqartinngikkaluarpakka kisianni maqaasivakka.
Imminut ilisaritilaarallarlanga. Ateqarpunga sir Nicholas de
Mimsy-Porpington. Gryffindorimi aliortugaq."

"Nalunngilara kinaasutit," Ron akuliuppoq. "Angajuma
uannut eqqartornikuuaatsit – illit tassaavutit Nick
Niaquingajassimasoq"

Ajunnginnerutissagaluarpara Sir Nicholas de Mimsymik
taagumma..." aliortugaq ajuallalluni oqarpoq, maannali
qaamasunik nujalik Seamus Finnigan aamma soqutiginni-
lersimavoq.

"Niaquerutingajassimasoq. Qanoq ililluni niaquerutinga-
jattoqarsinnaava?"

Sir Nicholas ajuallangajappasippoq. Oqaloqatigiinneq ili-
magisaatut ingerlasimannilaq.

"Imatut," narrassimarpalulluni oqarpoq, siutini saamerleq
pussoriarlugu nusuppaa. Taava niaqua tuviani inissisima-
lerpoq, allaanngivippoq niaqua qiversartulik. Paasinarpoq
arlaata niaqueriaraluarsimagaa iluatsivinnaguli. Eqqamini
issiasunik annilaartitsinini iluarisimaarpaseqalugu Nick
Niaquingajassimasup niaqquni inissaanut ikkuteqqippaa
quersoriarlunilu oqarluni: "Gryffindorimiunaa!
Neriuppunga ukioq manna kollegiat unammineranni kolle-
giassi ajuganissaanut peqataalluarumaartusi. Gryffindorip
napasuliaa aatsaat taama sivistutisumik pokalinnassiman-
ngilaq. Slytherinip pokali ukiut arfinilissaat pissarsiaraa.

Baroni aappallorissiq ajugaasimaartuartoq qatsunnarsivoq – taanna Slytherinip aliortugaraa.”

Harryp Slytherinimi najugallit nerriviat qiviarpaa taku-lerlugulu aliortugaq amiilaarnartoq angisoorsuarnik isilik, immikkuullarissuuk kiinalik atisamigullu sölvimik aagasat-toq. Malfoyip saniani issiavoq, Harryllu nuannaarutigeqi-saanik aliortukkap sanilini nuannarerpasinngivippaa.

”Sooruna taama aagasatsigisoq?” Seamus soqutiginnillu-ni aperivoq.

”Apeqqut taanna inuttaanut apeqqutiginnagisaannarsima-vara,” Nick Niaquingajassimasoq qanorluunniit pissusiler-sornissaminik nalornigisaqarpasinngitsaq oqarpoq.

Tamarmik qaarsillarlutik nerereermata nerisassat puugut-taninngaanniit tammarput puuguttallu ipiungaaramik allaanngivippat atorneqarsimanngitsut. Kingunitsianngua kinguleqqiutit takkuppet. Issortitat, sikut assigiinngitsorpas-suit, æbletærtit, kaagit sukkulaatit, jordbærit, pannakaat sirupillit allarpassuillu.

Harryp pannakaatornerani ilaqqutat eqqartorneqalerput.

”Uanga akusaavunga,” Seamus oqarpoq. ”Ataataga Muggleriuvog anaanamalu katikkamik aatsaat ataataga oqaluttuussimavaa arnaquassaajulluni. Tupassimannguat-siaqaaq.”

Ilai illarput.

”Illimmi Neville?” Ron aperivoq.

”Aap, uanga aanama perortippaanga, aanagalu arnaquas-saajuvoq,” Neville oqaluttuarpoq. ”Ilaqqutamali sinneri isu-maqaraluarput inuunera naallugu Muggleriussasunga. Aanama qatanngutaata angutip Algiep angakkuartinniarsa-risarnikuuvaanga – eqqaamavara ataasiarluni umiarsuali-vimmiit imaanut ajakkaanga. Taamani ipingajavippunga

pisorlu taanna angakkuarnermik kinguneqanngilaq. Arfineq pingasunik ukioqalernissama tungaanut pisoqanngivippoq. Taamani aanama qatanngutaa Angie tiitoriartorluni takkuppoq kingusinnerusukkullu qaliani igalaakkut ammut ningippaanga niaqora allinngortillugu. Singernikkut najummileruttoraanga ajaga Enid iserpoq kaageeqqanik pajullugu, eqqarsaqqaaarnanilu iperarpaanga kaageerartorni-arluni. Soorunami nakkarpunga kisianni anninngilanga ajoqusernangalu – akerlianik naatsiivimmi arsatut tammeqattaarpunga. Taamaaligama nuannattorsuanngorput aanagalu nuannaarnermik qiavog. Aamma kiinaat takussagaluar-pasi atuarfimmu atuariartoqqullunga allagarsigama. Tassami isumaqarsimagaluarput Hogwartsimi atuartunngornissannut angakkuarsinnaanermik pissaaneqarnera amigartog. Akkaa Algie usorsisimaangaarami narasissannik pitsippaanga."

Harry saniani issiasut Percy Weasley aamma Hermione Granger ilinniagassatik eqqartorpaat... "Neriuppunga ingerlaannaq aallartissasugut tassami ilinniagassaqaagaugut. Uanga immikkut soqutigaakka allanngortitsisarnerit, soorlu sunaluunniit allamut allanngortillugu. Soorunami tamanajornarnerusunut ilaagaluarpoq, kisiannili annikitsumik aallartittoqarsinnaavog - assersuutigalugu aallaqqaammut ikitsisit mequtinngortinneqarsinnaapput."

Harry misigilerpoq kiakkeriartorluni uernalerlunilu. Ilinniartitsisut nerriviat qiviaqqippaa. Hagrid tappika imigassartungaatsiarpoq professor McGonagallillu professor Dumbledore oqaloqatigaa. Professor Quirrelip eqqumiillu-innartumik nasallip ilinniartitsisog qernertumik nujarissaammik tanissimasog, qatiingasumik qingalik toqungasutullu asingatigisumik amilik oqaloqatigaa.

Sukkasoorujussuarmik pivoq. Ilinniartitsisup qatiingasumik qingallip Quirrelip turbania qarsullugu Harry toqqavillugu annilaarnartumik qissimerujussuarpaa - Harrylu qaamini qilerumigut naalliunnaannartumik annialerpoq.

"Na-aaa!" Harryp assani qileruminut tutsippaa.

"Suit?" Percy aperivoq.

"S-sunngilanga."

Anniarnera takkunermisut sukkatigisumik peeruppoq. Ilinniartitsisup qissiminna Harryp puigoruminaatsinnerogaa - qissiminnaami inussiarnersimannngilaq.

"Kinaana taanna ilinniartitsisoq professor Quirrelimik oqaloqateqartoq?" Percy aperivoq.

"Nå, Quirrel ilikkariikatassimavat? Tupinnanngilaq taama annilaangarpasitsigimmat tassami massakkut oqaloqatigisaa tassaavoq professor Snape. Taanna nakorsaasiasanik akuutissiornermik ilinniartitsisuuvoq, taannali ilinniartitsissutigissallugu soqutiginerpaajunngilaa. Quirrelip atorfia perusukkaluarpaa. Taartup Pissaaneranik ilisimasaqangaatsiarpoq."

Harryp Snape sivilungaaatsiartumik qimerloorpaa taassumali Harry isigeqqinngilaaluunniit.

Naggataatigut puugutani kinguleqqiutit nungulermata professor Dumbledore nikueqqipppoq inersuarmilu isersimasut nipaartuvipput.

"Aap, suli marlussunnik oqaasissaqarpunga maanna nerereerlutalu imigaqareeratta. Ataasiakkaanik paasissutisani oqaasissaqarpunga.

Atualerlaat ilisimasariaqarpaat maani eqqatsinni orpipassuit atuartunut tamanut matoqqammata.

Angajulliunerusut ilaasa aalajangersimasut aamma tamanna eqqaamasariaqarpaat."

Dumbledorep isiminik qillertunik Weasleykkut marluliai isigillatsiarpai.

"Atuarfiup kiffaata Filchip aamma qinnuvigaanga oqarfigeqqullusi anitsiarfinni torsuusani angakkuartoqartassanngitsoq.

"Quidditchimik sungiusarluni unamminerit semesterip aallartittup sapaatip akunnerata aappaani aallartissapput. Kollegiatik sinnerlugit unamminissamut peqataarusuttut madam Hoochimut nalunaassapput.

Naggataatigut nalunaarutigissavara ukioq manna init quleriit pingajuata torsuusaa talerperleq tamanut naalliunartumik toqorusunngitsunut matoqqasussaammat."

Harry illarpoq erninnarli paasillugu allanik illartoqarpianngitsoq.

"Ilumoornavianngilaq," Percy isussuppoq.

"Ilumut ilumoorisorivara," Percy akivoq Dumbledorellu isiginerani qinngorlerluni. "Eqqumiingaarami, arlaannik assiisoqaraangat sooq taamatut assiisoqarnersoq oqaatigisalaruarpaa. Orpippassuit uumasunik ulorianartunik ulikkaarput, tamanna tamarmik nalunngilaat. Maanna taama pisoqarnerani uagut siunnersuisartut ilisimatittussaagaluarpaatigut."

"Taava nikuitsinnata siunnersuutigissavara atuarfiup erinarsuutaa erinarsussagipput," Dumbledore nillerpoq. Harryp maluginiarpaa ilinniartitsisut allat qungujunneri ilungersunarsisimasut.

Dumbledorep angakkuaatini kivippaa aalariartillugulu qalersarlu kuultiusoq angakkuaataata nuuaniit qummut ingerlaarpoq oqaatsinik pilersitsilluni,

"Tamatta nipi aallartiffissarput nassaarisigu," Dumbledore oqarpoq, "aallarteriarta."

Taava tamarmik tamaviannguut erinarsulerput.

*Hogwarts, Hogwarts, Hoggy, Warty, Hogwarts,
atorsinnaasatsinnik ilinniartitsigut,
tamatta ataasiakkaarluta ilikkartitsigut,
utoqqaat inuusuttullu,
ajaappiallit inalunniit seeqqumikkut mattutillit,
niaqqugut immerneqassapput
tamanik ilinniagassanik
maannakkummi imaqanngillat silaannaannaallutillu,
sullernit toqungasut flødeskumilu
taava ilinniarneqarsinnaasunik ilinniartitsigut
ilinniartipiloortigut
sapinngisat tamaat, sinnera nammineerutigissavarput,
ilinniarluta tunniussilluta,
qaratsagut tamakkersortillugit.*

Immaqa ingasattajaarnerussaaq oqaraanni atuarmiup erinarsuutaa erinaq ataaseq atorlugu erinarsorneqartoq. Tamarmik immikkut erinnerlugu erinarsorpaat Weasleyllu marluliaatai allanit tamanit kingulliunerullutik erinarsorput taallat taalluartaqatigiissaarnerat nalugarnikku. Dumbledorep ussersorluni siulersorpai soorlu ajunngivissu-mik erinarsortut, erinarsuullu naammat sakkortunerpaamik ersaartaattuvoq.

"Ilumut erinarsuut tusarnej," pilerpoq qullinilu allarterlugit. "Tassa silarsuarmi angakkuaatit annersaat! Maannalu innarfissanngorpoq. Ingerlaniaritsi!"

Gryffindorip atuartuisa nutaat Percy inersuakkut nipiliorfusoqisukkut torsuusarsuarmut tassanngaaniillu majuartarfissuarmut marmorimik sanaanut qummut malippaat.

Harry misigilerpoq nissuni aqerlutut oqimaatsigilersimasut; qaarsilaqaaq misigisanilu amerlangaarmata qasoqaluni. Imalu uernartigaaq torsuusakkooramik assit nivingasut inuttai isussullutillu tikkuartulermata annertunerusumik tupigusuutiginaagit allaat. Aamma Percyp torsuusat isertuusat iikkamilu matut ersinngitsut aqqusaarlugit ingerlakkalu-armani annertunerusumik uissuummissutiginnilai. Tummeqqat arlalissuit majuarfigaat aatsaartarlutik isikkatil-lu kalikalaarlugit. Harry pisukataleruttortoq uneriataarput.

Sioraanni ajaappiarpassuit silaannarmi nivingapput. Percyp qanillimmatik anaartalerpaat.

"Peevesiuna," Percy atuartunut nutaanut tupigutsassima-qisunut isussuppoq. "Taanna qivittuuvoq poltergeisteq." Nipittuullugu suaartalerpaa. "Peeves - qaajumaamigit taku-niassavatsigit!"

Nillaarpalunneq nipitooq tusarsaavoq - soorlu ballonip silaannaarneqartup nipaa. Taava Peeves akivoq: "Baronimut Aagasattumukassagama?"

Qaarpallattoqarpoq, erininangitsorlu anguteerannguaq peqqarniippaluttunik taartunik isilik qanerujussualillu atuar-tut saannguannut takkuteriataarpoq. Silaannarmi qangata-voq nissuni paarlallugit issialluni ajaappissanilu tigulluarti-tersimallugu.

"Ooooh," oqarpoq tusarniitsumik tissitsalluni. "Atualerlaajaqqat inequnartut! Ila quianarpusi!"

Tungaannaannut sukkasoorujussuarmik timmivoq, tamarmillu eqqortikkumanatik taqipput.

"Qimagunnarit, Peeves, qimagutinngikkuit Baroni pisu-mik oqaluttuutissavara!" Percy nilllerpoq.

Peeves mitaarpoq qimagullunilu ajaappissat nivingasut tamaasa Neville niaquinnaata tungaanut miloriussuuteriar-

lugit. Tusaavaat sukkasuumik qimagukkiartortoq aqqutaani sakkutuut atisarsui savimernit sanioqqukkaangamigit anaartarpaluutigalugit.

"Eqqaamassavarsi Peeves mianersuutigissagassiuk," ingerlaqqimmata Percy oqarpoq. "Baronip aagasattup kisimi naalakkersorsinnaavaa. Uagut siunnersuisartuusugut allaat tusaajumanngilaatigut. Tassa maanna angerlamut apuupput."

Torsuusap akiani iikkami nivingavoq qalipagaq, arnap pualasoorujussuup siilikimik aappaluttoq qaquaartumik qalipaatilimmik kjoollip assinga.

"Oqaaseq isisutissaq sunaava?"

"Caput Draconis," Percy oqarpoq. Taava qalipagaq silammut qiverpoq tunuanilu iikkami putumik ammaneqalerpoq ammalortumik iserfigisinnaasaannik. Tamarmik uppeqqajaallutik putorsuakku isaapput - Neville ikiorneqartariaqarpoq - iserfigaallu Gryffindorip napasuliaata isersimaartarfia; ini najoruminartoq maavaartunik issiavissuarpassualik.

Percyp niviarsiaqqat sinittarfissaannukaappai nukappiaqqallu aamma sinittarfissaannut ingerlallugit. Nukappiaqqat sinittarfia napasuliami init qullerpaartaanniippoq - tummeqqakku qipisukku majuartariaqarput - naggataatigullu küsami siniffissaminnut innersuunneqarput. Siniffii tamarmik qilaaqarput aappaluttunik oqimaatsunik saagoqarlutik. Kuffertit nassatallu allat majuunneqareersimapput. Tamarmik oqalunnissaminnut qasoqqavallaqaat sinngusitillu attukkersuinnarpaat siniffisaminnullu innapajuusaannarlutik.

"Nerisagut mamat, ilaa?" Saagup iluanit Ron Harrymut isussuppoq. "Tassa, Scabbers oqorutit kimmarunnaarnakkit!"

Harry Ron aperissamaaraluarpaa pannakaat ussernerai sulili aperinani sinilersoorsimavoq.

Immaqa Harry nerivallaarsimavoq tassami eqqumeeq-qinnaamik sinnattorpoq. Sinnattumini professor Quirrelip turbania atisimavaa turbaniatalu oqaluffigiinnavippaa. Oqarfigaa ingerlaannaq Slytherinimut nuussasoq tassaniim-mammi siunissaa. Harryp turbani oqarfigaa nammineq Slytherinimut nuukkusunnigivilluni turbanili oqimaalliar-tuinnalerpoq. Harryp peerniarsarigaluarpaa kisiannili nasaq Harryp niaquanut ikkukkaluttuinnarpoq. Annernarsiartuinnarpoq Malfoyilu takkuppoq illaatiginiar-lugu. Taava Malfoy allanngoriataarpoq ilinniartitsisoq peqingasumik qingalik Snnape assigilerlugu, illarneralu nipitoqaaq uumissuERPaloqalunilu. Qorsummik innaallatto-qarpoq Harrylu iterpoq sajuttuinnaalluni aallerlunilu.

Illuanut saappoq sinileqqillunilu. Aqaguani iterami unnu-aammat sinnattuni eqqaamanngilaaluunniit.

Nakorsaasianut professori

"Aajinnga, takuuk."

"Sumi?"

"Nukappiaqqap takisuup aappaluttunik nujallip saniani."

"Isarualik?"

"Kiinaa takuviuk?"

"Qilerua takuviuk?"

Aqaguani Harry sinittarfini qimaannaraalu atuartorpas-suit isussullutik eqqartorpaat. Atuarfiup torsuusaani atuar-tut tamarmik Harry sanioqquttorlu arajutsiniangilaat. Allaammi ilaasa arlaleriaqalutik pisassaqartuusaarlutik takulluarumallugu piaaralutik sanioqquttarpaat. Harry neriuppoq erniinnaq soqutigunnaassagaanni tassami eqqis-silluni atuarfik sungiunnariusukkarniuk.

Hogwartsip ilikkarniarnera ajornakusooqaaq, torsuusam-mi majuartarfillit 142-uugamik. Ilaat silittorsuupput sangu-joraarlutik, allat amitsunnguupput qajannartuullutillu. Ilaat sapaatip akunnerata ullua sunaanersoq apeqqutaatillugu allanngorartuarterput tummeqqallu ilaat tammartarput tummeqqallu peeruteriataaraangata atuartut tummeqqanut allanut pissittariaqartarput. Aamma matoqarpoq ammarsin-naanngitsunik, aatsaat maniguulluni aperigaanni imaluun-niit quinassaaraanni aatsaat ammarsinnaasunik. Aamma

matoqarpoq matuunngitsunik matuusuusaarlutik iigaanaasunik. Atuartut ilungersorlutik eqqaamaniarsarisarpaat suut sumi inissisimanersut, tassami suut tamarmik taarse-raattuarmata nikittarlutillu. Qalipakkat inuttaat imminnut akulikitsumik pulaartarput, aamma Harryp qularinngivip-paa sakkutuut atisatoqarsui savimernit piumasaminnik ingerlasartut.

Aliortukkat ikiuutaanngivipput.

Tupannartorujussuusarpoq matu ammarniagaaq ammarlulgulu silaannakoorlutik takkuteriataaraangata. Nickip Niaquingajassimasup ajunngisaarluni Gryffindorimi najugallit sumunnarfissaannik ikiortarpai kisiannili Peevesip atuartut kinguarsartarpai, inortuilerlutik atuariartorpata matut parnaaqasut minnerpaamik marluk torsuusaanngitsorlu salloqittaaq aqqusaarteqqaartarlugit. Ilaanni siparnit eqqakkanik ulikkaartut atuartut niaquinut nakkartittarpai, natersuakkut ingerlaartillugit natersuaq nusuttarpaa atuartut natersuakkoortut uppitillugit, allattarfissuarmut allaatinik kridtunik milloortarpai imaluunniit tunuaninngaanniit taqissorluni ornittarlugit qingaasigullu tigoriarlugit nilliasarluni: "QINNGAT TIGOQAARA!"

Sulili Peevesimit ajornerusoqarpoq tassalu atuariup kif-faa Argus Filch. Harryp Ronillu ullaag siulleg atuariup kif-faa misillerfigeriikatappaat. Etagiat pingajuanni torsuusap iserfigeqqusaanngitsup matua ammarnialeruttoraat Filchip naammattoorpai. Tammarlutik oqalunnerat upperiumanngilaa isumaqarporlu nukappiaqqat naalanngillutik torsuusaq inerteqqutaasoq piaaralutik iserfiginialeraat. Kiilerimut mattunnialeraallu professor Quirrel qujanartumik sanioq-quppoq annaallugillu.

Filch qitsuuteqarpoq madam Norrisimik atilimmik.

Taanna uumasuuvoq sallukujooq qaserteq Filchitut angisoorsuarnik anillangasunik isilik. Qitsuk taanna torsuusani paarsisutut ingerlaartarpoq. Isiginerani inatsimmik unioqqutitsisoqarpat imaluunniit unioqqutitsiniarluni eqqarsaateqartoqarpat tuaviinnaq Filch aasarpaa, taannalu sekundialunnguit qaangiunneranni takkutareeraraaq. Filchip torsuusat isertukkat allanit tamanit nalunnginneruai (immaqa taamaallaat Weasleyp marluliaasa nalunnginneruaat), aammalu aliortukkatulli pilertortigisumik ilimagineqarani takkuteriataartarluni. Atuartut tamavimmik Norris nuannarinngivippaat amerlanerillu takorloortarpaat madam Norrisip tunuaniit isimmerujussuarnissaa.

Aammali atuarneq soqutiginarparpoq - klassi nassaarisinnaagaanni - Harryllu paasilluarpaa angakkuarneq tassaa-ginnanngitsoq angakkuaammik kaajallatsitsineq imaluunniit oqaatsinik eqqumiitsunik oqaaseqarneq.

Pingasunngornerit tamaasa unnuap qeqqata missaani qilak qinngussuarnik isiginnaartarpaat ullorissat assigiingitsut atii ilinniarlugit ulloriarsuillu ingerlaarneri qimerloorlugit. Sapaatip akunneranut pingasoriarlutik illussaarsuup tunuanut naatitsivinnukartarput naasunik ilisimatusarniarlutik ilinniartitsisortik arnaquassaavaraq professor Spiremik atilik ilagalugu. Ilinniartittarpai naasut pupiullu qanoq paarineqassanersut naatitallu ataasiakkaat qanoq piginnaaneqarnersut.

Fagit nuanniinnersarivaat Pissanerup Oqaluttuarisaaneranik ilisimatusarneq, taassuminngalu ilinniartitsisorivaat aliortugaq. Ilinniartitsisuat professor Binns utoqqarujussuulluni ilinniartitsisut isersimaartafianni kissarsuutip ammaannartup eqqaani sinilersimavoq. Aqaguani ullaakkut iterami timini qimappaa tamatumalu kingorna timeqarnani

nammineertariaqalersimalluni. Kisiannili aliortuganngoralu-
arluni quianarnerulinngilaq. Atuartitsigaangami nipangissa-
nani oqaluttarpoq atuartut atinik ukiunillu allattuineranni
atillu Emeric Qaasuttoq Uric Eqqumiitsorlu paarlaattuar-
tarpai.

Professor Flitwic angakkuarnermik serreranermillu ilinniar-
titsisorivaat. Torulliaaraavoq mikisoq saluttunnguaq, katiteri-
lu qulaallugu atuartitani isiginialeraangamigit allatut ajor-
nartumik atuakkat qaleriaat qaavini nikorfasariaqartoq.
Akunneq atuartitsivik siulleg aallartimmat atuartut nutaat
atii allattaavimminut krydsilertarpai. Harry tullinnguummat
nuannaarnermik nillerpoq katiterillu tunuanut uppilluni.

Professor McGonagall allaanerujussuuvoq. Harry ilu-
moorpoq isumaqarami arnaq taannaajuallatsinnaveersaar-
tariaqartoq. Sukannersuuvoq pikkorissuullunilu. Atuarteq-
qaaramigit sakkortuumik inissippai. "Angakkuarnermi
allanngortitsineq allanit tamanit ajornakusoorneraallunilu
ulorianarneraavoq, maanili Hogwartsimi ilinniassavarsi
nukiit taakku mianersortumik ilisimaarinnittumillu atornis-
saat," oqarpoq. "Taamaattumik siumoortumik oqaatigeriis-
savara arlarsi ilinniartitsinerup nalaani ajortuliorpat inger-
laannaq anisinneqassammat uteqqinngisaannassallunilu.
Tassa tamatuminnga ilisimateriissavassi."

Taava nerrivini puulukinngortippaa nerrivinngorteqqillu-
gulu. Tamarmik tupigusussuataarput aallartinnissartillu
utaqqisinnaajunnaarlugu qilanaangaramik. Erniinnarli
paasivaat piffissaq sivisooq ingerlareerpat aatsaat nammi-
neerlutik pequtit uumasunngortissinaassallugit.
Malittarisassarpasuit ajornakusoorlut allattoreerlugit
tamarmik immikkut ikitsimmik meqqutinngortitassaminnik
tunisipput. Atuartitsineq naammat Hermione Grangerip

kisimi ikitsisaatini allannortippaa meqqutinngortillugu. Professor McGonagallip klassimut ikitsit meqqutinngorsimasoq sölviusoq takutippaa Hermione Grangerilu qaquti-goortumik qungujullugu.

Atuartut tamarmiullutik qilanaarisaat tassaavoq Taartup Pissaaneranut Imminut Illersornermik ilinniaritaanissaq ajoraluartumilli professor Quirellip tamatuminnga ilinniar-titsinera soqutaarpiarunnaarsimavoq. Ini atuartitsivik hvid-løgisunnittorujussuuvoq. Tamarmik nalunngilaat hvidløg tassaasoq aammik milluaasartumut, vampyrimut Rumæniam i naapissimasaanut qunusaarut. Quirellip aammik milluaasartup naapeqqinnissaa annilaangagisorujussuuaa. Oqaluttuuppai kunngip ernerata afrikamiup nasani turbani tunniussimagaa zombiemik qimagutitsisimanera qujamasuutigalugu, kisiannili atuartut oqaluttuaq taanna uppererpiannigilaat tassami professor Quirell aappillerpoq silalu eqqartulergu Seamus Finniganip aperimmani qanoq ililluni zombie qimaatissimaneraa. Aammali turbani hvidløgisunnittorujussuuvoq Weasleyllu marluliaasa qularinngilaat nasaq taanna uanitsunik hvidløginik ulikkaartoq. Tamanna pissutigalugu Quirrel ajortunut tamakkununnga illersorneqartussaavoq sumulluunniit pigaluaruni.

Harry oqiliallaatigeqisaminik paasivaa allanut naleqqiulluni kinguarsimavallaarnani. Atuartut ilarpassui namminer-misut ilaqutariinnit Mugglerininngaanneersuupput taakku-lu nalulluinnarpaat qitornatik angakkuunersut arnaquas-saansulluunniit. Ilinniagassarpassuaqarput Ronilu angajorpassuaqaraluarluniluunniit allanit siuarsimanerunngilaq.

Tallimanngorneq Harrymut Ronimullu immikkut pingaaruteqarpoq. Tallimanngornikkut kiisami siullerpaamik aqquataani ataasiarlutilluunniit tammanngivillutik nammi-

neerlutik Inersuaq ullaakkorsiortarfik nassaarivaat.

"Ullumi suut atuassavagut?" Harry aperivoq issingigasat sukkulersuutigalugit.

"Nakorsaatit immikkut nakuussusillit Slytherinermiut peqatigalugit," Ron akivoq. "Snape Slytherinip kollegiaani pisortaavoq. Oqartoqartarpoq taakku immikkut asattuutrai - takussavarput taamaattoqassanersoq."

"Qanoq nuannertigissagalarpa McGonagallip uagut immikkut pizarualarpatigut," Harry oqarpoq. McGonagall Gryffindor kollegiami pisortaavoq taamaakkaluartorli Gryffindorimiut ilinniagasserujussuuartarpai.

Taamatut oqaluleruttortut allakkat takkuppet. Harryp qangali allakisartarneq sungiussimavaa, ullaarli siulleg annilaarujussuarsimavoq ullaakkorsiuleruttortut uppiit hundredikkaat Inersuarmut timmillutik isaammata. Atuartut tamaasa kaavippaat piginnittumik nassaarinnissaata tungaanut allakkallu taakkunungakartut nakkartittarlugit.

Ulloq manna tikillugu Hedvigip Harry allagarsiassaqartissimanngilaa, kisiannili ilaannikkooriarluni ornittarpaa siutaatigut kiilaartarlugu iffiaminermillu tunisittarluni, kingornalu uteqqittarpoq ilani uppiit inaniittut qasuersaaqatigiartorlugit. Ullaaq taanna allatut pisoqarpoq. Harry ornippaa marmaladeesiviullu sukkuusiviullu akornannut milluni minnginnerminilu allakkat Harryp puugutaanut nakkartillugit. Harryp allakkat atuarpai.

Asasara Harry. Naqinnerit pikkorlulluni allattup allassimavai.

Nalunngilara tallimanngornerni ualikkut atuartusnaanngitsuit, taamaattumik ualeru pingasut eqqaanni tiiloriartoq-quakkit. Sapaatip akunnera siulleg maaniinnerit assut tusa-

rusuppara. Akissutit Hedvigimut nassartinniaruk.
Hagrid

Harry Ronip allaataa suluk atorlugu akilluni allappoq. Qujanarsuaq qaaqussutinnut. Kingusinnerusukkut takussaagut, taama pappiaqqap tunuanut allappoq Hedvigimullu nassartillugu.

Harry qujasariaqarpoq Hagridip qaaqqusinera qilanaarutissarigamiuk tassami Snapep nakorsaasiormik ilinniaritsinera atuarnerni avaanngunarnersaavoq.

Atuarmut peqqaarnerminni nerersuaaramik Harry misigisimavaa professor Snapep nuannarerpianngikkaani. Professor Snapemut siullerpaamik atuarlutik naammassigamik kukkusimalluni paasivaa. Ingasaassinerussaaq oqassaanni Snapep nuannarinngikkaa - Snapep Harry uumissugaraa.

Nakorsaasiormik ilinniartitsineq samanersuaq kælderimi ingerlanneqartarpoq. Illussaarsuup sinneranut naleq-qiullugu kælderi nillerneroqaaq amiilaarnarlunilu uumasut toqungasut aserutsaaliukkat igalaamernit iluanimmata.

Flitwickitulli Snapep tümi siullesq atorpaa atuartut nalunaarsornerinut. Nalunaarsuinermini Harry tikikkamiuk uninngatsiarpoq.

"Aap soorunami," eqqissisimalluni oqarpoq. "Harry Potter. Tusaamasarsuaatitaarput."

Draco Malfoy ikinngutaalu Crabbe Goylelu atuakkat tunuanni illakusuppallupput. Snapep atuartut aqqinik taaguinini naammassivaa atuartullu isiginnaalerlugit. Hagriditulli isai qernertuupput kisiannili kialaassusermik ersittoqanngilaq. Isit uku peqqarniippasipput toqungallutillu. Isai Harryp puilasulianut taartunut nateqanngitsunullu eqqaanartippai.

"Maaniippusi eqqumiitsuliorneq akimasooq ilisimatuus-suserlu eqqorluartoq tassa nakorsaasiorneq ilinniarniarlu-gu," aallartippoq. Nipaa isussunnerinnaavoq kisiannili oqaasii tamaasa tusaavaat. Professor McGonagallitulli Snape-ip klassimi atuartut ilungersuaatiginngivillugu tusar-naartippai.

"Ajaappissamik angakkuaammik silaannakkut asuli ussersortuusaannginnatta amerlasuut immaqa isumaqassap-put fagi una angakkuarnertaqarpianngitsoq. Naatsorsuutigingilara ilissi makku kusanassusiannik paasinnissasusi: Qummuattat imerpalasunik assigiinngitsu-nik qalaartunik imallit, aalat qummut ingerlasut, nukeru-jussuaq aniguisinneqartoq akuutissiat taakku inuup timaata iluani siaruarpata inuk taanna angakkuarlugu misigissusaa-lu salloqittarlugit... Ilinniartissinnaavassi tusaamasanngor-tillusi, angingaassusermik pigisaqalersillusi aammalu allaat toqumik unitsitsisinnaalersillusi – eqqumanerulaarsinnaa-gussi silatunerulaarsinnaagussilu.

Oqalugiareermat oqartoqanngilaq atuartullu nipangersi-maannarput. Harry Ronilu imminnut ussersuinnarput qal-lutik kivillugit. Hermione Granger issiavimmi sinaani issia-voq soorlu takutinniaraa allanit pikkorinnerunini.

"Potter!" Snape oqariataarpoq. "Suna pissarsiarissavara sorlaat asfodel-rodit aserortikkat naasup sungarnitsup malurtip kimittornanik akugukkit?"

Sorlak aserortigaq suna, akusaq suna? Harryp paatsivee-rulluni Ron isigaa soorlu ikioqqorpasilluni taannali Harrytulli nalornerpasitsigaaq. Hermione sukkaqisumik nappaavoq.

"Naluara, professori," Harry akivoq.

Snape mitallerpaluttumik qungujuppoq.

"Takuarsi. Tusaamasaaneq naammassimanngilaq."

Hermionep nappaanera isiginngitsuusaarpaa.

"Misileeqqeriarta, Potter. Sumunnassagaluarpit bezoarimik ujarleqqusuugaluarukkit?"

Hermione nappaaqqippoq talini pavungarsuaq pisillugu Harrylli nalulluinnaqqissaarpaa Bezoar sunaanersoq. Malfoy, Crabbe Goylelu illarusunnermik sajuttuinnaasut isiginngitsuusaarniarsarivai.

"Naluara professori."

"Maannartinnak ilinniagasserinissat eqiagisimagunavip-pat, taamaappa Potter?"

Harry imminent pinngitsaalilluni isigisoq akillugu isigivaa. Ilaqutariinni Dursleykkunni atuagaatini atuarsimagaluarpai kisiannili Snapep piumasarisinnaanerpaa atuakkami Naatitat pupiillu angakkuaatit tusintit-ni allassimasut tamaasa eqqaamasinnaassagai?

Snapep Hermionep apeqqummut akerusunnera isiginngitsuusaartuarsinnarpaa.

"Kisianni, Potter, akilaariaruk una, naasut uku stormhatip venusvognillu suna assigiinnngissutigaat?"

Snape taama apeqquteqarmat Hermione eqqissilluni issiasinnaajunnaarpoq, pissippoq assamminillu kælderip qilaa-va attorlugu.

"Naluara," Harry eqqissilluni oqarpoq. "Kisianni isumaqarpunga Hermionep tamanna nalunngikkaa, sooq taanna aperinianngiliuk?"

Illarpalunneq tusarsaalerpoq. Harryp Seamus takuaa imminent ikinngutinnersumik iseeraartoq. Kisianni Snape nuannaarpasinngilaq.

"Ingigit," Hermione appisaluuppaa. Potter oqaluttuutissavakkit asfodel malurtilu akuliukkaanni taava pilersinneqar-

tarpoq sinissaat ima sakkortutigisoq allaat taaneqartarluni Toqup Uumasup Imigassaanik. Bezoar tassaavoq ujarak savaasap naavaneersaq, taassumalu toqunartut amerlanersaanit annaassinnaavaatit. Stormhat venusvognilu tassaa-ginnarput naatitap ataatsip aqqi marluk uumasumut aammik milluaasartumut illersuutaasooq aamma taaneqartartoq vinter-erantisimik. Ukorsiinnguiit, sooq oqaatsikka allat-tunngilisigit?”

Tamarmik allaatinik sulunnik pappiaqqamillu pergamentimik ujaasilerput. Snape nipittorluni oqalulerpoq eqqissi-veeruttut tusaaniassammanni. ”Matumuuna Gryffindor pointimik ataatsimik ilanngaanneqarpoq illit sorraannerit pissutigalugu, Potter.”

Atuartitsinerup ingerlanerani pissutsit Gryffindorimut pitsanngoriartunngillat. Snapep marlukkuutaarlugit sulisip-pai qinnuigalugillu imerpalasumik ajuartunut katsorsaatis-salioqqullugit. Takisuumik uligualerluni klassip iluani ingerlaarusaarpoq isiginnaarlugillu naasut ilaannik nælde-nik uuttortasut pulateriaarsuillu tuloriaat aserorteraat, tamaasalu ataasiakkaarlugit isornartorsiortarpai – Malfoy nuannarilersimasani kisiat pinnagu. Atuartitani oqaluttu-tileruttorai Malfoyip siuteqqut qaleruallit torrallallugit uuk-kai toqunartulimmik qorsummik pujortoqalerpoq qalaarpa-luttorsuarlu tutsiulluni. Neville qanoq ililluni pinnerpoq Seamusip qalatitsivia aatsittoorsimavaa nunguusavillugu. Nakorsaasiaq qalaartorsuaq imerpalasooq natermut ujaraa-sumut kuussimavoq atuartullu kamippaat putullugit. Sekuntialunnguit ingerlaneranni atuartut issiaveeqqaminnut qaqipallapput. Neville igaq aammat imerpalasumit serpar-neqarsimasooq anniarnermik nilliavoq, tallimigut nissumi-gullu amiilaarnaannartumik uutitersimalluni.

"Nukappiaraq sianiitsorsuaq!" Snape kamattorsuulluni oqarpoq nakorsaallu imerpalasoq natermut kuuttoq angakuaammunik tammartillugu. "Igaq innermiit illuartinnagu ilaqutsip kapinartortai akuliukkualuarpigit?"

Neville qissaserpoq ajuarsuit qingaatigut puttussuutiler-mata.

"Napparsimavimmukaanniaruk," Snape Seamusimut suaarpoq. Taava tuaviinnaq Harrymut Ronimullu saapal-lappoq.

"Potter – sooq ilaqutsip kapinartui pillugit mianersoq-qunnginnakku? Immaqa isumaliorputit kukkuppatt illit isi-gineqarnerit pitsaanerulissasoq, taamaappa? Kisianni ta-manna isumaqarpoq Gryffindor pointimik ataatsimik an-naasaqarmat."

Tamanna eqqortuliornerunngingaarmat Harry oqarniar-luni aatsaraluarmat Ronip kanaavatigut isimmippaa.

"Mianersorniarit," isussuppoq, "Tusarpara Snape peqqar-niitsorujussuanngorsinnaasoq."

Akunneq atuartsiviusoq qaangiummat kiisami kælderi-miit qaqisinnaanngoramik Harryp eqqarsaatersuuterpassuit niaqquminiitippai. Nikallungasorujussuuvoq tassami nam-mineq pisuulluni Gryffindor atuartsineq aallartiinnartoq pointinik marlunnik annaasaqariikatommat. Kisianni soo-runna Snapep taama uumissortigigaani?

"Qüimmanniarit," Ronip oqarfigaa, "Snapep aamma Fred Georgelu pointinik ilanngaaffigisarnikuuai. Hagrid pulaale-rukku ilaasinnaavunga?"

Pingasunut tanneq aqqaninngortoq illussaarsuaq qimap-paat atuarfimmillu akimut ikaarlutik. Hagrid orpippassuit inerteqqutaasut avatinnguanni illuaqqami qisummik sanaa-mi ineqarpoq. Isaariaata silataaniipput kamippaat qaatiguut

pisisserlu qarsortalik.

Harry kasuttormat illup iluaninngaanniit kukkilappaluk tusarsaavoq kamappaluttumik qiluppalluttumik malitseqarluni. Taava Hagridip nipaa tusaalerpaat: "Eqqissigit, Trofast – eqqissillutit."

Matu ammarmat matup ammarnani Hagridip kiinaa nujuarpasissoq takussaalerpoq.

"Utaqqilaaritsi," oqarpoq. "Eqqissigit, Trofast!"

Isertippai qimmipiluunersuup qernertup qungasequtaa tamaviaarluni tigumminiaatigalugu.

Illu ataasiinnarmik initaqarpoq. Timmissat fasanit puulukillu quttorai pujuukkat qilaami nivingapput, igarsuaq kanngussak kissarsuummi ammaannartumi nivingasooq qalaarusaarpoq teqeqqumiipporlu siniffik qajannaatsorsuaq siniffiup ulianik annoraaminernik katitikkamik peqqissaartumik ulissimasooq.

"Manna angerlarsimaffittut isiginiarsiuk," Hagrid oqarpoq Trofastilu iperarlugu. Taassuma ingerlaannaq Ron pisiffigaa siutaalu aluttulerlugit. Trofast Hagriditulli isikkumitut ulorianartiginngilaq.

"Ron ilagaara," Harryp Ron ilisaritippaa. Hagrid tiiliorfimmuut imermik qalaartumik kuisivoq puugutaasamullu sandkagenik ilioraalluni.

"Kukkuallaassanngikkuma aamma taanna Weasleyussannguatsiarpoq, taamaappa?" Hagrid oqarpoq Ronillu kiinaa milaarak qimerloorlugu. "Inuunerma affaa atornikuuara qatanngutivit orpippassuarniit angerlartinniarnerinut."

Sandkagip kigutaat napingajappai Harryli Ronilu pingitsuusaarput Hagridilu atuarnerminnik oqaluttuullugu. Trofastip niaqqi Hagridip seeqquanut tutsissimavaa uli-

guaanullu nuffiorluni.

Harry Ronillu nuannarilluinnarpaat Hagridip Filch "utoqapalaamik" taagormagu.

"Qitsuutaalu, madam Norris arlaanni Trofastimut ilassitissaqara. Qitsuup taassuma atuarfimmi sumunnaraangamaluunniit malersortarpaanga, ilaa ingasak? Qitsuk malinnittuaannarpoq katatassaanani - Filchip malinnitsittarpaa."

Harry Snape-imut atuarnertik Hagridimut oqaluttuaraa. Hagridip Ron isumaqatigaa oqarmat Harry Snape eqqarsaatigivallaassaangikkaa ilanngullugulu oqarluni Snape-ip atuartut tamangajaasa nuannarinngikkai.

"Kisianni uanga uumissorpasippaanga."

"Qanoq aamma taamaattoqassava. Sooq aamma taamaaliussava?"

Kisiannili Harry misigaa Hagrid taama oqarami isai uniffeqanngitsut.

"Qatanngutit Charlie qanoq ippa?" Hagridip Ron ape-
raa. "Charlie nuannarivippara - uumasunut pitsaasuumat."

Harry isumaliorpoq Hagrid piaaraluni allamut saanniar-sarisoq. Ronip Hagrid oqaluttuuppaa Charlie uumasorujunnik suliaqartoq taamaalineranilu Harryp aviisimit qiu-gaq serviettit ataaniittoq nerrivimmiittoq tiguaa. Pruffiitip Tusaataani allagaavoq ima oqaasertalik.

Gringottsimi tillinniarnermut nutaarsiassat kingulliit

Juulip 31-anni Gringottsimi tillinniarnermut atatillugu paasimiaaneq ingerlaqqippoq. Angakkut arnaquassaallu taar-tut kikkueneri ilisimaneqanngitsut tillinniarsimanissaat ilima-gineqarpoq.

*Gringottsimi nissiaqqat aalajangiusimavaat tillittoqarsiman-
ngitsoq. Nalunaarput aningaasanik toqqorsivik tillinniarneq
pitinagu imaarneqareersimasoq. Pisoq suli paasineqanngilaq
pisumullu tunngatillugu suli nassaartoqanngilaq.*

*"Kisianni oqaatigisinnaamngilarput aningaasanik toqqorsi-
vik sumik imaqarsimanersoq, taamaattumik ilissinnut suna pit-
saanerunersoq nalunnigikkussiuk akuliutissanngilasi,"*

Gringottsiþ oqaaseqartittagaa nissiaraq ualiartoq oqarpoq.

Harry eqqaamavaa qimuttuitsunut ilaatillutik Ronip tillin-
niartoqarsimaneranik oqaluttuukkaani, kisianni Ronip
oqaatigissallugu puigorsimavaa qanga tillinniarneq pisima-
nersoq.

"Hagrid!" Harry pilerpoq. "Gringottsimi tillinniarneq
uanga inuuiinni pivoq! Immaqa aningaaserivimmütilluta
pisimasinnaavoq!"

Maanna Hagridip isai eqqissiveerutivipput.

Paasissaanngitsumik oqarpoq pulaartunilu sandkagimik
sassaallerfigeqqillugit. Harry aviiisimi allaaserisaq atuaq-
qippaa. Allassimavoq toqqorsivik tillinniartoqartinnagu
imaarneqarsimasoq. Hagridip toqqorsivik normu 713
imaarpaa poortugaaraq ipertoq tiguramiuk.

Taannaasimassanerpa tillinniat ujagaat?

Harry Ronilu neriartorlutik illussaarsuarmut uteramik
kaasarfi sandkagenik manngertunik kilitanik ilusaarpar-
laarlutik nassassallugit akueriinnarsimasaannik ulikkaarput.
Harry eqqarsarpoq ulloq taanna Hagridimut pulaarnini
atuarfinni tiimerpassuarni atuarnernitut naleqqiullugu
eqqarsaatissanik amerlanerpaanik pilersitsisoq. Hagridip
poortugaq piffissaq kingullerpaaq atorlugu toqqorsimassa-
vaa. Maannakkulli sumiippa? Aamma Hagrid Snape pillu-

gu ilisimasaqarpa Harrymut oqaatigissallugu qunugisami-
nik?

Unnuakktu sakkuaalluni akiuunneq

Harryp qularinnginngilluinnarnikuugaluarpaar arlaanni nukappiaqqamik naapitaqaqqissanani Dudleymit nuannarinnginnerusaminik, taamalu eqqarsarsimavoq Draco Malfoy ilisarisimalinngikkallaramiuk. Qujanavissumik atualerlaat Gryffindorimi najugallit taamaallaat nakorsaasiornermik atualeraangamik Slytherinimi najugallit atuaqatigisarpaat. Tiimini allani Malfoy atuaqatigisariaqanngilaat. Taamatummi isumaqarsimagaluarput Gryffindorip allagarsiiviani pappiaqqamik nivingasumik atuarnissamik tungaanut. Pappiaaraq nalunaarut atuarpaat kappialaatigalutik nimaajutigalutillu. Allagarsiivimmi allassimavoq timminermik ilinniartitsineq sisamanngornermi aallartittussaasoq - aammalu allassimavoq Gryffindorimiut Slytherinermiullu atuaqatigiissasut.

"Taama pisaannarpoq," Harry nikallungarpassilluni oqarpoq. "Tassa amigaatiga. Sanigutit ipuat atorlugu timminermik ilinniartillunga mittatigineqarnissaq Malfoy isiginnaartuliullugu."

Timminermik ilinniarnissaq qilanaarisimasorujussuugaluarpaar.

"Siumut oqaatigereersinnaanngilat sianiilliornissat," Ron silassorippalluni oqarpoq. "Nalunngikkaluarpara

Malfoyip kikkut tamaasa oqaluttuuttarai Quidditchimik qanoq kakkatsigaluni kisianni ilimagilluinnarpara taama oqalunnera kakkanniarninnaasoq timitalersinnaanngisaa."

Tassami Malfoyip timmineq eqqartortorujussuusarpaa. Nipituuliutugalugu ajuusaarutigaa atualerlaat kollegiat Quidditchimik unammisartuinut ilaasinnaannginnerat aamalu sivisuumik usorsisimaarutigaa oqaluttuarisarlugulu amerlasooriaqaluni Mugglerit qulimiguuliannut apungajattarsimanini. Kisiannili Malfoy kisimi misilittakkaminik eqqartuisartuunngilaq. Seamus Finnigan oqaluttualeraangami allaanngivittarpoq meeraanini tamaat atorsimagaa sanigutit ipuannik timminermut. Ronimut allaat timminermut tungasunik oqaluttuassaqarput. Ronip oqaluttuarivaa taamani Charliep sanigutikuani timmilluni timmisaammut apungajassimanini. Ilaqutariit angakkuviit meerartaasa Quidditch eqqartortuarpaat. Ronip sinittarfimmeeqatini Dean Thomas isikkamik arsaanneq pillugu oqqateriikatasimavaa. Isikkamik arsaanneq pillugu oqqassimagunarput. Ronip ataasiinnarmik arsaqarluni timminanilu arsaanneq soqutiginartutut isigisinnaannginnerarpaa. Harry Ron naammattoorsimavaa Deanip Liverpoolip arsaattartuinik plakatiutaa attuualaaleruttora paasiniarlugu arsaattartut aalasinnaanersut.

Neville sanigutit ipuanni issiasimanngisaannarpoq aana-minit inerterneqartuartarsimagami. Harry isumaliorpoq inerteqqut taanna isumatuujusoq, kisiannili oqaaseqanngilaq. Neville ajunaartitsisartuuvoq piumanngikkaluarlunilu ajoqusiiisortarluni qanorluunniit piumanngitsigigalua-raangamiluunniit.

Hermione Granger Nevilletulli timminissaminut pissa-

ngatigaaq. Tassami timmineq atuagarsorluni ilinniarne-qarsinnaangilaq - soorunami timminermik ilitersuutit pilsarsiarineqarsinnaasut tamaasa atuareersimagaluarpai. Sisamanngornermi ullaakkorsionerminni ullaakkorsioqatini tamaasa avaangusutserujussuarpai atuakkanik atorniartar-fimmi atuagaq atukkani ateqartoq Quidditch ukiut ingerlaneranni atuqaatiminut issuaaffigigamiuk timminissamullu ilitersuutit oqaluttuaralugit. Neville kisimi Hermione Grangerip oqaasii tamaviisa tusarnaaqqissaarpai. Tamaviaangaarluni paaserusuppaa ullup ingerlanerani sanigutip ipuani issianissani qanoq ililluni iluatsissanerlugu. Tamarmilli eqqissiallapput Hermionep oqaluttuai uppiit allakkisartut tikiunnerannit kipitinneqarmata.

Harry, Hagrid qaaqqusimmalli ataatsimilluunniit allagar-sisimanngilaq. Malfoyip soorunami tamanna malugisimavaa, Harrylu usorsisimaarluni isiginnaartarpaa uppiutini takkukkaangat puussianik mamakujuttunik imalinnik angajoqqaamininngaanneersunik nassarluni takkukkaangat.

Uppiup Neville aanaavaniit poortugaaqqamik nassaap-paa. Pissangaqaluni ammarpaa ammallorissorlu igalaami-neq tuip manniatut angitigisoq ilaminut takutillugu. Allaanngivippoq putsumik qaqortumik imalik.

"Tassaana ammallorissoq eqqaasitsisartoq," nassuiaavoq. "Aanaap nalunngilaa qanoq puigututigisunga ammalloris-sullu uuma arlaannik puiugaqaruma puiukkannik eqqaasis-savaanga. Takusiuk, imatut najummilluaannassavarsi taava aappaluttunngorpat - aah.." Annulerpoq ammallorissoq eqqaasitsisartoq aappilleriataarmat oqarlunilu: "Puigugaqarputit!"

Neville suna puigorsimanerlugu eqqaaniaruttuleraa Draco

Malfoyip Gryffindorermiut nerriviat sanioqquppaa
Nevillelu ammallorissuutaanik arsaarlugu.

Harry Ronilu pissipput. Neriukkualarput pissutissaqaler-
lutik Malfoyimik paanninnissaminnut kisiannili professor
McGonagallip eqqissiviilliorneq atuarfimmi ilinniartitsisunit
allanit siulliulluni malugaa ingerlaannavillu ornippai.

"Sulerivisi?"

"Malfoyip ammallorissuutiga eqqaasitsisartoq tiguga-
miuk, professor."

Taamatut oqartorlu Malfoyip ammallorissoq eqqaasitsi-
sartoq utertippaa.

"Isiginnaaginnarniarigaana," oqarpoq, taava Crabbe
Goylu malitsigalugit qimaguppoq.

Ualikkut nalunaaqutaq sisamanut qiteqquttoq Harry Ron
atuaqataalu Gryffindorimeersut tuaviorlutik atuarfiup sila-
taanukarput timminermik ilinniarnissartik siulleq aallartik-
kiartorlugu. Ulloq taanna allaaqqippoo, nuiaqarani anor-
saanngualaaginnarlunilu, ivikkallu maligaartutut aalapput
nukappiaqqat narsaatitugut sivingaartutugut ingerlammata.
Akianni ungasissumi ersipput orpippassuit orneqqusaan-
ngitsut pilutaat annilaanganarpasillutik najunngartaartut.

Slytherinermiut tikiutereersimapput aammalu sanigutit
20-t ivikkani kusanaqqissaartumik iliorarneqarsimapput.
Harry Fred aamma George Weasley atuarfiup sanigutai
naammagittaalliutigerpalukkaat tusarnaarnikuuaa. Oqarput
timmissutigalugit qangattarpallaaraanni imaluunniit saa-
mimmuut sanguallaaraanni sajukulaalersartut aalarrajuttuin-
nanngorlutillu.

Ilinniartitsisuat madam Hooch takkuppoq. Naatsunik
qeersaartunik nujaqarpoq kissaviarsuttullu iseqarluni.

"Ukorsiiaa, sunaana utaqqivisiuk?" Nillerpoq. "Tamassi immikkut sanigutip ipuata sanianut pigitsi. Tuavi!"

Harryp sanigutini ammut isigaa. Pisoqaavoq børstiilu tamarmik sumut tamaanga sammipput.

Tallisi talerperliit sanigutip qulaanut pisillugit!" Madam Hooch nillerpoq, "oqarlusilu, QUMMUT!"

"Qummut!" Tamarmik ataatsikkut oqarput.

Harryp sanigutaa ingerlaannaq assaanut pissippoq, ikituinnaalli sanigutaat qangattarput. Hermione Grangerip sanigutaa nunami assakaalaarpoq Nevilillu pia aalariarsimanngivippoq. Immaqa sanigutit hiistitulli ipput; immaqa inuttamik annilaanganerat malugisinnaavaat ersigineqarlutilluunniit malugisinnaallugu, Harry eqqarsarpoq. Nevillep nipaa sajukulaarpoq malunnarporlu timminissani ersigigaa.

Madam Hoochip maanna takutippaa qanoq ilillutik quaanngivillutik sanigutitut qaqisinnaanersut. Atuartut sanigutit ipui iluamik tigummineraat misissorpaa kukkusu-millu tigummigaangatigit aqqittarlugit. Harryp Ronillu tipaatsuutigaat Malfoy oqarfigineqarmat nalunanngitsumik ukiorpassuarni sanigut kukkusumik tigummisarsimagaa.

"Siggartaammik siggaruma nuna tukerujussuassavarsi tingillusilu," madam Hooch oqarpoq. "Sanigut eqqissisima-sumik aalajangersimalluuartumillu najummissavarsi, nuna-miit meterimik ataatsimik qangattassaasi ingerlaannarlu nunneqqillusi. Nunnissinnaavusi siumut orlilaarussi. Piareerpisi? Maanna siggalerpunga...."

Kisianni Neville annilaangangaarami madam Hooch sig-garianngianngitsoq tukermersorpoq.

"Uterniarit, nukappiarakasingaa!" Hooch suaartarpoq, kisiannili Neville qangattariikatappoq pavungarujussuarlu pilluni soorlu qamutilimmit igeriunneqarsimasoq - meterit

arfineq pingasut - meterit 15-it. Harryp Nevillep kiinaa amiilaarsimasooq qarsungaqisorlu isiginnaarpaa aamma takuaa sanigummiit sanimut quaakkiartortoq aammalu...."

BAANG - qanngorpallannerujussuaq avatillu aseruatiterpalunnerattut nipilik tusarsaavoq Neville ivikkanut nakkar-mat. Sanigutaata ipua sulililaannarmiippoq; sulil qummut ingerlalluni orpippassuillu inerteqqutaasut tungaannut ingerlalerluni. Naggataatigut aanngarpoq.

Madam Hoochip Neville qulaanit isiginnaarpaa. Kiinaa Nevillep kiinaatulli asingatigaaq.

"Paffia napisimavoq," Harryp nipikitsumik oqaluppallut-toq tusaavaa. "Qaa nukappiaraq-aa, ajornavianngilaq, mas-sinniarit!"

Atuaqatai qiviarpai.

"Tissi maaniiginnassaasi uanga nukappiaraq napparsima-vimmukaatissavara. Peqannginninni sanigutit attussanngi-vippasi. Naalanngitsut Hogwartsimiit ima sukkatigisumik anisitaassapput allaat oqaaseq Quidditch oqaatigalugu naammassitinnagu anisitaareersimassallutik. Ikinngutiga qaaniarit."

Nevillep paffini najummivaa qulliliorlunilu madam Hoochilu malippaa taassumma tuppallersarniarluni eqissimagaani.

Qimaguttut tusaasinnaajunnaarmata Malfoy illalerpoq.

"Kiinaa takuisiuk, puulukersuup kiinaa?"

Ilaasa Slytherinimeersut nipangersippaat.

"Nipangerit, Malfoy!" Parvati Patil kamalluni oqarpoq.

"Sooq Neville Longbottom illersorpisiuk?" Pansy

Parkinson Slytherinimi nivissat ilaat naakkittaappasissumik kiinalik oqarpoq. "Tlimaginngikkaluarpara puulukiaqqanik qiasunik pualasuunik illersuinissat, Parvati!"

"Takusiuk!" Malfoy oqarpoq siumullu pissippoq ivikkalu akornanni nassaani takutillugu. "Tassaana ammallorissoq Longbottomip aanaavata ernutaminut nassiussaa."

Ammallorissoq eqqaasitsisartoq ilaminut takutimmagu seqinermi qillaallattarpoq.

"Qaaguk, Malfoy," Harry eqqissisimalluni oqarpoq. Tamarmik nipangerput nukappiaqqallu taakku marluk isik-kuserlugit.

Malfoy peqqarniippasilluni qungujuppoq.

"Isumaliorpunga maanga qimanniarlugu. Taava Longbottomip nammineq aajumaarpaa. Qanormi... orpimmut inissikkukku?"

"Uannut massakut tunniunniaruk!" Harry nilliavoq, kisiannili Malfoy sanigutiminut qaqereersimavoq tingilluni. Asuliinnaq oqalussimanngilaq. Timmisinnaavoq timmillaqqillunilu. Orpiup manngertup pilutaasa qullersaannut pigami uumissuerpalulluni nillerpoq: "Qaagit aaniaruk, Potter!"

Harry sanigutini tiguaa.

"Naagga!" Hermione Granger nillerpoq. "Madam Hoochip sanigutit attormissaannik inerterpaatigut. Qangattaraluaruit tamatta ajornartorsiortilissavatsigut."

Harry tusaanngitsuusaarpaa. Ima kamatsigaaq uummatimi kassuppalunnera tusaasinnaallugu allaat. Sanigutit ipuannut qaqivoq tuckerlunilu taavalu qummuinnaq timmillerluni, pavungaraallak timmivoq anorip nutsani aalatikkai uliguanilu tunummut siaarsimasoq.

Ajugaasimaarutigeqisaminik malugilerpaa sanigutini timmineq pikkoriffigalugu ilinniartariaqarnagulu aali aatsaat misilillugu. Ajornanngitsunnguuvormi aamma asseqanngilaq. Sanigutit qummuinnangajavik aquppai Malfoy anguni-

arlugu. Ataani niviarsiaqqat annilaangallutik nillianerat nukappiaqqallu alutorinnillutik nilliarpalunnerat tusarsaa-voq.

Sanigutit silaannarmi sakkortuumik sanguteriataarpai Malfoyillu qulaanut pilluni; taanna taamatut pisoqarnissaa-nik ilimasunnginnermik annilaarujussuarsimavoq.

"Qaanniaruk!" Harry suaarpoq. "Tunniutinngikkukku sanigutinniit ajassavakkit!"

"Ilumut taamaaliorniarpit?" Malfoy tamaviaarluni mer- sernarpasinniarsaraluni akivoq, naak kiinaatigut takune- qarsinnaagaluartoq toqqissisimarpalunngivissoq.

Harryp nalunngilaa qanoq iliussalluni. Siumut orlerpoq sanigutillu illuttut tigulluarterlugit. Sanigutit missil-itut sukkatigalutik Malfoyip tungaanut aallarput taannali apor- tilliivillunilu illuariataarpoq. Harry sanguvoq sanigutinilu silaannarmi uninngateqqissaalerlugit. Atuartut nunamiuttut ilaat ersaattaapput.

"Maanna Crabbe Goylellu annaassinnaanngilaatsit, Malfoy," Harry nillerpoq.

Malfoyip tamatuma ilumoornera paasisimarpasippaa.

"Taavami sapinngikkuit akorniaruk!" Nillerpoq kuulilu igalaamineq silaannarmut pavungarsuaq miloriullugu. Taava sukkaqisumik nunamut timmillerpoq.

Harryp takuaa kuuleq qulimini qummuinnaq ingerlariar- luni nakkariartulersoq. Allaangivippoq nalunaaqutaq unit- toq piffissaqalersillugulu eqqissilluni pisunik naliliinissaa- nik. Siumut orleqqippoq sanigutillu ipuat nunap tungaan- naanut aqulerlugu - taava sukkasoorujussuulluni kuulip nakkariartortup tungaanut aallarpoq. Anori siutaani sior- suppoq siorsunnerlu atuartut isiginnaartut nilliarpalunner- annut akuliuppoq. Talini siaarpaa - nuna meterip affaanik

qanitsigalugu - kuulerlu ammalortoq akorlugu nunamullu tunnginnermini sangoriataarluni. Taava ivikkat akornannut nunnippoq ammallorisoq eqqaasitsisisartoq tigumiarlugu.

"HARRY POTTER !"

Sapiilligaluarnera tammarpoq. Professor MacGonagall arpalluni tungaannut ingerlavoq. Harry sajulluni saniguti-niit niuvoq.

"Ukiorpassuarni Hogwartsimiinninni aatsaat taama..."

Professor McGonagallip annilaarnermik oqaasissani naluleraluarpai. Isaruaata tunuani isai innaallattarput.

"Qanoq aamma taama - Qungatsit napisinnaavat..."

"Harry pisuunngilaq, professor..."

"Nipangerit, Patil..."

"Kisiannimi Malfoy..."

"Tassa oqaqqinnak, Weasley. Potter maannakkorpiaq malinnga."

Harry takullatsiarpai Malfoy, Crabbe Goylelu nuan-naarpaloqisut professor McGonagall allorassaarluni illus-saarsuarmut pisuttoq malittussanngoraa paasigamikku. Anisitaanissani qulariunnaavippaa. Imminut illersorniarluni oqaaseqarusukkaluarpoq oqqanili aqussinnaajunnaarsima-vaa. Professor McGonagall tuavioqaluni ingerlavoq Harry isiginngivillugu Harrylu malinnaaniarluni arpasukaartaria-qarpoq. Maanna annertuumik kukkuluttorsimavoq, tassalu atualernermiiniit sapaatit akunneri marluinnaat qaangiuttul-lu. Minutsit qulit qaangiuppata ilimanarpoq iniminukartin-neqassasoq kuffertini poortoriartorlugu. Ilaqutariit Dursleykkut qanormita oqassappat takoqqikkunikku?

Illussaarsuup silataani majuartarfikkut majuarpoq illus-saarsuarmullu iserami majuartarfikkut marmoriusukkt majuarluni. Aqqutaanili professor McGonagallip oqaatsi-

mik ataatsimilluunniit oqarfiginngilaa. Matut sakkortuumik ammartarpai allorarlualrunilu akuttoqatigiissaartumik torsuusarpassuartigut ingerlalluni Harryp tunumini nikallungalluni malerusaaraani. Immaqa Dumbledoremur majuu-tissavaani. Eqqarsaatigilerpaa qanga Hagridip pineqarsimamera, atuartutut soraarsitaanera nunaassuarmilu nakkutilliusutut akuerisaanera matuersaatinillu nakkutilliisunngortitaanera. Immaqa Hagridimut ikiortinnorsinnaagaluarpoq. Naani anniarilerpai takorluuleramiuk nammineq Hagridimut ikiortaanermini Ronikkut allallu ilinniartitaanissaat.

Professor McGonagall init atuartsiviit ilaata silataanut unippoq. Matu ammarpaa niaqqilu pulatillugu.

"Utoqqatserpunga akornuserakkit, professor Filtwick. Wood sivikitsunnguamik atulaarsinnaavara?"

Wood? Harry tupigusulluni eqqarsarpoq, pillaatit arlaannik atornialernerluni?

Kisiannili paasinarsivoq Wood tassaasoq angut angisooi suaq nerinnattoq ukiut tallimassaat atuatoq.

Anillaffigigamigit Harrytulli tupigusuppalutsigaaq.

"Marluullusi malinniarsinnga," professor McGonagall oqarpoq torsuusakkullu ingerlaqqipput. Woodip alaper-naalluni Harry isigaa.

"Qamunga."

Professor McGonagallip inimut atuartsivimmut eqqup-pai. Ini atuartsivik inoqanngilaq taamaallaat Peeves isersimavoq oqaatsinillu naalanngitsunik allattarfissuarmut allal-luni.

"Aniniarit, Peeves!" Nillerpoq. Peevesip kridti eqqaavim-mut igippaa (nipitoqaaq eqqaavik qattaq qillertoraminermik sanaajummat) oqaasipiluutigalunilu aniartorluni.

Peeves animmat professor McGonagallip matu matupiloor-paa nukappiaqqanullu saalluni.

"Potter, aajuna Oliver Wood – Wood, ujarlertussannik nassaassuppakkit."

Woodip kiinaa paatsiveeruteqqagaluartooq maanna nuan-naangaarpalulerpoq.

"Ilumuuippit, professor?"

"Aap," professor McGonagall oqarpoq. "Nukappiaraq inunnguuseralugu immikkut pikkorissuseqarpoq. Aatsaat taamaattumik takulerpunga. Siullerpaamik sanigutit ipua-nik timmivit, Potter?"

Harry nipaqqarani angerpoq. Naluaa susoqarnersoq malugisinnaavaali anisitaanissani massakkorpiaq ilimanan-ngitsoq.

Isikkat 50-it apparsareerluni ammalortoq akorpaa," professor McGonagallip Wood oqaluttuuppa.
"Sunnguamilluunniit kimillanngilaq. Charlie Weasleyluun-niit taamaaliorsinnaanngilaq."

Woodip isikkua naapertussagaanni kissaatiginerpaasaa piviusunngortinneqarsimasooq paasinarsivoq.

"Quidditchimik unamneqataanikuuit, Potter?" Wood eqqissiveerulluni aperivoq.

"Wood Gryffindorip arsaattartuisa siuttoraat," professor McGonagall nassuiaavoq.

"Timaata sannaa isigiinnarlugu assut ujarlertussaqqip-poq," Wood Harry qimerluujutugalugu oqarpoq.

"Oqimaappallaanngitsoq – sukkasooq – sanigutininik ilua-laartunik tunisariaqassavarput, professor – Nimbus 2000-imik imaluunniit Cleansweep 7-imik, taama eqqarsar-punga."

"Professor Dumbledore tamanna pillugu oqaloqatigeq-

qaarusuppara. Paasiniaqqaartariaqarparput atuariup atualerlaanut malittarisassai sanioqqunneqarsinnaanersut. Guutit ilisimavaat siornamut naleqqiullugu arsaattartunik pikkorinnernik atorfissaqartitsisugut. Slytherinimut nagga-taarutaasumik unammigatta suujunnaarsitaavugut. Tamatuma kingorna Steven Snape-ip isai akunnerni arlalin-ni isigisinnaanngilakka..."

Professor McGonagallip isarussami qulaasigut Harry mersernartumik isigaa. "Allamik tusagaqarusunngilanga eqiasuillutit sungiusarnissannik taamaallaat, Potter. Taamaanngippat imaassinnaavog sakkortuumik pillarne-qarnissat aalajangeriga."

Taava qungujoriataarpoq.

"Ataatat paasigaluarunisit usorsisimaarsimassagaluar-poq," oqarpoq. "Taanna Quidditchimik arsaallaqqissorsuunikuuvoq."

"*Salluvutit!*"

Unnukkorsiorlutik neripput. Harryp Ron oqaluttuuteq-qammerpaa professor McGonagall ilagalugu timminermik ilinniarfitsik qimakkamikku qanoq pisoqarsimaneranik. Ron neqimik aserortigartortoq ajassaatini neqitalik qanermi tungaanukartissimagaluarpaa nerinissanili puigorsimallugu.

"Ujaasisuussavit?" Pilerpoq. "Kisiannimi atualerlaanik unammisartoqarsimanngisaannarpoq... unammisartut inuusunnersarissavaatsit..."

.... ukiuni untritilinni ukunani," Harry oqarpoq sukka-suumillu nerilluni. Pissanganartumik atugaqarecernermi kingorna perliliivissimavoq. "Woodip taama oqaluttuupaanga."

Ron tupigusungaarami kakkaginningaaramilu qarni

ammatiinnarlugu Harry isikkusersimavaa.

"Sapaatip akunnerani tullermi sungiusarlunga aallartissaanga," Harry oqarpoq. "Allanulli oqaluttuassanngilatit, Woodip isertuukkussupaa."

Fred aamma George Weasley nerisarfimmut iserput Harrylu takugamikku tuaviinnaq nerrivimmukarlutik.

"Torrak," George nipaatumik oqarpoq. "Woodip tamanik oqaluttuuppaatigut. Uagut aamma unammeqataassagut - uagut arsamik patitsisartuussaagut."

"Neriorsorpassi ukioq manna Quidditch-pokali pissarsiarissagatsigu," Fred oqarpoq. "George aallarmalli ingerlanerliulerpugut ukioq mannali pikkorissunik arsaqateqassaagut. Harry, pikkorissimaqaatit. Wood oqaluttuarami ilumigut aalaterneqarsimarpassippoq."

"Tassa, ingerlaqqilerpugut. Lee Jordan atuarfimiit silamut annivissamik isertortumik nassaarsimasorivoq."

"Immeraassutigisinnaasoraara pineqartoq tassaasoq aqqut Grigorius Qujanarniartup inuusaliaata tunuaniit aallartittoq. Taanna atuarneq aallartiinnartorli nassaaraarput. Takuss.!"

Fred aamma George tarriinnartullu nuanniitsumik eqqis-sinermillu aseruisumik pisoqarpoq, tassalu Malfoy isermat soorunami Crabbe aamma Goyle peqatigalugit.

"Aallartinnak tamaani naggataamik nerivit, Potter? Qaqugu Mugglerit silarsuaannut qimuttuitsoq ilaaffissat aallassagami?"

"Maanna sapiinnerulaartutut isikkoqarputit nuna tum-marsimagakku ikinnguteeqqatillu ilagalugit." Harry peq-qarnüppasilluni oqarpoq. Oqaasiilu Malfoyip nakkutilliisu-inut inersimarpaluttunut ajuallatsitsiniutaapput, kisiannili ilinniartitsisut tamarmik nerrivimminni nerrimmata allatut

ajornartumik annuinnartariaqarput nipitunissartillu tamaat naggussatik nipiliortillugit.

"Qaquguluunniit sumiluunniit unatarsinnaavakkit," Malfoy oqarpoq. "Ajoinngikkukku tamanna unnugu pisin-naavoq. Qanoq oqassagaluarpit angakkutut akersuuttuugaluarutta? Angakkuaataannarnik - paanata. Sunaana isigiinnarpiuk? Angakkutut akersuunneq tusarsimannginnakku?"

"Soorunami nalunngilaa," Ron oqarpoq tungaannullu saalluni. "Uanga akersuunnermi ikiortigissavaanga. Illit kina ikiortigissaviuk?"

Malfoyip Crabbe Goylelu umerualaarpai.

"Crabbe," oqarpoq. "Unnuap qeqqata missaani pisin-naavisi? Inimi uumasut pisat niaquisa aanaveersakkat niving-affianni naapissaagut; taanna parnaarsimanngisaannarpoq."

Malfoy ingerlareermat Ron Harrylu imminnut isigipput.

"Sunaagami angakkut akersuunnerat?" Harry aperivoq. "Qanorlu isumaqarpit oqaravit uannut ikiortaassallutit?"

"Aap, ikiorti tassaavoq toquguit sunik tamanik naammassinnittussaq." Ron akunnattuunngivilluni oqarpoq nereqqilerlunilu. Harryp kiinaa takugamiuk tuaviinnaq nangippoq. "Kisianni inuit akersuutivikkaangamik aatsaat toqusarput, tassa angakkuiit akersuukkaangata. Illit Malfoyilu taamaallaat immissinnut innaallagissamik eqqoriantassagunarpusi. Immissinnut ajortumiivinnissaq ilinniarsimanngilarsi. Immeraassutigerusussagalarpara naatsorsuutigisimassagaa akersuukkumannginnissat."

"Qanormi kinguneqassava angakkuaatiga kaajallatsikka-luarukku qanorli pisoqarnani?"

"Taava igiinnassavat qingaatigullu tillullugu," Ron siunnersuivoq.

"Akornuserpassi?"

Qummut qiviarput. Tassaana Hermione Granger takkut-toq.

"Eqqissilluta nerisinnaannginnatta?" Ron oqarpoq.

Hermionep tusaanngitsuusaarpaa Harrylu saallugu pilerpoq.

"Tusaanngitsoorsinnaanngilara Malfoyilu qanoq oqaloqatigiittusi..."

"Ilimanarami," Ron oqarpallappoq.

... aamma taarsinerata kingorna atuarfimmi angalaaqqusaanngilatit. Eqqarsaatigilaariuk tigusaassagaluait pointit qassit Gryffindorip annaasinnaagai - aamma tigusaanisat ilimanarluinnarpoq. Imminuinnarpoq eqqarsaatigissaatit taamaaliussaguit."

"Aamma illit akuliuffigisussaanngilat," Harry oqarpoq.

"Inuulluarit," Ron oqarpoq.

Kisianni oqartoqarsinnaanngilaq ulloq ajunngilluartumik naammassineqartoq, Harry eqqarsarpoq, innaramik sulii eqqumatilluni tusaagamigit eqqamini Dean aamma Seamus qannguerpalulersut. (Neville sulii napparsimavimmiit utersimanngilaq). Ronip ulloq naallugu siunnorsorsimavaa ilaati-gullu ima oqarfigalugu: "Perloqqussagaluarpait illuartariaqassaatit, tassami eqqaamanngilara perloqqussut qanoq akineqarsinnaanersoq." Aamma Filch madam Norrisilu naape-riataarsinnaavaat Harryllu nalunngilluinnarpaa ullumikkut atuarfimmi malittarisassamik unioqqutitsinermigut uloria-nartorsiulersinnaalluni. Aappaatigulli Malfoyip kiinapalaa-va taartumi isigiuarsinnarpaa - maanna periarfissaqalerpoq akeqqami kiinaa saallugu iliuuseqarnissaminut, neriupporlu pisassaanik pisikkumaarlugu.

"Unnuap qeqqata qeqqa," Ron nipaatsunik kiisami

oqarpoq. "Ingerlasariaqarpugut."

Makiaarutitik ativaat angakkuaatitillu tigullugit taavalu sinittarfitsik aqqusaariarlugu majuartarfut nimeriartortuu-saartut atorlugit ammut ingerlapput naggataatigullu Gryffindorip isersimaartarfianut pillutik. Kissarsuut ammaannartoq suli aamaarpoq issiaviillu ornavaffillit oqi-maatsorsuit tarratut qernertut ulorianartutut isikkoqar-put. Ikkami putup qulaani assiliaq anguleraallu issiavimmit qaninnerpaamit nipi tusalerpaat: "Taamaaliorniarnertit paa-sisinnaanngilara, Harry."

Naneruarfik ikinneqarpoq. Takulerpaallu Hermione Granger aappaluttumik qaquaartumik makiaarutilik avoq-qaarinnippaluttumillu isikkulik.

"Tamaani suit?" Ron kamalluni pilerpoq.

"Innariartoqqinniarit!"

"Angajunnut oqaatigingajappakkit," Hermione kamalluni oqarpoq. "Percy - siunnersuisuuvoq iliuseqarniarnersilu unitseriaannaavaa."

Harry upperisinnaanngingajappaa taama eqinnaatsigi-soqarsinnaanera.

"Qaagit ingerlaniarta," Ronimut oqarpoq. Arnap puala-suup assinga sanimut ajappaa putukkullu paarmorluni.

Kisiannili Hermione imaaliallaannaq malartitassaanngi-laq. Ron putukkut malippaa nerlertullu kamattutut nilliaffi-galugit.

"Gryffindorip tusaamaneqarnera soqutiginngivippisiuk? Imminuinnaq eqqarsaatigivisi? Uanga Slytherinip pokalin-nannissaa kissaatiginngeqaara qularinngilaralu professor McGonagallip pointit allanngortitsillaqqinnera pissutigalu-gu uannut tunniussai annaajumaarigut."

"Aniniarit."

"OK, kisianni mianersoqqoreerpassi. Tamanna eqqaam-niarisiuk aqagu qimuttuitsunut ilaalerussi, ilissimi tassa..."

Qanoq oqaaseqqaqqinniarnersoq tusaanngitsoorpaat. Hermione tunummut saassimavoq arnap pualasuup assinga saallugu arnarli peqanngilaq. Arnaq pualasooq unnuakkut pulaarniarluni anisimavoq Hermionelu utersin-naanngilaq Gryffindorillu napasuliaani mattussaavoq.

"Maanna qanoq iliussaanga?" Qataajaqilluni aperivoq.

"Illit tamanna nammineq ajornartorsiutigissavat." Ron oqarpoq. "Ingerlaqqittariaqarpugut taamaaliunngikkutta inortuissaagut."

Torsuusap isua suli angunngikkaat Hermionep angorii-katappai.

"Ilagissavassi," oqarpoq.

"Naamik, ilagissanngilatsigut."

"Isumaliorpisi maani uninngaannassasunga Filchimillu digusarineqarnissara utaqqiinnassagiga? Pingasuulluta ataatsikkut tigusarippatigut oqaluttuutiinnassavara unitsinniara-luarsimagissi, taava ilissi nammineq tamanna uppersarsas-savarsi."

"Kakkaak sorraakkavit..." Ron nipituumik oqarpoq.

"Nipangerniaritsi marluullusi!" Harry nipituumik oqar-poq. "Tusaasaqaleqaanga."

Ungasinngisaminni solummittumik tusaasaqarput.

"Madam Norris?" Ron isussuppoq eqqanilu qinilerlugu.

Madam Norrisiunngilaq. Tassaana Neville. Natermi nalavoq sinillunilu. Qanillimmata qisuariarpoq.

"Qujaqaanga nassaarigassinga. Akunnerpassuarni maa-niippunga matup ammarnissaanut oqaaseq puiorakku."

"Nipituuliorpallaarnak, Neville. Oqaaseq tassaavoq 'Puulukip qingaa', maannali iluaqutiginavianngilat. Arnaq

pualasooq allamut ingerlaqqereerpoq.”

”Talit qanoq ippa?” Harry aperaaq.

”Ajunngilaq,” Neville oqarpoq tallinilu takutillugu.

”Madam Pomfrey minutsiunngitsorluunniit aaqikka-miuk.”

”Ajunngilaq, maannali tusarnaalaariar, Neville. Angumerisassaqaratta ingerlaqqittariaqarpugut. Kingusinnerusukkut takussaagut...”

”Qimassanngilarsinnga!” Neville oqarpoq nikuipallallu-nilu.

”Kisima maaniinnianngilanga. Baroni Aagasattoq marlo-riarluni maaneereerpoq.”

Ronip nalunaaqutaaqqani qassinngornersoq takoriarlugu Hermione Nevillele kamaammerluni nakkuppai.

”Arlassi ajortumeertippatigut professor Quirrelip perloq-quisarnera ilinniariarlugu ilissinnut atussavara.”

Hermionip Ron oqaluttuutileraluarpaa perloqqussineq qanoq eqqortumik atorneqartarnersoq Harrylli nipituumik oqarfigaa nipangissasoq. Taava malitsigalugit aallarpooq.

Torsuusatigut taqissorlutik ingerlapput igalaanit qutsissu-mik inissisimasunit qilaamikkut aporsimaniusalinniit qaam-massuarmit qaammarfigitillutik. Teqqeqqumut pigaangamik Harryp ilimagisarpaa Filchip madam Norrisillu naaperia-taarnissaat kisiannili iluatsitsisillutik naapinngitsoorpaat. Tuaviinnaq init quleriit pingajuannut arpapput uumasullu pisat niaquisa inaannut ingerlaqqillutik.

Malfoy Crabbelu suli takkussimanngillat. Sikaaviit igalaa-nik matullit matui qillertut qaammatigimmi akisugupput. Pokalit, puugutat, inuusiat puugutaasallu sœlvit kuultillu taarnermi qillaripput. Iigaq sinerlugu ingerlapput matullu illugiit marserlugit. Harryp ajaappiaq angakkuaatini tiguaa

piareersimaniarluni unamminissap inatsisai isumaqatigiüssu-
tigitinnagit Malfoy takkuteriataassasoralugu angakkuarfiga-
lunilu. Minutsit ingerlapput.

"Kingusinaarpallaarpoq immaqa qunulerami," Ron isus-
suppoq.

Taava inip sanilianiit nipiliorpalummat qisuariarput.
Harryp ajaappiaq kivikkaalu nipi tusarsaalerpoq – kisianni
Malfoyiunngilaq.

"Narajorlutit ujarliinnarit ikinngutinnguara.
Imaassinnaavoq teqeqqut ilaanni toqqorsimasut."

Tassaana Filchip madam Norris oqaluukkaa. Harryp
annilaarsimaqaluni ilani ussersorfigai sukkanerpaamik
maleqqulluni. Nipaarsaangarlutik matumut Filchip agger-
fianit ungasinnerusumut arpapput. Matu tikikkamikku
Filch inimut iserpallattoq tusaavaat.

"Maani arlaanniipput," nipaatsumik oqaluppalluttoq
tusaavaat. "Toqqorfissarsiorunarput."

"Ugguuna," Harry ilaminut ussersorpoq annilaangaqalu-
tillu init sakkuusivissuit sakkutuut atisatoqaannik iikkap
eqqaani inissinneqarsimasunik ulikkaartut ilaat ingerlavigi-
lerlugu. Tusarsinnaavaat Filch qanilliertortoq. Neville naal-
liulluni nillernaveersaaraluarluni nillertoorpoq sapinngisani-
lu tamaat arpalerluni – taava pangallappoq pangallanner-
minilu Roni tigullugu, nipitoqisumillu marluullutik saku-
tuut atisarsuinut saviminernut uppipput.

Nipiliormerat ima nipitutigaaq qularnanngitsumik illus-
saarsuarmi sinittut tamarmik itertinneqarsimagunarlutik.

"ARPAGITSI!" Harry suaarpoq tamarmillu sisamaallu-
tik arpalerput Filchip malersorneraatik malersunnginneraa-
tilluunniit soqutiginaq. Sangoriap tungaanut arpassuataar-
put sangoriaramillu torsuusamut appakaakkamik torsuu-

sakkuulerlutik. Harry siuttuulluni arpappoq naloqqinnaar-lugu sumiinnerlutik imaluunniit sumunnarnerlutik. Tippersuaq iikkami nivingasoq sanioqqukkamikku tassan-gaannaq aqqutikkut isertortukkuulerput. Taanna ingerla-vigeeramikku angakkuartarfiup eqqaanut pippu, taannali uumasut toqutat niaquisa aanaveersakkat katersugaasivia-nut ungasippoq.

"Katassimassavagut," Harry anertikkarluni oqarpoq qaa-minilu aallernini tagiartuutigalugu iikkamut iigarluni. Neville qasunermit peqissimavoq anertikkarlunilu.

"Oqarpungami," Hermione nimaarpoq peqillunilu saneq-qamigut kapoortitsigami. "Taamami - oqaraluarpunga."

"Allatut ajornartumik Gryffindorip napasuliaanut uterta-riaqarpugut," Ron oqarpoq, "tuaviortariaqarpugut."

"Malfoyp salloqittarsimavaatit," Hermionep Harry oqar-figaa. "Tamannami paasinnguatsiarpat, ilaa?"

Unamminissarsi siunertarisimanngivippaa - aammalu Filchip arlaatigut paasisimavaa inimut uumasut toqutat nia-quisa inaannukarsimassasutit. Naatsorsoruminarpoq kia oqaluttuussimassaneraa."

Harryp qamuuna ilumigut ilumoornerartariaqarpaa kisi-annili tamanna nammineerluni nassuerutiginiangilaa.

"Ingerlariarta."

Ilimagisaannit ajornarneroqaaq. Ungasillerianngitsut eqqaanni matup tigummivia aalalerpoq sunaanersorlu tungaannaannut sukkaqisumik ingerlalerpoq.

Tassaana Peeves. Meeqqat takoriataarpai nuannaarner-millu nillialluni.

"Nipangerit, Peeves - qaa nipangilaariarit - nipanginngik-kuit tamatta anisitaatissavatsigut." Peeves illarpoq.

"Unnuaannakkut malunnaarsarlusi angalaarpisi, atua-

lerlaavaqqat? Kanngusunngilasi.. Tigusaanissarsi qularna-runnaarpoq."

"Aatsaat paasitikkutsigut tigusaassaagut, Peeves. Ilaa oqaluttuutissanngilatit?"

"Immaqa Filch oqaluttuuttariaqarpara," Peeves naalappallulluni oqarpoq, kisiannili isai uumissuERPasipput. "Ilissimi ikiorniarlusi taamaaliussaanga."

"Peerniarit," Ron qatimaluppoq Peevesilu tilloriarlugu - taamaaliornerali kukkunerujussuuvoq.

"ATUARTUT UNNUAKKUT INGERLAARTUT!"
Peeves suaartarpoq. "ATUARTUT UNNUAKKUT
INGERLAARTUT ANGAKKUARTARFIUP EQQAA-
NI!"

Tamaviannguat qimaallutik aallarput. Torsuusap isuanut pigamik matu ammariaraluarpaat - aamma taanna parnaaq-qavoq.

"Tassa naggatissarput tikipparput!" Ron anertikkarluni oqarpoq matu tamaviaarluni ammarniaraluartillugu. "Tassa naggatissarput tikipparput. Maanna tassa ikiornissaarupput!"

Tummarpaluk tusaavaat - Filchiusimassaaq tamaviaarluni arpappaluttoq.

"Ukorsiiaa illuaritsi," Hermione kamalluni oqarpoq. Harryp ajaappiaa angakkuaat tiguaa, matup parnaarsaataa taassuminnga anaallugu isussullunilu. "Alohomora!"

Parnaarsaataa seqqorpoq matulu ammarluni - tuaviinnaq ataatsikkorsuaq aniniarsaripallapput anillakkamillu matu parnaarpaat taavalu siutitik matumut tutsippaat kina aggernersoq tusaaniarlugu.

"Suna aqqutigaa, Peeves?" Filch aperivoq. "Tuavi oqaatigipallaguk."

"Iluasaarlutit apereqqaassavarma!"

"Uumisaarunnaarnianga, Peeves oqarniarillu meeqqat sumut ingerlanersut."

"Oqarnianngilanga, iluasaarlutit apereqqaassavarma."

Peeves naalappaluttumik uuminaqisumik nipeqarluni oqarpoq.

"Ajunngilarmi Peevesinnguaq-aa, oqaatigilaarsinnaaviuk sumut arpannersut, qujanassagaluqaatit?"

"OQARNIANNGILANGA! Ha haa! Oqarpungami OQARNIARNANGA iluasaarlutit aperigumma! Ha haa!" Tusaavaat Peeves qimaguppallattoq Filchilu kamannermik oqaasipiluppalluttoq.

"Isuma qarpoq matu una parnaarsimasoq," Harry isusuppoq. "Qimarratigisimagunarpaput - iperarnianga, Neville!" Minutsini kingullerni marlussunni Nevillep Harryp atsipaava nutsussimavaa. "Sunaana?"

Harry tunuppoq - namminerlu sunaanersoq takulerlugu. Siullermik isumaqaaqqaaraluarpoq sinnattupilulluni - inga sappallaaqaaq. Maanna sapilerpoq.

Iimagisaattut atuartitsivimmiinngillat. Akerlianik toqqaannartumik torsuusamut allamut pisimapput. Torsuusaq inerteqqutaasoq init quleriit pingajuanni talerperlermi! Maannalu nammineerlutik takusinnaalerpaat sooq tamanna ornissallugu inerteqqutaanersoq.

Saannguanniippoq qimmipiluunersuaq. Qimmeq angingaarami qilaaq tikivillugu angissuseqarpoq. Pingasunik niaqoqarpoq, marlukkuutaanik pingasunik kaavittunik silaaruteqqarpasissunik iseqarluni, qingai pingasut tamar-mik immikkut sammiveqarlutik solummigarpaput qanersuil-lu nuffiortut pingasut takisuunik sungaartunik tuloriarsuaqarput.

Uninngaqqissaarpoq meeqqallu isiminik arfinilinnik nak-kullugit. Harryp paasivaa pakasarsimagitsik - taamaanngip-pammi qangali toqoreersimassagaluarpot. Maannali tupan-nini anigorsimarpasippaa. Qatimaappalunnersuata sakkor-toqisup qimmip qanoq piniarnera qularnarunnaarsippaa.

Harryp matup tigummivia satsippaa - Filch toqulu arlaat qinissaguniuk Filch qinerusunnerungaarpaa.

Matu ammarmagu tunummut matukkut ammasukkut nerfallarput - Harryp matu matupallappaa taavalu timmiu-saannarlutik torsuusat inillu aqqusaartorpaat.

Filch allamut ujarlersimassaaq, tassami sukkaqisumik qimmersuarmit qimaanerminni aqquataani takunngilaal-luunniit. Kissaatituaat tassaavoq uumasorujummiit qima-a-nissartik. Aqquataat tamaat arpakkamik aatsaat unipput init quleriit qummut arfineq pingajuanni arnap pualasuup assinga tikikkamikku.

"Sumeerujussuarassi?" Arnaq pualasooq assimiittoq ape-rivoq makiaarusaallu equngasumik nivingasut tunuannilu issulittut kiinaallu aappillersimaqisut aallertullu nakkullugit.

"Sussa oqanngikkaluaruma - puulukip qingaa, puulukip qingaa," Harry anertikkarluni oqarpoq taavalu asseq illuar-poq. Isersimaartarfimmut iserput issiavissuarnullu annilaar-simanermik sajoqalutik nallaannarlutik.

Sivisulaartumik oqartoqanngilaq. Neville allaanngivip-poq oqaaseqaqqinngisaannassasoq.

"Sunaana siunertaralugu uumasorujuk taamaattoq atuar-fimmi parnaarunneqarsimasoq?" Kiisami Ron oqarpoq. "Qimmimik aneerunneqarnissamik aatsaat taama atorfissa-qartitsitigisumik takuvunga."

Hermione anersaartoqqissinnaalersimavoq isumalunnini-lu ateqqissimallugu.

"Arlaannassiluunniit isini atunngilaa," suangasarfigai.
"Takunngilisiuk suna tummarfigineraa?"

"Nateq?" Harry oqarpoq. "Isigaasa isiginissaanut periarfissaqarsimanngilanga niaqui alaatsinaannermik."

"Naamik natermiunngitsoq. Matup nakkartartup matoq-qasup qaavaniippoq. Arlaannik nakkutilliivoq."

Nikuippoq kamallunilu nakkutilerlugit.

"Neriuppunga immissinnut naammagisimaassasusi.
Toqutaasimasinnaagaluarpuq imaluunniit ajornerusumik pineqarluta - anisitaalluta! Ajorissanngikkussiuk innarniar-punga."

Ronip qarngi aatsartillugu nakkuppaa.

"Naamik ajorinngivipparput," oqarpoq ilanilu isigalugit.
"Isumaartoqarsinnaavormi pinngitsaalillugu ilagigipput."

Kisiannili Hermionep Harry arlaannik eqqarsaatississimavaa. Innarami eqqarsarujulerpoq. Qimmeq arlaannik nakkutilliivoq... Qanormaanna Hagrid oqarpa?
Toqqortaqarniaraanni Gringotts silarsuarmi isumannaan-nerpaasoq? - immaqami kisianni Hogwarts suli isuman-naannerugunarpoq.

Imaassimagunarpoq Harryp poortugaaraq ipertoq toq-qorsivimmi nummer 713-imiittoq nassaaresimagaa.

Iluartut ulluata unnukkua

Malfoyip isini uppererpianngilai aqaguani paasigamiuk Harry Roniluunniit Hogwartsimiit anisitaasimanngitsut. Qasoqqarpasipput nuannaqaqalutilli. Sinereeramik isumaqalerput qimmersuarmik pingasunik niaqulimmik naapitsinertik pissanganartuusimasoq. Takoqqilaarnissaa ajorilaalaarnavianngilaat. Massakkorpiaq Harry Ron poortukkamik eqqumiitsumik Gringottsimit tillinneqariarluni Hogwartsimut pissunneqarsimasumik tassanilu toqqorneqarsimasumik oqaluttuuppaa. Tamatuma kingorna piffissarujussuaq atorpaat eqqartorlugu poortugaq sooq taama nakkutigineqartariaqartiginersoq.

"Naleqarujussuanngikkuni ulorianartorujussuusimasaaq," Ron oqarpoq.

"Imaluunniit tamaasa," Harry oqarpoq.

Kisiannili poortugaq pillugu erseqqissumik ilisimasatuaat tassaavoq tommit marluk missaanni takissuseqarnera. Paasissutissanik allanik pissarsitinnatik iliuuseqaqqissinnaanngivipput.

Nevillep Hermionelluunniit paaserusunngivippaat qimmersuup suna nakkutigineraa. Neville naluunngiinnarpaa ajornanngippat qimmersuaq qanillinaveersaartariaqarlugu.

Hermionep Harry Ronilu oqaluukkusunngilai, kisiannili paatsuugassaanngitsumik naalagaarpasinniarpoq allanillu ilisimasaqarpasinniarluni – ilaminit pingaarnerusutut imminut isigiuarsinnarpoq.

Sulili Malfoyimik akiniaanissartik amigaatigaat. Qujanar-tumilli akiniaanissaminnut sivilisuumik utaqqisariaqanngillat tassami sapaatip akunnerani tullermi allakkat aqputigalugit periarfissaq takkuppoq.

Ullaat ilaanni uppiit Inersuarmut timmillutik pisarnertut isaammata isersimasut tamarmik malugaat uppiit arfinillit nilliallutik poortugaq takisooq akunnerminni timmissuk-kaat. Harry ilamisulli arajutsiniannngitsigaaq, tupigutsanner-paavorli uppiit poortugaq namminerminut tunniummas-suk, tunniukkamikku baconiutaa natermut nakkartillugu. Tingiunnartullu uppiik alla takkuppoq allakkallu poortuk-kap qaanut nakkartillugit.

Harry allakkat tauviinnaq ammarpai, tamannalu iluat-sitsineruvoq tassami allakkat ima imaqaarmata:

NERRIVIMMI AMMARNEQASSANNGILAQ

Poortukkap uuma imaraa Nimbusiutissat nutaaq, Nimbus 2000, ilavilli paasisanngilaat sanigutitaartutit - paasigunikku piumaleqinammata.

Oliver Woodip Quidditchertarfinni unnugu nalunaaqutaq arfineq marlunut naapissavaatit. Tassani sungiusarnerit siulleg pissaaq.

Professor McGonagall

Harry qümasunnini isertorsinnaanngingajappaa allakkallu Ronimut tunniuppai taassuma atuarniassammagit.

"Nimbus 2000," Ron sinngaginnippasilluni anertikkarpoq. "Uangaluunniit taamaattumik attueqqusaanikuunngilanga."

Tuaviorlutik inersuaq qimappaat atuariatortinnatik poortugaq ammarterniarlugu majuartarfitsigulli suli qaqitinnatik Crabbe Goyllu majuartarfik assarlugu unitsippaat. Malfoyip Harry poortugaataanik arsaarpaa poortugarlu attuallugu misissulerlugu.

"Sanigutinuku," oqarpoq poortugarlu Harrymut miloriullugu. Kiinaani sinnganera peqqissimineralu takussaapput. "Tamatumuuna tigusaassaait, Potter. Atualerlaat tamakku-ninnga atuarfimmittitaqqusaanngillat."

Ron nipangersimasinnaajunnaarpoq.

"Sanigutaanngillat nalinginnaasut," oqarpoq, "tassaana Nimbus 2000. Qanoruna oqartutit qanoq ittumik ilissinni peqarlutit, Malfoy? Comet 2-60-iuva?" Ron Harrymut qungujuppoq. "Comet 2-60 isikkumigut pitsaasoorpasipppoq kisiannili Nimbusimut nallersuunneqarsinnaanngilaq."

"Illit tamakku naluait, Weasley. Ipuanulluunniit akissaqalinngisaannassaait." Malfoy akivoq. "Naatsorsuutigaara illit qatanngutitillu sanigutitut akissaqarniarlusi sipaartariaqartartusi."

Ron suli akerianngitsoq professor Flitwick Malfoyip tunuaniit takkuppoq.

"Oqqappisi, nukappiaqqat?" Oqarpoq.

"Potter sanigutinin nassiussarsisimagami, professor," Malfoy sukkasuumik oqarpoq.

"Usi tassami ilumoorpoq," professor Flitwick oqarpoq Harrylu qungujullugu. "Professor McGonagallip pissutsit immikkut ittut oqaluttuarai, Potter. Qanoq ittumik tunisik-kavit?"

"Nimbus 2000, professori," Harry oqarpoq tamaviaarlunilu illarnaveersaarluni Malfoyip kiinaa mamiatsassimasoq takugamiuk. "Aamma Malfoy qutsavigisariaqarpara pissarsiarigakku," oqarpoq.

Harry Ronillu illakusullutik majuartarfikkut majuarneritik nangippaat Malfoyilu qimallugu paatsiveeruteqqasoq kamaqisorlu.

"Aammami ilumoorpoq," Harry illarluni oqarpoq, majuartarfik marmorimik sanaaq qaqigamikku. "Nevillep ammalortuutaa puigukkanik eqqaasitsisartoq tillissimanngikkaluarpagu unammisartunut ilanngussimanavianngikkaluarpunga..."

"Tassa isumaqarputit malittarisassat unioqqutikkakkit akissarsiarigit?" Nipi kamappaluttoq tunuanniit tusarsaavoq. Hermionep majuartarfikkut sukkaannavik qummut malippai Harryllu poortugaataa assuarinnippasilluni qissimillugu.

"Isumaqaraluarama oqaloqatiginissarput eqiagigit," Harry oqarpoq.

"Aap, oqaloqatigaluta aallartittariaqanngilatit," Ron oqarpoq.

Hermione ajuallappasilluni qinngani qummoortillugu ingerlaqqippoq.

Ulloq taanna Harry atuaraluarami malinnaasinnaanngivippoq. Sanigutit sinittarfimmi siniffimmi ataaniittut eqqarsaatiguarpai. Aamma eqqarsaatai quidditchimik arsaattarfimmiuttuarput, unnummut siullerpaamik sungiusarfissaani. Unnukkorsiorlutik nerigamik nerliutigineqartut suunersut paaserpianngivillugit nerivai. Taava Ron malitsigalugu arpaannaq qalianukarpoq Nimbus 2000-iutini kiisami puarniarlugu.

"Wauw," Ron anersaamivoq sanigutit Harryp siniffiani tippip qaavaniïlrmata.

Harry sanigutini ilisimasaqanngivissoq nassuerpoq takusani pikkunarluinnartuusut. Iluserissuupput qillaris-suullutillu ipuallu mahognimik sanaajulluni. Børstii takisuu-jupput takeqatigiïllutillu ipuanilu naqinnernik kuultiusunik allassimavoq Nimbus 2000.

Nalunaaqutaq arfineq marlunngulivissoq Harryp illus-saarsuaq qimappaa quidditchertarfiullu tungaanut ingerlal-luni. Tarrajuppoq aammalu siornatigut atuariup arsaattar-fianiinnikuunngisaannarpoq. Issiaviit hundredit arlallit qat-tuniliaasamiïpput ima qutsitsigisumiïllutik isiginnaartut arsaanneq tamaat malinnaaffigisinnaallugu. Arsaattarfiup isuini illugiinni qisuit kuultimik qallikkat nunamut mangus-simasut pingasuupput isuini ammalortunik nigaliliartaqar-lutik. Taakku Harryp plastikkeeqqanut Mugglerit meerar-taasa imermik qaqorsaatilimmik pullartaliuleraangamik atortagaannut eqqaanartippai – ukuli allaassuteqarput qisu-it meterinik 17-inik portussuseqaramik.

Harryp sanigutini misilikkusungaaramigit Wood utaq-qisinnaanngingajappaa. Sanigutinuq qaqivoq nunalu tucker-lugu. Misigissuseq sunaana taama nuannertigisoq - qisuit málertarfiut akunneqquttarlugit ingerlaarpoq arsaattarfillu qulaavaallugu. Nimbus 2000-iutini attulaaginnaraangamiuk ingerlalluaqaluni sangusarpoq.

"Hej, Potter, nunnigit!"

Oliver Wood takkussimavoq. Karsersuarmik qisummik sanaamik nassarpoq. Harry sanianut nunnippoq.

"Takutitsilluaqaatit," Wood alutorsarpasilluni oqarpoq. "Takusinnaavara McGonagall qanoq isumaqarnersoq... timmineq inunnguuseralugu piginnaaneqarfigaat. Malit-

tarisassanik unnugu ilinniartissavakkit, taava unammisartoqatissatit peqatigalugit sapaatip akunneranut pingasoriarluttit sungiusartalissaatit."

Karsi ammarpaa. Imarai arsat sisamat assigiinngitsunik angissusillit.

"Okay," Wood aallartippoq. "Quidditchip malittarisassai ajornakusoortuunngillat, naak arsaalluni ajornakusooraluartoq. Holdit marluk unammisussat tamarmik arfineq marlunnik inuttaqartarput. Ilaat pingasut ateqarput saassussisut."

"Saassussisut pingasut," Harry uteqqiivoq. Woodip arsaq isikkamik arsaattartut arsaata angeqqataa aappallorik tiguaa.

Arsaq una taaneqartarpoq manissaat," Wood nassuiaavoq. "Saassussisut manissaat siumut utimullu ilaminnut miloriuteqattaartarpaat nigaliliat arlaat akulloqqullugu ajuunnissamik tungaanut. Ajuukkunik pointinik qulinik pin-nassapput. Paasiviuk?"

"Saassussisut arsaq miloriuttarpaat imminnut tunioraallutik nigaliliat arlaat akulloqqullugu ajuunniallutik," Harry uteqqiivoq. "Basketballimut assinguvoq - assigiinngissuti-giinnarpaa quidditchimi arsaattut sanigutininik timmisarnerat nigaliliallu assigiinngitsut arfiniliunerat, ilaa?"

"Basketball sunaagami?" Wood paatsuungarpassilluni aperivoq.

"Sussa, puiguinnarniaruk." Harry tuaviinnaq akivoq.

"Aamma holdit tamarmik arsartoqartarput málmandimik taasagaannik - Uanga Gryffindorimi málmandiuvunga. Uanga nigaliliat akornanni timmisagattaartarpunga akeqqamalu ajuunnissaat pinngitsoortinniartarlugu.

"Saassussisut pingasut málmandilu ataaseq,

"Harry uteqqiivoq. Aalajangersimavoq Woodip oqaasii tamaviisa eqqaamaniarsariniarlugit. "Taakkulu manissaat arsarisarpaat. Okay. Tassa taakku paasivakka. Taavami arsat allat sumut atorneqassappat?" Aperivoq arsallu sinneruttut karsimiuttut tikkuarlugit.

"Maanna taakku tikissavakka," Wood oqarpoq. "Una tigummiuk."

Anaataaraq rundboldertut atortagaasa assipajuat Harrymut tunniuppaa.

"Maanna takutissavara arsaq smasher qanoq atorneqartnersoq." Wood oqarpoq. "Arsat uku marluk smasherinik taaneqartarput."

Arsat assigniiffaariit marluk qernariit manissaammillu aapaluttumit minnerulaartut Harrymut takutippai. Harryp malugaa arsat karsimi naatiffimminniit uumassuseqartutut tamaviaarlutik kaanngarniarsarisut.

"Mianersulaassaati," Wood mianersoqqusivoq. Peqippoq smasherillu ilaat naatiffianiit kaanngartillugu.

Tigummiunnaaraanilu arsaq pavungarujussuaq silaannarmut aallariataarpoq ammulu Harryp kiinaata tungaannaanut nakkariartulerluni. Qinngani napinnginniassammaru arsaq anaataminik anaariarpaa. Arsaaraq qernertoq eqqorpaa silaannarmullu aallartillugu. Niaqui akulloqqullugit Woodip tungaannaanut sukkaqisumik ingerlalerpoq taassumalli ajoquserinnani periataarluni akorpaa. Taava arsaq nunamut torrutipiloorpaa qummut aallaqqinnginias-sammat.

"Nammineq takoreerpat arsaq qanoq ingerlasartoq," anertikkarluni oqarpoq arsaq karsimut inaanut inissinniaatigalugu naatiffianullu naatillugu ikkulluarlugu. "Smasherit sumut tamaanga ingerlaartarput arsaattullu sanigutaannit

nakkartinniarsarisarlugit. Taamaattuminguna holdini tamani baskereqartartoq tassa anaasertiartoqartartoq - Weasleyp marluliai uagut anaasisartoraagut - taakkua suliasaraat arsaattut smasherinit eqqorneqannginnissaat isumagissallugu aammalu suliasarisarpaat arsat smasherit akeqqaminnut saatinnissaat. Maanna malittarisassat paasivigit?"

"Saassussisut pingasut tromleri arsaralugu ajuunniarsari-sarput. Målmandip nigaliliat målmiuttut akulloqqunneqannginnissaat isumagisarpaa. Anaasisartut arsaqatitik smasherinut illersortarpaat arsallu taakku akeqqaminnut saatinniartarlugit," Harry sukkasuumik alanngaarpoq.

"Ajunngivippoq," Wood oqarpoq.

"Apeqqutigilaarlara smasherit arsaattunik toqutsinikuunersut?" Harry soqutiginnigitsuusaarpasillugu aperivoq.

"Maani Hogwartsimi naamivik. Alleruujiartoqarnikuuvoq kisiannili ajornerusumik pisoqarnikuunani. Ata, ingerlaqqinniarta. Arsaattoq kingulleq oqaatiginngisara tassaavoq ujaasisoq. Tassa illit ujaasisussaavutit. Illit arsat tromleri smasheriluunniit soqutigissanngilatit..."

"Tassami nioqora sequminngippassuk."

"Annilaangassanngilatit. Weasleyp marluliaasa taamatut pisoqannginnissaa isumagissavaat. Utaqqilaaginnarit arsaattut takulerukkit tupigusuallasaatit. Pikkorissorsuupput arsaraangamillu allaaneq ajorput smasherit uumasut."

Woodip arsat sisamaat kingullersaallu karsimit ammu-paa. Arsaq taanna smasherimut tromlerimullu naleqqiullugu mikisuarannguuvog - qaqqortarissatut valnøditut angiti-ginnarpoq. Kusanaqaaq kuultisut qillerluni mikisuaqqanilu sølvinik erfattunik sulogarluni.

"Una," Wood oqarpoq, "tassaavoq innaallagiq kuulteq. Tassaavorlu arsanit tamanit pingaarnerpaaq. Tiguneq akor-

nerluunniit ajornakusoortorujussuuvoq sukkaqigami taku-
juminaallunilu. Ujaasisup akornissaa suliassaraa. Allatut
ajornartumik saassussisut anaasisartullu akornanni timmio-
raartariaqassuutit - tromlerit holdii sissuissagakkit eqqaa-
massavat - aamma eqqaamassavat eqqarsaatitit ataasiinna-
vimmik sammiveqassammata sukkasoorujussuusariaqarpu-
tillu innaallagiq akeqqannit tiguneqartinnagu annaatissa-
gukku. Ujaasisup innaallagissamik tigusisup holdini 150
pointinik pissarsissutissavai, tamannalu tamatigungajak
kinguneqartarpoq holdip ajugaanerani. Taamaattumik
ujaasisoq akuttunngitsumik sakkortuumik naallerneqartu-
artarpoq naallerneqartarlunilu. Quidditcherluni arsaan-
neq aatsaat naammassisarpoq innaallagiq kuultiusoq tigu-
neqaraangat, aammali unammineq naassaanngiusartumik
nangeqattaarneqarsinnaasarpoq - isumaqarpunga rekordi
qaammatit pingasuusut, taamanikkullu arsaattut taarseraat-
tuarneqarnissaat isumagisariaqarsimavarput arsaattut sinit-
tarniassammata. Aap, tassalu malittarisassat - apeqquutissa-
qarpit?"

Harry ileqimisaartorpoq. Nammineq ujaasisutut suliassa-
ni paasilluarpaa. Ajornartorsiut tassaaginnarpoq iluatsinnis-
saa.

"Innaallagissamik kuultiusumik sungiusarnissarput ki-
nguartilaarallassarput," Wood oqarpoq arsaararlu mia-
nersoqqissaarluni karsimut utertillugu. "Taarpallaaqaaq
annaanaveersaartariaqarparpullu. Taarsiullugu ukuningga
sungiusarniarta."

Golferluni atortartunik arsaqqanik nalinginnarnik kaa-
sarfimminiititaqarpoq minutsillu arlalinnguit qaangiumma-
ta Harrylu marluullutik sanigutiminnik qangattarput.
Woodip arsaqqat sumut tamaanga miloriuttarpai Harryllu

timmioraarluni akorniarsarisarpai. Woodip nuannaarutigeqisaanik tamaviisa akorpai. Akunnerup affaa qaangiummat taartuinnangorpoq taamaatittariaqarpullu.

"Quidditchip pokalia ukioq manna pissarsiarissavarput," illussaarsuarmut uterlutik aallaramik Wood pilluarpasilluni pilerpoq. "Tupigissanngivippara Charlie Weasleyminngaanniit pikkorinnerulissaguit; taanna naalagaaffimmi arsaattartunut ilaasortannngorsinnaagaluarpoq uumasorujunniarneq qinersimanngikkaluaruniuk."

Ullut Harrymut sukkasoorujussuarmik ingerlapput. Immaqa ulapputeqarpallaarsimavoq, ulapputigisaalu tassaapput atuarfimmi suliassat, ilinniagassat Quidditchimillu sapaatip akunneranut pingasoriarluni sungiusarneq. Maluginngitsuungajappaa Hogwartsimiinnermini qaammatit marlunngoramigit. Illussaarsuaq angerlarsimaffikumininngaanniit angerlarsimaffittut misigisimanerulersimavaa. Aamma atuarfimmi atuartareri pissanganarsiartorput naqganiit ilikkagassat ilikkareeriaramik.

Iluartut Ulluata ullaavani iterput kissartumik græskari-sunnialaannguartoq. Græskarit atuarfik tamaat tipigissitissimavaat. Aamma ulloq aallartilluareersoq suli nuannernerulerpoq angakkuarnermik atuarneranni professor Flitwick nalunaarmat atuartut ima pikkoritsigilersimasut maanna sunilluunniit timmisitsisinnaaneq ilinniarsinnaanngorlugu allaat - tamanna qilanaarilersimavaat taamani professorip Neville narasia inimi atuarfianni timmioraartimmaguli. Professor Flitwickip atuartut marlukkuaarlugit inissippai sungiusarnialerlugillu. Harryp aapparaa Seamus Finnigan, tamannalu Harrymut iluarpoq tassami Neville aappari-niarsimagaluarmani. Ron iluatsitsivallaanngilaq Hermione

Granger aapparissusanngoramiuk. Oqaatigiuminaappoq kinarleq naammaginnginninnerunersoq - Ron imaluunniit Hermione. Hermionep arlaannaalluunniit oqaloqatigeqqis-simanngilaa Harry sanigutitaarmalli.

"Puigussanngilarsi paffissi kaajallatsilaarnissaat, soorlu sungiusarnitsinni taamaaliortugut!" Professor Flitwick nerri-viup tunuaniit atuakkat qaleriiaarsimasut qaaniit oqarpoq. "Ajaappiaq aalatissiuk kaajallatsillugulu, eqqaamallugu, aalatissagassiuk kaajallatsillugulu. Aamma pingaaruteqar-poq oqaatsit angakkuaatit erseqqissumik oqaatigineqarnis-saat - puigunngisaannarsiuk angakkoq Baruffio, taassuma 's' f-itut taasoorpaa kingornalu ilisimmarpoq natermi nalal-luni puffalorsuaq sakissamini issiasoq.

Angakkuarniarnerat assorsuaq ajornakusoorpoq. Harryp Seamusillu angakkuaatitik aalatippaat kaajallatsittarlugillu kisiannili timmissap meqqua timmisussaagaluq aalariassa-nani nerrivimmiuginnarpoq. Seamusip utaqqikataluni qivioq ajaappissaminik tuupiloorpaa tamannalu nerriviup qaani ikuallaleraluarnermik kinguneqarpoq innerli sulí siammarianngitsoq Harryp qamippaa.

Ron nerriviup saniliata eqqaani nikorfasoq iluatsitsine-runngilaq.

"Wingardium Leviosa!" Suaarpoq tallinilu takisuut ase-rorteriviip suluusarsuatut kaavitillugit.

"Angakkuaatit kukkoqqinnaarlutit oqaatigisarpait," Hermione naveerserpalattoq tusaavaat. "Imaassaaq Wing-gar-dium Levi-o-sa. Eqqaamallugu 'gar' tannaassagakku."

"Taava nammineq oqaatiginiaruk pikkoreqiguit," Ron kamalluni oqarpoq.

Hermionep atsipaani kangujarterpai ajaappissanilu silaannarmi kaajallatsillugu oqarlunilu.

"Wingardium Leviosa!"

Timmissap qiviua nerrivimmiit qangattarpoq meterinillu marlussunnik niaqui qulaallugit timmilluni.

"Torrallavippat!" Professor Flitwich suaarpoq assanilu patalerlugit. "Tamassi qaagitsi takusiuk niviarsiaqqap Grangerip ilikkarsimagaa."

Atuartitsineq naammat Ron isumaluttorujussuuvoq.

"Tupinnanngilaq kinaluunniit eqqaaniissinnaanngimmat," Harrymut oqarpoq torsuusamut ajattaallutik aniartornerminni. "Isertuarnanga oqassaguma ilaginissaa annikilliornartorujussuuvoq."

Pisunneranni arlaata Harry ajattoorpaa. Sunaffa Hermionep ajattooraa. Sukkasuumik sanioqqummat kiina takooqqalaarpaa uissuummissutigaluguli qiasoq takugamiuk.

"Oqaatsitit tusaasimassavai."

"Taava?" Ron soqutigisaqarpasinnani aperaaq, kisiannili toqqissisimarpasinngilaq. "Namminermi paasisimassavaa ikinnguteqarnani."

Atuarneq aallarteqqimmat Hermione takkutinngilaq ualilu sinnerani takkuteqqingitsoorluni. Inersuarmut Iluartup Ulluani nalliuttorsiorfissaminnukarnerminni Harry Ronillu Parvati Patil ikinngumminut niviarsiaqqamut oqartoq tusavaat Hermione niviarsiaqqat anartarfianni qiaatigaluni issiasoq naammattoorsimallugu aammagooq oqaloqateqarusunngilaq. Ron attortittorujussuuvoq kingunitsiannguali Inersuarmut iserput Hermionelu puiorlugu.

Inersuarmi imangertat tusintit arlallit iikkat qilaallu nalaa-sigut timmioraarput, allallu tusintillit græskarit iluliumanerini naneruutillit qulaallugit timmippat sulussornerpassuisalu naneruutit naaralaarneri sakkukillisittarpaat sakkortusisittarlugillu. Nalliuttorsiornermi nerisassarpassuit puugutaasani

kuultiusuni takkuteriataarput soorlu aamma atualeqqaaramik nerrimmata taamatut pisoqarsimasoq.

Harry naatsiaat-pannakaanik puuguttaminut niusilerutto-toq professor Quirrel Inersuarmut tuaviinnaq takkuteriataarpoq. Nasaa sangusimavoq kiinaatigullu takuneqarsinnaavoq annilaarsimasorujussuusoq. Tamarmik nakkuppaat, professor Dumbledorelu tikikkamiuk oqalulerpoq. "Torulleq naq-qup iluanut ininut allerpaanut qimaasimavoq - maannapal-lappunga isumaqarama ingerlaannaq tamatuminnaga paasit-inneqartariaqartutit."

Taava aqullaarpoq ilisimajunnaangajallunilu.

Uivernersuaqarpoq paatsiveerunnersuaqarlunilu. Dumbledore angakkuaamminik arlaleriaqaluni mianersos-qusilluni seqqortitseremat aatsaat inersuarmiuttut nipaaru-put.

"Iltersuisut," suaarpoq, "kollegiami najugallit massakkor-piaq sinittarfiinukartissigit."

Percy qümmappoq.

"Malissinga! Atualerlaat immissinnut qanittunnguullusi ingerlassaasi! Iltersuutikka malikkussigit torulleq ersigisari-aqassanngilarsi! Tununni malissavarsinnga. Qaa ingerlania-ritsi, uanga iltersuisuuvunga!"

"Torulleq qanoq ililluni illussaarsuarmut isersinnaagami?" Majuarterfikkut majualeramik Harry aperaaq.

"Aperissanngilarma. Tusarnikuugaluarpara torulliit sia-niitsorujussuusut," Ron oqarpoq. "Immaqaana Peevesip ammaassimagaa. Iluartut Ulluanni quiasaarutigisimassavaa."

Atuartut arlallit qaangiavaat sumut tamaanga tuavioqalu-tik ingerlasut. Atuartut Hufflepuffimeersut arlallit paatsivee-ruteqqasut qaangerlugillu Harry Ron taliatigut tigoriataar-paa.

"Hermione eqqarsaatigileriataarpara."

"Sugami?"

"Torulleq illussaarsuarmut isersimasoq tusanngilaa."

Ronip qarluni kiivaa.

"Taavami qanoq iliuseqartariaqarpugut," narrassimaarluni oqarpoq. "Kisianni Percymut takutinnaveersaassaagut."

Taqissorlutik Hufflepuffermiut tunuannut toqqorterlutik arpalerput. Torsuusamut inoqanngitsumut appakaakkamik niviansiaqqat anartarfiannut arpalerput. Sangoriakkuulerluttillu tunuminni sukkasuumik tummarpalunnerit tusaalerpaat.

"Percy!" Ron isussuppoq Harrylu uumasorjuup inuusaliap tunuanut toqqoqatigalugu. Toqqorfimminniilli marsernerminni Percy takunngilaat kisiannili Snape takulerpaat. Taanna torsuusaq akimut ingerlaffigeriarlugu ersigunnaarpoq.

"Sulerisoruna?" Harry isussuppoq. "Sooruna ilinniartitsisoqatini allat ilagalugit naqqup ataanukarsimanngitsoq."

"Apeqqut pitsak."

Nipaarsaaqalutik torsuusakkut ingerlalerput Snapellu pisuppalunnera malittarilerlugu. Tummarpaluk ingerlaanaq tusarsaajunnaarpoq.

"Init qummut quleriit pingajuannut ingerlavoq," Harry oqarpoq, kisiannili Ronip assani mianersoqqusilluni kivip-paa.

"Arlaannik naamasaqanngilatit?"

Harry narajorpoq tipersuarlu naamalerpaa, alersersuatoq-qat sivisuumik errorneqanngitsut anartarfiillu eqqiarneqarsi-manngisaannartup tikka naavaa.

Taava tusaalerpaat qatimaaluppalak inorjussuullu pisup-palunnera. Ronip torsuusap akia tikkuarpaa, tassen-

ngaanniimmi takkuteriataarmat inupilorujussuaq tungimin-
nut ingerlasoq. Tarranut toqqorput inupilorujusuarlu marsi-
lerlugu.

Takusaat amiilaarnartorujussuuvoq. Meterinik tallimanik
angissuseqarpoq amialu qasertumik qalipaateqarpoq,
allaanngilaq uumassuseqarpasinngitsoq, tinumanertalinnik
timerujussuaqarpoq, niaqua meqqoqanngitsoq mikisuarar-
suuvoq qaqqortariarsuattullu immulittut angitigiinnarluni,
niui naatsunnguit orpiup kanaartaatut mattutigaat isigaalu
amitsuupput unngullit. Torulliup tipersua naalliunnaannar-
poq. Talini takingaarmata anaatarujussuaq tigumiani nater-
mi kalippaa.

Torulleq matup ammasup eqqaanut unippoq ilummullu
itsuarluni. Siuterujussuani equsaartippai eqqarsarpalungaar-
mallu qarasaaraa neeqquluppalluppoq. Taava kigaatsun-
ngumik malunnaarsaarluni inimit iseriartorpoq.

"Matuersaat parnaarsaataani ikkusimavoq," Harry nipi-
kitsuliorpoq. "Parnaarulluarsinnaagaluarparput."

"Eqqarsaat pitsak," Ron annilaangalluni akuersivoq.

Likkap sinaatigut matup ammasup tungaanut nipaarsaar-
lutik ingerlapput, qarni paneqalutik neriullutillu torulleq
matukkut silammut niaqquni puttutissanngikkallaraa. Harry
matup tungaanut pisserujussuarpoq matulu matoriarlugu
matuersaat qissallallugu.

"Taamatut."

Ajugaanertik nuannaarutigeqalugu torsuusakkut utimut
arpalerput, sangoriakkulli sangulivillutik tusaasaqarput aam-
minnik qerisoortitsingajattumik - annilaangaarpaluttumik
nipitoorsuarmik nillernerujussuaq tusaavaat - nipilu tutsiut-
toq torulliup inaaniit aatsaaginnaq parnaagaannin-
ngaanneerpoq.

"Ila ajussusia," Ron Baronimit Aagasattumit qarsungane-rulersimasoq oqarpoq.

"Hermione!" Ataatsikkut nillerput.

Silarsuarmi orniginerpaasaasa kingullersaraat matumut parnaarsimasumut uteqqinnissaq allamilli iliuousissaqanngilat. Tuaviinnaq uterput matulu angugamikku matuersaat passutilerpaat matulu ammarlugu. Harryp matu ammarpaa marluullutillu ilummut arpapput.

Hermione qimaariarsinnaanani iikkap eqqaani nikorfa-voq ilisimajunnaalersutullu isikkoqarluni. Torulleq niviar-siaqqap tungaanut ingerlavoq aqqutaanilu asattarfiit tulle-riiaarlugit anaataminik sequmittarlugit.

"Allamut saasartariaqarparput," Harry uippallersimaqa luni Ronimut oqarpoq erngullu kuuffia aseqqukoq nater-mut igitaq tigullugu. Nukini tamaviisa atorlugit iikkamut miloriuppaa.

Torulleq meterit marlussuit Hermione inorlugu ueria-taarpoq. Illuanut saappoq sianiippasittumillu isikkoqarluni uisorerluni nipi suminngaanneernersoq takuniarlugu. Isaasa peqqarniitsut mikisut Harry isigaat. Unillatsiarpoq Hermionelu puiguillugu. Anaatani kivippaa unammillerti-nilu nutaaq ornilerlugu.

"Hej qarasaaraq!" Ron inip akianut arpaatigaluni suaar-poq. Aamma taassuma savimineq natermut nakkarnikoq miloriuppaa. Savimernup torulleq tuiatigut eqqoraluaraa torulliup tamanna soqutiginnilaa nipili suaartartoq tusaal-luarunarpaa. Unillatsiaqqippoq kiinnani quniitsoq Ronimut saatillugu, taamaalinerata Harry periarfissippaa Hermione-p tungaanut arpapallannissaanut.

"Qaagit, arpagit, arpagit!" Harryp Hermione suaartarpaa noqillugulu matumukaanni aralarlugu. Taannali aalariar-

sinnaanngilaq. Aalariarsinnaanani iikkamut nippusimavog qarna annilaanganermik ammaannartoq.

Nipiliornerannik suaartarnerannillu torulleg kamattorsu-
anngorpoq. Qatimaappoq Ronillu imminent qaninnerusup
qimaariarsinnaanngitsullu tungaanut arpalerluni.

Maanna Harry iliuuseqarpoq sapiilluinnartumik naviat-
taatsumillu. Arpalersoriarluni torulliup qatigaanut pissip-
poq assamminillu inorujussuaq toqqusassillugu. Harryp
qatigaminiinnara malugisinnaanngikkaluarpa kisiannili
torulliup qanoq ittuugaluartulluunniit malugisinnaavaa
qisuminnermik takisuumik solummut kappussisoqarpat.
Harryp angakkuaatini tiggummisimavaa torulleg pissiffigiga-
miuk, maannalu isumassarseriataarami angakkuaatini
torulliup sorluata aappaanut kappuppa.

Torulleg anniarnermik nilliaatigaluni kaavippoq kaatami-
nillu silaannarmut anaartarluni. Harry najummatiinnar-
poq nukini tamaasa atorlugit inuunini annaanniarlugu;
utaqqiinnarpaalu uumasorujussuarmiit tigguneqarnissani
imaluunniit anaataanit eqqorneqarnissani.

Hermione annilaarnermik natermut uppissimavog,
Ronillu angakkuaatini tiguaa naak sumut atussanerlugu ili-
simarpiannngikkaluarlugu imminent tusaalerpoq angak-
kuaat eqqaasani siullerpaaq nilliaatigalugu "Wingardium
Leviosa!"

Anaataq torulliup assaaniit qummuinnaq tammippoq
pavungarujussuarlu pilluni taava ammut aallaqqippoq inut-
tamilu niaquata qaavanut qaqqulaarpaluttorsuarmik nipe-
qarluni tulluni. Torulleg sivikitsunnguamik uppeqqajaalluni
aalariarluni nipitoorsuarmik siaarsinnaanini tamaat uppip-
poq kiinaa alliulluni. Natermut uppimmat seqqorpallappoq
inilu tamarmi sajuppilulluni.

Harry nikuippoq. Sajuppoq anersaarsinnaanngingajallunilu. Ron nikorfavoq angakkuaatini kivissimallugu pilianilu tupassimaqaluni isiginnaarlugu.

Hermione siulliulluni oqaaseqarpoq.

"To-toquva?"

"Ilimananngilaq," Harry oqarpoq. "Iisimajunnaarallarnarpoq."

Peqippoq angakkuaatinilu torulliup qingaanit ammullogu. Angakkuaataa nipinneqqutitut isikkulimmik qasertumik tiggusimasumik qallersimavoq.

"Puuha - torulliup kakkissua."

Ajaappiani uumasorujussuup qarliinut allarterpaa.

Matut ammarpalunnerisa pisuppallunnerullu qummut qiviartippaat. Eqqarsaatigisimanngilaat qanoq nipiliorsimigtalutik, kisianni soorunami qanngorpalunnerit nillianerillu ataani inini quleriinni allerni tusaaneqarsimassapput - minnerunngitsumik torulliup qatimaannersua tusaaneqarsimassaaq. Kingunitsianngua professor McGonagall arpaannaq nivarsiaqqat anartarfiannut takkuppoq Snape Quirrelilu malitsigalugit, Quirrel ilaminut toqqortertoq. Quirrelip torulleq qissimippaa, nipaatsumik kappialavoq anartarfiillu ilaannut ingilluni assani uummatimi nalaanut tutsillugu.

Snape torulliup qulaanut peqissimavoq professor McGonagallillu Harry Ronilu isigivai. Harryp siornatigut taama kamatsitigitillugu takusimanngisaannarpaa. Qarlui qaqortuinnaapput. Torullermut ajugaaneq pissutigalugu Gryffindorip minnerpaamik 50 pointinik pinnannissaa ilimanarunnaavippoq.

"Qanoruna eqqarsarpisi?" Professor McGonagall kamasimarpaseqisumik nipaqarluni aperivoq.

Harry Ron isigivaa, taassuma angakkuaatini suli apparti-simanngilaa. "Qujasariaqarpusi suli inuugassi. Sooq atuaqatisi allat ilagalugit sinittarfissinniingilasi?"

Snapep Harry annernartumik isigivaa. Harry ammut nakappoq. Neriukkaluarpoq Ronip talini kivissimajunnaas-sagaa.

Taava nipi qajannarteq teqeqqumiit tutsiuppoq.

"Uangaana pisuusunga, professor McGonagall - uangaa-na ujaraannga."

Hermione kiisami nikuissimavoq.

"Nammineerlungaana torulleq ujaraluarakku isumaqar-lunga ikiorteqamanga ajugaaffigisinnaallugu... nalunngilar-si tamakku pillugit atuarujussuarnikuusunga."

Ronip kiisami talini appartippaa. Ila tupinnaraluassusia tusaallugu Hermione Granger ilinniartitsisumut sallulluni oqaluttuartoq!

"Nassarisimanngitsuugaluarpannga maannakkut toqo-reersimassagaluarpunga. Harryp angakkuaatini sorluanut kappuppaa Ronillu nammineq anaataanik ilisimajuunnaar-sippaa. Allaminngaanniit ikiortissarsiornissartik piffissaqar-figinngivippaat. Toqunnialeraangalu annaakkiartorpaan-nga."

Oqaluttuaa Harryp Ronillu tamaviaarlutik uppererpasin-niarsuataarpaat.

"Tassami - taama pisoqarsimassappat..." professor McGonagall oqarpoq pingasuullugillu tamaasa isigalugit. "Granger, niviarsiaq sianiitsoq-aa, qanoq ilillutit isumaqa-lerpit torulleq taama angitigisoq nammineerlutit ajugaaffi-gisinnaallugu?"

Hermionep niaqqi sikippaa. Harry oqaasissaarutivissima-voq.

Isumaqarsimagualarpoq Hermione malittarisassanik unioq-
qutitsisinnaanngitsoq taamaattumillu tupigusuppoq immi-
nut pilliutigimmat ajornartorsiulernissaannik annaanniarlu-
git.

"Granger, sianiitsuliorderit pissutigalugu Gryffindor
pointinik tallimanik ilanngaanneqassaaq," professor
McGonagall nalunaarpoq. "Assorsuaq pakatsisipparma.
Ajoqusersimanngikkuit tuaviinnaq Gryffindorip napasuliaa-
nut utertariaqarputit. Atuartut Iluartut Ulluani kollegiamin-
ni unnukkorsiussapput."

Hermione qimaguppoq.

Professor McGonagallip Harry Ronilu saappai.

"Aap, tassa oqaatigeqqittariaqarpara iluatitsingaatsiartusi,
kisiannili atualerlaat ikittuinnaat qaqqap torullianik angi-
soorsuarmik saassussisinnaapput. Ilissi tamassi immikkut
pointinik tallimanik Gryffindorip pissaanik pinnappusi.
Professor Dumbledore tamatumunnga nalunaarfigineqaru-
maarpoq. Ingerlasinnaavusi."

Nipaqaratik tuaviinnaq ingerlapput aatsaallu init quleriit
marluk qummut ingerlareeramikkik oqaaseqaqqillutik.
Torullersuup tipersuanit aniguiertik oqiliiallaatigeqaat.

"10 pointinit amerlanernik pisariaqaraluarpugut," Ron
qatimaluppoq.

"Tallimat. Hermionemiit pointit tallimat peerneqarput."

"Ila annaanniarluta salloqittaagami torrallaangaarami,"
Ron oqarpoq. "Kisiannimi aamma uagut annaapparpuit."

"Immaqami nammineerluni annassimasinnaagualarpoq
torullerlu marluutillugit parnaarussimanngitsuugaluarutsi-
git," Harryp Ron eqqaasippaa.

Arnarp pualasuup assinga qalipagaq tikippaat.

"Puulukip qingaa," oqarput iserlutillu.

Ini isersimaartarfik atuartunik nipersuarmillu ulikkaarput. Nerisassat inaannut majuussorneqarsimasut nerivaat. Hermioneli matup eqqaani immikkoorluni issiavoq utaqqil-lugillu. Avaanngunartumik oqaaseqanngitsiarput. Taava pingasuullutik ataatsikkut imminnut isiginatik oqarput: "Qujanaq," tuaviinnarlu nerrivimmukarlutik puugutassa-minnik aallerlutik.

Pisoq taanna aallarnerfigalugu Hermione Granger ikin-ngutigilerpaat. Inuunermi aqquasaagassat ilaat immikkut ittut aqqusaaraanni inuunerup sinnerani ikinngutigilertari-aqartarpoq - torullersuarmullu angisuumut ersinartumut ajugaaneq pisut taamaattut ilagaat.

Kapitalit aqqarnat

Quidditch

Novembariulerpoq silalu nillertittorujussuuvoq. Qaqqat atuarfiup avataaniuttut qasertumik qalipaateqalerput taserlu allaanngivippoq sisak nillorsersimasoq. Ullaat tamaasa illussaarsuup eqqaa kanersimasarpoq. Igalaanit qullerniit Hagrid takuneqarsinnaasarpoq savat amianik qaatiguulerluni, inuaqanngitsunik aqqaserluni kiggiallu amiinik kameqarluni Quidditchertarfimmi sanigutit kissasserlugillu piareersartarai.

Quidditchimik unammisarneq aallartippoq. Arfininngornerup tulliani Harry akunnerni arlalinni sungiusareerluni siullerpaamik unammisussaavoq Gryffindorillu Slytherin unammisussaavaa. Gryffindor ajugaaguni kollegiat akornanni unammersuaarnermi normu 2-nngussaaq.

Inuit ikittuinnannguit Harryp arsaattarfimmi sungiusarnera takusimavaat. Woodip kissaatigisimavaa Harryp sungiusarnera isertuunneqassasoq - Harry, sakkoq isertuusaq! Kisiannili unammisartuni ujaasisutut unammeqataanisaa qangali paasineqareersimavoq. Harryp naluua sorleq ajornerunersoq ilaasa qularutissaannginerarmassuk iluatsiluarumaartoq imaluunniit ilaat oqarmata madrassilerlutik arpallutik ataaniit malittariumaarlu.

Qujasariaqarpoq Hermione ikinngutigigamiuk.

Nalulluinnarpaa qanoq iliorsimasinnaagaluarnarluni piffisami kingullermi ilinniagassaminik ikiorsimanngitsuugaluarpani. Piffissammi ilarujussuani Quidditchimik sungiusartarpoq, naak piffissaq taanna ilinniakkaminut allanut ator-tussaagaluarlugu. Hermionep ikiorusungaaramiuk atuagasaanik atukkersimava ateqartumik 'Quidditch ukiut ingerlaneranni'; atuagarlu taanna pissangaqaluni atuarpaa.

Assersuutigalugu Harryp atuarpaa Quidditchimik arsaannermi malittarisassat malinnagit arsariaatsit 700-uusut, unioqquutisisinnaanerillu tamavimmik unioqqutinneqarsimasut silarsuarmi pissartanngorniunnermi 1473-imi ingerlanneqartumi. Atuarpaa ujaasisut tassaasut arsaattut minnerpaartaat sukkanerpaartaallu taakkulu annertunerpaamik ajoqusertartut. Aamma atuarpaa, naak Quidditchermermi qaqutiguinnaq toqusoqartaraluartoq, takornartaanngitsoq dommerit tammariataartarnerat qaamatillu arlallit qaangiukkaangata Saharap inoqajuitsuani nassaarineqartarnerat.

Hermionelli eqqissisimanerulluni inuuneq ilikkarsimavaa. Torullersuarmut annaanneqarnermi kingorna atuarfirmi malittarisassat unioqqutinnissaat annilaangagivallaarunnaarsimavaa. Harryp Ronillu niviarsiaaraq taanna maanna nuannarinerujussuannngorsimavaat. Harryp Quidditchimi unamminissaa siullesq aqaguttoq pingasuullutik illussaarsu-up silataani nilleqisumiipput. Anitsiarput Hermionellu angakkuarluni pinngortissimasaa naaralaarneq erseqqissoq tungujortoq marmaladip puuata igalaamernup iluaniittoq kissasserfigerusaarpaat. Tunullugu kissasserfigalugu nikorfaleruttortut Snape takkuppoq. Harryp ingerlaannaq takuaa tusiattoq. Harry, Ron Hermionelu imminut qanillipput inneq professorimut isertorniarlugu ilimagilluinnaramikku

atuarfimmi atuarfiullu eqqaani innermik pinnguarneq inertequtaassasoq. Ajoraluartumik ilerasuuteqarnerat kiinaan-ni malugineqarsinnaavoq Snape-llu ingerlaannaq malugisin-naavaa arlaannik pilersaaruteqapiluttut. Tussapilluni ornip-pai. Inneq takunngilaa taamaakkaluartorli naveersilluni aal-lartippoq.

"Suuteqartutit-una, Potter?"

Sunaaffa Harry Quidditch pillugu oqaluttuarisaanera pillugu atuagaa pigaa. Harry atuagaa takutippaa.

"Atuagaaqarfiup atuagaatai anniseqqusaanngillat."

Snape oqarpoq. "Qaaguk. Gryffindor pointinik tallimanik arsaarpara."

"Malittarisassaq taanna nammineq nassaarivaa." Harry kamalluni nipikitsuliorpoq Snape tusiapilluni qimagummat.

"Sunamita nissuminik ajoqutigigaa?"

"Naluara neriuppungali annernassaqisoq," Ron narru-juummisimaarluni oqarpoq.

Unnuk taanna Gryffindorip isersimaartarfia nipiliorfiuso-rujussuuvoq. Harry, Ron aamma Hermione igalaap eqqaani issiaqatigiupput. Harry Ron-llu angakkuarneq pillugu suliaat ilinniartitsisup suliassiissutaa Hermionep kukkuner-siorpaa. Hermionep nukappiaqqat taakku marluk nammi-neq suliaminik assileeqqunngisaannarpai (taava ilikkaga-qarnavianngilasi), kisiannili angerlarlutik suliassatik Hermionemut tunniukkaangamikkik akissutit eqqortut pisarpaat.

Harry eqqissiveeruteqqavoq Quidditch pillugu atuagaa tigoqqikkusukkaluaqigamiuk. Atuartuugaluarluniuk eqqissi-saatigissagaluarpaa. Soormi aamma Snape ersigissavaa?

Nikuippoq; Hermione Ronilu oqarfigai Snape oqarfiginiarlugu atuagaq utertissagaa.

"Iluatitsilluarniarna," marluullutik oqarput, kisiannili Harryp qularaa Snapep linniartitsisunik allanik eqqaminiittoqarpat atuagaq tunniutissagaa.

Ilinniartitsisut inaannukarpoq kasutturilunilu. Akisoqanngilaq. Kasuttoqqippoq kisiannili nipimik sunnguamilluunniit taqqamanngaanniit tutsiuttoqanngilaq.

Immaqa Snapep atuagaq arlaannut ilisimassavaa? Misilillugu takusartariaqarpaa. Matu qiverlugu ilummut qiviarpoq – takusaa amuilaarnaqaaq.

Snape Filchilu inimi kisiimiipput. Snapep uliguani seeqquni qulaallugit kivissimavaa, takuneqarsinaavorlu niuata aappaa kilersimalluni aagasattoq. Filchip nipittartumik matummillu tunivaa.

"Uumasorujupalaarsuaq," Snape oqarpoq. "Aammami qanoq ililuni niaqqut pingasut tamarmik ataatsikkut sissu-erneqarsinnaappat?"

Harryp matu nipeqanngitsumik matoriaraluarpaa.

"POTTER!"

Snapep kiinaa kamannermik equvoq uliguanilu tuaviinnaq iluarseqqippaa nissuni takutikkusunnginnermik.

"Uangaana – paasiniaannarigaana atuagaatiga tigoqqis-sinnaanerlugu?"

"ANIGIT! ANIGIT! ANINLARIT!"

Harry tuaviinnaq Snapep Gryffindor pointinik suli piia-affiginngikkaa anipallappoq tamaviaavillunilu qummut arpalluni. "Tiguviuk?" Ron aperivoq Harry eqqaminnut ingimmat. "Suit, suna ajoqutigaaq?"

Harryp isussuinnaq qanoq takusaqarsimanerminik tusa-gaqarsimanerminillu oqaluttuuppai.

"Ilaa nalunngilarsi qanoq isumaqartoq?" Anertikkarluni oqarpoq. "Iluartup Ulluani unnukkut torulleq tamarmik ulapputigileruttoraat qimmeq pingasunik niaqulik sanioq-quteriarsimagunarpaa. Taamani naapikkatsigu torsuusap inerteqqutaasup tungaanut ingerlaarsimassaaq – tassa qimmip nakkutigisaa tillinniarsimassavaa! Sanigutiga akigalugu eqqoriarsinnaavara paatsiveerussaarilluni torulleq anisissimassagaa. Tassa allamut sangutitsiniarneq pitsak."

Hermione isai angisoorsuanngorput.

"Naamik – taama ingasatsigisumik iliuuseqarsinnaangilaq," oqarpoq, "nalunngikkaluarpara iluanngitsorsuusok kisianni Dumbledorep isumannaatsumik toqqortaanik tillinniarsimanissaa ilimaginngilara."

"Hermione, ilumoorlutit isumaqarpit ilinniartitsisut tamarmik inngilinnguusut?" Ron pilerpoq. "Harry taper-sensorpara. Snapep qanorluunniit iliorsinnaanera upperaara. Kisianni sunamitaava tillinniarsimagaluarpaa? Qimmip sunamita nakkutigaa?"

Harry innarpoq apeqqutit taakku qarasaani kaavittut. Neville nipituumik qannguivoq Harryli sinilersinnaanngilaq. Eqqarsaateqarnaveersaaraluarpoq unnuk mannami sinik atorfissaqarteqaa. Akunnerit arlaqanngitsut qaangiup-pata Quidditchimik unammisussaavoq – kisiannili Snapep Harrymit naammattoortikkami kiinaata isikkua Harryp puigorsinnaanngilaa.

Ullaaq taanna issillunilu allaaqqippoq. Inersuaq baconisunillunilu pølsisunnippoq. Atuartut nuannaarlutik oqaluppalunnerisa paasinarsitippaat tamarmik Quidditchimik unaminissap isiginnaarnissaa qilanaarigaat.

"Ullaakkorsiortariaqarputit."

"Kajumerisaqanngilanga."

"Ifiamininnguamilluunniit neriniarit," Hermione pileri-saarivoq.

"Kaanngivippunga."

Harry iluaalliorpoq. Akunneq ataaseq qaangiuppat arsaattarfimmiüttussaavoq.

"Harry, nukitit tamaasa atorfissaqartippatit," Seamus Finnigan pilerpoq. "Ujaasisut akeqqaminnit ajornerpaamik naallerneqartarput."

"Qujanaq, Seamus," Harry oqarpoq nikallungallunilu isiginnaarpaa Seamusip pølsinik niusigaani ketchupilingaat-siarlugu.

Aqqarnup missaani atuarfimmi atuartut tamarmik Quidditchimik arsaattarfiup eqqaani katersuussimapput. Atuartut ilarpassui qinngusisaarput. Issiavii qaffasikkaluar-put kisiannili unamminermi suut tamaasa takunissaat ajor-nakusoortarpoq qinnguteqanngikkaanni.

Ron Hermionelu Neville, Seamusip Deanillu saniannut qattuniliap qaavanut ingipput. Harryp tupaallaatigeqisaanik tungeq Scabbersip aserorsimasaa allagartarsualiarisimavaat. Allassimavoq: Potter kunngiuvoq. Dewanillu titartaallaqqis-sup Gryffindorip liivia angisooq allannerit ataanni titartar-simavaa. Hermionep angakkuarsimavaa qalipaataa allan-ngorartuartissinnaanngorlugu.

Isiginnaariat issiavissaminnut issaaneranni Harry arsaqa-tissaalu atisaajartarfimmi ulappupput. Quidditchip uliguai aappillarissut ativaat (Slytherinip arsaattartui qorsunnik uli-guaqarlutik arsartussaapput).

Wood quersorpoq tusarnaaqqullugillu.

"Okay, nukappissat," oqarpoq.

"Nivissallu," siukkaat ilaat Angelina Johnson oqarpoq.

"Nivissallu," Woodip iluarsivaa, "Tassa maanna ilunger-sortaqariaqarpugut."

"Iluatsitsinissarput tullinnguuppoq," Fred Weasley oqarpoq.

"Sivisuumik utaqqisarput," George oqarpoq.

"Oliverip oqalugiarnissaa alanngaarsinnaavarput," Fred Harrymut oqarpoq. "Siorna aamma unammeqataavugut."

"Nipangeritsi marluullusi," Wood oqarpoq. "Iissi Gryffindorip ukiorpasuumi holdiinit pitsaanerpaavusi. Ullumi ajugaassaagut. Tamanna qularinngivippara."

Tamaasa mersernarpaluttumik qissimippai soorlulusooq oqarniarluni: Taamaanngippat utaqqilaaritsi."

"Tassa, aallartilerpusi. Tamassi iluatsitsilluarisi."

Harryp Fred Georgelu arsaattarfimmut ilagivai isigin-naartullu nipitoqisumik nuannaarlutik nilliapput. Neriuppoq inuit tamarmik isiginnaarnerini aqullaassanani.

Madam Hooch dommeriuvoq. Arsaattarfiup qeqqani nikorfavoq utaqqillugulu akerariit inissititernissaat. Sanigutini tigumiarpai.

"Naatsorsuutigaara tamassi pitsaasumik eqqortumillu arsaatissasusi," arsaattussat ungulluni inissimmata oqarpoq. Harryp malugaa taama oqarami Slytherinip siuttua mersernarpasissumik isigigaa. Taanna ateqarpoq Marcus Flint uki-ullu tallimassaat atuartuuvoq. Harry isumaliorpoq Marcusip aava torulliup aavanik akoqangaatsiassasoq. Isimi sinaaniit qattuniliap qaavani pavanerujussuaq allagartaq takutsiarpaa. Allagartarsuaq Potter kunngiuvoq seqiniusaap qalipaataanik tamanik qalipaateqarluni uisorilavoq. Uummataata tillernera sukkatsilaarpoq malugaalu sapiissuseqarnerulerluni.

"Sanigutissinnut qaqigitsi, unammisartut."

Harry Nimbus 2000-iutiminut qaqivoq.

Madam Hooch siggartaamminik sɔlviusumik siggarpoq.

Sanigutit 15-it pavungarujussuaq silaannarmut qullarput arsaannerlu aallartippoq.

"Maanna arsaq tromleri Angelina Johnsonimit Gryffindorimeersumit tiguneqarpoq - taanna nivarsiararaq tupinnaqaaq siukkaajulluassusia aamma pinneqaaq..."

"JORDAN!"

"Utoqqatserpunga, professori."

Weasleykkut marluliaasa ikinngutaat Lee Jordan tusar-naartunut oqaluttuartuuvoq professor McGonagallimit nakkutigineqarluni. Kamaappasillugu isigaa. Lee isigisamini oqaluttuarluni ingerlaqqippoq namminerlu isummani oqaatigeqqinnagit.

"Angelina tappava arsaalluavippoq. Torrallavillugu arsaq Alicia Spinnetimut, Woodip nassaavanut, tunniuppaa. Alicia siorna taartissamaataaginnaraluarpoq. Johnsonimut arsaq utertippaa taavalu - naamik. Slytherinip arsaq tiguaa. Slytherinip siuttuata Marcus Flintip arsaq maanna nakkutigaa nattoralittullu timmilluartigaluni aallaruni - máliliiv.. naamik málínngitsoorpoq, arsarlu Gryffindorip málmand-ianit Woodimit torrallavillugu unitsinneqarpoq maannalu Gryffindorip arsaq tigummilerpaa - taaka Gryffindorip siukkaava Kate Bell sukkaqaluni aggerpoq, Flint salloqittarlugu saneqquppaa arsarlu málertarfimmut ingerlallugu taava - taava -na-aa - annernarunaqaaq tunumigut smasherimit eqqortippoq - arsaq maanna Slytherinip tigoqqippaa - Adrian Pucey sukkaqaluni málertarfiup tungaanut ingerlavoq, kinguarsimasulli aappaata aqqutaa asserpaa - Fredip imaluunniit George Weasleyp arsaarniarpaa - takusin-naanngilara sorliunersoq - kisiannili Gryffindorip siukka-

vata aappaa arsarluavippoq. Johnsonip arsaq tromleri tigoqqippaa, tuaviinnaq siumut ingerlavoq aqqutaanilu akornuserneqarani - arsaq smashereq qununaqisoq eqqor-tinnani sanioqquppaa - málit nigaliliat qanillipput - qaa assut, Angelina - málmandi Beltcher apparsarpoq - arsaan-ngitsoorpaa - GRYFFINDOR AJUUPPOQ!"

Gryffindorip illersortaasa nuannallutik nillianerat silami nilleqisumi ungasissorsuarmit tusaaneqarsinnaavoq, akerli-anilli qattuniliap ilaani Slytherinimik illersuisutajuusaarlutik nillianerat tusarsaalluni.

"Illuaritsi ikinngutit. Inissaqartissinga."

"Hagrid!"

Sunaaffa Hagrid isiginnaariarluni takkuttoq. Ron Hermionelu issiavimminni qanillipput Hagrid saniminni inissaqarniassammat.

"Illuaqqamiit arsaanneq malinnaaffigigaluarpara," Hagrid oqarpoq. Qinnguterujussuaq qungasiani nivinga-voq. "Kisianni isiginnaartut akornanniilluni allaanerujussu-uvoq. Arsaq innaallagiasq ilanngutereerpa?"

"Naamik," Ron oqarpoq. "Harry suliluppasingilaq."

"Imaallaammi sulil naallertinngilaq." Hagrid pilerpoq qinngutillu isiminut tutsillugit. Silaannarmi inuusorisaminut qinngusersaarpoq, isiginnaagaa Harryusimassaaq.

Qulaanni pavanerujussuaq Harry timmivoq periarnissanilu utaqqillugu. Sumut tamaanga innaallagiasq kuulteq ujarpaa. Woodip ilitersuutai malilluaqqissaarpai.

"Allat akuliuffigissanngilatit innaallagissap takunissaata tungaanut," Wood oqarsimavoq. Pisariaqavitsinnagu ajortumeertissanngilatsigit."

Angelina ajuummat Harry nuannaangaarami silaannarmi ulikaqattaarpoq. Maanna eqqissilluni timmerusaarpoq

innaallagiarlu alapernaaserlugu. Ataasiarluni isumaliulera-luarpoq innaallannermik takusaqarluni sunaaffali qatan-ngutigiiit Weasleykkut nalunaaqutaaraasa qillaallannerat takusimagaa. Kingusinnerulaartukkut arsaq smasherit tun-gaannaanut ingerlavoq, kisiannili arsaq qamutillip aqer-luatut sukkatigaluni aallarsimavoq. Harry taqippoq Fred Weasleyllu arsaq malippaa.

"Qanoq ippit, Harry, ajunngilatit?" Harry sanioqqukka-miuk oqarpoq arsarlu Marcus Flintip tungaannaanut anaal-lugu.

"Slytherin sukappoq," arsaannerup ingerlaneranik oqa-luttuartoq Lee Jordan oqarpoq. "Siukkaap Puceyp arsat smasherit tamaasa qatanngutigiillu Weasleykkut tamaasa sanioqquppai. Siukkaaq Belle sukkatsippoq ornilerlugulu - utaqqilaaritsi - innaallagissamuna tungaanut aallartoq?"

Isiginnaartut isumalluarpalulerput Adrian Puceyp tunummut qiviarluni innaallagiasq kuultiusoq siutiminik saamerlermik sanioqutsisioq takuniarlugu tromleri nak-kaammagu.

Aamma Harryp arsaaraq takuaa. Uummatini pissanga-nermik kassuppaloqisoq innaallagissap kultiusup tungaanut apparsarpoq. Aamma Slytherinip ujaasisuata Terence Higgsip arsaq takuaa. Ujaasisut sanileriüllutik innaallagiasq malersorlugu sukkaqalutik timmippat - siukkaat tamarmik suliasatik puigorpasippaat ujaasisullu isiginnaarlugit silaan-narmi uninngalerlutik.

Harry Higgsimit sukkaneruvoq - arsaarannguaq amma-lortoq sölvinik issulittunik sululik siumini takusinnaavaa - sukkatsiallappoq....

WHAM! Gryffindorip illersuisui isiginnaartut kamanner-mik nillerrappat - Marcus Flintip piaaraluni Harry aqquitis-

saanik asserpaa Harryllu sanigutai allamut sangutillugit. Harry nakkaqqajaalluni sanigutini najummilluaqqissaarpai allaanngivipporlu inuunini annaanniarsarigaa.

"Periaaseq kusanaammat!" Gryffindorip illersuisui isigin-naartut nillerput.

Madam Hoochip kamalluni Flint naveerpaa Gryffindorillu holdia periartussanngortillugu. Kisiannili uivertoqarnerani arsaaraq kuultiusoq periarfeerunneqar-poq.

Inissiamit qattuniliamit Dean Thomas nillerpallappoq: "Anisinniaruk, dommeriaa! Allagartamik aappaluttumik tuniguk!"

"Isikkamik arsaatinngillat, Dean," Ronip eqqaasippaa. "Quidditchimit arsaattut anisinneqarsinnaanngillat - aamma allagartaq aappaluttoq sunaagami?"

Kisianni Hagridip Dean ilumoornerarpaa.

"Malittarisassat allanngortittariaqaraluarput. Flintip Harry arngalisissinnaasimagaluarpaa."

Lee Jordanip arlaannaannilluunniit illersuisussaatitaan-nginnini sapingajavippaa.

"Taava - inupiluusaarnerup kingorna..."

"Jordan!" Professor McGonagall siorasaarivoq.

"Imaassaaq, qunutuutut naalliinerup kingorna..."

"Jordan, naggataamik mianersoqqakkit..."

"Aap paasivakkit, okay. Flintip Gryffindorip ujaasisua toqungajavippaa - kinaluunniit taama nalaataqarsinnaavoq - kisianni qularinngivippara Gryffindorip frisparki Spinnerip isimmitassaa atorluarumaaraa. Maanna arsaateqqilerput. Gryffindorip arsaq tigummivaa."

Kingusinnerulaartukkut Harryp arsamt smasherimit eqqortingajappoq arsap sukkaqaluni niaqua sanioqqutisu-

ngarmagu. Sanigutai annilaarnartumik qummut aallaria-taarput. Nakkarnissani qulariunnaaraluarpaa. Sanigutit ipuat assamminik seeqquminillu illugiinnik najumminiarsuataarpaa. Siornatigut taamaattumik misigisaqarsimanngisaannarpoq.

Aamma tassa nakkangajaqqippoq. Allaanngivippoq sanigutit piaaralutik katatsinniarsarigaat. Kisiannili Nimbus 2000 taamaaliortussaanngikkaluarpoq. Harryp misilikkaluarpaa Gryffindorip mällinut nigalilianut timminiarluni Woodilu qinnuigingajappaa arsaanneq unitsequllugu. Taamatulli iluunngitsoorpoq tassami maanna sanigutit aqussinnaajunnaavippai. Sangutissinaanngilaaluunniit. Aqussinnaajunnaavissimavai. Silaannarmi sangusaarlutik ingerlapput qummoorujussuarterlutik ammoorujussuarterlutillu Harry nakkartingajavillugu.

Lee sulì oqaluttuarsinnarpoq.

"Slytherinip arsaq tigummiuarsinnarpaa - Flintip arsaq tromleri tigumiarpaa - Spinner sanioqquppaa - aamma Bell sanioqquppaa - arsamit kiinnamigut sakkortuumik eqqortippoq, neriuppunga qingaa napsimassagaa - asuliuna, professor - maannalu Slytherin ajuuppoq!"

Slytherinip illersortai nuannattorsuullutik nilliapput. Arlaannaataluunniit maluginngilaa Harryp sanigutai eqqu-miilluinnartumik pissusilersormata. Sanigutit kigaatsunguamik qullariartuaarput, arsaattut qimallugit sukkaqisumik sumut tamaanga ingerlaqattaarput sangusarlutillu.

"Harry sulerisoruna?" Hagrid nipaatumik imminut oqarfigaaq. Qinnusersaarpoq. "Harry ilisarisimanngitsuu-galuarukku oqassagaluarpunga sanigutit aqussinnaajunnaarai - kisianni taamaannaviannngilaq..."

Tassanngaannaq isiginnaartut Harry tikkuartulerpaat. Qattuniliami issiasut tamarmik nikuipput Harrylu nakku-tilerlugu. Sanigutai ulorianaqisumik sumut tamaanga ingerlalerput erseqqilluinnarporlu annakannajaaqaluni najummatserniarsarisooq. Tamarmik anertikkarput. Harryp sanigutai pikeriarujussuarput Harrylu nakkarpoq kisiannili assammik aappaanik sanigutit najummeqqalaarlugit.

"Flintip naallermagu sanigutit ajoqusersimassappat?" Seamus isussuppoq.

"Taamaannavianngilaq," Hagrid sajukulaartumik nipeqarluni oqarpoq. "Sanigutit sumilluunniit taamatut aseror-neqarsinnaanngillat - immaqa taamaallaat angakkuaatip taartup taamatut aserorsinnaavai - aamma meeqqap kialluunniit angakkuarluni Nimbus 2000 aserorsinnaanngilaa."

Taama oqartorlu Hermione sukkaqisumik Hagridip qinngutaanik arsaarpaa, kisiannili Harry qinnguartaarnagu qinngutit akiminut isiginnaartut akornannut saatippai. Isumatsappasilluni taakani inuit akornannut qinnguarterluppoq.

"Sulerivit?" Ron isussuppoq; annilaarnermillu kiinaa qasertuinnaavoq.

"Taannaqa taamaassasoralugu," Hermione anertikkarluni oqarpoq. "Snape takusiuk!"

Ronip qinngutit tiguai. Snape akerpiaanni isiginnaartut qiterliit akornanniippoq. Isini toqqarlugit Harrymut saatsisimavai unissananilu tusarsaanngingajattumik qatimalulluni.

"Taannaana pisuusooq - sanigutit angakkuarsimavai," Hermione oqarpoq.

"Qanoq iliussaagut?"

"Uanga isumagissavara."

Ron suli oqarianngitsoq Hermione periarfeerutereersimavoq. Ronip Harry qinngusersaaqqilerpaa. Sanigutai ima aalatigaat inuttaata najummisinnaajunnaangajalerlugit allaat. Isiginnaartut tamarmik issiavimminnit nikuissimapput annilaaqalutillu isiginnaarpaat qatanngutigii Weasleykkut Harryp tungaanut timminerat Harry sanigutiminnut nuutinniarlugu. Kisiannili ajornaqaaq – qanillinerit tamaasa sanigutai aalariarujussuartaarput qullariartarlutillu. Annaassiniat apparsarput ataanullu pillutik, nalunanngitsumik nakkassagaluarpak akorniarlugu. Marcus Flintip arsaq qanoq iliallanngitsoq tigusimavaa allanillu malugineqanguarani tallimariarlunilu ajuulluni.

"Hermione tuaviorniarit," Ron neriuutaarulluinnarsimaluni nipaatumik oqarpoq.

Hermione tamaviaarluni inissiap qattuniliap aappaanut Snapep issiavigisaanut pisimavoq. Issiaviit sanileriit ataanut tuaviinnaq ingerlavoq aqqutaanilu utoqqatsernissaminulluunniit piffissaqanngilaq professor Squirrel sakattooramiuk saavani issiasunut nakkartillugu. Snape qanilligamiuk isiginnaartut allat tunuinut toqqorpoq, angakkuaatini tigullugu oqaatsillu ikittunnguit qinerluagaasut atorlugit isussulluni. Inneq tungujortoq erseqqissoq ajaappissamiit anialerpoq Snapellu uliguai ikuallatsillugit.

Sekundit 30-t missaanni qaangiummata aatsaat Snapep paasivaa atisani ikuallattut. Hermionep siunertani iluatsilluartoq paasivaa annilaarnermik nilliasoq tusaagamiuk. Toqqorsimaffimminiit tuaviinnaq inneq piliani utertipallappaa qummuattaasamullu igalaaminermut marmalademut poorisartakkaminut toqqupallallugu taavalu isiginnaartut issiavii qimappai. Snapep paasinngitsoortussaavaa qanoq

pisoqarsimanersoq.

Maanna Harry silaannarmi eqqissilluni sanigutiminut ikeqqissinnaanngorpoq.

"Neville, ueqqissinnaanngorputit," Ron oqarpoq.

Minutsini kingullerni tallimani Neville qiaatigaluni kiinnani Hagridip kavaajaanut toqqortersimavaa.

Harry maanna sanigutini aqussinnaanngorpai nunamul-lu sukkaqisumik ingerlalerpoq. Takuaat assammi illua qanerminut tutsikkaa soorlu meriarniarluni – ivikkat akornannut nakkarpoq assani isikkanilu siulliullugit – quersorpoq – arsaararlu kuulteq assamminut oriarpaa.

"Innaallagjaq tiguara!" Nillerpoq tamarmillu takunias-sammassuk arsaq niaqquni qulaatingaatsiarlugu nittarsaap-paa.

Arsaanneq naammassivoq uivernersuaqarporlu.

"Oqartoqarsinnaanngilaq akoraa – iingajaannarpaa!"

Arsaannerup inernera pillugu Flint minutsini 20-ni naam-magittaallioraluarpoq iluaqutaanngilarli. Harryp malittari-sassat unioqqutinngilai Lee Jordanillu nuannaaqaluni arsaannerup inernera nalunaarutigaa. Gryffindor ajugaa-voq 170 pointinnalluni Slytherin 60 pointinnattoq. Harryli tusaasaqanngivippoq. Hagridip Ron Hermionelu ilanngul-lugit illuaqqaminukaassimavaa. Maanna Harry tiitugassani saaminiitillugu paatsiveeruteqqalluni ilami oqaasii tusar-naarpai.

"Tassaana Snape pisuusoq," Ron oqarpoq. "Hermionelu takuarput sanigutitit angakkuarai. Issiavoq perloqqussuti-nik nipaatsunnguamik isikkorluutigalutit oqalulluni."

"Taamaattoqanngilaq," Hagrid arsaattarfimmi isiginnaar-tut akornanni qanoq pisoqarneranik malinnaasimanngivis-soq oqarpoq. "Sooq Snape taamaaliussava?"

Harry, Ron Hermionelu imminnut isikkupput. Naluaat qanoq oqarfigissanerlugu. Harry aalajangerpoq piviusunik oqaluttuunnarlugu.

"Snape pillugu paasisaqarpunga," Hagrid oqaluttuuppaa. "Iluartut Ulluata unnukkuani tillinniarnarluni qimmersuaq pingasunik niaqulik sanioqquteriaraluarpaa kiitillunili. Isumaqarpugut qimmip paarisaa tilleriaraluaraa."

Hagridip tiitorfini nakkaavaa.

"Qanoq ilillusi Fluffy paasigassiuk?"

"Fluffy?"

"Aap – uanga qimmeq– griikerimit angummit siorna imerniartarfimmi naapitannit pisiaraara. Dumbledoremuk atukkiuppara imaattoq paariniassammagu..."

"Suna?" Harry ilungersuavoq.

"Tassa apersoqqissanngilarsingga," Hagrid kamalluni oqarpoq. "Isertugaasorujussuuvoq."

"Kisiannimi Snapep tillinniaraluarpaa.

"Naamik taamaattoqanngilaq," Hagrid oqaqqippoq.

"Snape maani Hogwartsimi ilinniartitsisuuvoq uagullu innuttavut taamaaliornaviannngillat."

"Soormi Harry toqoriaraluarpaa?" Hermione nilliavoq.

Ualeq manna pisimasut Snape pillugu isumaanik allanngortitsilluinnarsimapput.

"Ajortumeeriniarluni angakkuarneq takugukku ilisarisinnaava, Hagrid. Tamakku tamaasa atuarnikuuakka! Inummik allamik ajortumeeriniarluni angakkuaraanni angakkuarniagaq isaatigut nakkuttuartariaqarpoq Snapelu uisoriallanngivippoq, uangami isiginnaarpara."

"Oqarfigereerpakkit kukkusimassasutit!" Hagrid kamalluni oqarpoq. "Naluara sooq Harryp sanigutai taama eqqu-miitsigisumik pissusilersornersut, kisianni Snape qaqugu-

luunniit atuartumik toqutseriarnaviannngilaq! Maanna tamassi tusarnaarniarsinnga – susassarinngisassinnut akuli-uppusi. Taamaaliorneq ulorianarpoq. Qimmeq puigorniar-siuk aamma eqqarsaatigissanngilarsi suna paarineraa. Tamanna taamaallaat professor Dumbledorep Nicolas Flamelillu susassaraat...”

”Aha!” Harry oqarpoq. ”Tassa angummik Nicolas Flamelimik ateqartoqarpa pisunik ilisimasaqartumik?”

Hagrid allaanngivippoq oqqani keeriaannaagaa.

Tarrarsuut takorruuisitsisartog

Juullingajalerpoq. Ullaat ilaanni decembarip qeqqani Hogwarts isikkanik arlalinnik ititigisumik apummit qallerneqarsimavoq. Taseq sikusimavoq Weasleykkullu marlu-liaat pillarneqarput aputit milluutissiat arlalissuit angakku-arsimagamikkik Quirrel sumunnaraluaraangalluunniit taas-suminga malersuiuartussanngortillugit turbanianullu tut-tarlutik. Uppiit ikittunnguit allakkisarlutik anordersuartumi apuussimasutuat Hagridimi qasuerseqqaartariaqartarput illakkanik nassiussisunut uterartinnatik.

Atuartut tamarmik atuangiffeqarnissartik qilanaaraat. Gryffindorip isersimaartarfia Inersuarlu kialaarput isersimaffigalugillu nuannerlutik kissarsuutaannilu ammaannar-tuni inneq nutaraaluppalluttarluni akerlianilli torsuusat tor-suusarsuillu angallavigalugit nilleqaat. Anorlertuaannarmat atuartitsiviit amerlanersaanni igalaat anaarlussaappaluttuar-put kisiannili professor Snapemoorluni naqqup ataani atu-arluni ajornerpaavoq. Tamanna ima nillertigaaq isugutatsi-galunilu anerneq takuneqarsinnaalluni allaat atuartullu qummuattaaqqatik kissassernialeraangamikkit imminnut qaninniartarput.

”Juullikkunni angerlarfissaqannginnertik pissutigalugu Hogwartsimüiginnartussat nalligeqaakka,” Draco Malfoy nakorsaasiornermik atuartillutik oqarpoq.

Taama oqarami Harry qiviarpaa. Crabbe aamma Goyle

illakusupput. Harryp tarraleqisaap kapinartui aserortikkat uuttortaatigalugit tusaanngitsuusaaginnarpai.

Quidditchimik unamminerup kingorna Malfoyip eqqaaniil-luni ippingianartorujussuanngorsimavoq. Taassuma Slytherinip ajorsarnera mamiagingaaramiuk Harry illaruaa-tigeqattaaginnavippaa oqartarluni unamminermi tullermi orpissap Gryffindorip ujaasisua taarserumaaraa. Paasivaali quiasaarutini quiaagineqanngitsoq inuit tamarmik Harryp sanigutiminit aalaqisumit nakkannginnera tupigutsaatigim-massuk. Tamanna Malfoyip suli annerungaartumik kamaa-tigaa sinnganeralu suli annerulerpoq, allatullu ajornartumik Harrymik malersuinini allanngortippaa qasukkarlugu Harrylu ilaquataqannginneranik eqqaasittualerlugu.

Nakorsaasiornermik atuartitsineq taamaatimmat naqqup ataaniit tummeqqakkut majuartillutik naammattooriataar-paat orpiliassarujussuaq aqqutissaminnik ameqisumik assii-simasoq. Pilutat alliit ataanni isigarujussuit takussaapput nipitoqisumillu anersaartorpalummat paasivaat Hagrid orpiliassap tunuaniittoq.

"Hej, Hagrid, ikiortissaaleqivit?" Ron aperivoq niaqquni-lu pilutat akornisigut pulatillugu.

"Naamik, ajornavianngilaq, qujaannarpunga, Ron."

"Illualaarsinnaavisi?" Malfoyip nipaa pingaakujuttoq tunuanniit tusarsaavoq. "Kaasarfimmiussarsiniarpit, Weasley? Imaluunniit neriuutigiviuk arlaanni atuarunnaa-ruit matuersaatinik nakkutilliisunngornissat – naatsorsuuti-gaara Hagridip illuaraa illussaarsuurtut isikkoqassasoq illit ilaquttavit sungiusimasaannut naleqqiullugu."

Snap majuartarfiit qulaanni takkuteruttortoq Ronip Malfoy pissiffigaa.

"WEASLEY!"

Ronip Malfoy iperarpaa.

"Qinngasaarneqartoruna, professor Snape," Hagrid oqarpoq kiinnanilu umissualik orpiliassap avalequtaasa akornisigut anillatsillugu. "Malfoyimuna ilaqutai pillugit ajualatsikkaa."

"Sunaluunniit pissutaagaluarpas Hogwartsip malittarisasaa-nik unioqqutitsineruvoq," Snape oqarpoq. "Gryffindor pointinik tallimanik ilanngaaffigineqassaaq, illillu nuannaarutigisariaqarpat pointinik amerlanernik ilanngaanneqannginnavit, Weasley. Qaa, tamassi ingerlaqqinniaritsi."

Malfoy, Crabbe Goylelu ajattaallutik orpiliassaq sanioq-quppaat piaaralutillu avalequtit amerlanaarlugit nallorlugit. Orpiliassap meequtaasai katagarlutik natermut nakkaapput kiinaannilu ilaminnik ajortumeerillutik nuannaarutiginninerat takuneqarsinnaavoq.

"Utaqqilaarli," Ron Malfoyimut uumitsaateqalugu qatimaalaarpoq, "ullut arlaanni iluatsillugu..."

"Tamaasa uumigeqaakka," Harry oqarpoq, "Malfoy Snape-lu."

"Tassa, tassa, nuannaarniaritsi," Hagrid pilerpoq.

"Maanna tusaalaariaritsi. Siunnersuutissaqarpunga. Sooq Inersuarmut ilaginiangilisinga qanoq kusanartigisumik pinnerarneqarsimasoq takusarlugu?"

Pingasuullutik Hagrid orpiliassarlu Inersuarmut malippaat; tassani professor McGonagall professor Flitwickilu ulapissuataarput juullimut pinneraallutik.

"Qujanassusia, kiisami Hagridip orpiliassaq kingulleq eqquppaa - iluassagaluqaq teqeqqumut inissittuugaluarukku."

Inersuaq alutornangaartorsuuvoq. Naasut ilaannik mistelteninik kristjorninillu siaartartuliat iikkami nivingapput

aammalu orpiliaasat aqqaneq marluk natermi sumi tamaani takussaapput - ilaat kusukkanik qillaallattartunik ilaallu naneruutunik hundredenik arlalinnik pinnersarneqarsimasut.

"Qaqugu atuannigiffeqalissavisi?" Hagrid aperaaq.

"Ulloq ataaseq atuarutta atuannigiffeqalissaagut,"

Hermione oqarpoq. "Eqqaasaqaleqaanga - Harry, Ron, ulloqeqqasiortinnata akunnerup affaanik piffissaqarpugut. Atuakkanik atorniartarfimmukartariaqarpugut."

"Aap ilumoorputit," Ron oqarpoq professor Flitwickilu alarlugu; taassuma angakkuaamminik orpilissap eqqussap kingulliup avalequtaasa tungaanut pullartat kuultiusut aallartippai.

"Atuakkanik atorniartarfimmut?" Hagrid pilerpoq matumullu qanillugit. "Juullimi atuannigifik aallartingajaleruttortoq? Ilumut atuartunngorsimavusi eqiasuitsut."

"Aap, kisianni ilinniagasseriaartornianngilagut," Harry nakimaalluni oqarpoq. Nicolas Flamelip atia taagakkuli paaserusulerparput kinarpiaanersoq."

"Qanoq?" Hagrid annilaarpasittorujussuuvoq.

"Tusaalaariaritsi - oqarfiginikuuassi susassarinnngisasi akuliuffigissanngikkisi. Isumakuluutigisariaqanngilarsi qimmip suna paarineraa."

"Aammami paaserusuinnarparput Nicolas Flamel kinaanersoq," Hermione pinngitsuusaarluni oqarpoq.

"Kisianni nammineerlutit Flamel kinaanersoq oqaluttuuk-kutsigut taava paasiniaanerput tamaviaarutigisariaarutissavarput," Harry neriuppalluni oqarpoq. "Tkinnerpaamik atuakkat 100-t atuareerpagut angullu taanna pillugu suli nassaanngilagut - najoqqutarisinnaasatsinnik tuniinnartigut - isumaqarluiinnarpunga atia arlaannut tunngatillugu takusimallugu."

"Qanera matoqqavog..." Hagrid aalajangersimarpalullu-ni oqarpoq.

"Taavami nammineerluta paasiniartariaqarparput," Ron oqarpoq nuannaaruteqarnatillu Hagrid qimappaat atuakkani illu atorniartarfimmukapallallutik.

Ulloq taanna Hagridip oqartoorneratali kingorna tamaviaavillutik Flamelip atia atuakkanik atorniartarfimmi atuakkanik qupperaallutik ujarsimagaluarpaat. Snapep tillieraluarneranut tunngatillugu najoqqutassaas taannaannaasimavoq. Ajornartorsiutaasimavorli qanog ilillutik aallartin-nissartik qanorlu ilillugu naammassinissaa ilisimannginnamikk. Naluaammi Nicolas Flamel atuakkani eqqaaneqartariaqartumik suliaqarsimanersog. Atuakkani ukunani allaaserineqarsimanngilaq: Ukiut 2000-issaanni angakkut immikkut taasariaqartut imaluunniit Ukiuni makkunani angakkut pingaarnerit. Aammali atuakkani ukunani taaneqarsimanngilaq: Ukiuni nutaaliaasuni angakkut pilersitaat nutaaliat imaluunniit Ukiuni nutaanerusuni angakkuarnermik ilisimatusarnerit. Aamma atuakkanik atorniartarfiup angissusaa pissutigalugu ujarlerneq imaannaanngilaq. Atuakkat titusintilikkuutaarput, atuagaasiviit meterit tusintilikkaat atuagaasiviillu akorni amitsut hundredikkaat.

Hermione allattuisimavoq sammisassanik atuakkallu atini-nik aqqissuulluakkamik misissugassaminik. Ron atuagaasiviit akornanni ingerlaqattaarpoq aqqaatani atuakkat naammattuukkani tigusarlugit, qupperartarlugit inaannullu ileqqittarlugit. Harry atuakkanik atorniartarfiup ilaanut immikkuullarissumukarpoq atuakkanik atuarniaraanni immikkut akuersissummik peqqaarluni atorniarfiusartumut. Misigisimavoq Flamelip atia tassani nassaarissallugu. Ajoraluartumik ilinniartitsisumut allagartamik ujaasisinnaa-

nermut akuersissummik pisimannigilaq aamma nalunngilaa akuersissummik pissarsinissani neriutigisinnaanagu.

Tassami tamaaniipput taartumik angakkuarnermik atuakkat sakkortunerpaat Hogwartsimi ilinniartitsisut atuartuutiminnut ilinniartitsissutigerusunngilluinnagaat. Atuakkat taakku atuartunit annernit Taartup Pissaaneranut Illersuutini atuartunit taamaallaat atuarneqartarput.

"Suna ujarpiuk, nukappiaraq-aa?"

"Ujarlinngilanga," Harry tuaviinnaq oqarpoq.

Atuakkanik atorniartarfimmi ningiup madam Pincep sanigutiminik tikkuarpaa.

"Taavami maangaanniit anisariaqarputit. Qaa ingerlania-rit."

Harry qimaguppoqajuusaarutigaaali uummaarinnerulluni iliuuseqarsimanninnini. Utoqqatsissutissarsipallassimassagaluarami atuagaasiviit inerteqqutaasut akornanni ujarlernissaminut. Ilanilu isumaqatigiissimapput madam Pincepaasiniaaffiginiarnagu. Qularinngilaalli Flamel pillugu oqaluttuussinnaagaluaraatsik, sapiiserusunngillalli paasiniaa-nertik Snapemit paasineqaqinammat.

Harry torsuusamut anillappoq ilanilu utaqqilerlugit. Immaqa taakku arlaannik paasisaqarput naak tamanna ilimanannigikkaluartoq. Atuarnerup kingorna ulluni 14-ini paasiniaallutik ujaasisimapput, kisiannili naammassisaqarnissaminnut piffissaqaavissimannigillat. Ilumoortuugaluarpataava eqqissillutik madam Pince akornusersortiginagu atuakkanik atorniartarfik ujaasiffigisariaqarsimagaluarpaat.

Minutsit tallimat qaangiummata Ron Hermionelu takkupput. Nipaatsumik nikallungallutillu niaqqutik ileqimisaartorpaat. Allamik iliuusissaqannigillat kisianni neriartorlutik.

"Uanga angerlarlunga feriarninni ilissi ujaasinersi ingerlatiinnassavarsi, ilaa?" Hermione oqarpoq. "Uppimmik nas-sissavarsingga arlaannik paasisaqarussi."

"Aammami illit angajoqqaatit misilillugit aperisinnaavatit Flamel nalunnginneraat." Ron oqarpoq. "Iugarneq anner-narneq ajorpoq."

"Soorunami. Marluullutik kigutitut nakorsaapput," Hermione oqarpoq.

Kisianni feria aallartimmat Ron Harrylu ima nuannisaarti-gaat Flamel pillugu ajornartorsiut eqqarsaatigiunnaavissimal-lugit allaat. Sinittarfitsik ataatsimoorussaak kisimik sinittarfigi-lersimavaat isersimaartarfillu aamma inuerutivissimavoq. Isersimaartarfiup issiavissui pitsaanerpaat kissarsuummut ammaannartumut qanillivaat suullu tamaasa savissuarmut kappunneqarsinnaasut siaasarlugit - iffiat qaqortut, skumfi-dusit, pølsit - siatsinerminnilu pilersaarusiortut qanoq ilillu-tik Malfoy ajutoortissinnaanerlugu. Nuannisaavissoqaat naak pilersaarutaasa amerlanersaat piviusorsiortuunngikkaluartut.

Ronip Harry angakkut skakkiannik ilinniartippaa. Mugglerit skakkiannut assinguvoq taamaallaalli illersartut uumallutik. Taamatut skakkerluni allaaneq ajorpoq sorsun-nermi sakkutuunut naalagaalluni, tassa taama pikkunartigi-sarpoq. Ronip skakkiisa illersartui pisoqaaqaat nungullarsi-maqalutillu. Pigisamisut allamisulli skakkit ilaquuttami ilaan-nit kingornussimavai - taakku aataminut kingornussimallugit oqarpoq. Skakkimili illersartut taakku ajorpiannngillat. Ronip illersartuni nalunngingaaramigit qanoq iliortinniarneraanni naluneq ajorpaa.

Harry Seamus Finniganip illersartui unammissutigai taakkuli Harry tatiginngivippaat. Sulimi skakkillaqqippal-

laangngilaq taamaattumillu illersartut ilitsersuuttarpaat naalakkersortarlugulu paatsiveerunnaqisumik. "Naamik taakunga nuussangilarma, hiistia takusinnaanginnakku? Taanna aallartiinnaqiuk toqutaagaluaruni sussa atorfissaqartingilarput." Illersartut Harry taama oqaluttuuttarpaat.

Juullimut aqaguttoq Harry innarpoq aqagumut ilorriismaarnissartik, nuannisaarnissartik nerilluarnissartillu qila-naaralugu. Tunissutissat eqqarsaatigisimanngivippai tunisinnissanilu naatsorsuutiginagu. Ullaaralaakkut iterami takoqqaagai tassaapput siniffiup ataani poortukkat qaleriaarsimasut arlalialuit.

"Juullimi pilluarit," Ron uernarluni oqarpoq Harrylu aalassareqaluni siniffimmiit aqqarpoq makiaaruserlunilu.

"Illillu," Harry oqarpoq. "Uku takuvigit? Tunissutisisimasungaana."

"Sunimmi tunineqarnissat naatsorsuutigigaluarakku? Ruuanik?" Ron oqarpoq namminerlu tunissutisiassani Harryp pissaanit amerlanerit saallugit.

Harry poortukkat qaleriaarsimasut quillersaat tiguaa. Pappiaqqamik issusuumik kajortumik poortorsimavoq allannerloqisumillu qaatiguuliorneqarsimalluni: Harrymut Hagridimit. Poortugaq puuiariamiuk tunissutisiassani takulerpaa tassaasoq qarlortaat qisummik sanaaq kusanarsagaangitsoq. Malunnarpoq Hagridip nammineq sanaarisimassagaa. Harry misilillugu siggarpoq siggarneralu uppitut nipeqarpoq.

Poortugaarannguaq alla allagartamik imaqarpoq imalu allassimalluni: Oqariartuutit tiguarput juullimullu tunissutisiassat nassiullugu. Akkaa Vernonimit aja Petuniamillu. Koruunit 50-it nipittartumik nipitinneqarsimapput.

"Isumatungaaramik," Harry oqarpoq.

Ronip aningaasat alutoreqai.

"Tupinnaq," oqarpoq. "Eqqumiingaaramik aningaasaviu-galuarpat?"

"Perusukkukkit piniakkit," Ronip tupigusunnera illaati-ginngitsoorsinnaanagu oqarpoq. "Tassalu tunissutisiassak-ka Hagridimit, akkannit ajannillu sinnerimita suminngaanneerpat?"

"Nalugunanngilara una suminngaanneersuunersoq," Ron oqarpoq aappillerlunilu poortugaq tinupanertooq tikkuaramiuk. "Tassaana anaanannit illit tunissutisiassat! Oqaluttuukkakku tunissutisinissat naatsorsuutiginnigkit – ajoqaaq" nimaarpoq, "Tassami Weasleyyp tuluujuanik sanaassimavaatit."

Harryp poortugaq puuiarpaa ilumullumi tunissutisiaa tassaavoq tuluujuq qorsooqqissoq oqortoq nammineq nuer-sagaq. Aamma iluanippit karamelit nammineq sanaat poortat.

"Aamma uanga ukiut tamaasa nuersaassuttarpaanga uangalu tuluujuussara tamatigut aappaluttoq kajuaartuusar-poq."

"Ila iluasaangaarami," Harry oqarpoq karamelillu nerillu-git. Assut mamarput.

Poortugarsiassaa tulleg aamma mamakujunnik imaqar-poq – tassalu uppiit sukkulaatit poortat Hermioneminngaanniit.

Taava poortugarsiassaa ataasiinnanngorpoq. Tiguaa at-tuaaalarlugulu. Oqitsuararsuuvoq. Taava puuialerpaa.

Sunaanersoq pujattoq qasertorlu natermut sisuvoq nater-milu perititerluni. Ron nipilimmik anersaarpoq.

"Taamaattoqartoq tusarnikuuvara," killitsisimalluni isus-suppoq eertallu assigiinngitsunik mamassusillit poortat

Hermionemeersut nakkaallugit. "Ilimagisattut ittuussaguni – taava qaqutigoorlunilu nalilerujussuuvoq."

"Sunaagami?"

Harryp natermiit atisaq sölvitut qalipaatilik qillalaartoq siilikitut qillertoq tiguaa. Attorlugu eqqumiippoq – soorlu atisaq imermik ikaartiterneqarsimasoq.

"Tassa uliguaq atillugu ersigunnaartitsisartoq," Ron ataq-qinnippasittumik nipeqarluni oqarpoq. "Taamaassorivippa-ra. Misilillugu ateriaruk."

Harryp uliguaq ativaa Ronilu nillerpoq.

"Aap, ilumut taamaappoq, tassaana uliguaq inuttaminik ersigunnaarsitsisartoq! Imminut qimerlooriarit!" Harryp isikkani qiviarpai takusinnaanngilaali. Tammarsimapput. Tarrarsuummut arpappoq. Tarrasorami niaqquni kisiat isigaa, allaanngivippoq niaqua silaannarmi erfattoq. Timaata sinnera ersigunnaarsimavoq. Uliguani niaqquni qulaallugu atimmagu Harryp timaa tamarmi ersigunnaavippoq.

"Aamma allagartaqarpoq," Ron pilерpoq. Allagartaq natermut nakkarpoq." Harryp uliguaq peerpaa allagartarlu tigullugu. Naqinnerit sangujoraartumik ima allassimapput:

*Ataatavit toqunnginnermini uliguaq una uannut
paaritittussanngorlugu tunniuppaa.*

Maanna piffissanngorpoq ilinnut tunniunnissaanut.

Pitsaanerpaamik atorluarniariuk.

Juullimi pilluarnissannik kissaappakkitt.

Allagaq atsiorneqanngilaq. Ronip alutorsarnerani Harryp allagartaq nakkuppaa.

"Suna tamaat akigalugu taamaattutaarusukkaluarpunga," oqarpoq.

"Ilumut suna tamaat akigalugu. Uumaak, suinuna?"

"Sunngilanga," Harry akivoq kisianni eqqumitsumik misigisimavoq. Kiaana uliguaq nassiussimagaa? Ilumut ataataata pigisimanerlugu?

Suli oqaqqinngitsoq atualerlaat ataatsimoorullugu sinitarfiannut matu ammariataarpoq. Fred aamma George Weasley uppiisaannarlutik iserput. Harryp uliguaq tuaviinnaq toqqorpaa suli nammineq allanut oqattaarteqattaarnagu tigumnerusukkallaramiuk.

"Juullimi pilluaritsi!"

"Uumaak, takulaariaruk – Harry Weasleyp tuluujuanik aamma pisaarsimavoq!"

Fred aamma George tamarmik nuersakkanik tuluujoqarput tungujortunik qalipaatilinnik. Aappaata tuluujuata saavani sungaartumik angisuumik F allassimavoq aapaatalu saavani G-mik allassimalluni.

"Harryp pia uagut pitsinnit kusanarnerujussuuvoq." Fred pilерpoq Harryllu tuluujua kivillugu. "Soorluuna anaanarput ilaqutarinngisaminut nuersaagaangami peqqissaarnerusartoq."

"Sooq illit piit atinngiliuk, Ron?" George aperivoq.

"Akitsorterunnaarlutit atiniaruk oqoqaaq."

"Aappalaartooq kajuaartooq nuannarinngilara," Ron uppernarpiannngitsumik oqarpoq tuluujunilu atillugu.

"Illit tuluujut naqinnilerneqarsimanngilaq," George oqarpoq. "Immaqaana nalunnginnamiuk atit eqqaamasinnaagit allassimanngikkaa. Uagummi aamma sianiitsununngilagut. Nalunngilarput ateqarluta Gred aamma Feorge."

"Sooruna taama nipiliortigaasi?"

Percy Weasleyp niaqqi puttutsippaa kamaappasillugillu isigalugit. Aamma tunissutisiami affaasa missaat puuiareer-

simagunarpai tassami nuersakkamik tuluummik oqortumik unermippoq. Fredip tungaanut arpariarluni arsaarpaa.

"Siunnersuisup tuluuja P-mik allanneqarpoq, tassalu P isumaqarooq pikkorinnerpaaq! Atiniaruk, Percy, qaa atiniaruk. Tamatta pigut atinikuuvagut. Harry aamma pisaarnikuuvoq."

"Naamik atinianngilara," Percy ipianngulluni oqarpoq ilami pinngitsaalilluni tuluujuuk niaqqumi qaavaniit atitinniarsarimmassuk isaruaalu katatsingajallugit.

"Aamma ullumi siunnersuisut nerrivianni issiassanngilatit," George oqarpoq. "Juullimi nerersuarneq ilaqutariit nerersuarneraat, issiaqatigissavatsigut."

Taava Percy pinngitsaalillugu aallaruppaat talii tuluujuata iluani parnaarlugit, tuluujuata aavi nivingataartut.

Harry inuulillaramili aatsaat taamarsuaq juullimi nerersuaartunut pegataavoq. Nerrivimmiipput kalkunit siatat pualasuut, naatsiiat siatat uutallu, puugutaasat ceertanik punnermik siatanik ulikkaartut, skålit miseqqamik paarnanillu tyttebærinik kinertunngorlugit sukkulerlugit qalatanik imallit – aammalu angakktut seqqortartorpassui puuguttat akornannut ilioqqarneqarsimasut. Seqqortartut taakku tupinnaqisut Mugglerit piinut assingunngillat – taakktut akikitsunik plastikinik nasanilluunniit pappiaqqanik iluaniittoqanngilaq. Harryp Fredillu seqqortartoq noqqoruuppaat, taanalu qamutilittut qaarpoq marluullutillu pujorsuarmik tungujortumik qalipaatilimmik poorneqarput. Putsup iluaniit takkussuupput sakkutuut imarsiortut naalagaata admiralip nasaa kusanartorsuaq terissallu uumasut amerlasoorpassuit.

Ilinniartitsisut nerrivianni Dumbledorep angakktut nasani amitsukujooq arnap nasaanik saneralimmik tunu-

limmillu taarsersimavaa. Professor Flitwickip seqqortartumi nassaaminik quiasaarummik atuffammani qitutsingajappoq.

Kalkunitoreeramik puutinngitorput seqquluttulimmik. Percyp kigutini naqitsiseeqqamut sœlviusumut puutinngitukkami iluaniittumut napingajappai.

Harryp takuaa Hagridip viinnisornera ingasatsikkiartortillugu kiinaa aappilleralluttuinnartoq tupigutsanneralu a-ngeqaaq takugamiuk Hagridip professor McGonagall ulu-aatigut kunikkaa kunissugaalu tissitsattoq aappillerlunilu.

Neriunnaaramik nerrivillu qimakkamikku Harryp seqqortartunit pinnattaani amerlasoorpassuit nassarlugit nikuippoq. Pullattakkat putuneq ajortut immiini qaamasut poor-tat, unnguliortaait poortat, angakkullu skakkimi illersartui nutaaviit. Terissat qaqortut sumut tamaanga ingerlareersi-mapput Harrylu eqqarsarpoq terissat taakku madam Norrisip juullimut nerisassaanut ilaajumaartut.

Harry qatanngutigiuillu Weasleykkut illussaarsuup silataa-ni ualeq nuannivissumik atorpaat apummik arsalianik imminnut milloorlutik unammillutik. Qjallutik, masammit pitarneqarlutik anertikkarlutillu Gryffindorip isersimaartar-fianut kialaartumut iseramik Harryp illersartuni atoqqaar-fissiornialerpai. Ronip ajugaaffigerujussuarpaa, kisiannili Harryp qularinngivippaa unammilluarsimanerussagaluarlu-ni Percyp eqinnaaqaluni ikiunngitsuugaluarpani.

Tiitoreeramik kalkuniminertoreerlutillu, poorlutoreeramik julekagisoreerlutillu ima qaalertigaat innartinnatik allamik sammisaqarsinnaanatik allaat. Ron Harrylu issiavissuarmi issiaannarusupput Percyp Fred Georgelu Gryffindorip napa-suliaani malersoraat isiginnaarlugit. Percyp qatanngutini malersorpai siunnersuisutut allagartani tillissimammassuk.

Ron kalkunitorluareerluni kaagisorluareerlunilu innarami

sekundialunnguit ingerlanerinnaani sinilerpoq. Siniffimmi saagui saagureeramigit ingerlaannaq qannguilerpoq. Kisiannili Harry siniffimminit aqqarpoq uliguarlu ersigun-naartitsisartog siniffiup ataani ammullugu.

Angutaata... angutaata pigisimavaa. Annoraamineq imaannanngitsorsuaq inussaminik tagiartorpaa. Siilikimiit qitunnerusutut misinnarpoq oqitsuarakasiullunilu. Pitsaanerpaamik atorluarniariuk, allagartami allassimavoq.

Harryp misileqqittariaqarpaa. Siniffimminiit aqqarpoq uli guarlu atillugu. Ammut isigivoq nissunili takusinnaanagit qaammatip qaamanera tarrallu kisiisa takuai. Misigisag eqqumeeqaaq.

Pitsaanerpaamik atorluarniariuk.

Tassaanngaannaq Harry eqeerpoq. Uliguaq taanna ator-niuk Hogwartsimut tamarmut ammaanneqqartussaavoq. Tamaani taartorsuarmi nipaannersuarmilu uninnganerani uummataa sukkasuumik tillilerpoq. Sumulluunniit piumasa-minut takuneqarani ingerlasinnaanngorpoq. Kialluunniit akornusersinnaanngilaa aammalu Filchip paasinavianngilaa.

Ron sininnermini sordlummilluni nipiliorpoq. Itersassanerpa? Suunersup Harry unitsippaa - ataataata uli-guaata - misigisimavoq siullerpaamik takuneqarani angalaar-nissamini kisimünniarluni.

Sinittarfimmiit nipaarsaarluni anivoq, tummeqqat nimeru-aartut ammut ingerlaffigai, isersimaartarfik aqqusaarpaa assillu tunuaniittukkut putukkut anillalluni.

"Kinaana?" Arnaq pualasooq qataatsumik nilllerpoq. Harry oqaaseqanngilaq. Tuaviorluni torsuusakkut ingerlaq-qippoq.

Sumunnassavami? Unillatsiarpoq eqqarsalerlunilu. Pissanganerata paatsiveerutitilerualarpaa.

Taava eqqaasaqarpoq. Atuakkanik atorniartarfiup immikkoortortaa isertuussaq eqqaavaa. Sunaluunniit takuneqarani atuarsinnaangorpaa. Maanna qanorsuaq piffissaqalerpoq paasiniassallugu Nicolas Flamel kinaanersoq. Ingerlaqqilerpoq uliguanilu atilluarterlugu.

Atuakkanik atorniartarfik taartorsuuvoq unnuamilu ersinarluni. Harryp qaammartartoq ikippaa atuagaasiviit akornanni aqqutissarsiorniarluni. Qaammartartoq allaanngivippoq nammineerluni silaannarmi ingerlaartoq Harrylu uulikullanngitsuunngilaq qaammartartoq tigummineqanngitsutullusooq ingerlaartoq takuleramiuk naak nalunngikkaluarlugu nammineq tigumiarlugu.

Immikkoortoq akuersissummik pitinnani iserfigeqqusaanngitsoq atuakkanik atorniartarfiup tunuani tunorlerpaamiippoq. Assiaqut allunaasaq mianersorluni qulaappaa qaammartartunilu qummut atuagaasivinnut saatillugu atuakkat atii atuarniarlugit.

Iluaqutaavallaanngilaq. Naqinnerit kuultit nakkaalasut qarsornikut atuarsinnaanngilai tassami oqaatsit allamiut atorlugit naqinneqarmata. Atuakkat ilaat ateqanngillalluunniit. Atuakkat ilaata saqqaa taartumik simersimavoq simernerlu aammut panernikumut issorsimasumut asallugu piiarneqarsinnaanngitsumut eqqaanarpoq. Harry annilaa-rujussuarpoq pukusuanilu nujai tikkorput, takorluuinerpoq tassami allaanngivippoq atuagaasivimmi saavaniittumi atuakkat akornanni isussuppalluttoqartoq. Allaanngivippoq nalunngikkaat tamaaneeqqusaanngitsoq.

Kisiannili ujaasiniaruni arlaanninngaanniit aallartittariaqarpoq. Mianersoqqissaarluni qaammartartuni natermut ilivaa atuagaasiviillu alliit soqutiginartoqarsoralugit misissu-lerlugit. Atuagaq angisooq amermik qernertumik ungalulik

takuaa. Angeqimmat oqimaaqalunilu naalliutigalugu amuaa seeqquminullu ileriarlugu ammarpaa.

Nipanneq sakkortoqisumik annilaarnaqisumillu nillernermik kipitinneqarpoq - tassaana atuagaq ammagaa nillia- lersoq! Harryp atuagaq matupallappaa kisiannili nilliane qipinngilaq nilliajuarporlu Harry qoqertingajallugu. Tunummut ulikarpoq qaammartartunilu nakkaavaa nakka- ramilu ingerlaannaq qamippoq. Quarsaaqaluni silatiminit torsuusamit pisuppalummik tusaasaqalerpoq. Atuagaq nillia- soq atuagaasivimmut ajaasaannavillugu inissippaa inuu- ninilu annaanniarlugu arpalerluni. Filchip matu matulivik- kaalu sanioqquppa. Filchip isaasa qaamasut peqqarniitsut toqqaannartumik isigaat Harrylli uliguani atilluarterpaa arpasuataarlunilu atuakkap nillianersua suli tusarsaasoq.

Atisat sakkutuussutit savimernit eqqaannut uneriaar- poq. Atuakkanik atorniartarfimmiit qimaalluni tuaviungaa- rami sumunnarnerluni eqqarsaatigiunnaarsimagaluarpaa. Immaqa taarnersua pissutaasimassaaq kisiannili mannak- korpiaq naluaa illussaarsuup suatungaaniinnerluni. Sumiiffini ilisarisinnaanngilaaluunniit. Nalunngilaa igaffiup eqqaani sakkutuut atisaannik taamaattunik peqartoq kisi- nili qularinngilluinnarpaa illussaarsuarmi qutsinnerusu- miinnissani.

"Oqarfigaarma tuaviinnaq ormissagikkitt unnuakkut a- ngalaartoqartartoq paasigukku! Maanna atuakkanik atorni- artarfimmiittoqarsimavoq - immikkoortumi iserfigeqqu- saanngitsumi."

Harry maanna annilaangasorujussuanngorpoq. Filch suk- kasuumik maanga angunniarluni qaninneriorlugu aqqu- tissarsiorsimassaaq. Nipaa saamasoq qujanarniarpaluttuu- saartoq qanilliartorpoq tusaalerpaalu Snape akerpallattoq.

"Immikkortortaq iserfigeqqusaanngitsoq? Aap, kisianni ungasissumut pisimanaviannngillat. Tigusarissaqqaarpagut."

Harry innaallagissamit eqqorneqarsimasutullusooq misigivoq Filch Snapelu siunerminiittut takuleramigit. Soorunami takusinnaanngikkaluarpaat, kisiannili torsuusaq amitsunnuguvoq tungaannullu ingerlaannassagunik pinngitsoornatik aportussaassavaat – uliguaata soorunami aliortukkatut tamartivissinnaanngilaa silaannanngortillugu.

Sapinngisaminik nipaarsaarniaqaluni tunuarterpoq. Saamiatungaani matu ikersisimalaarpoq. Taanna neriuutituaraa. Matukkut ikersisimalaartukkut assororluni putoqquppoq matu ammarnerunaveersaaginnavillugu. Angutit marluk malussaratik sanioqqutiinnarlugu ingerlaannarput. Harryp anerneerutingajalluni sanioqquttut tummarpalui ungasilluartortut tusarnaarpai. Ajutuungajavipppoq. Sekundit arlallit qaangiummata aatsaat ini isersimaffini iluamik qimerluulerpaa.

Initut atuarfittut maannakkut atorneqanngitsutut isikkoqarpoq. Nerriviit issiaviullu iikkap saani qaleriiaarneqarsimasut killingi taartut takusinnaavai, aamma eqqaavik pusingasoq takusinnaavaa. Aammali allamik inimiittoqarpoq – tamaaniittussaannngikkaluartumik, kisiannili aaqqiigallarnertut tamaanga inissinneqarsimasumik.

Takusaa tassaavoq tarrarsuut kusanartorsuaq portusooq natermiit qilaamut killittoq sinaa kuultiusoq. Løvitut isikkulinnik marlunnik niuloqarpoq. Harryp qanilligamiuk qulaata sinaani kigartorlugit allannerit isigiarsullugit atuarpai ima allannillit: Erised stra ehru oyt ube cafru oyt on wohsi.

Maanna annilaangajunnaarpoq Filch Snapelu eqqamini

tusaasinnaajunnaaramigit. Tarrarsuut suli qanilleqqippaa imminut tarrarsoqqinniarluni. Maanna qanillisinnaanera tamaat qanillivaa.

Nipituumik nillnnginniassagami assaminik illugiinnik qarni asserpaa tarrarsornialerlunilu. Tupangaarami innaalagissatut sukkatigaluni kaavippoq uummataatalu tillernera sukkatserujussuarpoq – tassami tarrarsuummi imminuinaq takunngilaq kisianili inuit arlallit tunuminiüttut takuai. Nalunngilaali inimi isersimaqateqarnani. Anertikkaqaluni tarrarsuut saaqqippaa. Imminut tarrarsuummi takuvoq taattulungaarluni, asingangaarluni annilaangaqalunilu. Tunuanilu ikinnerpaamik qulinik inoqarpoq. Harry tunumut qiviarpoq – soorunalumi takusaqanngilaq. Immaqa aamma namminermisulli ersinngillat? Immaqa inimiippoq ersinngitsorpassuarnik inulimmi tarrarsuutillu ersinngitsuinnaat kisiisa takutissinnaavai?

Tarrarsuut qiviaqqippaa. Tarraata tunuaniüttup arnap qungujuppaa aalateriffigalugulu. Assani tunummut isaatippaa tunuanili soqanngilaq taamaallaalliuna silaannaq. Tunuminiittoqarsimagaluarpatt attorsimassagaluarppaa kisiannili attugaqanngilaq. Tarraat imminnut qanittuararsuupput – arnaq qungujulasoq ilaalu tarrarsuummi taamaallaat takuneqarsinnaapput.

Arnaq pinnerisorujussuuvoq. Taartunik aappalungusersunik nujarpoq isaalu – isai uanga isinnut assingupput, Herry eqqarsarpoq tarrarsuullu qanillinerullugu. Qorsooqqiit – isinnut assingulluinnarput – taavali qiasoq paaseriataarpaa; qungujuppoq kisianni qiaatigaluni. Angutip angisuup saluttup qernertunik nujallip sanianiüttup arnaq eqippaa. Angut taanna isaruaqarpoq nujarujussuuarlunilu. Harrysulli pukusuani nujai tikkungapput.

Harryp tarrarsuut maanna ima qanillitigaa qingaata tarrarsuut attungajavillugu allaat.

"Anaana?" Isussuppoq. "Ataata?"

Qungujulallutik isigaat. Harryp tarrarsuummi inuit allat tarraat isiginnaalerpai. Inuit isaat qorsuit nammineq isimisut ittut allat takuai, qinngat qingaasut ittut, anguteerannguaq utoqqaq seeqqui nammineq seeqqumisut tinuneqartut – Harryp inuunermini siullerpaamik ilaqttani takulerpai.

Ilaqutariit Potterikkut qungujulapput aalateriffigalugulu Harryllu isigiunnaarneq saperpai. Assani tarrarsuummut tutsippai neriulluni tarrarsuut putullugu iserfigisinnaassallugit. Misigissuseq sakkortooq nuannaarneq aliasunnermik akulik takkuppoq.

Naluua qanoq siviisutigisumik tassani uninngasimanerluni. Tarrat tammanngillat isiginnaartuarpaalu aatsaallu qaatulerluni ungasissumiit niperpalaq tusaaleramiuk. Tamaani nakorfasinnaajunnaarpoq sinittarfimmullu utertariaqalerpoq. Piniarsuaarluni anaanami kiinaa alarpaa isussuffigalugulu: "Uteqqissaanga." Taava tuaviinnaq inimit qimaguppoq.

"Itersarsimasinnaagaluarparma," ullaakkorsiorlutik Ron isumalulluni oqarpoq.

"Unnugu ini tarrarsuutilik uterfigilerukku ilagisinnaavarma. Ilnnut takuterusuppara."

"Aamma uanga anaanat ataatallu takorusuppakka," Ron ilungersorluni oqarpoq.

"Aamma uanga ilaqttatit tamaasa takorusuppakka, Weasleykkormiut tamaasa. Taava angajutit tamaasa ilaallu takutissinnaavatit."

"Taakku takorusukkukkit takusinnaavatit," Ron oqar-

poq," aasaru angerlaleruma ilagiinnarsinnaavarma. Kisianni immaqa tarrarsuutip toqusimasuinnaat takutittarpai.

Ajoraluaqaarli Nicolas Flamel pillugu paasisaqanngitsooravit. Aajuku nerisassat, baconitorusuppit imaluunniit allamik perusuppit? Sooq nerinngilatit?"

Kisianni Harry sunnguamilluunniit iisisinnaanngilaq. Angajoqqaani takoreerpai unnugulu takoqqikkusuppai. Flamelimut tunngasut tamaasa puigoreersimavai taannami pingaaruteqarunnaarpoq. Qimmip pingasunik niaqullip sumik paarsaqarnera soqutaajunnaarsorinarpoq. Soqutaajunnaarpormi? Aamma Snapep malunnaarsaaqattaarluni angalaarnera kia soqutigissavaa?

"Ajunngikkaluarpit?" Ron aperaaq. "Eqqumiippasingaaravit."

Harry annilaangaginerpaavaa atuartut atuarfiannut inimut tarrarsuutilmmut atorneqanngitsumut uteqqissinnaannginnissani. Maanna Ronilu marluullutik tarrarsuut takunialerpaat. Uliguap inuttaminik ersigunnaarsitsisartup marluullutik assersimaniassammatik kigaatsunnguamik mianersoqqissaarlutillu angalasariaqarput. Harry unnu-aammat ingerlavia alanngaarlugu atuarniasarivaat, atuakanik atorniartarfimmiit aallartillutik. Kisiannili torsuusani taartuni sivikinnerpaamik akunnermi ataatsimi ingerlarsaarput ornigartik nalulerlugu.

"Qiulerpunga," Ron oqarpoq. "Taamaatiinnarta uterluta-lu."

"Naamik!" Harry isussuppoq, "nalunngilara ornitarput massuma eqqannguaniittoq."

Arnaquassaap angisuup aliortugaa timmisooq aqquitiminni taamaallaat naammattoorpaat allanilli naapitaqaratik. Ron

naalliulluni nipiliulperpoq nissuni qianermik misigisimasaa-
rummata. Taamaalisorlu Harryp sakkutuut atisaat nassaari-
vaa.

"Maaniippoq - maanerpiaq - tamanna qularnanngilaq!"

Matu ajallugu ammarpaat. Harryp uliguaq piipallappa
tarrarsuummullu arpalluni.

Suli tamarmik tassani takussaapput. Arnaata angutaatalu
takugamikku nuannaaqaat.

"Takusinnaavigit?" Harry isussuppoq.

"Naamivik."

"Qaa iluamik qivialaariakkit! Tamaasa takulaariakkit...
takuuk amerlat!"

"Illit kivisit takusinnaavakkit."

"Immaqa ajortumik nikorfavutit. Uunga saninnut pilaa-
riarit."

Harry illuarpoq maannali Ron tarrarsuutip saarpiaanut
pimmat ilaqutai tamarmik tammarput. Taamaallaat Ronip
makiaarusillip tarraa takusinnaalerpaa.

Kisianni Ronip tarrani kisiat qimerualaalerpaa.

"Takulariannga!" Ron pilperpoq.

"Ilaquttatit tamaasa takusinnaavigit?"

"Naamik - kisimiivippunga - kisianni allatut isikkoqar-
punga - utoqqaanerullunga - aamma siunnersuisunngorsi-
mavunga!"

"Qanoq?"

"Ilumoorpunga - Percytut saqqarmiuusaqarpunga -
aamma kollegiap ilisarnaataa Quidditchillu pokalia tigu-
miarpakka - aamma arsaattartunut siuttunngorsimavunga!"

Ronip takusani alutornartorsuaq alarpaa qiimaqalunilu
Harry isigalugu.

"Isumaqarpit tarrarsuummi siunissaq takuneqarsinnaasoq?"

"Qanoq ililluni taamaalisinnaava? Ilaquttakkami tamar-mik toqoreerput - takooqilaariarlara..."

"Unnuaq tamaat illit pigereerpat. Sivikitsumik maani nikorfalaarallarlanga."

"Arsaattartut pokaliat imertarfiusaq taamaallaat tigumiarpat allamik isigisaqanngilatit. Qanoq aamma soqutiginassava? Angajoqqaakka takorusuppakka."

"Ajattaanak..."

Torsuusami nipiliortoqariataarnerata assortuunnerat kipi-tippaa. Maluginngitsoorsimavaat qanoq nipitutigalutik oqa-lussimallutik.

"Tuavi!"

Ronip uliguaq imminnut atitipallappaa madam Norrisip isai qaamasut matukkut ikersisimasukkut puttuttullu. Ron Harrylu uninngaqqissaarput ataatsikkullu ataasiinnavim-mik eqqarsaateqarlutik: Uliguaq qitsunnut iluaqutaanerlu-ni? Inuit takusinnaanngisaat qitsuup takusinnaassavai? Qitsuk sivisoorujussuarmik uninngareerluni kiisami tunup-poq arriitsumillu ingerlaqqilluni."

"Iluarnavianngilaq - immaqa Filch aallugu ingerlavoq. Ilimagilluinnarpara tusaasimassagaatigut. Qaagit."

Taava Ronip Harry aallaruppaa.

Aqaguani ullaakkut aperujussuarsimasoq iterput.

"Skakkissaagut, Harry?" Ron aperaaq.

"Sussa."

"Hagrid pulaassavarput?"

"Naagga, uanga eqiagaara, illit ingerlaannarit..."

"Nalunngilara suna eqqarsaatigigit, Harry. Tarrarsuut eqqarsaatigaat, ilaa? Unnugu orninniaqinagu."

"Sooq?"

"Nalua. Kisianni toqqissisimanarinngilara.... aammami qanorluunniit pisoqassagaluarpas piffissami kingullermi imminut navianartorsioirtitaqaatit. Filch, Snape, Madam Norris tamarmik ujarlerput. Una allaavoq takusinnaanngimmatsit kisianni qanoq pisoqassagaluarpa aqquataani naammattoortuugaluarukkit. Imaluunniit qanoq pisoqassagaluarpa arlaannik uppititsisooraluaruit?"

"Hermionetorpiak nipeqarputit."

"Ilumut taama isumaqarpunga, Harry.
Taakunnarniaqinak."

Kisiannili Harry ataasiinnarmik niaqormioqarpoq.
rrarsuummut utertariaqarpoq Ronillu unitsissinnaanngi-

Unnuit pingajuanni ornitani unnuit siuliinut naleqqiullugu sukkannerusumik nassaarivaa. Aqquataani sukkangaarami pisariaqanngitsumik nipituuliorpoq, kisiannili iluatitsilluni naapitsinngilaq.

Tarrarsuummut apuummat angajoqqaavisa pisarnermisut qungujuppaat. Aanaavisa ilaata pilluarpasilluni sikiffigaa. Harry tarrarsuutip saavanut nallarpoq. Ilaquttaminik unnuaq naallugu ilaqarnissaa kialluunniit akornusissanngilaa. Naamivik.

Immaqa taamaallaat....

"Takuarsi, uteqqissimavutit, Harry?"

Harry innallagissamit eqqorneqartutut qerattarpoq. Eqqani alakkarterpaa takulerpaalu nerriviit iikkat eqqaa-niittut ilaanni Albus Dumbledore issiasoq. Harryt tarrarsuut

takorusunnermik sanioqqukkamiuk takunngitsoorsimavaa.

"Taku- takunngivippakkit, professor."

"Ila eqqumiik uliguap inuttaminik ersigunnaarsitsisartup nukappiaqqamik tappiikujuttunngortitsisinaanera."

Dumbledore oqarpoq, Harrylu eqqissiallaqaaq qungujuttoq takugamiuk.

"Aap," Dumbledore oqarpoq nerriviullu saani issiavimmi-niit nikuilluni Harryp sanianut natermut inginniarluni.

"Maanna illit allarpassuit assigalugit tarrarsuutip takorloortit-sisartup nuannersua misigaat."

"Sunaaffa tarrarsuut taama taasarpaat, professor."

"Maanna ilimagaara tarrarsuutip isertugai nassaarisimassa-giitit, taamaappa?"

"Ilaquttakka takutippai..."

"Aamma Ron siulersuisunngorsimasoq tarraata takutip-paa."

"Qanoq ilillutit nalunngiliuk...?"

"Uanga ersigunnaarnissannut uliguag atorfissaqartinngi-lara," Dumbledore inussiarnersumik oqarpoq.

"Naatsorsorsinnaanngiliuk tarrarsuut sumik takutitsiner-soq?"

Harry ileqimisaartorpoq.

"Nassuiarallarlara. Silarsuarmi angutit pilluarnersaata tar-rarsuut una tarrarsuutitut sutulluunniit atorsinnaavaa.

Tarrarsorfiguniuk qanoq isikkoqavinnini takusinnaassavaa. Paasiartulaalerpiuk suna pineriga?"

Harry eqqarsarpoq. Taava kigaatsumik oqarpoq:

"Tarrarsuutip takorusutarput takutittarpaa... sunaagaluarpal-luunniit..."

"Aap," Dumbledore nipaatumik oqarpoq.

"Minnerpaamik kissaatitta itinersaat annersaallu uummatit-

sinniittut takutittarpai. Illit ilaquttatit ilisarisimanngisaannarakkit eqqannut katersuunnissaat kissaatigaat. Ronald Weasley pikkorissorpasuarnik angajoqarami soqutigineqanngisaannarsimavoq taamaattumillu tamanit pitsaanerpaatut imminut isigaaq. Kisiannili tarrarsuutip uuma eqqortumik ilisimasassanillu tunissuteqarfiginngilaatigut. Anguterpassuit taanna saallugu toqujartortarsimapput takusatik alutorsaatigeqalugit imaluunniit silanngajaalertarsimapput ilisimanagu takusartik ilumoortuunersoq imaluunniit inuunerup ilaani piviusunngorsinnaanersoq.

Tarrarsuut aqagu allamut nuunneqassaaq. Harry qinnuvigissavakkit ujarunnaaqqullugu. Arlaanni naammattooqqissagalarukku ilisimassavat tarrarsuutip sunarpiaq takutinneraa. Mianersorsinnaalissaatit. Sinnattuinnarluni inuusoqarsinnaanngilaq taamaalioraannimi inuuneq puigorneqartussaavoq. Tamanna eqqaamajuk. Maannalu isumaqarpunga uliguat kusanartoq atissagit innariartorlutillu?"

Harry nikuippoq.

"Professor Dumbledore, apeqquteqarsinnaavunga?"

"Taamaaliortutinuna," professor Dumbledore qungujuppoq. "Kisianni apeqquummik ataatsimik apereqqissinnaavarma."

"Illit suna takusarpiuk tarrarsuutip saani tarrarsoraangavit?"

"Uanga? Imminut takusarpunga alersersuarnik nuersakanik tigumiarlunga."

Harryp paasinagu isigaa.

"Alersersuarnik atorfissaqartitsiuassaagut," Dumbledore oqarpoq. Kingullermik juulleraluarmat alersersuarnik ataasiinnarnilluunniit pisaanngilanga. Tamarmik atuakkanik tunerusuppaannga."

Atsaat innaqqikkami Harryp eqqarsaatigilerpaa
Dumbledore immaqa ilumuuvilluni oqalussimanngitsoq.
Aappaatigulli eqqarsarpoq, Scabbers akitsimit peersiitigalu-
gu, immaqa ittuukulutsitsinartumik apeqquteqarsimagunar-
luni.

Nicolas Flamel

Dumbledorep Harry qularunnaarsissimavaa Tarrarsuut Takorluuinartog nuunneqarmat ujarnissaa sianiilliormerus-sasog juullimilu atuannigiffeqarnerata sinnerani uliguua ersi-gunnaarsitsisartog imulluaqqissaarsimalluni kuffertiata naq-qaniippoq. Harry neriukkalarpoq tarrarsuummi takusani puigorsinnaassallugit taamaalisogannigilarli. Unnuakkut oqimangertalerpoq. Angajoqqaami qaamanermut qorsum-mut inngianaqisumut tammarnarat illarpalunnerlu nipitooq peqqarniippaseqisog ajorpaseqisorlu sinnattorisalerpai.

”Takusinnaanngiliuk Dumbledore ilumoortoq; tarrarsuut tip taassuma silaarutitissinnaagaluarpaatit,” Ron oqarpoq, Harryp sinnattupilumminik oqaluttuummani.

Hermione uterpoq atualeqqinnissartik ullormik ataatsimik sioqqullugu. Pissutsit allatulaaq isigilersimavai. Misigissusai nikerarput. Harryp unnuut pingasut tulleriit angalaarsimanera annilaarutigeqaa (Qanoq pisoqarsimassagaluarpa Filchip tigusarisimasuugaluarpatit?) aamma ajuusaarutigaa Nicolas Flamelip kinaaneranik paasiniaanerusimannngimmat.

Atuakkanik atorniartarfimmi atuakkat akornanni atiata nassaarinissaa ilimagiunnaangajakkalarpaat naak Harryp sulii qularinngikkaluaraa ateq taanna arlaanni atuarsimallu-

gu. Atuarnerli aallarteqqimmat anitsiarfiit tamaasa atuakkanik qupperaanertik aallarteqqippaat.

Harry ilaminit piffissaqannginneruvoq Quidditchimik sungiusarneq aamma aallarteqqimmat.

Woodip unammisartut siornatigornit sukannernerusumik sungiusarpai. Nittaaalalluunniit kingoraartaasa sialuit tamaviaarnera qasukkaallatsissinnaangilaa. Qatanngutigii Weasleykkut isumaqarput Wood ingasalluni tamaviaarपालाartoq Harrylli Wood illersorpaa. Unamminermi tullermi Hufflepuffimut ajugaagunik Slytherinip pokalia ukiut arfineq marluk ingerlaneranni siullerpaamik pisussaavaat. Taassuma saniatigut Harryp paasisimavaa qasunissami tungaanut tamaviaarluni sungiusaraangami sinnattupilunani sinilluarterluni.

Ullut ilaanni sungiusarneranni sila masannaqisoq sungiusarfillu marulloqaqisoq Woodip nutaarsiassanik avaangunartunik oqaluttuuppai. Weasleykkut marluliaatai sanigutiminnik timmillutik imminnut aarsaarfigisaqattaartut sanigutiminniillu nakkartuusaartaqattaartut kamaappai.

"Asuleerunnaarniaritsi!" Nilliaffigai. "Taamaaliorderit holdinik aseruisarput! Unamminermi tullermi Snape dommeriusussaavoq qularissanngilarsilu allamik suliaqarnavianngitsoq Gryffindorimiit pointinik arsaarinninniarneq kisiat!"

George Weasley tamanna tusaramiuk sanigutiminit nakkarpoq.

"Snape dommeriussava?" Marullummiit nikuikkami kamaammersimalluni aperivoq. "Qanga dommerinngorami? Slytherinimut ajugaalerutta naapertuilluartumik dommeriunissaa ilimanangilaq."

Arsaqatai Georgep eqqaanut nunnipput. Tamarmik aala-

terneqarsimapput mamiatsassimaqalutillu.

"Uanga tamanna isumassarsiarinngilara," Wood oqarpoq. "Aamma allatut iliorsinnaanngilagut, allatut ajornartumik malittarisassat maleqqissaarlugit unammisariaqarpugut Snape-ip uatsinnik malersuinissaa pinngitsoortissagutsigu."

Tamannami ajunngikkaluqaaq, Harry eqqarsarpoq, kisiannili unammileruni kissaatigissagaluarpaa Snape-ip dommeriunnginnissaa...

Sungiusareeramik arsaattartut arsaattarfimmi oqaloqatigilermata Harry tuaviinnaq toqqaannartumik Gryffindorip isersimaartarfianukarpoq, tassanilu Ron aamma Hermione skakkileruttortut naappipai. Pinnguaatini taakkunani taamaallaat Hermione ajorsartarpoq aammalu Ron Harrylu isumaqarput skakkimik ajorsartarnera Hermionemut peqqinnartuusoq.

"Oqanngikkallaat," Ron oqarpoq Harry saniminut ingimmat. "Eqqarsarluartariaqarpunga..." Harryp isikkua takoriasaarpaa. "Suit? Sooruna taama isikkulutsigaat?"

Allanit tusaaneqannginniassagami Harryp nipikitsunguamik Snape-ip dommerinngortitaanera oqaluttuaraa.

"Unamminermi tassani peqataassanngivipputit," Hermione ingerlaannaq oqarpoq.

"Oqassuutit napparsimalersimallutit," Ron siunnersuivoq.

"Imaluunniit nissut napisimatittuusaassavat," Hermione oqarpoq.

"Aap, napinerassavat," Ron oqarpoq.

"Iluarnavianngilaq," Harry pilerpoq. "Ujaasisumut taartissaqanngilagut. Arsaqataanngikkuma Gryffindor arsaassinnaajunnaassaaq."

Taamaalisorlu Neville isersimaartarfimmut tassaangaan-

naq iserpoq. Qanoq ililluni assip tunuatigut putukkut anillassimanersoq eqqoriagassaanngilaq niuimi parnaarsimapput ilaasa Nissumik-parnaarsaammik perloqqussummik ilisarisaannik. Gryffindorip napasuliaanut aqqutaa tamaat kaninatut pissigarsimassaaq.

Inimiittut tamarmik illalerput Hermione kisimi pinnani. Taanna ingerlaannaq pissippoq Nevillemillu perloqqussut atorunnaarsinniarlugu angakkualerluni. Neville niui parnaaqqajunnaarput iluamillu pisussinnaanngoqqippoq.

"Qanoq pisoqarami?" Hermionep Neville aperaa nerri-vimmut Harryp Ronillu issiavigisaanukaatiitigalugu.

"Malfoy," Neville aalaterneqaqaluni oqarpoq. "Atuakkat atorniartarfiata silataani naapippara. Oqarpoq angakkuarniarami inummik sungiusarfissaminik ujarlerluni."

"Professor McGonagall ujaruk!" Hermionep oqarfigaa. "Oqaatigisariaqarpat."

Neville ileqimisaartorpoq.

"Perulluliortitseqqinnianngilanga," nipaatsumik oqarpoq.

"Akiniaasariaqarputit, Neville!" Ron oqarpoq. "Malfoyip inunnik allanik malersuineq sungiusimavallaalerpaa, illilli naalaannaruit malersugariuassavaatit."

"Oqaluttuuttariaqanngilarsinga Gryffindorimiinnissannut sapiissuseqanngitsunga. Tamanna Malfoyip isumagereerpaa," Neville qissaseqqajaalluni oqarpoq.

Harryp uppiq sukkulaaq uligussami kaasarfiani ilorlermi nassaarivaa, tassalu Hermionep juullimut tunniussaasa amiakkuat, Neville lu saammarsarniarlugu sukkulaaq tunniuppaa.

"Illit Malfoymiit aqqaneq marloriaammik pingaarneruvutit," Harry oqarpoq. "Nasap eqqumiitsup Gryffindorimut pisippaatit, ilaa? Malfoyiili sumut pisinneqarpa?"

Kollegiapalaamut Slytherinimut.”

Neville nuannaajummerpoq sukkulaajutinilu puialerlugu.

”Harry qujanaq... eqqarsarpunga maanna innarniarlunga... allagartaa perusuppiuk? Katersorpatimmi, ilaa?”

Nevillep qimammatik Harryp allagartaq takuaa.

”Tassaasiit Dumbledore. Siullerpaamik pinnakkama taannarpiannguaq aamma....”

Anerikkalerpoq allagartarlugu qimerloorlualerlugu. Taava annilaarnartumik isikkoqarluni Ron Hermionelu isigilerpai.”

”Kinaasooq paasivara!” Eqqissiveerulluni isussuppoq.

”Flamel nassaarivara. Oqarpungami atia arlaanni takuni-kuullugu. Qimuttuitsunut ilaallunga maanngarninni allagartami imaattoq atuarpara: 'Dumbledorep tusaamasaassugineruai 1945-mi Taartup Angakkua, Grindelwald aju-gaaffigigamiuk, uumasorujuit aavata assigiinngitsunut aqqaneq marlunnut atorsinnaanera nassaarigamiuk aammalu minnerunngitsumik suleqatini Nicolas Flamel peqatigalugu kuultiliorniariarluni suliaqarnini:

Hermione nuannaangaarami pissingajappoq. Juullip siorna karakteritik tigugamikkilli aatsaat taama nuannaarti-gaaq.

”Maani utaqqisinga!” Oqarpoq niviarsiaqqallu sinittarfi-annut arpaannaq aallarluni. Harry Ronilu tupigusunnermik sulii imminnut isigilluanngitsut tuaviinnaq uterikatappoq atuagarujussuaq pisoqaq unermillugu.

”Uuma atuarnissaa eqqarsaatigisimanngivippara!”

Pissangalluni isussuppoq. ”Sapaatit akunneri arlallit matuma siornatigut atuakkanik atorniartarfinni atorpara.

Sukisaarsaatissannik atuagassaqaarniaannarlunga atorakku.”

”Sukisaarsaataasinnaagami?” Ron pilerpoq, Hermionelli

nipangeqquaa atuagarlu qupperalerlugu. Tuavioqaluni nipaatsumik oqaluutigaluni qupperarpaa.

Kiisami ujakani nassaarivaa.

"Taannaqaana taama ilimagalugu! Taannaqaana taama ilimagalugu!"

"Massakkut oqaaseqalaarsinnaavugut?" Ron ajuallalluni aperivoq. Hermionep tusaanngitsuusaarpaa.

"Nicolas Flamel," ilungersorpalluni oqaluleroq,
"tassaavoq angakkunit ilisimaneqartunit kisimi ujaqqamik angakkuakkamik pinngortitsisinaasoq."

Oqaatsit taakku Hermionep neriutigisaraluutut Harry Ronilluunniit aalassaatinngilaat.

"Suut ujaqqat?" Ataatsikkut oqarput.

"Ukorsiinnguiit atuakkanik atuanngisannarassi?
Takusiuk – oqaaseqatigiit uku atualaariarsigik." Atuagaq ilaminut tunniuppaa. Atualerpullu:

*Kuultiliorniarluni ilisimatusaatit pisogarsuit sammivaat
Ujaqqamik Inuunartumik pinngortitsiniarneq. Ujarak taanna
tupinnaannartumik pissaaneqarpoq. Ujaqqap taassuma saffiu-
gassiaq sunaluunniit kuultinngortittarpaa akuilluinnartog.
Aamma taanna uumassusermik akuutissamik pilersitsisinnaa-
voq, akuutissiarlu taanna inummik toqujuitsunngortitsisarpoq.*

*Ukiuni hundredelikkaani Ujaraq Inuunartog pillugu tusar-
takkat oqaluttuallu amerlasimagaat, kisiannili Ujarak pigine-
qartutuaq Nicolas Flamelimit pigineqarpoq, taanna tassaavoq
kuultiliortartog tusaamasaq operamillu nuannarisalik. Flamel
siorna 665-inik ukioqalerluni inuuissiortog nuliannili Perenelle
(658) Devonimi nipaatsumik inuupput.*

"Maanna suna pineqartoq paasiartulerpisiuk?" Harry Ronilu atuarlutik naammassimmata Hermione aperivoq.

"Qimmersuup pingasunik niaqullip Flamelip Ujaraataa angakkuagaq paarisimassavaa! Eqqoriarinnaavara Flamelip Dumbledore piunaffigisimassagaa Ujarak isumannaatsumut toqqoqqullugu. Ikinngutigippummi suleqatigiillutillu.

Iisimasimassavaa Ujarak tillinniarneqartoq.

Taamaattumimmik-una Gringottsip aningaaserivianiit nuunneqarsimasoq!"

"Ujarak kuultilorsinnaasoq inuillu naassaanngitsumik inuuneqalersillugit!" Harry pilerpoq.

Tupinnanngilluinnarpoq Snape-ip ujaarimmagu!

Kinaluunniit taamaattumik peqarusussaaq."

"Aamma tupinnanngilaq Flamelip atia atuakkami Ukiuni kingulliunerusuni angakkuartarneq-mi nassaaresinnaannginnatsigu," Ron oqarpoq. Inuusunnerpaanummi ilaasimanaviannngilaq 665-inik ukioqarsimaguni, ilaa?"

Aqaguani ullaakkut Taartup Pissaaneranut Illersornissaq ilinniarpaat inunnillu amaruunngortunit kiitinnermut katsorsaariaatsit assigiinngitsut allattulermatigit Harry Ronillu suli soqutigeqalugu oqaluuseraat Ujaqqanik angakkuakkanik peqartuugaluvarunik taakku sumut atussanerlugit. Aatsaat Ron oqarmat taamaattunik peqartuugaluvaruni nammineq Quidditchimik unammisartunik pisiniarluni Harry Snape unamminissarlu eqqaalerpai.

"Pinngitsoornanga unammeqataasariaqarpunga," Ronimut Hermionemullu oqarpoq. "Unammeqataanianngikkuma Slytherinip arsaattartui isumaliussapput qunugineqarlutik. Silattorserlugit ajugaasariaqarpugut."

"Neriussaagut Snapep illit silattorsissanngikkaatit," Hermione oqarpoq.

Unamminissaq qanilliertortillugu Harry annilaangaleriartu-innarpoq. Ronimut Hermionemullu sapiitsuusaarsinnaanngilaq. Aammali arsaateqatigisartagaasa qanoq pisoqarnera malugaat. Pissartanngorniutivilluni unamminissami Slytherinimut ajugaanissamik eqqarsaat nuanningaarami asseqanngilaq. Ukiuni kingullerni arfineq marlunni ajugaaffigineqarsimanngisaannarpoq kisiannili dommerimik taama illuinnaasiortigisumik dommereqassappat Gryffindor iluat-sitsisinnaanarpa?

Harryp naluaa imminut salloqittarnerluni kisiannili allaanngivippoq sumiikkaluaraangamiluunniit Snape naa-pittuaannaraa. Soorlu Snapep nakkutigiuannaleraa. Nakorsaasiornermik ilinniartitsineq naalliunnarsivoq. Snape-ip Harry ajuiissumik pisarpaa. Ujaqqat Angakkuak kat pillugit paasisaqarnerat ilisimanerpaa? Harryp paasisinnaanngilaa Snapep qanoq ililluni imminut tunngasunik paasiqalersimassanersoq - ilaannikkooriarlunili isumaqalersarpoq Snapep eqqarsaatini atuarsinnaagai.

Ronip Hermionellu aqaguani ualikkut arsaattarfiup atisaler-sortarfiata silataani unamminissami iluatitsilluaqqummanni Harryp takusinnaavaa qanoq eqqarsarnersut; eqqarsarput unamminerup kingorna uumatillugu takoqqissanerlugu, tamannalu qiïmmassaataasutut oqaatigineqarsinnaanngilaq. Woodip arsaattartunut kajumissaarinera Harryp tusaanngingajappaa; Quidditchip uliguua ativaa Nimbus 2000-ilu tigullugu.

Utaqqiisaa Ron Hermionelu inissiami qattuniliaasumi isiginnaartut inigisaanni Neville saniani issiavinni marlunni inissarsipput. Harryp isumaaluttutut isikkoqarnerat paasisinnaanngivippaa aammattaaq paasisinnaanngilaa sooq

unamminermik isiginnaarnissaminnut angakkuaatitik nasarsimaneraat. Harryp aamma naluaa Ronip Hermionellu isertortumik Nissunik parnaartitsinissamik perloqqussut sungiusarsimagaat. Ilinniarnissaanik isumassarsisimapput Nevillep Malfoyimik naapitsinermi kingorna pississaarluni Gryffindorip napasuliaata tungaanut ingerlasoq takugamikku. Aamma Snapep Harry ajortumeernialissagaluarpagu perloqqussut Snapemut atornissaa nangaassutiginavianngilluinnarpaat.

"Puiussanngilat angakkuaat ateqarmat Locomotor Mortis," Ronip angakkuaatini atsipaaminut toqqormagu Hermione isussuppoq.

"Aap, aap. Alanngaarsinnaavara," Ron annilaangarpasiluni akivoq. "Malersorunnaarnianga."

Atisaajartarfimmi Woodip Harry oqaloqatiginiarlugu qaaquaa.

"Pinngitsaalinianngilakkit, Potter, kisianni assut pisariagartipparput arsaanneq aallartilaaginnartoq innaallagissamik tigusinissat. Ajugaapallattariaqarpugut Snapep Hufflepuffimik illersuina malunnarsivallaartinnagu."

"Atuartut tamarmik isiginnaariarsimapput!" Fred Weasley matup eqqaaniittoq oqarpoq. "Ila ukorsii - Dumbledoremut allaat isiginnaariarsimapput!"

Harry qiimmappoq.

"Dumbledore?" Pilerpoq matullu tungaanut arpalluni ilu-moornersoq takusarlugu. Fred ilumoorpoq. Umiit takisuut sœlvitut qasertigisut allamut paarlaanneqarsinnaanngillat.

Harry eqqissiallangaarami nipituumik nillingajappoq. Annappoq. Qularnanngivissumik Snapep ajoqusemissaa qunugissavaa Dumbledore isiginnaartut akornanniippat unamminerullu ingerlaneramik sissuerluni.

Immaqa aamma tamanna pissutaasimassaaq Snapep kamappasinneeranut holdit marluk unammisussat arsaattar-fimmut isaammata. Ronip aamma tamanna malugaa.

"Snape aatsaat taama kamappasitsigitillugu takuara," Hermione oqarfigaa. "Takuuk - tingilerput. Na-aa!"

Ron kassermigut anaaneqarpoq anaasisorlu tassaavog Malfoy.

"Utoqqatserpunga, Weasley, takunngitsoorakkit."

Malfoy Crabbemut Goylemullu qungujupalaarpoq.

"Potterimita tamatumuuna qanoq sivistigisumik nakkar-nani sanigutiminiissinnaava? Qanoq sivistigisumik silaan-narmiissinnaanera eqqoriassavarput? Illimmi Weasley eq-qoriarsinnaaviuk?"

Ron akinngilaq. Snapep Hufflepuff immikkut pointinik tuneqqammerpaa George Weasley akeqqami ilaat niaqua-tigut arsamik eqqortoormagu. Hermionep inussani paarlap-pai Harrylu sissueqqissaarlugu arsaattut qulaanni kissaviar-suttut kaajalukaartoq innaallagialu kuultiusoq qiniitigalugu.

"Nalunngilisiuk Gryffindorip holdiani arsaattussat qanoq ilillutik nassarisarneraat?" Minutsit tallimat qaangiuttut Snapep Hufflepuff peqquteqarnani pointinik tunimmagu Malfoy pingaakujulluni aperivoq.

"Nalliginerpaasatik ilaatittarpaat. Potter assersuutiginnariartigu. Angajoqqaanngilaq. Aamma aaku qatanngutigii-t Weasleykkut taakku aningaasaateqanngillat. Aamma illit arsaateqataasariaqaraluarputit, Longbottom. Qarasaqan-ngilatit."

Neville aappillerujussuarpoq Malfoyilu saallugu.

"Ilinninngaanniit aqqaneq marloriaammik naleqarneru-vunga, Malfoy!" Oqarpoq.

Malfoy, Crabbe Goylelu qitutsingajallutik illarput, Ronili

arsaattut pissanganarpallaaqimmata allamut qiviarusunngitsoq oqarpoq: "Torrak, taamaaqataanik akiinnartassavat, Neville."

"Longbottom, qaratsat kuultimik sanaajugaluarpata illit qatanngutiginnit Weasleykkunnit piitsuunerussagaluarpuit."

Ron Harrymik isumassaanermik sianiutai ajortunngivissimapput.

"Mianersorit, Malfoy - oqaqqissanngilatit..."

"Ronip!" Hermione oqariataarpoq. "Harry..."

"Qanoq? Sumi?"

Harry sukkasoorujussuarmik ammuinnangajak apparsalerpoq isiginnaartullu annilaarput nillialerlutillu. Hermione nikuippoq inussanilu qaqortuinnanngortillugit paarlallugit. Harry nunamut tuliivillunilu sangoriataarpoq aqerlutut sukkatigaluni nuna qulaatilaannguarlugu timmilerluni.

"Iluaanarputit, Weasley. Potterip nunami aggorsimasut nassaarisimannguatsiarpai!" Malfoy oqarpoq.

Maanna Malfoyip mittatilliinera Ronip naammagilerpaa. Malfoyip qanoq pisoqalernersoq paaserianngikkaa Ronip pissiffigaa tillullugulu nunamullu uppitillugu. Neville issiavini qulaallugu pissippoq Ron ikioriartorlugu.

"Qaa, Harry, tuavi!" Hermione suaarpoq issiavimmilu qaanut nikuilluni takulluarusukkamiuk qanoq pisoqarnersoq, tassami Harry sukkaqaluni Snape-ip tungaannaanut timmilersimavoq - Hermioneq pissangangaarami Ronip Malfoyillu issiavimmi ataana paanerat aammalu Neville Crabbemik Goylemillu nilliaatigaluni paanninnera takunngitsoorpaa.

Silaannarmi Snape-ip sanigutini sanguteriataarpaa aappil-larissiq sunaanersoq qanittunnguulluni sanioqquttoq takul-

luarumallugu - kingunitsianngua Harry silaannarmi uneria-taarpoq talinilu ajugaasimaarpalulluni kivillugu. Sunaaffa innaallagialq kuulteq akorsimallugu tigumiaraa.

Isiginnaartut qümmattarlutik nillerrattorsuupput. Angusat annerpaartaraat! Kialluunniit eqqaamanngilaa qanga arsaq taama sukkatigisumik tiguneqarmat.

"Ron! Ron! Sumiippit? Arsaanneq naammassivoq! Harry ajugaavoq! Ajugaavugut! Gryffindor kollegiat pissartanngorniunneranni pissartanngorpoq!" Hermione nilliavoq. Issiavimmini pississaarpoq Parvati Patililu saaminiittoq eqitaarlugu.

Harry suli nunamut tunnani sanigumminiit pissippoq. Ajugaanertik uppererpianngilaa. Iluatsissimavaa - unammineq naammassivoq minutsillu tallimaanngitsulluunniit unammineq sivisussuseqarsimavoq. Arsaattut sinneri nunnimmata Snape akornanniittoq takuaa kiinaa qaqortuinnaasoq ipummersimallunilu. Taava Harryp tuimini assak malugilerpaa quliminilu Dumbledorep kiinaa qungujulasoq takulerlugu.

"Arsaalluaqaatit," Dumbledore nipaatsumik oqarpoq Harryp kisimi tusaasinnaasaanik. "Nuannerpoq takullugu tarrarsuutip saavani isiginnaarnerinnarmik suliaqanngitsutit. Ingerlalluarniarna... torrallaaqaatit..."

Snape narrujuummersimarpasilluni qiserpoq.

Kingunitsianngua Harryp kisimiilluni atisaajartarfik qimappa Nimbus 2000-iutini sanigutaasivimmut illuaqqamut inissikkiartorlugu. Eqqaamanngilaa qanga kingullermik taama pilluartigigami. Maanna sakkortuumik tulluusimaarutissaqalerpoq. Oqartoqarsinnaajunnaarpoq tusaamasanngorniarluni nammineerluni iliuuseqarsimanngisaannartoq. Unnuup silaannaa

aatsaat taama tipigilluinnartigaaq. Ivikkat isugutasut ingerlavigai akunnerup kingulliup ingerlanerani pisimasut niaquani kaaverusaartut. Gryffindorip unammisartuisa akiarsimavaat kunngillu issiavianut ingitillugu. Ron Hermionelu nuannatut isiginnaartullu issiaviunut qallorlutik pisseqattaarsimapput naallu Ron qinngamigut tillutsissimanerminit aakkaluarluni ajugaasimaarnermit nuannaarnera asseqanngilaq.

Harry illuaqqamut apuuppoq. Matumut qisummik sanaamut iigarluni Hogwartsip igalaavi seqinermit akisugussimasut isiginnaallatsiarpai. Maanna Gryffindor siuttunngorpoq Snapemullu pikkorinnini takutippaa.

Snape sumiippamitaava....

Inuk ilisarineqarnaveersaarpasissiq illussaarsuup tumme-
raatigut sukkasuumik aterpoq. Erseqqippoq takutikkusun-
ngitsoq taamatummi orpippassuit inerteqqutaasut tungaan-
nut sukkaqisumik ingerlanera isikkoqarpoq. Isertorpaseqaaq.
Harryp ajugaanini puigorluinnarpaa inullu eqqumiitsoq ala-
pernaaqaluni isiginnaalerlugu. Taqissorluni orlerlunilu pisun-
nera ilisarivaa; tassaana Snape orpippassuarnut ingerlasoq
allat tamarmik Inersuarmut neriartortut - suniartormitaava?

Harry Nimbus 2000-iutiminut pissippoq tingillunilu.
Nipaatsumik illussaarsuaq qulaappaa takullugulu Snape
orpippassuit killingannut pisoq. Maanna arpalerpoq
Harryllu malippaa.

Orpiit kaarfi eqimangaarmata silingaarmatalu Snape
sumut pinersaq paatsiveerukkaluarpaa. Appariartuutigaluni
kaajalukaarpoq naggataatigullu orpiit kaarfisa avalequtaat
qulliit attullataalerlugit. Taava nipinik tusaasaqaleriataarpoq.
Nipip tungaanut timmivoq orpiillu ilaata avalequtaanut issu-
sumut nunnilluni.

Avalequt mianersorluni paarnguffigaa sanigutinilu najum-

milluarlugu nunami qanoq pisoqarnersoq marsiitigalugu.

Ataani orpeqannginnersami alanngiffigiuminartumi Snape nikorfavoq. Kisimiinngilaq aammali professor Quirrel takussaavoq. Harryp kiinai takusinnaanngilai kisianni professor Quirrel aatsaat taama ittoqerpalutsigitillugu tusaavaa. Harry tamaviaartariaqarpoq qanoq oqalunnersoq paasinialugu.

"...n-naluara, sooq maanerpiaqqissaaq n-naa-naapikku-sunnerimma, Severus..."

"Uumangaa, isumaqaraluarama isertuunniarlugu isumaqatigiittugut," Snape misigittaappalulluni oqarpoq. "Atuartut pisinnaatitaanngillat Ujaqqat Inuunartut pillugit paasitinnegarnissaminnut, ilaa?"

Harry siumut orlerpoq. Quirrel oqariaraluarpoq Snape-ill nipangersippaa.

"Hagridip uumasorujuutaa ajoqusernani qanoq ilillugu sanioqqunneqarsinaanersoq paasiviuk?"

"K-kisiannimi, Severus, uanga..."

"Sianigit akerariileqinaagut, Quirrel," Snape oqarpoq Quirrelilu qunusaarlugu qanillillugu.

"N-naluara s-suna..."

"Nalunngilluaasarpat suna pineriga."

Uppik nipituumik qarlorpaluppoq Harrylu tupangaarami nakkangajappoq. Snapep oqaaseqatigiit ima naggaserai tusaavaa.... angakkuartuusaarnerit. Utaqqissavakkit!"

"K-kisiannimi u-uanga s-sa-saperpunga...."

"Ajunngilaq," Snapep kipitippaa.

"Oqaloqatigiilaarumaarpugut piffissaqarluarlutit eqqarsaati-gereerukku kikkut illersorniarnarlugit."

Uliguap nasartaa ativaa orpeqannginnersarlu allorataarluni qimallugu. Maanna taarsilerpoq kisianni Harryp Quirrel

suli atimini takusinnaavaa soorlu nunamut nippusimasoq.

"Harry, sumiikkavinuna?" Hermione nillerpoq.

"Ajugaavugut! Ajugaavugut! Ajugaavugut!" Ron nilliavoq Harrylu tuviatigut pattalaarlugu. "Aamma unga Malfoy isaatigut tilluppara Neville kisimiilluni Crabbe Goylelu unatarniarai! Suli ilisimajunnaaqqavoq madam Pomfreyli oqarpoq qaangerumaaraa. Ila nuanneq akeqqagut ajorsartikkatsigit! Tamarmik inimi utaqqivaatsit. Nalliuttorsiussaa-gut. Fred Georgelu nalliuttorsiutissatsinnik kaagininik allarpassuarnillu igaffimmi tillissimapput."

"Utaqqilaarallarniarta," Harry anertikkarluni oqarpoq. "Akornusersorneqarata oqaloqatigiiffissatsinnik nassaartaria-qarpugut. Utaqqilaaritsi oqaluttuassaqarpunga..."

Ini inoqanngitsoq nassaarivaat Harryllu matu matutinna-gu qulakkeeqqaarpaa Peeves inimiinnginnersoq. Taava Ron Hermionelu qanoq takusaqarnerminik qanorlu tusagaqarnerminik oqaluttuuppai.

"Taavami eqqortumik eqqoriaasimavugut. Tassa Ujaqqat Inuunartut ujarneqarput Snapellu Quirrel Ujaqqanik ujarlernermini pinngitsaalillugu ikiortiseraa. Fluffymik sanioq-qutsinissamik ikioqquvoq - aamma Quirrelip angakkuartuusaarnera oqaatigaa - naatsorsuutigaa qimmeq kisimi akornusersuutaanngitsoq. Allani angakkuaatinik peqarsimasaaq Ujaqqamut illersuummik. Immaqa Quirrel Taartup Pissaaneranut akiuussutissamik sakkortuumik angakkuarsimassaaq immaqalu Snapep piuffigisimassavaa angakku-aat taanna atorunnaarseqqullugu..."

"Tassa isumaqarpit Ujarak Inuunartoq isumannaatsumik toqqorneqarsimasoq Quirrelip Snapemut tunniutiinnarnissaata tungaanut?" Hermione annilaarluni aperivoq.

"Taamaassappat Ujarak sapaatip akunnera ataaseq
qaangiutsinnagu tammareersimassaaq," Ron oqarpoq.

Norbert Uumasorujuk

Paasinarsivorli Quirrel ilimagisamit sapiissuseqarnerusoq. Sapaatit akunnerini tullerni sanigoriartuinnarpoq qarsoriartu-innarlunilu kisiannili suli nukillaalivissutut isikkoqanngilaq.

Init quleriit pingajuanni torsuusaq iserfigeqqusaanngitsoq sanioqqutiteraangamikku Harryp, Ronip Hermionellu siutitik matumut tutsittarpaat Fluffy suli taqqamani kaajalukaar-palunnersoq paasiniarlugu. Snapep avatangiisini pisarnertut isumalunnerminik avaangusutsippai, taamaanneralu pissutigalugu naatsorsuutigaat Ujaraq suli isumannanngitsoq. Quirrel naapikkaangamikku eqqaamajuartarpaat qümmas-saataasinnaasumik qungujuffigissallugu Ronilu ilaminut oqartalerpoq ittoqeraangat illaatigisassanngikkaat.

Hermioneli Ujaqqap saniatigut allamik eqqarsaatissaqaler-poq. Soraarummeernissaminut piareersarnissaminut atuar-nissani pilersaarusiulersimavaa allattukkanilu aaqqissuutiler-simallugit. Harryp Ronillu soraarummeernissartik suli isu-makuluutiginngeqaat naak Hermionep namminermisut ilior-nissaannik kaammattortuarteraluaraatik.

"Hermione soraarummernissarput suli ungaseqaaq."

"Sapaatit akunneri quliinnanngorput," Hermione sukan-nersumik akivoq. "Ungasinngilaq. Nicolas Flamelimut sekundiunngilarluunniit."

"Uagummi 600-t sinnerlugit ukioqanngilagut," Ronip eqqaasippaa. "Aamma sooq soraarummeerutissatit atuaq-qissavigit? Suut tamaasa nalunnereerpatit."

"Sooq uteqqiissanersunga? Silaqaraluarpit? Nalugakku ukiumi tullermi atuaqqissagutta angusisariaqartugut? Ilinniagasserinissara pingaaruteqartorujussuuvoq. Qaammatip ataatsip matuma siornatigulli aallartereertus-saagaluarpunga. Nalulluinnarpara sooq taama sivistutigisumik utaqqisimanerlunga...?"

Ajoraluartumik aamma ilinniartitsisut Hermionetut eqqsarpasipput. Atuartut angerlarsimaffimmi suliaasaan-nik tuniorangaarmatigit taakkununga poorskimi atuan-ngiffik juullimi atuanngifittulli nuannertiginaviarunanngi-laq. Aammami eqqissisimanarinngilaat Hermione eqqamin-ni tusaajuaramikku uumasorjuup aavata assigiinngitsunut aqqaneq marlunnut atornissaanik alanngaarpaluttuartoq imaluunniit angakkuaat atorlugu ussersornissamik sungiu-sartuartoq. Harryp Ronillu anersaaruluttuarlutik sunngif-fimmik ilarujussua Hermione ilagalugu atuakkanik atorni-artarfirmi atorpaat angerlarsimaffimmi ilinniagassatik naalliuutigalugit persaralugillu.

"Tamaasa alanngaalersinnaalernavianngilakka," ualit ilaanni Ron pilerpoq allaallu suluk nerrivimmut miloriullu-gu. Atuagaateqarfiup igalaavisigut kipisalluni silammut isi-ginnaarpoq. Ulloq taanna qaammaterpassuit ingerlanerini siullerpaamik seqinnerpoq. Qilak allaaqqippoq tungujorlu-nilu silaannarlu aasarpaluttumik tipeqalereersimavoq.

Harryp qupperarpaa atuagaq Naasut pupiillu angakkua-tit tusindit. Ron oqarpallattoq tusaagamiuk qummut qiviar-poq. "Hagrid! Maani atuagaateqarfirmi sulerivit?"

Hagridip arriitsunnguamik ingerlalluni ornippai sunaa-

nersoq tunumini toqqortaralugu. Hagridip savap meqqunik qaatigooqarluni inimi taamaattumi isersimanera ippinnaqateqanngilaq.

"Takusassarsiortungaana," pinngitsuusaarpasilluni oqarmat ingerlaannaq pasitsapput. "Ilissimi sulerivisi?"

Ingerlaannaq pasitsaateriataarpai. "Nicolas Flamel sulii ujarpisiuk?"

"Naamik, kinaanersoq qangali paasereerparput," Ron pingaakujulluni oqarpoq. "Aamma nalunngilarput qimmip suna paarineraa. Tassa Ujarak..."

"Nipaarsaarniarit!" Hagrid eqqaminut qinipallappoq tusarnaartoqarnersoq paasiniaarlugu. "Nillianak. Sunaana eqqarsaatigaajuk?"

"Kisiannimi arlalinnik apeqqutissaqarfigaatsigit," Harry oqarpoq. "Fluffyp saniautut suut allat isumannaarsuutaapat?"

"SHHH!" Hagrid oqaqqippoq. "Tusaagitsi, kingusinnerusukkut pulaarsinnaavarsinnga. Neriorsorsinnaanngilassi oqaluttuunniarlusi kisiannili tamanna pillugu maani oqalus-sanngilasi atuartut tusaasinnaavaasi. Paasisaqarunik isumaqalissapput uanga oqaatilliisimasunga."

"Taava kingusinnerusukkut takussaagut, Hagrid," Harry oqarpoq.

Hagrid kigaatsorsuamik ingerlaqqippoq.

"Sunamitaava tunumini toqqortarigaa?" Hermione eqqarsarpasilluni oqarpoq.

"Isumaqaarpisi Ujaqqamut attuumassuteqartoq?"

"Takusalaassavara suminngaanniit aggersimanersoq," Ron ilinniagasseri katalluni oqarpoq. Minutsit qulit qaangi-ummata atuakkat arlallit unermillugit uterpoq. Atuakkat nerriuiup qaanut ilipiloorpai. "Uumasorujuit!" Isussuppoq.

"Hagrid uumasorujuit pillugit atuarsimavoq! Qulequtaat takulaariarsigit! Tuluit Nunaanni Irlandemilu uumasorujuit assigiinngitsut aamma Mannimmiit uumasorujummut: Uumasorujunnik paarsisunut ilitersuut."

"Hagrid qangalili uumasorujuutitaarusuppoq. Naapeqqaaratta tamatuminnga oqaluttuuppaanga," Harry oqarpoq.

"Kisiannimi inerteqqutaapput," Ron oqarpoq. "Uumasorujunnik tukertitsisarneq Warlock-konventionimi 1709-mi inerteqqutaalerpoq, tamanna inuit tamarmik nalunngilaat. Aammami Mugglerit ingalassimaniarneri ajornakusuulissaaq naatsiivitsinni uumasorujuuteqartalerut ta - aammami uumasorujuit nujuillisinneqarsinnaanngillat. Uumasorujuit ulorianartuupput. Takussagaluarpasi Charliep Rumæniamiilluni uumasorujunnit nujuartanit saassunneqarluni uutiterneri."

"Kisiannimi Tuluit Nunaanni nujuartanik uumasorujooqanngilaq, ilaa?" Harry oqarpoq.

"Ilumut, soorunami peqarpoq." Ron oqarpoq. "Waliserit qorsuit Hebriderillu uumasorujui qernertut Tuluit Nunaanni najugaqarput. Angakkuarnermik Naalakkersuisoqarfiup nukippassuit atorlugit tamanna isertuunniarsaraa. Tassa taamaavippoq. Angakkoqatitta Mugglerit uumasorujunnik takunnissimasut puigorsaatinik angakkuartariaqartarpaat.

"Hagrid suniartoruna?" Hermione oqarpoq.

Nalunaaquttap akunnera ataaseq qaangiummat matuersaatinik nakkutilliisup illuaraanut kasuttoramik tupigusuutigaa saagut tamarmik saagusimanerat. Tusaavaat Hagridip nipaa nillerpaluttoq: "Kinaana?" Taava matu ammarpaa

iseriarmatalu tuaviinnaq matupallallugu.

Illup ilua ipianngunarluni kiattorujussuuvoq. Naak sila kiakkaluaqisoq Hagridip kissarsuut kukussimavaa. Tüliorpoq hermelinillu neqaannik qallersuutissaliamik sandwichimik sassaallerfigalugit pissuserissaarlutik naaggaagaannik.

"Atagu - arlaannik apeqqutissaqarpisi?"

"Aap," Harry oqarpoq. Asattuunnissaa pisariaaruppoq. "Tusarusupparput Ujaqqamik Inuunartumik toqqorsinermut atatillugu qimmersuup Fluffyp saniatigut Ujaqqamik tillinni-arniartunut isitsaaliummik allamik peqarnersoq?"

Hagrid qinngorlerpoq.

"Soorunami tamatuminnga oqaluttuussinnaanngilassi," oqarpoq. "Naluara peqarnersoq aamma naammattumik ilisimasaqareerpusi. Nalussanngilarsili una: Annertunerusumik ilisimasaqartuugaluaruma oqaatiginavianngikkaluarpara. Ujarak pissuteqavilluni maani paarineqarpoq. Gringottsimi tillinneqangajavissimagami maanga toqqorneqarsimavoq - tamannali ilissi ilisimareerparsi. Eqqoriarsinnanngilarali qanoq ilillusi Fluffyqarnera ilisimanerissi."

"Taamaattoqanngilaq, Hagrid, immaqami oqaluttuuterusunngilatsigut, kisianni oqaluttuarerusunngisannik ilisimasaqarputit. Maani qanoq pisoqarnera tamaat ilisimavat," Hermione qujanarniarpaluttumik nersorinnippaluttumillu nipeqarluni oqarpoq. Hagridip umissui aalassapput paasivaallu qungujuttoq. "Paaserusuinnarippununa Ujaqqamik isumannaarsuinermt kina akisussaanersoq, allamik naamik," Hermione nangippoq. "Paaserusuinnarparput Dumbledorep suliaasaq taanna kimut tunniussimaneraa - soorunami ilinnut suliaasanngortinnerata saniatigut."

Oqaatsit taakku tusaramigit Hagrid pingaakujuppasilerpoq. Harryp Ronillu Hermione alutoreqalugu isigaat.

"Aap, immaqami tamatuminnga oqaluttuussinnaavassi - eqqarsalaariarlunga - Fluffy uanga atorippara... taava ilinniartitsisut ilaat angakkuaasiorput... professor Spire, professor Flitwick, professor McGonagall aammalu" Atit tulleriiaarlugit oqaatigisarpai inussaminik kisitsiitigaluni. "Aap, aamma professor Quirrel professor Dumbledorelu nammineq, soorunami. Usi, ataaseq puigunnguatsiarpara. "Kinamaannaa kingullersaava? Aap, usi, professor Snape aamma angakkuaasioqataavoq."

"Snape?"

"Aap, Snape suli eqqarsaatigerujoorpisiuk? Ukorsiinngui tusarnaassuusi. Snapep nammineerluni Ujaqqap tillinneqannginnissaa suleqataaffigaa. Ujarak tillinnianngilaa."

Harryp nalunngilaa Ron Hermionelu namminermisulli eqqarsartut. Snape Ujaqqap tillinneqannginnissaanik illersuutissamik sanaqataasimaguni paasisimassavaa ilinniartitsisooqatimi illersuut suna atussallugu aalajangersimaneraat. Nalunanngitsumik angakkuaatit tamaasa ilisimavai ataasiinnaq kisiat pinnagu, tassalu Quirrelep angakkuaataa. Quirrelep isertugaataa paasiguniuk Fluffy taamaallaat toqtartiaqassavaa.

"Illit kisivit nalunngilat Fluffy qanoq ililluni sanioqqunneqarsinnaanersoq, ilaa taamaappoq, Hagrid?" Harry ernumarpasilluni aperivoq. "Aammami tamanna allanut oqaatiginngisaannassavat, ilaa? Ilinniartitsisut arlaannulluunniit?"

"Kialluunniit ilisimanngilaa, taamaallaat Dumbledorelu marluulluta nalunngilarput." Hagrid usorsisimaarluni oqarpoq.

"Ila qujanassusia," Harry ilaminut nipikitsuliorpoq.

"Hagrid, igalaamik ammaasinnaanngilatit? Kiassuarmik ipilerpunga."

"Ajoraluartumik, tamanna ajornavippoq. Utoqqatserpunga, Harry." Hagrid oqarpoq. Harryp takuaa inneq isigigaa. Harryp isai malittarai.

"Hagrid - sunaana, suit?"

Kisiannili nalunngereerpaa sunaanersaq. Ikumatitap iluani uunnaaviup ataani mannerujussuaq qernertoq takulerpaa.

"Suunngilaq," Hagrid oqarpoq uminilu eqqissiveerulluni tagiartulerlugit, "Tassaana...eeh..."

"Suminngaanniit pissarsiaraajuk, Hagrid?" Ron aperaaq kisarsuutillu ammaannartup saanut aqupilluni mannik takulluarumallugu. "Akisusimassaqaaq. Pisiarilerakku aningaasarpasuit atorsimassavatit?"

"Eqqugaraana," Hagrid oqarpoq. "Ippassaq unnukkut imerniartarfiliarama takornartaq taassuminnga immeraati-ginnikkusuttoq naapikkakku eqqorpara. Annaagamiuk nuannaarutigünnannguatsiarpaa."

"Tukerpammi qanoq iliorniarpit?" Hermione aperaaq.

"Aap, tamanna atualaarnikuuara," Hagrid oqarpoq atuagarsuarlu akitsimi ataaniit amnullugu. "Atuagaateqarfimmi una pissarsiaraara - Nuannariinnarlugu aningaasarsiutigalugulu uumasorujunnik tukertütsineq - atuagaq pisoqalilaarsimagaluarpoq kisiannili paasisariaqakkakka tamarmik tassa-nüpput. Mannik pejsimi ikumasumiitinneqassaaq uumasorujuit mannik innermik anersaartorfigisarmatigik. Mannik tukerpat uumasorujuup piaraa akunnerit affai tamaasa puiaasamik snapsimik kukkukuuvaqqallu aavannik akusamik imigassaanik tunineqartassaaq. Unalu takulaariarsiuk - quppernermi uani uumasorujuit assigünnngitsut manni allattorneqarsimapput - uangalu piga tassaavoq Norgemiut Takhaliat. Taakkua qaqutigoortorujussuupput."

Imminut iluarisimaartorujussuuvoq Hermioneli tulluusi-
maarpallaanngilaq.

"Hagrid ilumu qisummik sanaami najugaqarputit," oqar-
poq.

Hagridilli tusaanngilaa. Niperujuujutigaluni inneq taku-
sarpaa.

Maannali aamma isumakuluutissaqalerput. Hagrid qanor-
mita pineqassava paasineqarpat uumasorujummik inerteq-
qutaasumik illuaqqamini toqqortaartoq.

"Qanormita issagaluarpa eqqissisimasumik inuuneqaral-
araanni," Ron oqartarpoq unnuit tamaasa ilinniartitsisut
angerlarsimaffimminni ilinniagassiisutaat amerlasoorpas-
suit suliarileraangamikkik. Hermionep Ron Harrylu ilinnia-
gassaannik pisariillisarniarlugit najoqqutassiuussimavai.

Ullut ilaanni ullaakkorsiortillutik Hedvig timmilluni tak-
kuppoq Harrymut nalunaarummik nassarluni. Nalunaarut
Hagridimeersuuvoq. Oqaatsit marluk pappiaqqamut allas-
simavai: Uumasorujuk tukilerpoq.

Ron piareersimavoq atuariartunngitsoornissaminut inger-
laanniarlu Hagridip illuaraanukarnissaminut Hermionelli
tamanna tusarusunngilaa.

"Hermione, inuunitsinni qasseriarluta uumasorujummik
tukertumik takussangatissorivisigit?"

"Kisiannimi atuarnarput nakkutigisariaqarparput.
Naveersiinnassaagut ajornartorsiutigiligassagullu suunngil-
lat Hagridip paasitikkuni ajornartorsiutigiligassaanut naleq-
qiullugit."

"Nipangerit!" Harry isussuppoq.

Malfoy eqqannguanniippoq Harryllu takusinnaavaa
oqaatsitik tusarusuttorujussuugai. Qanormitaava annertuti-

gisumik paasisaqarpa? Harryp Malfoyip isikkua nuannarinngivippaa.

Ron Hermionelu atuariartoramik aqqutaa tamaat oqqapput, naggataatigulli Hermione akuersivoq anitsiarunik Hagridip illuanukaqataanissaminut. Atuarfiup siarna anitsiaqqusilluni sianermat pingasuullutik tigumiatik iperarpaat tuaviinnarlu orpippassuit sinaanut Hagridip illuaraanukarlutik. Hagridip pissanganermik sajuttuinnaalluni tikilluaquai.

"Tukilivippoq." Nerriviup tungaanut ajappai. Mannik arlalinnik qupisimavoq takusinnaavaallu manniup iluani aalasoqartoq. Aamma tusaaneqarsinnaavoq piaraq silarsuarmut anillanniarluni mannik putuniarlugu tamaviaartoq.

Tamarmik issiavinnik tigusillutik nerrivik qanillillugu ingipput isiginnaalerlutillu.

Taava nipi aalajangersimarpaluttoq kigartuerpaluttoq tutsiuppoq manniullu qalipaa aserorpoq uumasorujuullu piaraa nerrivimmut nakkarluni. Isigisaq pinner-suinnaangilaq. Harryp uumasorjuaraq assingutippaa sialussiummut siaartartumut qernertumut eqitersimasumut. Sului imangertap suluinut assingusut timaanut saluttumut naleqqiullugit angisoorujussuupput. Qingaa takisoorujussuuvoq sorlorujussuaqarluni, mikisuarakasinnik nassoqarpoq isaalu anilngasut orangemik qalipaateqarput.

Tangajorpoq sorluanninngaanniillu aamat ikittunnguit tammipput.

"Ilaa pinneq?" Hagrid aalaterneqarpasilluni isussuppoq. Assani siaarpaa uumasorujuk niaquatigut tagiartorniarlugu. Uumasorjuup inuai keeriarpai tuloissanilu ipittut takutillugit.

"Inequnaq, anaanani ilisarisalereerpaa!" Hagrid oqarpoq.

"Hagrid," Hermione oqarpoq, uumasorujuk qanoq sukatigisumik alliartortarpa?"

Hagridip kiinaa qarsoriataarpoq - pissippoq igalaallu tungaanut arpaannaq aallarluni.

"Sunaana?"

"Saagut akornisigut itsuartortoqarpoq - nukappiaqqamik - nukappiararlu atuariup tungaanut arpappoq."

Harry tuaviinnaq matumut arpappoq silammullu alakarluni. Nukappiaraq ungasillereeraluartoq kinaanera paat-suugassaanngilaq.

Malfoyip uumasorujuk takusimavaa.

Sapaatip akunnerata tulliani Malfoy illakusuttoq takusalerpaat. Harry, Ron Hermionelu annilaangallutik inuupput qanorlu pineqassanerlutik naluaat. Sunngiffimminni Hagridip illupalaannguani taartuinnarmiittarput eqqissisarniaraluarlugulu.

"Uumasorujuk anisittariaqarpat," Harry kimigiuserluni oqarpoq. "Iperarniaruk."

"Taamaaliorsinnaanngilanga," Hagrid oqarpoq.

"Nammineernissaminut mikivallaaqaaq. Immineerneqaruni toqussaaq."

Uumasorujuk isiginnaarpaat. Sapaatip akunnerata ataatsip ingerlanerinnaani pingasoriaammik allisimavoq sorluisigullu pujoq aniavoq. Hagridip suliassani sularisinnaanngilai uumasorujuup atorfissaqartittuarmani. Sumi tamaani snapisit puukui takussaapput naterlu kukkukuut meqqunik qallersimavoq.

"Norbertimik atserpara," Hagrid oqarpoq uumasorujullu asannippaluttumik qissimillugu. "Maanna sungiutivipaanga. Takoriarsiuk: Norbert! Norbert! Anaanamut...!"

"Silaarussimavoq." Ron ilaminut isussuppoq.

"Hagrid," Harry nipituumik oqarpoq, "ullut 14-it qaangi-uppata Norbert illunnit annerulersimassaaq puigussanngilallu Malfoy qaquguluunniit Dumbledoremut oqaatilliisinaammat."

Hagridip qarluni kiivaa.

"Nalunngilara maani tigummisinnaanagu kisiannili ani-siinnarsinnaanngilara. Taamaaliorsinnaanngilanga."

Harry Ronimut saariataarpoq.

"Charlie" oqarpoq.

"Aamma illit paatsiveerutilerunarputit," Ron oqarpoq. "Ronimik ateqarpunga, tamanna eqqaamassagunarpat?"

"Naamik, una pivara - Charlie - qatanngutit, Charlie Rumæniami najugalik uumasorujunnillu ilisimatusartoq. Norbert Charliemut nassiussinnaavarput. Charliep paa-risinnaavaa nammineersinnaalerpallu aniguisillugu!"

"Isumassarsiatsialak!" Ron oqarpoq. "Qanoq isumaqar-pit, Hagrid?"

Naggataatigut Hagrid kimigiiserfigalugu akuersitippaat uppiq Charliemut allakkisartinneqassasoq ajornartorsium-mik ikioqqusummik imalimmik.

Sapaatip akunnera tullesq kigaatsuaqqamik ingerlavoq. Pingasunngornermi unnukkut Harry Hermionelu kisimiil-lutik isersimaartarfimmiipput. Ilaat qangarsuarli innareersi-mapput. Nalunaaqutaq iikkamiittoq unnuaqqeqarluni tutsi-uteruttortoq qalipagaq iikkamiittoq sanimut illikartinneqar-poq Ronilu putukkut takkuppoq Harryp uliguaa ersigun-naarsitsisartoq atorsimasani piutugalugu.

Hagridimiissimavoq Norbertip nerisinnerani ikiuukkiartor-luni, taannalu massakkut ima atsigilersimavoq teriarsuit

toqungasut karsikkuutaarlugit nerisalersimallugit.

"Kiigaminga!" Oqarpoq assanilu kakkissarfimmik aaga-sattumik nimmersimasoq takutillugu. "Sivikinnerpaamik sapaatip akunnera ilivitsoq allassinnaajunnaarpunga. Ilumut oqarfigissavassi uumasorujuk taanna uumasunit naapitannit allanit ingasannersaavoq. Hagridimulli kaniinap piaraatut maavaartutut ippoq. Kiimmanga naveerpaa-nga oqarluni ersitissimagiga, anileramalu sinnassarlugu erinarsorfigigaa takuara."

Igalaakkut taartukkut kasuttortoqarpaluppoq.

"Hedvigiana!" Harry pilerpoq tuaviorlunilu ammaak-kiartorlugu. "Charliep akissutaa nassarsimassavaa!"

Asasara Ron.

Qanoq ippit? Qujanaq allakkannut - qilanaarpunga uumasorujup parinissaanut, kisiannili maangaanmissaa ajornartorsiutaalaassaaq. Isumaqarpunga pilsaanerpaassasoq ikinngutinut sapaatip akunnera ataaseq qaangiuppat uannut tikeraartussanut nassartittuugalarussiuk.

Pingaaruteqartorujussuuvorli tikeraassama uumasorijummik aallarussinera paasineqannginmissaat.

Arfininngorpat unnuap qeqqata missaani uumasorujuk Hogwartsip napasuliaasa portumersaannukaassinnaavisiuk? Ikinngutima malikkumaarpaasi sulilu taarnerani aallarukku-maarpaat.

Piaarnerpaamik akigingaa.

Asannittumik inuulluaqqusillunga

Charlie

Imminnut isikkupput.

"Uliguaq ersigunnaarsitsisartoq suli pigaarput," Harry

oqarpoq. "Ajornarnavianngilaq - isumaqarpunga uligussap inuit marluk Norbertilu matusinnaagai."

Ilai sikitsiarput, sapaatip akunnera taanna naalliunnarsi-
maqaq. Suna tamaat sakkugalugu Norbert iperarusuler-
paat - aammami Malfoy.

Kisiannili ajornartorsiuteqaqqaartinnaatik iluatsitsisussaasi-
manngillat. Aqaguani ullaakkut Ronip assaa kilernikoq pul-
lalluni marloriaatiminik allisimavoq. Aalajangersinnaanngi-
laa ajornartorsiutini madam Pomfreyimut oqaatigissanerlu-
gu - tassami taassuma uumasorjuup kiggia takuguniuk
takusinnaassanerpa uumasup kiggerigaa? Assaa kusanaaqi-
sumik qorsorpaluttumik qalipaateqalersimavoq. Norbertip
tutoriai toqunartoqarsimassagunarput.

Atuarneq taamaatimmat Harry Hermionelu atuarfiup
napparsimavittaanut arpapput. Tassani Ron napparsimarpa-
seqaluni nalavoq.

"Assaga kisimi ajornartorsiutaajunnaarpoq naak kataler-
sutut misinnaraluatoq." Isussuppoq. "Malfoy sulii sissuigas-
saraarput. Atuarnissinni maaniippoq atuagaatima ilaannik
atorniartuusaarluni. Madam Pomfreyip upperalugu mappi-
uppaa. Sioorasaarpaanga kimit kiineqarsimasunga oqalut-
tuunniarlugu - tassami madam Pomfrey salloqittarakku qim-
mersuarmit kiitinnerarlunga, naak ilimagingikkaluarlugu
upperissagaanga. Malfoy Quidditchimik pissartanngorniun-
nermi unatarsimassanngikkaluarakku, akiniarnialeqaanga."

Harry Hermionellu sapinngisartik tamaat eqqissisarnia-
raluarpaat.

"Arfininngorpat unnuap qeqqa suut tamarmik qaangiutis-
sapput," Hermione oqarpoq, kisiannili tamanna Ronip
eqqississutiginngilaa. Akerlianilli siniffimmini ingeriataarpoq

qaamigut aallertorujussuanngorluni.

"Arfininngorpat unnuap qeqqa?" Iggiarlulluni pilerpoq.

"Naamik - naamik - eqqaalerpara Charliep allagai Malfoyip atugaani atuakkap iluanimmata. Maanna Norbert pillugu pilersaarutigut paasissajunnarsivai!"

Harry Hermionelu akinissaminnut periarfissaqanngitsoorput tassami maanna madam Pomfrey iserpoq aneqqullugillu Ron sinittariaqarmat.

"Pilersaarutitsinnik allanngortitsinissatsinnut kingusinaareerpugut," Harry Hermionemut oqarpoq. "Charliemut uppimmik nassitseqqinnissamut piffissaaruppugut. Puigussanngilarpullu Norbertip peerunnissaanut periarfistuorigatsigu. Allatut ajornartumik sapiisertariaqarpugut. Aammami uliguaq ersigunnaarsitsisartoq pigaarput taamaatumimmi peqarnerput Malfoyip naluaa."

Hagridip illupalaannguanukarput pilersaarutiminnik Charliellu ikinngutaanik oqaluttuukkiartorlugu. Illup silataani qimmeq Trofast nalavoq. Pamiua mattuteqarpoq. Hagridip igalaaq ammarpaa oqaluunniarlugit.

"Ajuusaaraluarlunga isertissinnaanngilassi," anertikkarpoq. "Norbert maanna ajornartorsiorami - ajornavianngilarli qaangissaqqaarpara."

Charliep allagaanik oqaluttuummanni isai qullilipput. Immaqali tamanna pissuteqaannarpoq Norbertip niuisigut kiisimammagu.

"Soqutaanngilaq, suunngilaq. Taamaallaat støvlikkut kii-vaanga - pinnguarusuttarnermik - sulimi meeraaraagami."

Meeraaqqap pamiuni iikkamut anaarluppaa igalaallu aviluaartillugit. Harry Hermionelu illussaarsuarmut uterput arfininngornerunissaalu ungasippallaartutut takorloorpaat. Norbertip inuulluaqqunissaanut piffissaq qanilliartortillugu

Hagrid nalliginerusimassagualarpaat qanoq pisoqarsinnaa-nera annilaangatigalugulu ernumassutiginnitsugualuarunikku. Unnuaavoq taartorujussuaq qilallu qulisimavoq Hagridip illupalaannguanut kingusinaalaarlutik apuummata Peevesip isertarfiup torsuusaani iikkamut tennisertup qimagunnissaa utaqqeqqaaramikku.

Hagridip Norbert karserujussuarmut isertissimavaa aallarnissaanut piareerlugu.

"Angalanissaminut teriarpassuarnik pissaqarpoq snapsis-saqarlunilu," Hagrid qiasunngulluni oqarpoq. "Aamma bamsiutaa poortorpara kiserliunnginniassammat."

Karsip iluaniit kukippalaaq nutsuERPalaarlutarsaapput; Harryp qularinngivippaa bamsip niaquerussimanissaa.

"Inuulluarit, Norbert!" Hagrid manittorpoq. Harry Hermionellu karsi uliguamik ersigunnaarsitsisartumik mataat namminnerlu aamma pulaffigalugu. "Ungaavaraq inuulluarit, puigussanngilakkit!" Hagrid aliasulluni oqarpoq.

Qanoq ilillutik karsi illussaarsuarmut apuussimanerlugu naluaat. Unnuamut qiteqqutilerpoq tamaviaarlutillu asso-roorput karsi tummeqqakkut marmoriusutigut qummut ingerlallugu. Torsuusat arlallit tummeqqallu allat aqqutigalugit naalliullutik tamaviaarsuataarput. Naak Harryp aqqut qaninnersioraluaraa aqqutaat naaffeqanngiusartutut naallinnartutullu misinnarpoq.

"Apuutilivippugut," torsuusaq napasuliat portunersaannut aqqutaasoq tikikkamikku Harry anertikkarluni oqarpoq.

Taamaalisorlu saannguaminni tassanngaannaq aalariartoqarmat Norbertip karsia nakkaangajappaat. Puigorluinnarpaat allanit takuneqarsinnaanatik taamaattumillu tuaviinnaq toqqorfissarsiupallapput. Inimi taaqisumi takullatsiarsinnaavaat inuit marluk ungasialaartumi akiuuttut.

Qaammartartuq qaamaallappoq.

Professor McGonagallip kipparissortuumik makiaarusilip qassutaasamillu nutsaminut nakkarnaveeqqutillip Malfoyip siutaata illua aalajangerlugu tigummivaa.

"Malittarisassamik unioqqutitsinermut pillaatissaatit," nillerpoq, "pointit 20-t Slytherinimit ilanngaaticineqassaput! Qanoq aamma qununak unnuaannakkut angalaarsinnaavit..."

"Tusaalaariannga, professor, Harry Potter erniinnaq takkutissaaq... uumasorjuuteqarpoq!"

"Pumasaannannik oqalunnak! Salloqittaanissannut qunungilatit? Qaaniarit - tamanna pillugu professor Snape oqaloqatiginiarpara, Malfoy!"

Majuartarfuit nimeriartortuusaartut sivingajaartut napasuliap qaarpiaanut aqquataasut ingerlafiginissaat annilaartitaa-rujussuarnerup kingorna soqutaajunnaarput. Aatsaat silamut nillertumut anillakkamik eqqissiallallutillu anersaatorsinnaanngoramik uliguaq peerpaat. Hermione nuannaangaarami pississaaqpoq.

"Malfoy pillarneqassaaq! Tamanna pillugu erinarsorusuummerpunga!"

"Sussa taamaaliornak," Harry siunnersuivoq.

Malfoyip ajortumeernera illaatigitiigalugu utaqqipput Norbert karsimini nipiliorusaartoq. Minutsit qulit missaat qaangiummata sanigutit sisamat timmillutik takkupput illusaarsuullu qalianut millutik.

Charliep ikinngutai nuannaagaat. Anuliarisimasartik Harrymut Hermionemullu takutippaat. Akunnerminni Norbert kivillugu timmissunniarpaat. Tamarmik Norbertip anulersornerani ikiuupput naggataatigullu Harryp Hermionellu assammillugit qutsavigaat.

Taava Norbert aallaarunneqarpoq.... angerlarsimaffit-taassanut... kiisamilu Norbert eqqarsaatigeqqittariaarup-paat.

Naammassinertik eqqissiallaatigeqalugu nuannaarutigalugulu majuartarfiit nimeriartortuusaartut ammukarfigaat. Kingorna uumasorujunnik naalliuuteqaqqissanngillat aamma Malfoy ajutoorpoq - nuannaarnerat kipitinneqarsinnaanerpa?

Apeqqutip akissutaa majuartarfiup ataani nassaassaavoq. Majuartarfiup naqqanut pillutillu Filchip kiinaa ammalortoq qarsungasorlu takuaat.

"Takuarsi, takuarsi," siorsualavoq. "Tassa naveersittusamngorunarpugut!"

Sunaaffa uliguaq ersigunnaarsitsisartoq atinngitsoorlugu qalianut qimassimagaat.

Orpippassuit inerteqqutaasut

Ajorneroriarsinnaanngilaq.

Filchip Harry Hermionelu professor McGonagallip allafianut ingerlappai. Tassani imminnut oqaaseqanngivillutik utaqqipput. Hermione sajuppoq. Harryp niaquani utoqqat-sissutissat nassuiaatissallu kaavipput tamarmik tupinnaan-nartut uppernaanngitsullu. Takusinnaanngivippaa tamatu-muuna qanoq ililluni annassinnaassanerluni. Ajortuliulerut-torlutik tigusaasimapput. Soormiuna taama mianersuaatsi-gisimasut uliguaq inuttaminik ersigunnaarsitsisartoq qaliani puigoramikku. Ilimananngivippoq professor McGonagallip unnuaannakkut aneernerannik utoqqatsissutissaat tusaaju-massagai. Aamma atuarfiup napasuliaasa portunersaanniis-simanertik pissutigalugu tigusaasimanerat ajorluinnartutut isigineqassasoq ilimanarpoq. Qujanartumilli Norberteqar-nera isertuussimavaat uumasorujummimmi assartuisut takuneqarsimasuugaluarpata ingerlaannaq kuffertiminnik poortuiseriarlugit aallartitaasimassagaluarput.

Harryli kukkulluinnassaaq isumaqaruni pissutsit suli ajorseriaqqissinnaanngitsut. Professor McGonagall takkuk-kami Neville ilagalugu iserpoq.

"Harry!" Neville nillerpoq. "Mianersoqquniarlutit ornik-kaluarpakkit Malfoy tusaagakku oqartoq tigusariniarlutit.

Oqarpoq illit uumasorjuuteqar...."

Harry kiinarsortorujussuuvog niaqqunilu ileqimisaartorlugu Neville nipangersinniaraluarnermik. Professor McGonagallilli suut tamaasa paasereerpai. Ajortuliortut saavannut pigami Norbertitulli innermik aniatitsitigingajap-poq.

"Ajortuliornissarsi ilimagisimanngikkaluarpara. Filch oqarpoq ulloriarsiortarfimmi napasuliamiissimasusi. Maanna nalunaaqutaq unnuakkut ataasinngorpoq. Massakkorpiag nassuiaateqarnissarsi piumasaraara!"

Hermione siullerpaamik ilinniartitsisup apeqqutaanik akisaqarsinnaanngilaq. Ateraasani nakkuppai inuusaliatut uninngaqqiissaartigaluni.

"Isumaqarpunga nammineerlunga qanoq pisoqarsimnersoq eqqoriarsinnaallugu," professor McGonagall nangip-poq. "Taamaaliornissamut silatoorujussuusariaqanngilaq. Malfoy uumasorujummik oqaluttuamik salloqittarsimavarsi ajortumeertinniarlugu. Taanna tigusarereerpara. Immaqa aamma quianarsorisimavarsi Longbottomip oqaatsisi tamaasa tusaammagit tamaasalu upperalugit?"

Harry Neville qiviarsaraluarpaa eqqissisarniarlugu. Kisianni Neville paatsiveeruteqqavog ajuallassimarpaseqalunilu. Neville pikkorluttoq nallinnaq - Harryp nalunngilaa Neville sapiiserujussuarluni taartorsuarmut anillassimassoq mianersogqusiartorniarluni.

"Iliusersi uissuummissutigeqaara," professor McGonagall oqarpoq. "Atuartut sisamat unnuap ataatsip ingerlanerinnaani makissimasut! Aatsaat taama ingasatsigisumik nalaataqarpunga! Taamaaliornissat naatsorsuutigingivikkaluarpara, Granger. Isumaqaraluarama silatunerusutit. Illillu Potter, isumaqaraluarama Gryffindor ilinnut

pingaaruteqarnerusoq. Tamassi naleqquttumik pillarneqassaasi - aap, aamma illit Longbottom. Unnuap taamaasinerani atuarfimmi angalaarnissinnut utoqqatsissutissaqanngilasi, pingaartumik ulluni makkunani ulorianartorsiorfiusuni! Gryffindor 50 pointinik ilanngaaffigineqassaaq."

"50!" Harry annilaajallappoq - kingullermik Quidditchimik unammigamik siuaraluarnertik annaasus-sanngorpaat.

"Tamassi immikkut 50 pointit," professor McGonagall oqarpoq sorlummillunilu.

"Professoriaa - ingasappallaaqaaq..."

"Taama isumaqanngilatit..."

"Akerlilissanngilluinnarparsinnga! Tamassi pingasuullusi massakkorpiaq innariartorniaritsi. Inuuleramali Gryffindorimi atuartunut aatsaat taama kanngusutsigaa-nga!"

Pointit 150-it annaavaat. Tamnanna isumaqarpoq Gryffindor maanna kingullikunngortoq. Unnuap ataasiinnaap ingerlanerani Gryffindorip pokalinnannissaralua maangaannartippaat. Harry napparsimasutut nallinnartutullu misigisimavoq. Qanoq iliorlutik aaqqiisinnaappat?

Unnuap sinnerani sineqqinngilaq. Akunnerni arlalinni Neville akitsiminut pulluni qiarpaluttoq tusaavaa Harrylu saammarsaaruskaluarluni saammarsaataasinnaasumilluunniit oqaasissaqanngilaq. Nalunngilaa Neville namminermisulli aqagussaq annilaangagigaa. Gryffindorimi najugallit allat qanormita oqassappat qanoq iliorsimanertik oqaluttuarineqarpat?

Aqaguani ullaakkut Gryffindorimi atuartut igalaamineq sioqqanik qorlortulerlugu nalunaaqutsiaq kollegiat qanoq pointeqartiginerannik takutitsisoq sanioqqukkaangamikku

isumalioraluarput kukkuneqartoq. Qanoq ilillutik 150 pointinik annaasaqarsinnaagamik? Taavali tusatsiagaqartalerput: Harry Potter, Harry Potter tusaamasaq, Quidditchimik arsaannerni marlunni sapiitsorsuartut tusaa-malersimasaat pointerpassuarnik annaasaqarnerannut pi-suuvoq. Taanna atualerlaallu allat marluk sianiilliorsimap-put ajugaanissaraluallu pinngitsoortillugu.

Harry nuannarineqarnerpaanngorsimagaluarluni aluto-rineqarnerpaanngorsimagaluarlunilu maanna atuarfimmi atuartunit tamanit ajorineqarnerpaalerpoq. Ravenclawip Hufflepuffillu atuartuisa allaat kamaappaat taakkumi Slytherinip pokaliminik annaasaqarnissaa qilanaarigaluar-paat. Harry sumiikkaluaraangamiluunniit qinngasaarneqar-tuarterpoq. Inguleraangamikku nipikillissaarput - eqqa-minniikkaluarpalluunniit. Kisiannili Slytherinip atuartui nuannaqaat; torsuusani naapikkaangamikku assatik pat-taattarpaat nilliallutillu: "Qujanarsuaq Potter. Akiligassaqarfigaatsigit!"

Ron kisimi ilumoortuujuarpoq.

"Sapaatit akunneri marlussuit qaangiuppata puigorunar-paat. Piffissap ingerlanerani Fred Georgelu pissutaallutik pointerpassuit annaanikuuagut, taakkuli suli tamanit nuan-narineqarput." Ron oqarpoq.

"Kisiannimi uattulli pointinik taama amerlatigisunik annaasaqartitsinngillat, ilaa?" Harry isumatsassimalluni oqarpoq.

"Aap, taamaappoq," Ron nassuerpoq.

Kingornginnaatigut isumassarsineq iluaqutaanngikkalu-artoq Harry imminut neriorsorpoq kingorna allanut tun-ngasunik akuliuteqqinniarani. Paasisassarsiukujunneq taa-maatippaa. Kanngusungaarami Wood ornippaa unammi-

sartuujunnaarniarluni oqaluttuukkiartorlugu.

"Tunuarniarpit?" Wood suangasarluni oqarpoq. "Aamma sumut iluaqutaassava? Qanoq iliorluta pointit uterteqqissa-vagut holdinut allanut minnerpaamilluunniit iluatitsisinnaa-nissatsinnik ilimanartoqanngippat?"

Aamma arsarnierluunniit Harryp soqutigiunnaarpaa. Sungiusaraangamik ilaasa oqaloqatigiumaneq ajorpaat eqqartortariaqaraangamikku atia taanagu ujaasisumik taaginnartarpaat.

Hermione Neville aamma nuannersumik atugaqanngilat. Taakkununga inuuneq atoruminarnerrugaluarpog taakkumi Harrytulli tusaamasaatiginngillat, taamaakkaluartorli kialluunniit oqaloqatigerusunngilai. Atuaraangamik Hermione qangatuulli sammineqassaarpog. Niaqquni sikip-paa nipaatsumillu sulilerluni.

Harryp nuannaarutiginnangajappaaluunniit soraarum-meertussanngortetik. Ilinniagassatik soraarummeerutissanillu uteqqiinerit allanut sangusaataapput, naalliunneranik puigorsaataallutik. Ron Hermionelu peqatigalugit allanut akuliunnaveersaarpog unnuarsuarmullu ilinniagassereqatigisarpai. Nakorsaasiassat nalunarnerpaat akussaat alanngaarniarlugit atuartarput, angakkuarnerit kisitsisillu alanngaartarlugit, oqaluttuarisaanermi angakku nassaavisa aammalu nissiaqqat pikititsitsinerisa ukiui ulluilu alanngaarniartarlugit....

Kisiannili soraarummeernissamut sapaatip akunnerinnanngortorlu pisoqarpoq Harryp sumulluunniit akuliuteq-qinniarnani aalajangerneranik allannngortitsisumik. Ualit ilaanni atuagaateqarfik kisimiilluni qimakkamiuk init atuartitsiviit ilaannit kappialaneq tusaalerpaa. Nipip tungaanut ingerlagami Quirrelip nipaa ilisaraa.

"Naamik - naamik - taamaalioqqinnak..."

Allaanngivippoq siorasaarneqarpaluttoq. Harry nipaarsarluni qanillattorpoq.

"Ajunngilarmi - taamaaliussaanga...." Quirrel manittorluni oqartoq tusaavaa.

Tamatuma kinguninngua Quirrel arpaannaq anillappoq nasani uisaqaluni aaqqinniaatigalugu. Qarsungaqaq allaanngivipporlu qiangajappassissoq. Tuaviinnaq ingerlavoq erniinnarlu aanngarluni. Harryp qularinngilaa profesorip takunngikkaani. Quirrelip tummarpalunnera tusarsaajunnaarmat aatsaat inimut atuartitsivimmut alakkarnialerpoq. Inoqanngilaq inilli akiani matu ikersisimavoq. Harryp matu tikilivillugulu eqqaaleriataarpaa akuliunniarnani aalajangermini.

Kisiannili pisariaqanngilaq kina inimiissimanersooq eqqoriassallugu. Harryp qularinngivippaa Snape inimiissimasooq taamaattoqarnissaalu ilimagingingaaramiuk sunaluunniit eqquniaassutigisinnaavaa. Ilimanarluinnarpoq maanna Snape imminut upperinerulersimassasooq tassami qularnanngivippoq Quirrel kiisami nakkaannarsimasooq.

Harry atuagaateqarfimmut uterpoq Hermionep Ron ulloriarriornermik oqaluttuartileruttora. Harryllu tuaviinnaq tusakkani oqaluttuari.

"Kiisami Snapen iluatsippaa!" Ron pilerpoq. "Quirrelip oqaluttuarisimappagu Taartup Pissaaneranut angakkuaatini qanoq atorunnaarsinneqarsinnaanersooq..."

"Kisiannimi Fluffy suli paarsivoq," Hermione oqarpoq.

"Immaqa Snapen Hagrid aperinngikkaluarlugu akornutip taassuma qanoq saneqqunneqarnissaa paasereerpaa," Ron oqarpoq atuagaasivippassuillu eqqaminniittut qissimillugit. "Qularinngivippara atuagaqarnissaa qimmerujussuarmik

pingasunik niaqulimmik qanoq ililluni sanioqqutsisinnaanermik oqaluttuarmik. Qanoq iliussaagut, Harry?"

Ron takusassarsiorusuleqqissimavoq Harryli suli akerianngitsoq Hermione akivoq.

"Dumbledore oqaloqatigiartortariaqarparput. Qangalili taamaaliorsimassagaluarpugut. Nammineerniaannarutta qularnanngivissumik naggataatigut atuarfimmiit anisitaassaa-gut.

"Kisiannimi uppersaatisaqaanngilagut!" Harry oqarpoq. "Quirreliq annilaangaqigami tapersersornavianngilaatigut. Snape oqaannarsinnaavoq nammineq nalullugu qaqqat torulliat qanoq ililluni Iluartut Ulluanni illussaarsuarmut isersimanersoq aammalu init quleriit pingajuanni torsuusap eqqaaniissimanngisaannarluni. Kina upperinerussagaat ilima-gaasiuk, Snape uagulluunniit? Naluneqaanngilarmi Snape nuannarinngikkipput. Dumbledore isumaqassaaq soraarsitaatinniarlugu taamaaliortugut. Filchip aamma ikiornavianngilaatigut inuunini navianartorsiortinneqassagaluarpalluunniit, Snapelu kammagiipput aappaatigullu atuartunik anisitaasoqarpat nuannarissaqaa. Aammi eqqaamassavarput Fluffy Ujarallu pillugit ilisimasaqaqqusaannginnatta. Torsuusami toqqortaqaqneranik ilisimasaqarluta oqaraluarutta annertuumik nassuiaasariaqassaagut."

Hermione qiummattutut isikkoqarpoq Ronili tunuartitasaanngilaq.

"Qanormi issava namminersuutigutsigu...?"

"Naamik," Harry aalajangersimarpalulluni oqarpoq.

"Namminersornerput naammareerpoq."

Jupiterip qaammataasa assinga tiguaa oqaaseqaqqinnanilu misissuataalerlugu.

Aqaguani ullaakut Harrymut Hermionemut

Neville mullu nalunaarutinik tunniussisoqarpoq. Allakkat tamarmik assigiimmik allanneqarput:

Pillagaanerit unnugu aqqanermut aallartissaaq.

Filch torsuusami naapissavat.

Prof. M. McGonagall

Harry malittarisassanik unioqutitsinertik pillugu pillarneqarnissartik puigorsimavaa. Hermione qiviarpaa naatsorsuutigalugulu unnummi ataatsimi ilinniagasserinngitsoornisani naammagittaalliutigissagaa taannali oqaatsimik ataatsimilluunniit oqaaseqanngilaq. Harrytulli misigivoq pillarneqarnissartik pissusissamisuuginnartoq.

Unnuk taanna nalunaaqutaq aqqanermut Gryffindorip isersimaartarfiani Ron inuulluaqqaat Neville lu ilagalugu isaariap torsuusarsuanut ingerlallutik. Filchip nikorfalluni utaqqivai - aamma Malfoyip utaqqivai. Harry eqqarsaatigisimanngilaa Malfoyip aamma pillarneqarnissaa.

"Malissinga," Filch oqarpoq qaammartartorlu ikeriarlugu silammut ingerlappai.

"Tulliani atuariup malittarisassaanik unioqutitseqqilerussi eqqarsaqqaaartariaqassaasi, ilaa?" Nuannaapilulluni pitsaasaartuusaarlunilu oqarpoq. "Usi... sulerulutsitaaneq sak-kortuumillu pillaneq isumaga malillugu perorsaataapput pitsassuit... ajoraluartumilli pillasarnert qanganitsat atorunnaarsinneqareerput... nammineerlunga isumaga atussagukku pitsaanerpaatissagaluarpaa ulluni marlussunni paffissigut qilerlusi nivingatitaasuugaluarussi. Paffinnut kalunerit sulii allaffinniitippakka ukiullu ingerlanerini uuliatertu-
artarpakka arlaanni atorfissaqaleriataarsinnaammata...
Atagu, qaaniaritsi, qimaaniarnissarsilu eqqarsaatigissanngil-

luinnarparsi taamaaliorussi ilissinnut ajornerpaamik kingu-neqarsinnaammat."

Atuariup nunaataatigut taartukkut ingerlapput. Neville manittorunnaarsinnaanngilaq. Harryp qanorpiaq pillarne-qarnissartik eqqoriarsinnaanngilaa ilimagaali amiilaarnartorujussuusussasoq tassami taamaanngippat Filch taama nuannaapilutsiginavianngikkaluarmat.

Qaammatigippoq nuiarsuilli alittorsimasutut isikkullit qaammatip qinngorneri nuisissinnaanngilaat. Harryp siu-nerminni Hagridip illuata igalaavi qaamasut takusinnaavai. Taava ungasissumiit nillerpaluttoqartoq tusaalerpaa.

"Illit-una Filch? Tuaviorniarit ingerlaqqipallanniassaanga

Harry sapiinneruleqqippoq. Hagrid ilaassappat ajorpallaarnavianngilaq. Eqqissiallannera malunnarsimaqimmat Filch oqapallappoq: "Immaqa isumaqarputit sianiitsoq taana ilagalugu nuannisaariarniartugut, ilaa? Kisiannili taamaattoqanngilaq, nukappiaraq-aa - orpippassuarnukassaasi ilimaginngilaralu ilivitsuullusi uterumaartusi, ilumoorlunga oqassaguma taamaappoq."

Neville sumunnarnissartik paasigamiuk nimaalerpooq Malfoyilu allaanngivippoq qertussimasooq.

"Orpippassuarnukalerpugut?" Oqarpoq, pisarnermisullu pingaakujuppasikkunnaarsimavoq. "Unnuaannakkut ornissinnaanngilarput - orpippassuarni sorpassuaqarpoq - inun-nut amaruunngortartunut allaat, taama tusaamavara."

Nevillep Harryp atsipaaavi tiguai nipaalu allaanngivippoq ersinermik ipilersooq.

"Taamaalluarsinnaavoq," Filch oqarpoq nuannaarnini malunnarnaveersaartillugu. "Kisiannili perulluliuunnginnissinni tamanna eqqarsaatigeqqaarsimasariaqaraluarparsi, taamaanngila?"

Hagridip taarsuup ataani ornippai. Qimmia saniani ar-riitsunnguamik ingerlavoq. Pisissersuani tigumiarpaa qarsu-
usivillu unermillugu.

"Kiisami takkuppusi," oqarpoq. "Akunnerup affaani
utaqqereerpunga. Harry Hermionelu qiimmanniaritsi!"

"Illiusuuguma taama inussiarnisaarfigitigissanngikkaluar-
pakka," Filch peqqarniippasilluni oqarpoq.

"Pillarneqartussaasunuku!"

"Tamannalumi pissutigalugu immaqa kingusinaarputi?"
Hagrid oqarpoq Filchilu qinngorlerfigalugu. "Piffissaq
naveersinerinnarmut atorakku? Illimmi tamanna suliassa-
rinngilat, ilaa? Aammami naammalerputit, massakkumiit
uanga isumagilissavakka."

"Qaammalerpat uteqqissaanga," Filch oqarpoq. "Taava
meeqqat sinnikui aassavakka," peqqarniippasilluni nangip-
poq tunukkamilu illussaarsuarmut aallarpoq.

Takusinnaavaat qaammartartua taartumi aalasoq.

Malfoyip Hagrid nakkuppaa.

"Orpippassuarnukarnianngilanga," oqarpoq Harryllu
nuannaarutiginngitsoorsinnaanngilaa nipaata sajuppalunne-
ra.

"Allatut ajornartumik orpippassualiartariaqarputi
Hogwartsimiiginnarusukkussi," Hagrid peqqarniippalulluni
oqarpoq. "Malittarisassat unioqqutippasi tamannalu pissuti-
galugu pillagaalerputi."

"Kisiannimi atuartut taamatut pillarneqarsinnaanngillat.
Isumaqaraluarpunga pillaatitut oqaaseqatigiit hundrederiar-
lugit allattarfissuarmut allassagigut. Anaanama ataatama-
luunniit manna tusaraluarunikku...."

"- Taava oqaluttuutissagaluarpaatsit Hogwartsimi malitta-
risassat qanoq ittuunersut." Hagrid massuavoq. "Pillaatitut

oqaaseqatigiit allattarfissuarmut allaannaraanni sumut iluaqutaassagami? Naamik, akerlianik iluaqutaalaartariaqarpusi anisitaaniangikkussi. Kisianni isumaqaruit anisitaanissat ataavit piumanerugaa taava oqaannassaait. Taava utiinassaait kuffertillu poortorlugu. "Atagu, qanoq piniarpit?"

Malfoy aalariangilaq. Kamangaarluni Hagrid isikkorluppaa taavali nikallorluni isini nakatsippai.

"Ajunngilaq," Hagrid oqarpoq. "Tusarnaarluassuusi unnugumi ulorianartumik suliassaqpugut uangalu kukkorusungeqaanga. Qaagitsi tamassi malinniarsinnga."

Orpippassuit killerpiaanukaappai. Nanerussani kivippaa aqqusininnguarlu tullagaannaq orpiit taartut akornannut ingerlasoq tikkuarlugu.

"Takusiuk," Hagrid oqarpoq. "Takusinnaavisiuk nuna-müttoqartoq qinngornilimmik? Pujoralattut sëlvmik qalipaatilittut isikkoqartumik? Tassaana enhjørningip aava. Ikiligaasimavoq. Sapaatip akunnerata ataatsip ingerlanerinaani aappassaa taama pisoqarpoq. Kingullermik pingasunngormat nersut taamaattoq toqungasoq nassaaraara. Nersut nallinnartoq ujassavarput. Nassaarigutsigu immaqa allatut ajornartumik toquttariaqassavarput naalliukkunnaarniassammat."

"Qanormi iliussaagut nersutip ikiligaasup siulliulluni nas-saariippatigut..." Malfoy oqarpoq nipini annilaangarpalut-toq isertorunnaarlugu.

"Uanga Trofastilu ilagitilluta orpippassuarni ajortumeer-niarneqarnavianngilasi," Hagrid oqarpoq. "Kisianni aqqusininnguaq malittariinnassavarsi avaqqunnaveersaarlu-gu. Atagu, marlunngorluta avissaassaagut, aqqusininnguak-kullu assigiinngitsumik aqquteqarluta aallassaagut. Suna tamarmi aagasappoq. Sivikinnerpaamik ulloq unnuarlugu

uppeqqajaalluni ingerlasimassaaq."

"Qimmeq ingiaqatigissavara," Malfoy oqarpoq qimmillu tuloriai ipittut qissimillugit.

"Ajunnigilaq. Kisianni oqarfigissavakkit ersitoorujussuuvoq," Hagrid oqarpoq. "Kisianni uanga Harrylu Hermionelu ugguunaqquutissaagut. Draco, Neville Trofastilu paarlattuanut ingerlassapput. Arlaata nersut nassaariguniuk qorsunnik qalipaatilinnik qummoroortitsissaaq, paasivisiuk? Taava aamma imaallaat angakkuaatissinnik angakuarneq sungiusassavarsi - maanna piariiginnarsigit - aap, taamatut. Arlarsi ajornartorsiuleruni aappaluttunik qalipaatilimmik qummoroortitsissaaq. Taava sapnngisarput tamaat tuaviorluta ajornartorsiulersoq ikioriartussavarput. Piareerpisi? Iluatsitsilluarisi!"

Orpippassuit taarput nipaqaalutillu. Orpippassuit akornannut pigamik aqputaa marlunngorluni avippoq. Harryp, Hermionep Hagridillu aqput saamerleq atuarpaat Malfoyp, Neville Trofastillu talerperleq atuaraat.

Nipaatumik ingerlapput nunamut isigüitigalutik. Ilaanikkooariarluni qaammatip qaamanerata nersutip aava ersersittarpaa tungujortumillu sølviusumik qaamasumik pilutat nakkaanikut akornanni qalipaateqartilersarlugu.

Harryp takusinnaavaa Hagrid ernumarpaseqisoq.

"Inoqarsinnaava amarunngortartunik enhjörninginik toqutsisartunik?" Harry aperivoq.

"Naamik, tigusarinissaat inorpaat, kigaappallaarput", Hagrid akivoq. Nersutinin qaamikkut ataatsimik tuugaajusalinnik toqutsiniarneq imaannaanngitsorujussuuvoq. Nersutaapput nukittuut angakkuakkatut tupinnartut. Tusarnikuunngisaannarpara taama isillutik ikiligaasinnaanerat."

Orpiup kippakua issuatsiaanik naaffigineqarsimasoq naammattoorpaat. Harryr kuunnguarpalaaq tusaavaa eqqoriarlugulu eqqannguaminni puilasooqassasoq.

Aqqusineeqqami sangujoraartumi sulii nersutip aavanik tamani tamaani takusaqartarput.

"Annilaanganngilatit, Hermione?" Hagrid isussulluni aperivoq. "Annilaangassanngilatit. Ikiligaarujussuarsimaguni ungasinnaviannngilaq. "Nassaarigutsigu taava - TUAVI! ORPIUP ISSUMA TUNUANUT TOQQORITSI!"

Hagridip Harry Hermionelu tuaviinnaq nusuppai. Sukkasoorujussuarmik orpissuup tunuanut pissuppai pisissinilu qarsuleramiuk piseriarnissaminut piareerluni. Unnngaqqissaarpoq piseriarnissaminut piareeqqalluni. Pingasuullutik tamarmik taarsuup ataani tusarnaqqissaarput. Eqqaanni pilutat nakkaanikut qaavini paarngortoqarpaluppoq. Hagridip aqqusineeraq taartoq nakkuppaa erininarseriannngitsorli nipi tammaqqippop.

"Taannaqaana taama ilimagalugu," isussuppoq, "taqqamaniittoqarpoq taqqamaniittussaannngitsumik."

"Immaqa inuk amarunngortartoq," Harry siunnersuuteqarpoq.

"Inuk amarunngortartuunngilaq aamma enhjorningiunngilaq," Hagrid ilungersorpalluni oqarpoq. "Atagu maliniarsinga kisianni mianersorlusi."

Nipiusinnaasumik tusaaniaatigalutik siumut kigaannerusumik ingerlaqqilerput. Tassanngaannaq siuninnguaminni orpeqannginnersami aalasoq takuaat.

"Kinaana?" Hagrid nillerpoq. "Kinaanerit oqaatigiuk - sakkoqarpunga!"

Taama oqartorlu takkuttoqarpoq - angutaanerpa hüstiu-nerpaluunniit? Niaquminiit qitini tikillugu angutaavoq aap-

paluttunik umeqarlunilu nujalik timaatali sinnera hiistip timeraa aappaluttoq kajuaartoq takisuumik pamiulik. Harryp Hermionellu qanitik ammaannarlugit nakkuppaat.

"Illinuna, Ronan," Hagrid eqqissiallalluni oqarpoq.

"Qanoq ippit?"

Hiisti inuttut kiatilik ornippaa assaalu eqqillugu.

"Inuugujok, Hagrid," Ronan oqarpoq. "Qatituumik nikallungarpaluttumik nipeqarpoq. Aallaanialeraluarpi-nga?"

"Ulluni makkunani mianersunngikkaanni ajornaqaaq, Ronan," Hagrid oqarpoq pisissinilu pattalaarlugu. "Maani orpippassuarni ajortoqarpoq! Ikinngutikkali ilisaritilaariarlakka. Aajuna Harry Potter aajunalu Hermione Granger. Atuarfimmi atuartuupput. Aajuna Ronan, Ronan kentaurovoq tassa hiistiuvoq inuttut kiatilik.

"Tamanna malugaarput," Hermione sallaallilluni oqarpoq.

"Inuugujok, Ronan oqarpoq. "Tassa atuartuuvusi," Atuarfimmi tappikani iluaqutaasinnaasunik ilikkagaqartarpisi?"

"Taamaagunarpoq..."

"Immannguaq," Hermione maniguulluni oqarpoq.

"Immannguaq. Aap tamanna ilikkagaqannginnermit pitsaaneruvoq." Ronan anersaamivoq. Qummut qiviarpok qilallu qimerluulerlugu. "Marsi unnuk manna assut erseqqarippoq."

"Aap, ilumoorputit," Hagrid aamma qummut qiviarsimasok oqarpoq. "Tusaalaariannga, Ronan, nuannaarutigeqaara naapikkakkit tassami nersummik ikiligaasoqarsimavoq aperiniarpakkillu immikkut ittumik takusaqarsimasoralutit?"

Ronan ingerlaannaq akinngilaq. Qilak uisorinngivilluni qimerloortuarpaa taava anersaameqqippoq.

"Sunngitsunnguit tamatigut siulliullutik pilliutigineqartarput," oqarpoq. "Qangali taamaattuartarpoq sulilu taamaattuassalluni."

"Aap, ilumoorputit," Hagrid oqarpoq, "kisianni arlaannik takusaqarpit, Ronan? Arlaannik qaqutigoorluinnartumik?"

"Marsi unnuk manna erseqqarilluinnarpoq," Ronan oqaqqippoq Hagridilu utaqqikatalerpoq. "Erseqqareqaaq."

"Aap taamaappoq kisianniuna maani nunami eqqumiitsumik takusaqarsimasoralutit aperisunga." Hagrid oqarpoq "Tassa immikkut ittumik takusaqanngilatit?"

Ronan akitinnani nipangersimaqqaarpoq. Kiisami oqarpoq: "Orpippassuit isertugaaterpassuarnik toqqorta qarput."

Ronanip tunuani aalariartoqarmat Hagridip pisissini pia-reerpaa kisianniliuna hiisti inuttut kiatilik alla qernertunik nujalik qernertumillu qalipaatilimmik timilik takkuttoq. Ronanimit nujuarnerorpassippoq.

"Aluu Bane," Hagrid ilassivoq. "Ajunngilatit?"

"Inuugujoq, Hagrid, neriuppunga ajunngitsutit."

"Ajunngilanga. Tusaalaariannga, aatsaannguaq Ronan aperigaluarpara ungasinngitsukkut eqqumiitsumik takusaqarsimanersoq. Tasaana taama aperisugut nersummik iki-ligaasoqarsimammat – immaqa ilisimasaqarfigaat?"

Bane Ronanip sanianut pivoq. Qummut qiviarpoq.

"Marsi unnuk manna erseqqarippoq." Oqarpoq.

"Tusareerparput," Hagrid puffassimalluni oqarpoq.

"Arlaannik eqqumiitsumik takusaqassagaluarussi oqalut-tuunniarisinnga, taamaaliorsinnaassavisi? Uagut ingerlaq-qittariaqarpugut."

Harryp Hermionellu orpeqannginnersamit orpippassuarnut ingerlasoq malippaat tunummut Bane Ronanilu isigiitigalugit orpinnit asserneqarnissaasa tungaanut.

"Hiistimit inuttut kiatilimmit erseqqissumik akissutisinis-saq ilimagineqarsinnaanngilaq," Hagrid uumitsalluni oqar-poq. "Ulloriarsiortuupput qaammammiillu qaninnerusu-miittut soqutiginnilaat."

"Orpippassuarni taamaattut amerlappat?" Hermione ape-raaq.

"Aap, arlaqarput... imminuinnaq nakkutigisuupput alla-nut akuliutinngisaannartut, namminerli soqutigisatig eqqar-torneqalerpata takkutissaqqaarput. Itisuumik eqqarsartar-tuupput silatusaartuullutillu... ilisimasarpassuaqarput naak-tamanna nassuerutigiumaneq ajoraluaraat."

"Immaqa tusaasarput hiistiusimassaaq inuttut kiatilik?" Harry aperivoq.

"Kukiffappaluttoqarsorigakku? Naamik aperissagumma tusaasarput tassaavoq nersummik qaamigut ataatsimik tuu-gaajusalimmik toqutsisartog... nipimik taamaattumik sior-natigut maani tusarnikuunngilanga!"

Orpiit eqimasut akornatigoorlutik ingerlaqqilerput. Harry annilaangalluni tunummut qiviartuarpoq, malugiso-raalu isiginnaarneqarlutik nuannaarutigaa Hagridip sak-koqarnera. Aqqusernup sangoriarnera ingerlaffigeruttule-raat Hermioneq Hagridip talia tiguaa.

"Hagrid! Takukkit! Innaallannerit aappaluttunik qalipaa-tillit, ilagut ajornartorsiorput!"

"Marluullusi maani utaqqissavarsinga!" Hagrid niller-poq. "Aqqusineeqqamiiginnassuusi. Aallusi uteqqissaanga!"

Orpippassuakut ingerlarsorpaluttoq tusaavaat imminnut paatsiveerullutik isigiitigalutik. Annilaangaqaat maannalu

Hagridip qimammatik tusaasatuaat tassaavoq pilutat aalarpalunnerat.

"Ajortumeersimassasoraagit?" Hermione isussuppoq.

"Malfoy soqutiginngilara kisianni Neville tigusarineqarsi-mäppat...uagummi orpippassuarnukartitaaneranut pisuu-vugut."

Minutsit kigaatsunnguamik ingerlapput. Allaanngivippoq tutsarissisimasut. Harry isumaqarpoq anoraasuannnguit tamaasa avalequtinnguillu napineri tamaasa tusaasinnaallugit. Taarsuup ataani susoqartoruna? Ilaanuku sumiüttut?

Kiisami avalequtit nallorpalunnerat tutsiuppoq paasivaallu Hagrid uterpaluttoq. Takkutileriallartoq Malfoy, Neville Trofastilu ilagalugit. Hagrid kamappaseqaaq, paasivaallu Malfoyp Neville tunuaninngaanniit taqissorluni ersisaarsimagaa. Ersisaarneqarami Neville annilaarnermit innaallattartut aappaluttut qummoroortissimavai.

"Iluatsitsissaqaagut marluullusi perullulioortitsinissi kingorna tigusaqassagalarutta. Maanna allatut iliorluta agguataartariaqarpugut: Neville illit Hermionelu maaneeqatigissavarsinnga. Harry illit Trofast sianiitsorsuarlu una ilagissavatit. Ajuusaaraluarpunga," Hagrid isussuppoq, "kisianni illit imaaliallaannaq ersisaarnaviannngilaatit suliaasarlu naammassisariaqarparput."

Taava Harry, Trofast Malfoyilu orpippassuarnut ingerlaqqipput. Akunnerup affangajaa pisoreeramik ima ilorparsimatigipput orpiit eqimavallaaqimmata ingerlarpiarsinnaajunnaarlutik. Harry isumaliorpoq nunami pilutanilu aagasanneq alliartuinnartoq. Orpiit kanaartaanni aagasannera annertungaarmat allaanngilaq nersutinnguakkuluk orpinut uppittarsimasoq. Harry orpitoqarsuup avalequtaasa akerortuut akornisigut alakkarterpoq siunermiñilu orpe-

qannginnersaq takulerlugu.

"Takuuk..." nipaatsumik oqarpoq Malfoyilu taliatigut tigullugu.

Sunaanersaq qaqortoq qaammarissoq nunami nalavoq. Taqissorlutik qanillattorpaat paasillugulu sunaasoq.

Tassaana nersut qaamigut ataatsimik tuugaajusalik toqungalluni nalasoq. Harry inuunermi taama alianartigisumik kusanartigisumillu takunikuunngisaannarpoq.

Nersutip niui takisuut amitsut paatsiveqanngitsumik siaarsimapput qungasiatalu meqqui takisuut qaqortut maligaasartut pilutanut nunamut nakkaasimasunut siaarsimapput.

Harry ataatsimik allortorlu tagiutilaarpalaarnerup unitsivillugu unitsippaa. Orpeqannginnersap sinaani orpikkat ilaat aalalaarpoq... taava inuk uumasorluunniit ulissimasutut isikkulik paarngorluni takkuppoq uumasutut qaasuttutut pisassaminik ujaasisutut pissusilersorluni. Harry, Malfoy qimmerlu annilaarnermik qeqqiinnarput. Suunersup ulissimasup enhjørningi nallerpaa, niaqquni nasalik nersutip saneraanut ikianut tutsillugu aavalu nipiimmik imerpalulerlugu.

"AAAAAAAARGH!"

Malfoy nillerujussuarpoq qimaallunilu – aamma Trofast qimaavoq. Nasallip niaqqi massitippaa Harrylu toqqarlugu isigilerlugu nersutip aava qanermiiniit kuuttoq. Umasoq nikuippoq sukkasuumillu tungaanukarluni, Harryli anni-laangangaarami nikeriarsinnaanngilarluunniit.

Taava siornatigut misigisimanngisaannakkaminik niaq-qumigut annerujussuarpoq. Allaanngivippoq qilerua aamaarteq. Paatsiveerulluni tunuporsorpoq. Tunumini hiisit pangalippalunneri tusaavai suugaluarnersorlu sukkasoorujussuulluni takkuppoq Harryllu uumasullu ulorianartup

akornannut inissilluni.

Harry niaqquminik anniangaarami aqullaarpoq. Minutsi ataaseq marlulluunniit qaangiummata aatsaat anniarpallaa-runnaarpoq. Qummut qiviaqqimmat saassussigaluartoq peerutereersimavoq. Hiistip inuttut kiatillip isigivaa. Bane-unngilaq Ronaniunaniluunniit. Hiisti inuttut kiatilik taanna inuusuppasinneruvoq; qaamasunik nujaaqarpoq allatullu qalipaatilimmik nujaaqluni.

"Ajunngilatit?" Hiisti inuttut kiatilik aperivoq Harrylu nikuitillugu.

"Aap – qujanaq – sunaana takugiga?"

Hiisti inuttut kiatilik akinngilaq. Isai tupinnaannartumik tungujorput soorlu safiritut asingasutut. Harry misissorpa-sillugu isigaa qilerualu qaavani erseqqarissoq qaqqorissorlu qimerloorlugu.

"Illit Potterikkut nukappiaraatigaatsit," oqarpoq.

"Massakkorpiaq Hagridimut utertariaqarputit, orpippassuit navianarput – pingaartumik ilinnut. Hiistersinnaavit? Hiisteruit sukkanerussaaitit."

"Ateqarpunga Firenzemik," nangippoq, taava aqupippoq Harry qatiggaminut qaqiniassammat.

Maanna hiisterpaluttut allat tusarsaalerput sivitsorian-ngitsorlu Ronan Banilu orpiit akornisigut puttupput sane-raat kiammik kuuttuinnaallutik.

"Firenze!" Bane sukangasaarluni oqarpoq. "Maani suleri-vit? Inuk qatigganniitippat! Kanngusunngilatit! Siutituujugavit?"

"Nalunngilisiuk kinaasoq?" Firenze oqarpoq. "Tassaana Potterikkut nukappiaraataat. Sukkanerpaamik orpippassuit qimappagit tamanna pitsaanerpaassaaq."

"Qanoq oqaluttuuppiuk?" Bane kamalluni oqarpoq.

Eqqaamassavat Firenze, neriorsuinikuusugut qilaap piumasaa akiussanagu. Ulloriarsuit ingerlarnat atuarnikuunngin-natsigu?"

Ronanip annilaangalluni nuna kiliorporaa.

"Ilimagilluinnarpara Firenzip pitsaanerpaaq qinersimagaa," aliasuppaluttumik nipeqarluni oqarpoq.

Bane kamannermik kingulliiminik tukeriarpoq.

"Pitsaanerpaaq? Tamakku qanoq ilillutik uatsinnut tungassuteqaramik? Kentaurit siulittuutit kisüsa soqutigisarpaat! Uagut suliassarinnngilarput inuit orpippassuarni tamarsimasut ikiussallugit!"

Firenze kamalluni tunorliiminik nikussaariataarpoq. Harryp nakkannginniassagami tuviisigut tigulluartitertariaqarjaa.

"Nersut una takusinnaannginnakku?" Firenze Banemut nilliavoq. "Takusinnaanngiliuk sooq toqutaasimanersoq? Imaluunniit ulloriarsuit tamatuminnga oqaluttuutinngitsoorpaatsit? Uanga orpippassuarni maani ulorianarsinnaasut tamaasa akiussavakka, Bane inunnik suleqateqassagaluarumaluunniit."

Taama oqarlunilu Firenze tunuppoq orpiillu akornisigut sukkaqaluni aallarluni. Harry sapinngisannguani tamaat najummatserpoq Bane Ronanilu sukkaqisumik ungasilliar-tuaarneranni.

Harryp susoqarnersoq paasinngilaa.

"Sooruna Bane taama kamatsigisoq? Aperivoq. "Aamma uumasumit suminngaanniinuna annaappinga?"

Firenze kigaallappoq pangalikkunnaarluni Harrylu peqquaa peqeqqullugu niaquni avalequtinut anaarlutinnginniassammat. Apeqqutit akinaveersaarpai. Nipaqaratik sivisoorujussuarmik ingerlapput Harrylu isumaliuleraluarpoq

Firenzip oqaloqatigeqqinniarunnaaraani. Orpiit eqimasorujussuit tikikkaallu Firenze tassanngaannaq unippoq.

"Harry Potter, nalunngiliuk enhjorningip aava sumut atorneqartartoq?"

"Naamivik," Harry apeqqummut annilaarluni akivoq. "Uagut tuugaava pamiuatalu meqqui kisiisa nakorsaatinut akussatut atortarpagut."

"Taamaaliortarnersi eqqortuliornervuq tassami nersutini taamaattunik toqutsineq pinerlunneruvoq amiilaarnartoq," Firenze oqarpoq. "Ataasiinnaq kisimi taamatut pinerlunnermigut annaasaqarani iluaqutissarsiinnartussaavoq. Inuunerit ulorianartorsiorpat nersutip taamaattup aavata uumatissinnaavaatit. Taamaalioruilli inuunerit akisunaassavat. Inuunerit annaanniarlugu nersummik qaamigut ataatsimik tuugaajusalimmik toqutsiguit minguitsumik pissusilik toqussavat. Toqutsisoq affakuinnarmik inuuneqalissaaq aak imeruniuk perloqqusaalluni inuulertussaagami."

Harryp Firenzip niaqua tununngasoq qaammatigimmi sölvitut akisuguttoq nakkuppaa.

"Kisiannimi kina taama neriuutaarulluinnartigisinnaava?" Tupigusulluni oqarpoq. "Naassaanngitsumik perloqqusaagaanni pitsaanerunngila toquinnaraanni?"

"Taamaappoq," Firenze oqarpoq, "inuinnarniarluni taamaaliorsimanngikkaanni allamik imigaqarnissap tungaanut - arlaannik inuunermik ilivitsumik utertitsitsisinnaasumik - arlaannik naassaanngitsumik inuuneqalersitsisinnaasumik. Potter, nalunngiliuk atuarfimmi suna massakkorpiaq toqhortaanersoq?"

"Ujarak Inuunartoq! Soorunami - Najoqqagassiaq naassaanngitsumik inuuneqalersitsisinnaasoq. Kisianni paasisinnaanngilara kiap..."

"Eqqaasaqarsinnaanngilatit ukiorpassuarni naammagittarluni pissaanermunik utertitsinissaminik utaqqisimasumik? Nutaamik periarfissinneqarnissamik utaqqisimasumik?"

Allaangvivippoq assaap saviminiinnaap Harryp uummataa aalajangerlugu tigugaa. Maani orpippassuarni tusaaq-qissorilerpaa Hagridip oqaluttuaa taamanikkut siullerpaa-mik naapikkamiuk: "Ilaat isumaqarput toqoreersoq, ujaqqatut toqungasoq. Tassa ima inuppalaartigiguni toqusinnaalluni allaat."

"Isumaqarpit..." Harry iggiinngarluni pilerpoq. "Vol...."

"Harry! Harry, suit, ajunngilatit?"

Hermionep arpaannaq aqqusineeqqakkoorluni Harry ornippaa, Hagridip anertikkarluni arriitsumik malippaa.

"Ajoqusinngilanga, "Harry puullaapingaarami qanoq oqarnini ilisimanagu akivoq. "Nersut toquvoq, Hagrid. Tunutsinni orpeqannginnersami nalavoq."

"Maanna qimalerpakkit," Firenze nipikitsumik oqarpoq. Hagridip enhjørningi misissoriartorpaa. "Maanna isumanarunnaarputit."

Harry hiistip inuttut kiatillip qaavaniit nunamut sisuvoq.

"Inuulluarit iluatitsiginalu, Harry Potter," Firenze oqarpoq. "Ulloriarsuit siornatigut kukkusumik atuarneqarsimapput, allaat kentaurinit. Neriuppunga aamma tamatu-muuna taama pisoqarsimassasoq."

Tunuppoq orpippassuillu issunersaata tungaanut pangallarluni. Harryp sajulluni isiginnaarpaa.

Ron isersimaartarfimmi sinilersoorsimavoq ilami uternissaat utaqqillugu. Quidditchimik unammineq sinnattoraa nilliallunilu: "Qunutuutut naalliineq," taama sinnattulerut-

torluni iterpoq Harryp issuttuukkaani. Sekundialunnguit ingerlanerinnaani eqüivilluni eqeerpoq. Harryp Hermionellu tuaviinnaq orpippassuarni qanoq pisoqarnera-nik oqaluttuppaat.

Harry eqqissiveeruteqqanermik eqqissilluni issiasin-naanngilarluunnit. Kissarsuutip ammaannartup saavani uteqattaarpoq sulilu sajuttuinnaalluni.

"Snapep Ujarak tillinniarpa Voldemortimullu tunniullu-gu... Voldemortilu orpippassuarni utaqqivoq... isumaqar-tuaraluarpuq Snape pisuunngorniaannarluni ujaqqamik tillinniartoq..."

"Ateq taanna taasaqattaarunnaarniaruk," Ron Voldemortimit tusaaneqassasoraluni annilaarluni isussup poq.

Harryp soqutiginnilaa.

"Firenzip annaappaanga, tamannali siunertaanngikkalu-arpoq... Bane kamattorsuuvoq... ulloriansuit siulittuutaan-nut akuliunnissaq eqqartorpaa.. isumaqarpunga ulloriansuit oqaluttuartut Voldemort utilersoq.... Bane isumaqarpoq Voldemortip uannik toqutsiniarnera Firenzip akueriinnarsi-masariaqaraluaraa ... naatsorsuutigaara aamma tamanna ullorissani allassimassasoq."

"Ateq taanna oqaatigisaqattaarunnaarniaruk!" Ron qati-maluppoq.

"Taava maanna Snapep Ujaqqamik tillinnissaa utaqqiin-nassavarput," Harry puffassimalluni nangippoq. "Taava Voldemort takkutissaaq toqukkiartorlunga... taava Bane eqqississajunnarsivoq."

Hermione annilaangarpaseqaaq taamaakkaluartorli saammarsaavoq.

"Harry, tamarmik oqartarput 'Illit-nalunngilat-kinaasup'

Dumbledore kisiat ersigigaa. Dumbledore maaniitillugu 'Tllit-nalunngilat-kinaasup' susinnaanngilaatit. Aamma kina oqarpa hiistit inuttut kiatillit ilumoortut? Isumaga malillugu siulittuusserpalaarpallaaqaaq aamma professor McGonagall oqarpoq angakkuarneq taamaattoq tatiginanngilluaasartog.

Qasulluinnaqqissaarlutik innarmata ullaanngoreersimavoq unnualli uissuumminartui suli nungunngillat.

Harryp qipini illuartikkamiuk uliguaq atillugu inuttamini ersiguunnaarsitsisartog qipiup ataaniittoq nassaaraa. Allagartag ikkunneqarsimavoq ima allannilik.

Nalunartog pillugu.

Matukkut nakkartartukkut

Harryp kingusinnerusukkut eqqarsaatigilluaqqikkamiuk paasisinnaanngilaa qanoq ililluni soraarummeernerup nalaa anigorsimanerlugu tassami Voldemortip iseriataarnissaa aannilaanngatigiuarumiuk. Ullulli ingerlapput qularinngilaallu Fluffy torsuusami matup parnaaqqasup tunuani sulipaarsissasoq.

Kiattorujussuuvog pingaartumillu klassimi allattarissanik soraarummeerfianni issialluni naalliunnartorujussuulluni - ini taanna immikkut angakkuagaavog atuartut peqquserlusinnaajunaarsillugit.

Allattarissat saniatigut aamma allanik misilitsipput. Professor Flitwickip atuartut ataasiakkaarlugit aggersittarpai qulakkeerniarlugu tamarmik ananasimik ilinniartitsisup nerriviata qaavani qititsitsisinnaanersut. Aamma atuartut terissanik sunoorsit puunngortitsinermik soraarummeersinneqarput professor McGonagall soraarummeersitsisuulluni - pointit tunniunneqartarput sunoorsit puuata qillertuusap qanoq kusanartiginera najoqqutaralugu, pointinillu ilanngaanneqartarput qillertuusaq tunniussaata uumasut umittaqaraangat. Snapep tamaasa annilaangatippai tunuisigut anersaartorfigisarlugit imigassamik puigorsaatissamik sanallutik tamaviaaleruttortut.

Harry sapinngisani tamaviat soraarummeerluni tamavi-aarpoq qileqquminik anniarnerrujussuani eqqarsaatiginave-ersaarlugu. Orpippassuarnut angalaarnermi kingorna nia-qorluttalersimavoq. Neville isumaleqaraluarpoq Harry soraarummeernissaminut pissangasoq paasigamiuk unnu-akkut sininneq ajungajattoq, kisiannili Harry unnuakkut eqqumasarsimavoq sunaagaluarnersoq nasalik aagasattoq oqimangissutigalugu.

Immaqa Harryp misigisai misigisimanngeriaramik Rönip Hermionellu Ujarak Inuunartoq isumakuluutigival-laanngilaat. Tamatumunnga aamma pissutaasinnaavoq qaa-mikkut anniarsaminik qileroqannginnerat. Voldemort eqqarsaatigileraangamikku annilaangalersarput kisiannili unnuakkut eqqumassutigineq ajorpaat. Oqimangerneq ajorput soraarummeernissaminnullu atuarnertik ulapputi-gaat tamannalu pissutigalugu Snapep allalluunniit pilersaa-ruteqapilunnerisa eqqarsaatiginissaanut piffissaqanngillat.

Kingullerpaamik soraarummeeramik Angakkuarnerup Oqaluttuarisaaneramik soraarummeerput. Akunnermi ilivit-sumi angakkutoqqat uunnaavinnik namminneq qalattartu-nik nassaarsimasut pillugit apeqqutit akisassat ulapputigaat. Misilitsinnerullu taassuma kingorna atuarunnaartussaap-put. Sapaatip akunnera ilivitoq pilluakataarnartoq ingerla-sussaassaaq misilitsinnerit inernerisa tigusissaasa tungaa-nut. Aliortugaq, professor Binns, oqarmat allaatit suluit nerriviup qaavanut ilisinnaanngoraat pappiaqqallu imussa-gaat Harry ikinngutinilu qiimmattarput.

"Ilimagisannit ajornannginnerujussuavoq," Hermione oqarpoq atuartut illussaarsuup eqqaanut seqinnisaariartor-tut ilaqquffigamik. "Pisariaqarsimanngikkaluarpoq atuakkat Inuit amarunngortartut angalanerminni malittari-

sassaat 1637-meersoq imaluunniit Elfric Nikallujuitsup pikitsitsinera atuassallugit.

Hermione p soraarummeernertik eqqartorusukkaluaraa Ron oqarpoq tamanna sianiutilussaataaginnassasoq. Tamatumunnga taarsiullugu taseqqamut pisuttuarput orpi-ullu ataanut nallarlutik. Wesleykkut marluliaasa Lee Jordanillu tatsip sinaani amikorsuaq sinittoq uniisigut quinassaarpaat.

"Ilinniagassat eqqarsaatigeqqissanngilagut," Ron pilluarluni anersaamivoq. "Harry, nuannaarpasinnerulaartariaqaralarputit, sapaatip akunnera ilivitsoq susassaqanngilagut angusagut ajortut isumanerluutigilersinnagit. Pisariaqanngilaq sioqqutsilluni ernumanissaq."

Harry p qaani tagiartorpaa.

"Paaserusukkaluaqaara tamanna qanoq isumaqanersoq?" Kamalluni pilerpoq. "Qilerora ajuissumik annernarpoq - siornatigut anniartarnikuuvunga kisiannili taama sivisutiginngitsumik aammalu siornatigut taama annernartiginngisaannarpoq."

"Madam Pomfrey orninniaruk," Hermione siunnersui-voq.

"Napparsimanngilanga," Harry oqarpoq. "Isumaqarpunga mianersoqqussutaasoq... tassa ima isumaqarpoq ulorianartoqalersoq..."

Ron aasarimmi kiaqisumi kamassaatissaqanngilaq.

"Harry eqqissiniarit Hermione ilumoorpoq. Dumbledore maaniitillugu Ujarak isumannanngilaq. Aammami Snapep Fluffymik qoqassiilluni sanioqqutsineranik tusaamasaqanngilagut. Kingullermimmi misiliigaluarami nissuni kippingajappaa. Tamanna misileqqinnavianngikkallarpaa."

Harry sikisaarpoq kisiannili navianartorsiortitaasutut

misigiuarsinnaarpoq. Misigivorlu suliassaraluaminik pingaaruteqartorujussuarmik puiugaqarsimalluni.

Nassuiarniarsarigaluarmagu Hermione oqarpoq:

"Soraarummeeravit sianiutilunnerit suli qaangersimann-gilat. Uanga unnuaq iterpunga soraarummeernissannut atuarniarlunga qujanartumilli eqqaaleriataarpara soraarum-meernerput naammassereersoq."

Harry qularinngilluinnarpaa eqqissiveqannginnini atuarfimmi suliassaanut attuumassuteqanngivissoq. Uppik takuaa illussaarsuup tungaanut timmissoq allakkat kimmialugit. Hagridip kisimi allakkanik nassittarnikuuvaa. Hagridip Dumbledore killuutinngisaannartussaavaa. Hagridip kinaluunniit oqaluttuunnavianngilaa qanoq ililluni Fluffy saneqqunneqarsinnaanersoq.... naamivik... kisiannimi....

Harry nikuikkasuarpoq ingerlanialerlunilu.

"Sumunnalerpit?" Ron uernarpasilluni aperaaq.

"Eqqaasaqariataartungaana," Harry oqarpoq. Kiinaa qarsorsimavoq. "Maannakkorpiaq Hagrid ujartariaqarparput."

"Sooq?" Harry ingerlammat Hermione malinnaanarluni arpattariaqartoq anertikkarluni oqarpoq.

"Eqqumüginngiliuk takornartaq takkummat Hagridip silarsuarmi pisaarissallugu kissaatiginerpaasaa kaasarfimmiorlugu? Inuit qassit uumasorujuup manniinik kaasarfimmiorlutik ingerlaarpat nalunagu taamaaliorneq angakut inatsisaat malillugu inerteqqutaasoq? Isumaqanngilatit iluatsitsineruallaartoq taassuma Hagriderpiannguaq naape-riataarmagu? Sooq tamanna qangali eqqarsaatiginngilarput?" Harry oqarpoq.

"Sunaana eqqartorpiuk?" Ron oqarpoq Harryli tuavioqaluni illupalaanngumut orpippassuit sinaanniüttumut arpap-

poq. Tuaviungaaramilu akinissaminut piffissaqanngilar-luunniit.

Hagrid illup silataani issiavissuarmi issiavimmi ornavaffi-limmi issiavoq. Qarlimmi niutai atsipaamilu kangujartersi-mavai eertallu puuinit nagguiniit puugutarsuarmut piiarpai

"Aluu," qungujulluni oqarpoq. "Soraarummeernersi naammassiva? Imeruersarusuppisi?"

"Naamik, tuaviorpugut, Hagrid. Apeqqutissaqarpugut. Taamani unnukkut nallukattarlusi Norbert pinnattaarigak-ku.... angut takornartaq taanna qanorpiaq isikkoqarpa?"

"Asuki, eqqaamaqqissaanngilara," Hagrid eqqissisimar-pasilluni oqarpoq. "Uliguani peerusunnginnamiuk nasar-taalu atuinnaarlugu kiinaa takorpiannngilara."

Uissuummerpasissut takugamigit qallumi aappaa kivi-paa.

"Tamanna takornartaanngilaq. Inuit eqqumiitsorpassuit Puulukimut Nujuartamut Nuannaartumut isertarput - tassa imerniartarfimmut illoqarfeeqqamiittumut.

Uumasorjuerniartuinnaasimasinnaavoq, ilaa?

Ajoraluartumilli kiinaa takunngilara, ajuusaarpunga!"

Harry eertanut puugutap sanianut aqupiinnarpoq.

"Suut oqaloqatigiissutigaaasigit? Hogwarts eqqaaviuk?"

"Taamaannguatsiarpoq," Hagrid oqarpoq kingumullu pisimasut eqqarsaatigilerlugit. "Aap, maanna eqqaalerpara. Uumasut paarisakka apeqqutigai.... taava pissutsit nassu-iaatigaakka oqaluttuullugulu uumasorjuutitaarusuttuaan-narsimallunga. Taava... eqqaamalluaqqissaanngilara imer-tittuaannarmanga... qanorpiaq pisoqarnera eqqarsaatigilaa-riarlugu... aap, taava oqarpoq uumasorjuup manniuteqar-luni taannalu piomaguma nallukattarluta ajugaaniutigisin-naagipput. Kisiannili paasilluarusuppaa uumasorjummik

paarsisinnaanersunga... tassami kimulluunniit tunniussin-
naannginnamiuk... taava oqaluttuuppara Fluffy paarisin-
naagukku uumasorjuup paarinissaa ajornangitsuarsu-
ussasoq..."

"Fluffymik soqutiginnippasippaa?" Harry aperivoq nipini
eqqissisimarpasitsinniarsaralugu.

"Aap, soqutiginnippasippoq. Inuit qassit qimmit pingasu-
nik niaqullit naapinnissaannut periarfissinneqartarpat?
Taava oqaluttuuppara Fluffy ajornartorsiutigisimanagu tas-
sami nipilersorfigiunnaraanni savaaqqatut ulorianaruun-
naartarmat. Takornartaq oqaluttuuppara sinnassaatinik
nipilersorfigigaanni ingerlaannangajalluni sinilertartoq..."

Hagrid nipangeriasaarpoq kukkunini paasigamiuk.

"Tamakkuninnga oqaluttuussimassanngikkaluarakku!"
Annilaarluni oqarpoq. "Oqaatsikka puigorniarsigit!
Ukorsiinnguit - sumunnalerpisi?"

Harry, Ron Hermionelu oqaloqatigeeqqinngillat illus-
saarsuup isaariaata torsuusaanut apuunnissamik tungaanut.
Silami seqinnerneranut naleqqiullugu tamanna nillerpoq
tarrajullunilu.

"Allatut ajornartumik Dumbledore ornittariaqarparput,"
Harry oqarpoq. "Harry takornartaq oqaluttuussimavaa
qanoq ililluni Fluffy saneqqussinnaagaa, tassalu Snapeun-
gikkuni Voldemort Hagridip naapisimassavaa - Hagrid
aalakuulereermat oqaluttuartinniarnissaa ajornangitsuarsar-
suusimassaaq. Dumbledorep allaffia sumiippa?"

Eqqartik qinerpaat soorlu neriuutigalugu allagartamik
sumunnarnissaminnik tikkuussisinnaasumik nassaarnissar-
tik. Siornatigut eqqarsaatiginngisaannarsimavaat
Dumbledore sumi najugaqarnersoq imaluunniit allaffia
sumiinnersoq. Aamma tusaamasaqanngillat Dumbledore-

mukartinneqarsimasumik.

"Imaattuinnassaagut...." Harry oqalulluni aallartippoq nipangersinneqarporli nipimit peqqarniitsumit.

"Maani sulerivisi?"

Taama aperisoq tassaavoq McGonagall atuakkanik arl linnik tigumiarluni takkuttoq.

"Professor Dumbledore oqaloqatigerusukkaluarparput," Hermione sapiiserluni oqarpoq. Ron Harrylu eqqarsaannarput Hermionep taamaaliornera sapiitsuliornerusoq.

"Dumbledore oqaloqatiginiarpisiuk?" Professor McGonagall oqarpoq soorlu peqqusersusaarsoralugit pasi-pilullugit. "Sooq?"

Harry qiasunnguummerpoq. Maanna qanoq iliussappat?

"Ajoraluartumik isertuussaavoq..." Oqarpoq, taamali oqarnini peqqissimissutigaa tassami professor McGonagallip sorlua ingerlaannaq imernaalalermat.

Professor Dumbledore minutsit qulit matuma siornatigulli anivoq," inussiarnüppalulluni oqarpoq. "Angakkuarnermik Naalakkersuisoqarfimmiit allagarsigami tamatumalu kinguninngua tuaviornarpaamik Londoniliarluni timmilluni."

"Peqanngila?" Harry silaarutaasarluni oqarpoq.
"Aallarami?"

"Professor Dumbledore angakkorsuuvoq pissaanilissuaq, Potter. Annertuumik piumasaqaateqarfigineqartuarpoq..."

"Kisianni oqaasissarput pingaaruteqarpoq."

"Illit ajornartorsiutitit Angakkuarnermut Naalakkersuisoqarfiup ajornartorsiutaanit pingaaruteqarnerujussuuppat, Potter?"

"Tusaassuutit," Harry oqarpoq mianersorunnaavillunilu.
"Ujarak Inuunartoq pillugu maanngarpugut ..."

Taamatut oqarnissaa McGonagallip ilimaginngilluinnarpaa. Atuakkat iperarpai nakkaallugillu, katersornissaannillu eqqarsaateqarpasinngilaq.

"Qanoq ilillutit ilisimaviuk...?" Oqaaseqatigiit naanngitsorpai.

"Professoriaa isumaqarpunga - nalunngilara Sn - inuit ilaata Ujarak tillinniaraa tamannalu pillugu Dumbledore oqaloqatigisariaqarpara."

McGonagallip Harry annilaarpaseqaluni nakkuppaa uppererpasinngulu.

"Dumbledore aqagu utissaaq, kiisami oqarpoq.

"Naluara qanoq ilillutit Ujarak ilisimasaqarfiginerit kisianni oqarfigissavakkit Ujarak taanna tillinneqarsinnaanngilaq. Paarineqarluarpoq."

"Kisianni professoriaa...."

"Potter, nalunngilara suna eqqartorlugu," peqqarniippa-silluni oqarpoq. Peqippoq atuakkallu katersulerlugit.

"Siunnersuutigissavara silaannarissumut anissasutit seqinni-saarlutillu."

Taamaaliorsinnaanngillalli.

"Unnuaru pisoqassaaq," Professor McGonagall animmat Harry oqarpoq. Snape unnuaru matukkut nakkartartuk-kuussaaq. Ilisimasariaqakkani tamaasa nalunngilai maannalu Dumbledore qimagutitissimavaa. Dumbledore allaffigisimavaa. Iimagilluinnarpara Angakkuarnermut Naalakkersuisoqarfimmiut tupaallarujuussuassasut Dumbledore takkuppap.

"Ugummi susinnaa...."

Hermione anertikkarpoq. Harry Ronilu tuaviinnaq tunummut saapput.

Snape tunuanni qeqarpoq.

"Inuugujok," tatiginaatsumik oqarpoq.

Meeqqat nakkuppaat.

"Ullormi taama alianaatsigisumi isersimasariaqanngikka-luarpusi," qungujupalaarluni oqarpoq.

"Imaattuinnarniartugununa..." Harry aallartippoq qanoq oqarniarnarluni naluillugu.

"Sissuilaartariaqarpusi," Snape oqarpoq. "Taamatut malunnaarsaartuarlusi ingerlasaqaattaaginnarussi inuit isu-maqalissapput pilersaaruteqapiluttusi. Aammami Gryffindorip pointinik annaasaqaqqinnissani akissaqartin-ngilaa, ilaa?"

Harry aappillerpoq. Matumukalersullu ilinniartitsisup uteqquai.

"Mianersorit, Potter - unnuaannakkut angalaartutit naammattooqqikkukkit sulissutigissavara atuarfimmuit ani-sitaanissat. Tamassi nuannersumik ulloq atorluarniarisiuk!

Tunuppoq ilinniartitsisullu inaannut aallaruni.

Harry aatsaat majuartarfinnut ujaraasunut pigamik oqaq-qippoq.

"Okay, tusaassavarsi qanoq iliussanersugut," sukkasuu-mik isussuppoq. "Ilatta Snape sissuissavaa - ilinniartitsisut inaata silataani utaqqissavaa arlaannullu ingerlagaluarpat malittaralugu. Hermione, illit suliassamut taassumunnga piukkunnarnersaagunarputit."

"Sooq uangarpiannguaq?"

"Soorunami illiussaaq," Ron oqarpoq. "Professor Flitwick utaqqisuusaarsinnaavat, ilaa?" Nipini qataallisippaa niviar-siaqqap nipaa ilaarlugu. "Professor Flitwickiaa isumaalo-qaanga. Isumaqarpunga apequt normu 14 b kukkusumik akisimallugu."

"Nipangerniarit," Hermione oqarpoq Snapeli arajutsina-

veersaarniarlugu neriorsuilluni.

"Aamma init qummut quleriit pingajuanni torsuusap sila-
taani nakkutilliisariaqarpugut," Harry Ronimut oqarpoq.
"Qaaniaritsi!"

Paasinarsivorli pilersaarut taannarpiannguaq piviusun-
ngortinneqarsinnaanngitsoq. Matumut Fluffyp paarsaanut
pisullu professor McGonagall takkuppoq kamattorujussuul-
luni.

"Immaqa isumaqarpusi angakkuakkagut pitsaanerpaat
sanioqqussinnaallugit?" Kammaserpoq. "Maanna asuleer-
nersi naammagilivippara! Torsuusap uuma eqqaaniittusi
takoqqikkussi Gryffindorimiit 50 pointinik ilanngaaqqinnis-
sara nangaassutigissanngilara! Aap, Weasley, nammineq
kollegianninngaanniit!"

Harry aamma Ron isersimaartarfimmut uterput. Harry
oqaqqammensorlu, "qujanartumik Hermionep Snape nak-
kutigaa," asseq iikkamiittoq illuarpoq Hermionelu iserpoq.

"Ajuusaarpunga, Harry," aliasulluni oqarpoq. "Snape
marsileruttorlugu anillappoq aperalungalu sulerinersunga
akigakkulu Flitwick utaqqillugu taanna aavaa. Allatut ajor-
nartumik Flitwick oqaloqatigisariaqarsimavara oqaloqatigi-
neranilu Snape qimaasimavog. Nalulluinnarpara sumun-
narnersoq!"

"Taava allatut ajornartumik ataasiinnarmik periarfissa-
qarpugut," Harry oqarpoq.

Ilaasa marluk nakkuppaat. Harry tungertut qarsungati-
gaaq isaalu eqqumiitsumik qillerput.

"Unnuaru Ujarak allamit tiguneqartinnagu misilillugu
aaniarpara."

"Silaqaraluarpit?" Ron pilерpoq.

"Taamaaliorsinnaanngilatit!" Hermione oqarpoq.

"Tusaavatit McGonagall aamma Snape qanoq oqartut? Anisitaassaatit!"

"SOORMI ANISITTAAGALUARUMA?" Harry nillerpoq. "Takusinnaanngilisiuk? Snape-ip Ujarak tiguppagu Voldemort utissaaq! Tusarnikuunnginnassiuk taamani kikut tamaasa naalagaaffiginialermagit qanoq pisoqartoq? Atuarfeerutissaaq anisitaaffiusinnaasumik! Voldemortip aturfik suujunnaarsissavaa imaluunniit Ajortumut atuarfinngortillugu! Pointinik annaasaqarnissaaq tassunga naleqqiullugu suunngilaq, tamanna paasisinnaanngilisiuk? Isumaqarpisi nukittoqqikkuni ilissi ilaqutasilu suutissagaa-si? Ujarak pissarsiaritinnagu tigusaaguma taava ilaqutariin nut Dursleykkunnut utertariaqassaanga tassanilu Voldemortimit nassaarineqarnissara utaqqillugu. Tamanna ima isumaqaannarpoq Voldemortip naatsorsuineranit kingusinnerusumik toqussasunga. Taartup Pissaaneranut tunniutiinnarnavianngilanga! Unnuaru matukkut nakkartartukkuussaanga ilissilu qanorluunniit ilioraluarussi unitsis-sinnaanngilarsinga! Soorlu nalunngikkissi Voldemortip angajoqqaakka toqunnikuuai!"

Anneruniarpasilluni nakkuppai.

"Luumoorputit, Harry," Hermione nipaalluni oqarpoq.

"Uliguaq inuttaminik ersigunnaarsitsisartoo atussavara," Harry oqarpoq. "Qujanaqaaq uterteqqikkakku."

"Kisiannimi tamatta pingasuulluta ersigunnaarsissinnaavaatigut?" Ron aperivoq.

"Tamatta?"

"Umaangaa tassa. Isumaqarpit illit kisivit ulorianartorsiortinniaritsigit?"

"Soorunami taamaaliornavianngilagut," Hermione aalajangersimarpalulluni oqarpoq. "Qanoq ilillutit uagut ikiorti-

ginata Ujarak pissarsiarisinnaassasoraajuk? Atuakkakka qupperalaartariaqarpakka. Immaqa atorfissaqartitatsinnik nassaarsinnaavunga."

"Kisiannimi paasineqarutta ilissi marluullusi aamma anisitaassaasi."

"Tamanna qularaara," Hermione ilungersorpalulluni oqarpoq. "Flitwickip allamut oqaqqusinani oqaluttuuppaa nga taassumunga soraarummeerama 112 procentersima-sunga. Atuarfimmi taama angusarissaartigalunga anisinne-qarsinnaanngilanga."

Ulloqqeqasioreeramik pingasuullutik isersimaartarfimmi pissangallutik issiapput. Kialluunniit akornusersunngilaat; Gryffindorimi atuartup kialluunniit Harry oqaloqatigeru-sukkunnaarsimavaa. Kisiannili kiisami tamanna soqutiginnilaa. Hermione-p allattukkani tamaasa qupperarpari neri-ulluni angakkuaat unnuaru atorfissaqartitartik nassaarisinnaassallugu. Harry aamma Ron nipaqaanngillat, marluullutimmi ujaasinissartik eqqarsaatigaat.

Unnukkiartornerani atuartut isersimaartarfik qimagarpaat innariartorlutik.

"Uliguaq aasariaqarparput," Ron nipaatsumik oqarpoq Lee Jordan kingullerpaalluni kiisami innariartormat. Harry qummut arpappoq sinittarfimmilu taartumi uliguaq tigullugu. Tigugamiuk siggartaat Hagridip juullimut tunissutaa takulerpaa. Kaasarfimminut ikivaa; immaqa Fluffymut atorneqarsinnaavoq - aammami erinarsullaqqissorsuunnginnami.

Tuaviinnaq ilaminut arpalluni uterpoq.

"Uliguaq massakkut oqattaartariaqarparput, paasinias-savarput tamatta ersigunnaarsinnaanerluta. Filchip nassaa-

rigunisigut akuersissummik peqarnata unnuaannaq angalaartugut...."

"Sulerivisi?" Inip teqeqquanit nipi tutsiuppoq.

Neville issiavissuup tunuanit puttuppoq. Trevor tigullu-artitersimavaa naraserlu allaanngivippoq nammineerluni angalaarsimasoq-aasiit.

"Sulerinngilagut, Neville, sulerinngilagut," Harry oqapal-lappoq uliguarlu tunuminut toqqorlugu.

Nevillep kiinai qimerlooqqissaarpai.

"Aneeqqilerpusi," oqarpoq.

"Naamik, naamik, naamivik," Hermione oqarpoq.

"Taamaaliornissarput eqqarsaatiginngilarput, sooq innannginnavit, Neville?"

Harryp nalunaaqutaq bornholmereq matup eqqaaniittoq qissimippaa. Piffissamik asiutitseqqissinnaajunnaarput. Immaqa Snapep Fluffy sinnassarlugu aallartereerpoq.

"Anissanngilasi," Neville oqarpoq.

"Tigusaaqqiunnassaasiaasiit Gryffindorilu ajornartorsiortilerlugu.

"Naluat susoqarnersoq," Harry oqarpoq. "Aninissarput pingaaruteqarpoq."

Kisiannili erseqqippoq Neville tunniutiinnarnianngitsoq.

"Aninissarsi akuerisinnaanngilara," oqarpoq amallu puulasuup assingata saavanut qeqqilluni ingerlavissaat asserlugu. "Aniniarussi unammeqqaartariaqassavassinga."

"Neville!" Ron kamaammerujussuarpoq. Putumiit peerit, sianiülliorunnaarniarit..."

"Sianiitsuunerassanngilarma," Neville oqarpoq.

Malittarisassanik unioqqutitseqqissanngilatit! Aamma nammineq oqarnikuuvutit akiuunnissaq ilinniassagiga!"

"Aap, kisianni uagutsinnut akiuunnissaq pinngilara,"

Ron nillerpoq. "Neville, naluat sulerillutit!"

Siumut alloriarpoq, taamaalisorlu Neville naraseq nak-
kaavaa, taannalu ingerlaannaq pississaarluni qimagutipal-
lappoq.

"Qaaginnarit qununngikkuit!" Neville oqarpoq assanilu
peqissimasut qullarlugit. Piareersimavunga!"

Harryp Hermione pilerpaa.

"Angakkuaqit!" Quarsaarsimangaarluni oqarpoq.

Hermionep Neville ornippaa.

"Neville," oqarpoq, "iliuuseriniagara ajuusaarutigigalua-
qaara."

Angakkuaatini qullarpaa.

"Paralysicus Totalus!" Nillerpoq angakkuaatiminillu
Neville tikkuarlugu. Neville talii saneraanut nakkarpud
tasillutillu, niui imminnut parnaarpud timaalu tamarmi
issorporlusooq. Uppeqqaajalaarpoq naggataatigullu uppillu-
ni kiinaa ammut saalluni.

Hermionep tuaviinnaq illuanut saatippaa. Allerui aamma
parnaaqqagamik oqalussinnaanngilaaq. Taamaallaat isai
aalapput amiilaarsimarpasillunilu ilani isigai.

"Sugakku," Harry isussuppoq.

"Tassaana angakkuaat Timimik Parnaartitsisartoq ato-
rakku," Hermione naalliuppasilluni oqarpoq. "Neville ajuu-
saaqaanga."

"Allatut iliorsinnaanngilagut, Neville. Aamma maanna
nassuiaanissatsinnut piffissaqanngilagut," Harry oqarpoq.

"Kingusinnerusukkut paasiumaarpud, Neville," qulaallu-
gu alloriarlutik uliguaq inuttaminik ersigunnaarsitsisartoq
atigamikku Ron oqarpoq.

Kisiannili Neville natermi aalariarsinnaanngitsoq qimak-
kamikku ajuusaaraluaqaat. Annilaangangaaramik aqputaa-

ni inuusaliat takusatik tamaasa allaatinneq ajorpaat Filch taqissuisoq, anoraannguarpaluttumillu tusaagaangamik isu-maqartarput Peeves tungiminnut timmerpaluttoq.

Majuartarfiit siulliit ataanni madam Norris naammatoorpaat.

"Qaa, tunuaniit isimmeqisigu ataasiaannarlutaluunniit," Ron Harryp siutaatigut isussuppoq, Harryli ileqimisaartorpoq. Taqissorlutik sanioqqukkiartorpaat. Madam Norrisip isini sungaartut angisuut tungaannut saatippai aalariarnanili.

Allanik naapitsinatik init qummut quleriit pingajuanni torsuusap iserfigeqqusaanngitsup majuartarfiinut killipput Peeves majuartarfiit qulaanniippoq tullarfissiaq majuartarfimmittoq kaanngartinniarsaralugu inuit majuartarfikkut atertut naaffiginiasammassuk.

"Kinaana?" Tungiminnut ingerlasut tusarlugillu pilerpoq. Isai taartut peqqarniitsut ammaneerutingajapput.

"Nalunngilara maaniittutit naak takusinnaanngikkaluarlutit. Anersaajuvit, aliortugaq imaluunniit atuartuinnaq?"

Qullarsarpoq sumullu tamaanga qinerluni.

"Filch aassavara oqarfigalugulu majuartarfiit eqqaanni ersinngitsumik aalasoqartoq?"

Harry tassaanngaannaq isumassarsivoq.

"Peeves," iggiingalluni isussuppoq. "Baroni Aagasattoq ersinnginnissaminut pissutissaqarpoq."

Peeves tupangaarami nakkangajappoq. Nakkartinanni silaannarmi uneriatarpoq tummeqqallu alliit qulaanni silaannarmiilerluni.

"Utoqqatserpunga, Baroni Aagasattoq-aa," qujageqqusaarluni oqarpoq. "Allaasorigaluarpakkit tassami takusinnaannginnakkit, tamannali tupinnanngilaq ersinngilatimmi.

Peevesitoqaq isumakkeerfiginiaruk, asuleertungaana!"

"Uanga maani suliassaqarpunga, Peeves," Harry oqarpoq. "Unnuaru maaniissanngilatit."

"Aap, baron, qimagutissaanga." Peeves kajumissuseqarpalulluni oqarpoq qangattaqqillunilu. "Neriuppunga suliasat naammaginatsumik isumagiumaarit, baroniaa, akornusersussanngilakkitt."

Taava timmilluni qimaguppoq.

"Torrak, Harry," Ron isussuppoq.

Kingunitsianngua torsuusap iserfigeqqusaanngitsup matuanut pipput - matulu ikersisimareersoq takuaat.

"Takusiuk," Harry nipaatumik oqarpoq. "Snapep Fluffy saneqqutereersimavaa."

Matu ikersisimasoq takugamikku aatsaat qanoq pisoqar-nissaa iluamik paasillualerpaat. Uliguap ataani Harryp ilani saappai.

"Peqqissimigussi suli uternissassinut periarfissaqarpusi, taamaaliussagussi avoqqaarissanngilassi," oqarpoq.

"Uliguaq nassaannarsinnaavarsi uanga atorfissaqartikkun-naarpara."

"Ata sianiitsuusaarnak," Ron oqarpoq.

Aqqutaa tamaat peqataanarpugut," Hermione pilerpoq. Harryp matu ajappaa amnavillugu.

Matup neeqquluppallunnerata nipaa qatimaappallunner-mut nipaatumut akuliuppoq. Qimmip sorlui pingasut ingerlaannaq tungaannut sangutinneqarput, naak ersinnginnamik qimmimit takuneqarsinnaanngikkahualutik.

"Qimmip eqqaani natermiittoq sunaana?" Hermione isussuppoq.

"Kukkilattariatut isikkoqarpoq," Ron akivoq. "Snapep tamaanga qimassimassavaa."

"Imaassimassaaq nipilersorunnaaraanni qimmeq itertartoq," Harry oqarpoq. "Atagu, misilinniarpara..."

Hagridip qarlortaataa qanerminut tutsippaa supillugulu. Erinnamik tusarnersumik appitaqanngikkaluarpog erinarli appinneqarmat takusinnaavaat qimmip uisorersaatai oqi-maalliertortut. Harryp qimmeq sinilersikkusungaaramiuk anersaartornissaminulluunniit piffissaqanngilaq. Kigaatsun-guamik qimmeq qatimalukkunnaariartorpoq. Uppeqqa-jaavog naggataatigullu natermut uppilluni eqqissivilluni sinilerpoq.

"Nipilersorunnaassanngilatit, Harry," Ron mianersoqqu-sivog uliguarlu peerpaat nipaarsaarlutillu matumut nakkar tartumukarlutik. Qimmip niaqorujussui pingasut saneqqu kamikkik qimmip anersaartornera kissartog malugisinnaa-vaat.

"Maanna matu ammarsinnaagunarparput," Ron oqarpoq qimmillu qatigaa qulaallugu isiginnaarluni. "Siulliorusuppit, Hermione?"

"Qujaannarpunga!"

"Okay." Ronip kigutini kiivai qimmillu niui siaarsimasut qulaallugit allorluni. Peqippoq matullu nakkartartup tigum-mivia putulik saviminiusog nusullugu matulu ammarlugu.

"Arlaannik ersittoqarpa?" Hermione annilaangalluni aperi-voq.

"Naamik. Sunnguamilluunniit naamik - tasama taggariin-naavog - aamma majuartarfeqanngilaq allatullu ajornartu-mik ammut pissiinnartariaqarpugut."

Harryp siggartaammik siggartartuarpog Ron takoqqullu-ni aalateriffigaa taavalu imminut tikkuarluni.

"Siulliuniarpit? Ilumuuippit?" Ron oqarpoq. "Naluara naqqanut qanog ungasitsiginersog. Siggartaat

Hermionemut tunniunnaruk qimmeq eqqissisimatinniassa-
vaa."

Harryp siggartaat tunniuppaa. Sekundialunnguani sig-
gartaatip nipangersimanerani qimmeq qatimaaqqilerualuar-
poq pikilerualarlunilu, Hermioneli siggartaqqilermat pikku-
navissumik qanngueqqilerpoq.

Harry qimmeq qulaallugu allorpoq putukkullu ammut
isiginnaalerluni. Naqqa ersinngivippoq.

Putukkut aqqarpoq taliminillu nivinngarluni. Taava Ron
qummut qiviarpaa oqarlunilu: "Ajortumik pisoqariataassa-
galuarpat malissanngilersinnga. Akerlianik uppinnukassaasi
Hedvigilu Dumbledoremud allakkisartillugu. Taama nerior-
sorsinnaavisinga?"

"Neriorsorpatsigit!" Ron akivoq.

"Neriuppunga erniinnannguaq takoqqissallusi..."

Taava Harry ammut pissippoq. Silaannaq millertoq isugu-
tattorlu misigaa samungarujussuaq nakkariartornermini.

"FLUMP. Maavaartumut tuppoq massipporlu eqqani
misissorniarlugu. Isaasa taartoq suli sungiussinnanngilaat
kisiannili malugaa naasumi suugaluarnersumi issialluni.

"Ajortoqanngilaq!" Ilami tungaannut qummut suaarpoq,
tappika qaamaneq frimærkituinnaq angitigaaq. "Tuffissarsi
maavaaqaq pissiinnaritsi!"

Ron siulliulluni pissippoq Harryllu sanianut qinngamigut
tulluni.

"Sunaana taama eqqumiülluinnaqqissaartigisoq?" Oqar-
poq.

"Naluara, naasut arlarisimagunarpaat."

Tappavanngaanniut qimmip qiluppallunnera nipitooq tusar-
saalerpoq qujanartumilli Hermione pissereersimavoq.

Harryp sanianut tuppoq.

"Atuarfiup ataanut samungarujussuaq pisimassaagut,"
oqarpoq.

"Aap, iluanaarpugut naasumut tukkatta imaallaat maa-
vaartumut tuppugut," Ron oqarpoq.

"Iluanaarpugut!" Hermione kamappalulluni qataatsumik
nipeqarluni oqarpoq naasullu iigaanut isugutasumut tama-
viaarluni ingerlalerluni. Tuaviortariaqavippoq tassami tun-
nerata kinguninngua naasup kanaartai takisuut pulateriaar-
suttut ittut singernerinut nermussimapput. Naasup nermus-
sorluni talliartortartup Ron Harrylu tigusareereersimavai
aatsaalli taama pisoqartoq paasivaat Hermione takulera-
mikku.

Hermione naasup suli nermutivinngikkaani pilluni pil-
ni aniguivoq. Maanna annilaangarluni nukappiaqqat mar-
luk neriutaarutingajallutik naasumit kaanngarniarsarisut
isiginnaarpai. Tamaviaarnerat alliartortillugu naasoq taak-
kununga sakkortunerujartuinnartumik nermussuuppoq.

"Uninngaannaritsi aalajunnaarlusi!" Hermionep nilliaffi-
gai. Paasivara sunaanersaq - tassaana diaavulup inupilua!"

"Qujanaqaaq paasigakku qanoq ateqarnersaq.
Iluaqutaaqaatit," Ron naallioqisoq uumisaarluni oqarpoq
naasullu qungatsiminut nermunniarnera pinaveersaartinni-
arsarigaluarlugu.

"Nipangerit, eqqaaniarsarigigaana qanoq toqunneqartar-
nersaq!" Hermione oqarpoq.

"Aap, kisianni tuaviorniari. Anersaartorsinnaajunnaaler-
punga!" Naasup sakissamigut kiggigummani inuunini an-
naanniaatigalugu anertikkarluni oqarpoq.

"Diaavulup illusaataa - diaavulup illusaataa - qanormaan-
na professor Spire oqarpa? Naasoq taamaattoq isugutattu-
mi taartumi naasarpoq..."

"Taavami innermik ikitsiniarit!" Harry tamaviaarluni oqarniarsuaarpoq.

"Aap - soorunami - kisiannimi ikumasinnaasumik peqanngilagut!" Hermione nillerpoq neriuutaarulluinnarlunilu assani uluttuullugit.

"SOORUNA KAPPIALAANNARPIT? Ron suaarpoq. "ARNAQUASSAAJUIT IMALUUNNIIT NAAMIK?"

"Annilaangassangilasi ikiornialerpassi!" Hermione oqarpoq angakkuaatinilu tigoriarlugu aalatillugu, nipaatsumik oqaatsit ikittunnguit oqaatigai naasullu tungaanut tungujortumik naaralaartitsilluni. Naaralanerit tungujortut taamaattut Snape-imut sakkuginikuuai. Sekundialunnguit qaangi-ummata nukappiaqqat malugaat naasoq innermit qimagunniarsarilersoq aammalu iperariartoraatik. Naasoq innermit qimagukkiartuaarpoq sivitsorianngitsorlu nukappiaqqat naasup tigutsisaanit aniguipput.

"Qujanaqaaq naasut pillugit atuarnitsinni tusarnaartarsimagavit, Hermione," Harryp Hermione iikkap eqqaaniit-toq nalleramiuk kiagussuataarluni oqarpoq.

"Ilumoorputit," Ron oqarpoq, "aamma qujanarpoq ajutooqqajarnerit tamaasa paatsiveerunneq ajoravit, Harry. Hermioneaa qanoq aamma oqarsinnaavit ikitsisaateqanngitsugut?"

"Ugguunaqquutissaagut," Harry oqarpoq aqquutissiarlu qaarsoq ikuttarlugu sanaaq tikkuarlugu. Taanna kisimi aniffissiaavoq.

Pisuppalunnerisa saniatigut nipi tusaasatuaat tassaavoq iikkaninngaanniit erngup kuserpalunnera. Aqqutaat ammut sivinngariartuaarpoq Harryllu Gringotts eqqarsaatigilerpaa. Aamma eqqaalerpaa oqartoqartarmat uumasorujuit angakut aningaasaateqarfianni aningaaseriviit paarisarigaat.

Tamanna eqqarsaatigileramiuk uummataa tillerululerpoq. Ila qanoq ajortigissagaluarpa massakkut uumasorujummik naapitsisugalarunik - uumasorujummik angisoorsuarmik.

"Tusaasaqarpisi?" Ron isussuppoq.

Harry naalaalerpoq. Siuninguanni pisorpaluttumik tusaasaqalerput.

"Immaqaana aliortugaq pisorpaluttoq?"

"Taamaakkunanngilaq - allaanngivippoq suluppalluttoqartoq."

"Siunitsinni ikumasoqarpoq aamma aalasoqartoq takusinnaavara."

Aqquiliap amitsup isua tikippaat inimullu qaamasumut qilaava portoqisumut qaarajuttumut appakaallutik. Ini timmiaaqqanik diamantitut qillalaartunik timmisunik ulikkaarpoq. Inip akiani takusinnaavaat matu oqimaappassissoq qisummik sanaaq.

"Isumaqarpit ini aqqusaarutsigu saassutissagaatigut?"

Ron aperaaq.

"Ilimanaannaavoq," Harry oqarpoq.

"Qaasuppasippallaanngikkaluarpit kisiannili tamarsuarmik ataatsikkut tungitsinnut timmilerunik... atagu, allatut iliorsinnaanngilagut. Uanga siulliullunga arpasaanga."

Illumut anersaarujussuarpoq kiinnani taliminik asserlugu tuaviørnerpaamillu inip akianut arpalluni. Ilimagigaluarpaa timmissat sigguisa kukiisalu ikuttassagaanni kisiannili susoqanngilaq, ajornanilu matumut apuuppoq. Matup tiggummivia tiguaa kisiannili parnaaqqavoq.

Ilai marluk malinnaapput. Matu tamaviaarlutik ammar-niaraluarpaat ajornaqaarli ammarsinnaanngilaat. Aamma iluaqutaanngilaq Hermionep angakkuaat Alohomora

misilikkaluarmagu.

"Qanoq iliussaagut?" Ron aperivoq.

"Timmissat uku... kusassaataaginnarnavianngillat,"
Hermione eqqarsarpalulluni oqarpoq.

Timmissat qillalaartut kaavillutik timmisut isiginnaar-
paat... qillalaartut?

"Timmiaanngillat!" Harry oqariataarpoq. "Takusigit,
matuersaatinuku! Matuersaatit sulullit - qimerloorluaari-
arsigit. Ima isumaqarsimassaaq..." Inimi qinerpoq ilami
matuersaatit timmisut isiginnaaraat. "Aap, taamaassimas-
saaq. Takusigit, aajuku sanigutit! Nammineerluta timmillu-
ta matumut matuersaat tiguniassavarput!"

"Kisiannimi timmiaaqqat hundredet arlaqarput!"

"Ujagassarput matuersaataavog angisooq itsarnisaq.
limanavippoq sœlvimik sanaajussasog soorlu matup tigung-
nivia parnaarsaatalu sœlvimik sanaajusut."

Tamarmik sanigummik tigusipput tingillutillu.
Matuersaatit timmisut akornanni timmippat tigoriantarlugit
kisiannili silaannaq tigusarlugu. Matuersaatit angakkuakkat
sukkaqalutik illuartarmata tigungissaat ajornangajavittarpoq.

Kisiannili Harry asuliinnaq ukiut 100-t ingerlaneranni
ujaasisut inuusunnersarinngilaat. Eqqamini aalasut suul-
luunniit qanorlu sukkatigigaluartut takusinnaanissaannut
maluginissaannullu piginnaassuseqarpoq. Minutsi ataaseq
qaangiummat matuersaaterujussuaq sœlviusog naffakumik
sululik takulerpaa. Allaanngivippoq siornatigut tigusarine-
qarsimasog matuersaaserfimmullu peqqarniitsumik ikkun-
neqarsimasog.

"Aajinga" ilaminut nillerpog. "Matuersaassuaq innga -
naamik ikaniittoq - tungutsorinnik sululik - saneraani sului
nutsunneqarsimapput."

Ron tingilluni aallaannaqaaq Harryp tikkuagaata tungaanut kisiannili qilaamut aporluni sanigutiniillu nakkangajalluni.

"Allatut ajornartumik unguasariaqarparput!" Harry suaarpoq matuersaat naffakumik sululik alarnaveersaarlugu. "Ron illit qulaaniit qanillattussavat - Hermione illit ataaniit aarsaartinnaveersaarlugu. Uanga saneraaniit tiguniarsaris-savara, Okay. MASSAKKUT!"

Ron aarsaarpoq Hermionelu qummut aallarpoq. Matuersaatip tamaasa qimarratigai Harrylli malersorpaa. Matuersaat iikkap tungaannaanut sukkaqaluni timmivoq Harryllu assammi illua isatsippaa taavalu iikkamut tuttorlu assamminik siaaqqasumik tigusaralugu. Ron Hermionelu nuannaarnermik nipitoqisumik nillerrapput.

Sukkasuumik nunnipput Harrylu arpaannaq matumukarpoq matuersaat tiguniarlugu piuminaaqisooq tigumiarlugu. Parnaarsaammuk manguppaa qipillugulu. Parnaarsaat seqqorpallappoq matuersaallu qimaavoq ilaminullu tingilluni. Marlorialuni tiguneqarnermi kingorna aseruatiitersimaqaaq.

"Piareerpisi?" Matup tigummivia tigumiarlugu ilani aperivai. Taakku sikiallapput Harryllu matu ammarpaa.

Ini tullia taangaarmat assatilluunniit takusinnaanngilaat. Isermatali ini tamarmi qaammarujussuarpoq tupinnaannartumillu takusaqarput.

Skakkerferujussuup sinaaniippuk, illersartut qernertut namminerminniit annerujussuit ujaqqanit qernertunit qiperukkatut isikkullit tunuanni. Skakkerfiup illuatungaaniippuk illersartut qaqortut qernertunut saassimasut. Harryp, Ronip Hermionellu takugamikkit amiilaarujussuarput. Illersartut portusoorsuit kiinaqanngillat.

"Qanoq iliussaagut?" Harry isussuppoq.

"Skakkertariaqarpugut inip illuata tungaanut piniarluta."

Ron oqarpoq.

Illersartut qaqortut tunuanni matu alla takusinnaavaat.

"Qanoq ililluta?" Hermione qularpalulluni oqarpoq.

"Isumaqarpunga," Ron oqarpoq, "allatut ajornartumik illersartuusaartariaqartugut."

Illersartut ilaat hiisti ornippaa assanilu isaallugu hiisti attorniarlugu. Attoraanilu uummarpoq. Hiistip skakkerfik kiliororpaa hiistertullu niaqqi niaqorortinnaveeqqutilik Ronimut saatippaa.

"Iligiissaagut?" Ron aperivoq.

Hiistersuaq sikisaarpoq Ronilu ilaminut saappoq.

"Iungersunassaqaq..." Oqarpoq. "Isumaliorpunga qer-nertut inaat pingasut tigussagivut..."

Ronip qanoq iliornissani eqqarsaatigileruttora Harry Hermionelu oqaaseqanngillat. Kiisami oqarpoq. "Maanna ajuallassanngilasi kisianni nalunngilarsi arlaannarsiluunniit skakkillaqqissorsuunngitsoq..."

"Ajuallanngilagut," Harry oqapallappoq.

"Oqaluttuutiinnartigut qanoq iliussanersugut."

"Illit Harry, illersartut ilaata arpattartup inaa tigussavat illillu Hermione illit napasuliap sanianut pissaatit."

"Ilimmi?"

"Uanga hiistiussaanga," Ron oqarpoq.

Illersartut tusarnaartutut isikkoqarput tassami arpattartup, napasuliap hiistilli illersartut qaqortut tunuppaat skakkerfillu qimallugu Harry, Hermione Ronilu inissaqartinniarlugit.

"Qaqortut tamatigut aallartittarput," Ron oqarpoq skak-kerfiullu illuatungaa nakkullugu. "Aap... takusiuk..."

Naasorissaasoq qaqortoq siumut alloriarpoq kipparissut

marluk allorlugit.

Ronip qernertut naalakkersulerpai. Skakkerfimmi kippa-rissunut tikkuagaanut nipeqanngivillutik nuuttarput. Harryp seeqquni sajuttut malugisinnaavai. Ajorsassagaluarpata qan-ormita pisoqassava?

"Harry - diagonalimik siumut ingerlagit - talerpimmut kip-parissut sisamat ingerlavigissavatit."

Siullerpaamik annilaarujussuarput hiistimik aappaat tigu-saammat. Dronningip qaqortup anaallugu uppitippaa skak-kerfiullu avataanut kalillugu tassanilu uumassuseqanngitsoq ilillugu.

"Allatut ajornartumik pilliutigisariaqarparput," Ron oqar-poq aalaterneqarsimarpasilluni. Hermione maanna arpattar-tuat, løberiat tigusinnaanngorpat. Qaa ingerlaniarit!"

Illersartut qaqortut qernertunik toqutsisinnaanngoraa-ngamik naakkittarneq ajorput. Sivitsorianngitsoq qernert amerlanngitsut teqeqqumiilerput. Ronip marloriarluni tak-sarpaa Harry Hermionelu ulorianartorsiortut. Ilani ajornar-torsiortut tuavioqaluni angalaqattaartuarpoq akeqqaminik sapinngisaminik amerlasuunik toqutsisarluni.

"Apuutingajalerpugut," Ron oqarpoq.

"Eqqarsalaariarlunga - takulaariarlara."

Dronningi qaqortoq kiinaqanngitsoq Ronimut saappoq.

"Aap, paasisinnaavara..." Ron eqqarsarpalulluni oqarpoq.

"Tassami periarfissatuaavoq... allatut ajornartumik imminut pilliutigisariaqarpunga."

"NAAMIK!" Harry Hermionelu ataatsikkut nillerput.

"Skakkernerup malittarisassai taamaapput!" Ron nillerpoq.

"Imminut pilliutigisariaqarpoq! Siumut periassaanga taava tigussavaanga - taava illit kunngi ajorsartissinnaanngussavat, Harry!"

"Kisianni..."

"Snape unitsinniarpiuk imaluunniit qanoq?"

"Ron..."

"Tusaariarit, tuaviunngikkuit Ujarak siulliulluni tigussavaa!"

"Piareerpit?" Ron suaarpoq qarsungaqaluni aalajangersi-marpasillunili. "Perialerpunga, piffissaq asiutissanngilarasi ajugaaniariarussi."

Siumut allorpoq dronningillu qaqortup anaariarpaa. Niaquata qaavatigut taliminik ujaraasumik anaavaa Ronilu skakkertarfimmut uppippoq. Hermione nillerpoq kisiannili uninngaannarluni. Dronningip qaqortup Ron uniarlugu aallaruppaa taannalu ilisimajunnaaqasutut isikkoqarpoq.

Harry ileqimisaartuutigaluni kipparissut pingasut saamimmut illuarpoq.

Kunngip qaqortup niaqorutini peerpaa Harryllu isigaasa saavinut miloriullugu. Harrykkut ajugaapput. Illersartut avissaarput, sikillutik matumiillu illuarlutik. Ron neriuutaa-rulluinnaarlutik naggataamik qissimeriarlugu matu ammarpaat anillutillu torsuusamullu allamut iserlutik.

"Qanormi iliussaagut imaattorsimappat....?"

"Ilisimmassaqqaarpoq," imminut uppertinniartutullusooq Harry oqarpoq. "Maannali qanoq pisoqassava?"

"Spirep naasuutaa Flitwickillu matuersaatai timmisut naammattooreerpagut. McGonagallip skakkip illersagai angakkuarsimassavai uumassuseqalersillugit. Taava Quirrelip Snapellu angakkuagai kiserngoruppagut..."

Matu alla tikippaat.

"Piareerpit?" Harry aperivoq.

"Isiinnarit."

Harryp matu ammarpaa.

Matu ammaraallu tipersuaq naalerpaat. Tipingaarmat qinngatik uliguaminnik assertariaqarpaat. Isitik qulliliortut takulerpaat torulleq natermi nalasoq aagasaqaluni niaqqumigut kilerujussuarsimasoq. Torulleq una niviersiaqqat anartarfianni naammattuugaannit annerujussuuvoq.

"Qujaqaanga torullersuaq una akiortariaqannginnatsigu," torullip niorsui meqqulissut qulaannialeramikkik Harry oqarpoq. "Tuaviorniarit inimi maani anersaartorsinnaanngingajappunga."

Matup tullia ammarpaa qanorlu pisoqarnissaa sioorageqalugu ingerlaqqipput. Kisiannili annilaarnartumik naammattuuinngillat; taamaallaat takuaat nerrivik qaavani puiaasat assigiunngitsut arfineq marluk sanileriaarneqarsimasut.

"Tassa Snapep angakkuagaa," Harry oqarpoq.

"Qanormita iliussaagut?"

Ini iserfigaat iserniariartullu tunuanni innersuaq ikippuq uterfissaarullugit tunuanni matu asserlugu. Inneq nalinginnaanngilaq; naaralaarnerit aappillarissuuk qalipaateqarput. Taava inip akiani matup sioraani inneq qernertorsuaq naaralaalerpoq. Naaralaartut marluk akomanni ingerlaqqis sinnaajunaarput.

"Takuuk!" Hermionep pappiara imusimasoq pergamenti puiaasat sanianniittoq tiguaa Harryllu pappiaqqami allakat imaattut atualerpai.

Akunntsinni marluk ikiussavaatsit, aappaa aapparmisut pitsaatigaaq.

Arfineq marluusugut ilatta ataatsip ingerlaqqinmissat akuerisavaa.

Ataatsip imeruit utertissavaatit.

Puiaasat allat marluk naasumit viinniliaq uloriananngitsaq imaraat.

Ilagut pingasut toqutsiniarput, arlaanni tulleriiaartumi utaq-qissaagut.

Qanoq iliussallutit aalajangerit qaqugorsuarmut maaniin-nianngikkuit.

Aalajangiiniarninni ikiorniarlutit tumisiugassannik sisamanik tunissavatsigit.

Siulleg: Toqunartoq qanorluunniit toqqorsimalluartigigaluarpat, naasup viinniata tuiani saamerlermi arlaannik nassaassa-qartuassaatit.

Tumip aappaa imaappoq: Puiaasat marluk isui tamarmik assigiinngillat, ingerlaqqinniaruilli tamarmik akerarissavaatsit.

Siunnersuutit pingajuat: Soorlu takusinnaagit tamarmik assigiinngitsunik angissuseqarput, Toqup inorujussuit inuaqqal-luunniit toqqortarinngilai.

Sisamaat aajuna: Usserukkit saamerlerniit aappaat talerper-lerniillu aappaat assigiipput, takugukkilli tamarmik assigiis-sanngillat.

Hermione anersaamivoq Harryllu qungujuttoq takugamiuk tupaallappoq. Maannakkorpiaq qungujunnissaa ilimaginn-gikkaluarpaa.

"Ajunngilluinnarpoq," Hermione oqarpoq. "Una angak-kuarnerunngilaq qarasagulli atortariaqarpagut.

Nalorsitsaarutaavoq. Angakkorpasuaqarpoq tunngaveqar-luartumik eqqarsarsinnaanngitsunik maangalu iseraluaru-nik qaqugorsuarmut aneqqinnaviissagaluartunik."

"Uagummi aamma allatut ajornartumik maaniiginnarta-riaqassanngilagut?"

"Naamik taamaalisariaqanngilagut," Hermione oqarpoq.

"Pappiaqqami akissut takusinnaavarput. Puiaasat arfineq marluupput. Pingasut toqunartumik imaqarput, marluk viinnimik, puiaasap ataatsip isumannaatsumik innermit qernertumit innarlerneqartinnata ingerlatissavaatigut ataatsillu innermit aappaluttumit innarlerneqartinnata uterteq-qissavaatigut."

"Kisiannimi qanoq ililluta paasissavarput puiaasaq sorlerimissanerlugu?"

"Utaqqilaarit."

Hermionep allakkat marloriarluni atuaqqippai. Taava puiaasat ornippai isiginnaalerlugillu nipaqaanngitsumik oqaluutigaluni ataasiakkaarlugillu tikkuartarlugit.

Naggataatigut paasisaqarpasilluni assani patippai.

"Paasivara," oqarpoq. "Puiaasat minnersaata innermik qernertumik aqqusaarutissavaatigut Ujaqqamullu ingerlalluta."

"Puiaasap taassuma imaa ataasiinnarmut naammappoq," oqarpoq. "Ataasiarluniluunniit najorsinermut naammanngilaq."

Imminnut nakkupput.

"Puiaasap sorliup inneq aappaluttukut aqqusaartissavaatigut?"

Hermionep puiaasat talerperlersaat puiaasaq ammalortoq tikkuarpaa.

"Illit imissavat," Harry oqarpoq. "Naagga tusaariarit - uterlutit Ron aassavat. Marluullusi tamassi matuersaasivimmi sanigummik tigusissaasi matukut nakkartartukut qummut ingerlallusi, Fluffy sanioqqullugu uppinnullu ingerlaqqillusi. Hedvig Dumbledoremuk allakkisartissavarsi - taassuma ikiuunnissaa atorfissaqartipparput. Immaqa Snape nassaarigukku sivikitsumik uninngatikallarsinnaa-

vara kisiannili sivilunerusumik akiorsinnaanngilara."

"Kisiannimi Harry, qanoq iliussavit 'Illit-nalunngilat-kinaasoq' takkutissagaluarpap?"

"Naapeqqaarakku iluatsitserujussuarpunga," Harry oqarpoq qilerunilu tikkuarlugu. "Imaassinnaavoq tamatumuuna aamma iluatsitsisunga."

Hermione qarlui sajulerput tassanngaannarlui Harry eqippaa.

"Hermione-aa!"

"Harry - paasissavat - angakkorsuuvutit."

"Uanga illitulli pikkoritsiginngilanga," Iperarmani Harry aappillerluni oqarpoq.

"Uanga!" Hermione oqarpoq. "Uanga nalunngisakka taamaallaat atuakkani atuarsimavakka! Maanili inuunermi pikkorissuseqarnermut naleqqiullugu pingaarnarujussuarnik peqarpoq. Soorlu ikinngutiginneq sapiissuseqarnerlu.... aamma -, Harry - neriorsussavarua mianersussagavit!"

"Illit imeqqaassaait," Harry oqarpoq.

"Qularutiginngilammi suna sorliunersog, ilaa?"

"Aap qularutiginngilara. Puiaasat isorlersaat puiaasaq ammalortoq aarlruppaa erniinnarlui timaa tamarmi sajulerpoq.

"Toqunartuunngilarmi?" Harry annilaangalluni pilerpoq.

"Naamik - kisianni nillertorujussuuvog."

"Tuavi, sunniutaarutsinnagu ingerlapallanniarit."

"Inuulluarit iluatsitsilluarinalu - imminut paariniarna..."

"ANINIARIT!"

Hermione tunuppoq innerlu aappaluttoq ajoqusernani aqqusaarlugu.

Harry anertikkarpoq puiaasallu minnersaat tigullugu.

Inneq qernertoq saappaa.

"Maanna aggilerpunga," oqarpoq puiaasarlu ataasiarlugu aarlorukkamiuk imaarlugu.

"Allaanngivippoq nillertorsuarmik kuineqartoq. Puiaasaq ilivaa siumullu aallarluni. Ajornerpaamik pisoqarnissaa ilimagalugu inneq qernertoq pulaffigaa. Ikualasut timiminut naaralaartut isigai maluginagilli - sivikitsunnguamik inneq qernertuinnaq eqqamini takusinnaavaa - taava illuatungaanut pivoq, tassaniipporlu init kingullerpaartaat.

Taqqamaniittoqareerpoq - kisiannili ilimagisamitut Snape-iunngilaq aamma Voldemortiuunngilaq.

Angut marlunnik kiinalik

Tassaana Quirrel.

"Illit!" Harry anertikkarpoq.

Quirrel qungujuppoq. Sunnguamilluunniit annilaangar-pasinngilaq.

"Aap, uanga allanit inornerunngitsoq! Eqqissilluni oqar-poq. "Eqqarsaatigileruttoq para qaqugu maani naapissaner-lutit, Potter."

"Isumaqaraluarpunga...Snape..."

"Severus?" Quirrel illarpoq. Illarneralu pisarnermit allaa-neruvoq. Illartarneratut inngilaq peqqarniitsumilli illaruua-tiginninneruvoq. "Aap, Severusiunissaa ilimanarnerugaluar-poq, ilaa? Uannut iluaqutaasimaqaaq Snape imangertatut allisoornikuusutut pasinapilulluni angalaqattaarmat.

Taamaattumik inupalaaqartillugu kiap it-it-ittoqersoq n-n-nal-nallinnartoq p-professor Q-Quirrel pasipilussavaa?"

Harry paasisinnaanngivippaa.

Taamaattoqarsinnaanngilaq.

"Kisiannimi Snapep toqoriaraluarpaanga?"

"Naagga, naagga, naagga. Uanga toqoriaraluarpakkit. Ikinngutivit niaviarsiap Grangerip Quidditchimik unamm-i nermi Snape tuaviinnaq ikuallatsikkiartoramiuk aqquataani sakallunga ajattoorpaanga. Sakammanga illit isigiunnaar-

toorpakkit. Ajanngitsuugaluarpanga sekundit arlaqanngit-sut qaangiunneranni sanigutinniit nakkartissimassagaluarpakkit. Siusinnerujussuakkulli nakkartissimasinnaagaluarpakkit Snape ikiorniarlutit nipaqaanngitsumik oqalulluni angakkuarsimanngitsuugaluarpat."

"Snapep annaanniaraluaraminga?"

"Soorunami." Quirrel peqqarneeqaluni akivoq.

"Annaanniarlutimmi unamminissami tullermi dommeriunissani kimigiuserutigisimassavaa. Qulakkeerniarsimavaa sanigutinniit igitaaqqinnginnissat. Tamanna assut quianarpoq - taamarsuarmi naalliunnissaa pisariaqarsimanngikka-luarpoq, tassami Dumbledore isiginnaartut akornanniütillu-gu uanga qanoq iliuuseqarsinnaanngivippunga.

Ilinniartitsisut allat tamarmik isumaqarput Snape domme-riuniartoq Gryffindorip ajugaanissaa pinngitsoortinniarlu-gu. Imminut dommerinngortinnermigut ilaminit nuanna-rineqarnera annikillerujussuarpoq... aammami tamanna piffissamik asiutitsinerinnaavoq unnuarumi toqunniarak-kit."

Quirrelip assammi inuai imminnut kalluullugit seqqortip-pai. Silaannarmiit allunaasat takisuut takkupput Harryllu timaanut nermullutik.

"Alapernaappallaaqigavit toqussaait, Potter. Iluartut Ulluata unnukkuani sumi tamaani angalaartoqartarami? Naammattoorsimasinnaagaluarpama Ujaqqamik paarsisoq kinaanersoq paasiniarlugu ingerlaninni."

"Illit-una qaqqap torullia isertikkit?"

"Aap uangaana. Uanga torullit tungaasigut immikkut piginnaaneqarpunga, takoreerpammi qamani inip aappaani inorujussuaq qanoq pisimagiga? Kisiannili kikkut tamar-mik torullermik ujaasillutik arpaqattaalermata Snape-ip

sulerisunga paasereersimavaanga. Snape init quleriit pingajuannut torsuusarsuarmukarpoq unitsinniarlunga.

Ajornerusumilli pisoqarpoq. Torulliup unatarujussuanngitsoorpaatit aamma qimmersuup Snape-ip niua kiillugu kipinngitsoorpaa. Kisianni maani eqqissillutit utaqqisariaqarparma, Potter. Tarrarsuut una soqutiginarpoq misissoqqaartariaqarpara."

Harryp aatsaat paasivaa Quirrelip tunuani soqarnersoq. Tassaana Tarrarsuut takorruuisitsisartog.

"Ujarak nassaariniaraanni tarrarsuut una matuersaataavoq." Quirrel oqarpoq tarrarsuutillu sinna sakkukitsumik kasutturugulu. "Tassaana Dumbledorep ileqqua taamaattunik persaqusersuinissaq... kisianni maanna Londonimiipog uterpallu uanga qimaareersimassuunga."

Harry allatut iliorsinnaanngilaq kisianni Quirrel oqalut-sinniarsaralugu oqaluleruni tarrarsuut eqqarsaatiginngin-niassammagu.

"Takuassi Snape-ilu orpippassuarniittusi..." Tuaviinnaq oqarpoq.

"Aap," Quirrel soqutigisaqarpassinnani oqarpoq tarrarsuut tunuaniit takuniaatigalugu. "Tamatumaa nalaani paasi-soorpaanga suniarnersunga paasiniaaffigalungalu qanoq paasisaqarsimatigereernersunga. Qangalili pasipilulersimavaanga. Annilaartinniaraluarpaanga - annilaartissinnaasoralunga. Voldemort saninniimmat...."

Quirrel tarrarsuutip tunuaniit takkuteqqippog, tarrarsuutip saavanut qeqqippog pilerigingaarlugulu isigilerlugu.

"Ujarak takusinnaavara... naalakkannut takutissavara... kisianni massakkorpiag sumiippa?"

Harry kaanngarniaraluarpoq kisiannili allunaasat pituus-saarsinnaanngilai. Quirrelip tarrarsuummik isertugaataanil-

lu paasisaqarnissaa pinngitsoortinniartariaqarpaa.

"Kisiannimi Snapep qinngarsortutut pissusilersorfignar-paanga.." Harry pilerpoq.

"Aap, aammami qinngarsugaraatit." Quirrel oqarpoq.

"Tumut qinngarsugareqaatit. Hogwartsimi atuartuugallara-mi ataatat atuaqatigaa. Immaqa tamanna naluat?

Taamanikkut taakku marluk imminnut saperput. Kisiannili toqunissat kissaatiginngisaannarpaa."

"Kisiannimi ippassaani atuagaateqarfiup saniani inimi atuarfiusumi inoqanngitsumi tusaavakkit qiarpaluttutit - isumaqaraluarpunga Snapep qunusaaraatit..."

Siullerpaamik Quirrel annilaangarpasilerpoq.

"Taannikkooriarlunga," oqarpoq, "ajornakusoortittarpar-naalaklama naalakkiutaasa malinnissaat. Taanna silarsuar-mi angakkut annersaraat uangali sanngiitsuinnaavunga..."

"Tassa ima paasisariaqarpa naalakkat inimeeqatigisima-git?" Harry oqarpoq.

"Sumiikkaluaraangamaluunniit eqqanniittuaannartar-poq," Quirrel nipaatumik oqarpoq. "Silarsuarmik kaajal-laallunga angalaarama naapippara. Taamanikkut inuusut-tuuvunga sianiitsoq, ajunngitsoq ajortorlu pillugit quia-naannartumik eqqarsaatersuutilik, kisiannili Lord Volde-mortip paasitippaanga kukkusunga. Ajunngitsoqarnanilu ajortoqanngilaq. Taamaallaat pissaaneq, taannalu tigune-qarsinnaavoq imaluunniit tibunngitsoorneqarsinnaalluni. Taamanikkulli Voldemort aalajaallunga kiffartuussimavara naak arlaleriaqalunga kukkusarsimagaluarlunga. Allatut ajornartumik sukannerfigisarsimavaanga." Quirrel tassan-ngaannaq sajoriarpoq. "Kukkugaangama imaaliillaannaq isumakkeerfigineq ajorpaanga. Ujarak Gringottsiminngaaniit tillinngitsoorakku naammagittaalliortorujussuuvoq.

Pillarpaanga... aalajangerluni sissuerneruniarlunga..."

Quirrelip nipaa tusarsaajunnaarpoq. Harryp
Diagonalstrædimut ingerlaarnini eqaalerpaa - qanoq
aamma taama sianiitsigisinnaava? Namminermi ulloq taan-
na Hagrid ilagalugu aningaaserivimmiikkami Quirrel naa-
pippaa. Imerniartarfimmi Uunnaavimmi Ussiitsumi ilassi-
vaa.

Quirrel nipikitsumik oqaasipiluppoq.

"Paasisinnaanngilara - Ujarak tarrarsuutip iluaniippa?
Tarrarsuut aserorlugu nassaarissavara?"

Harry tamaviannguut eqqarsalerpoq: Suna tamaat akiga-
lugu Quirrelimit siulliullunga Ujarak nassaariniartariaqar-
para, eqqarsarpoq. Tassalu maannakkorpiq kissaatigisama
annersaat. Maannakkut tarrarsuummut qiviaruma imminut
takussaanga Ujarak nassarisimallugu - tamannalu ima isu-
maqarpoq aamma takussagiga Ujarak sumiinnersoq!
Kisianni Quirrelip paasinngisaanik qanoq ilillunga tarrar-
suut qiviassavara?

Quirrelip maluginngisaanik tarrarsuutip saavanut piniar-
luni saamimmut illuarniarsarigaluarpoq, allunaasalli singer-
neranut pitulluarsimavallaaqimmata naappoq uppillunilu.

Quirrelip isiginngitsuusaarpaa. Suli imminut oqaluup-
poq. "Tarrarsuut una susinnaava? Qanoq atorneqarsinnaa-
va? Naalagara ikiunnga!"

Harrylli annilaarutigeqisaanik nipi Quirrelimeerpassissoq
akivoq.

"Nukappiaraq atoruk... nukappiaraq atoruk..."

Quirrel Harrymut saappoq.

"Aap - Potter - qaagit."

Assani patippai allunaasallu Harrymit pituussaajarpot.
Harry kigaatsunnguamik nikuippoq.

"Qaagit!" Quirrel oqaqqippoq. "Tarrarsuut isigiuk sunalu takunerlugu oqaluttuullunga."

Harryp ornippaa.

Salloqittartariaqarpara, neriutaarutillerluni eqqarsarpoq. Tarrarsuut alakkartariaqarpara sunalu takunerlugu salloqittaagalugu - allamik iliuuseqartariaqanngilanga.

Quirrel tununnguanut qeqqippoq. Harryp tipi eqqumiitsoq Quirrelip nasaaneersaq naamavaa. Sequnngerpoq tarrarsuutillu saavanut qeqqilluni. Taava isini ammaqqippai.

Tarrani takuaa siullermik annilaangasoq qarsungasorlu. Kinguninnguutigulli tarraata qungujuppaa. Tarraa kaasarfissiorpoq ujarallu aappillarissoq amnullugu. Tarraata isimi illua qamippaa ujarallu kaasarfimminut ikeqqillugu - taamaalisorlu Harryp oqimaatsorujussuaq kaasarfimminut tuttoq malugilerpaa. Qanoq ililluni pinerpoq Ujarak Inuunartoq pigilersimavaa.

"Qaa," Quirrel erinitsalluni oqarpoq. "Suna takusinnaaviuk?"

Harry tamaviannguat sapiisernialerpoq.

"Imminut takusinnaavunga Dumbledore assammikkiga," oqaluttualiorpoq. "Uanga - uanga pissutaallunga Gryffindorimi ilinniartut najugaqarfiata pokali pissarsia-raa."

Quirrel oqaasipiloqqippoq.

"Illuarit," oqarpoq. Harry illuarami Ujarak Inuunartoq kaasarfimminiuttoq malugilluarsinnaalerpaa.

Qimaanissanimi qunuginngilaa?

Sulili tallimanik allorianngitsoq nipitoorsuarmik oqaluttoq tusaqqilerpaa naak Quirrelip qarluni aalatinngikkaluarai.

"Salluvoq... salluvoq..."

"Potter, qaagit!" Quirrel suaarpoq. "Ilumoortoq oqaati-giniaruk! Tarrarsuummi suna takuviuk?"

Nipi nipitoorsuaq oqaloqqilerpoq.

"Uanga oqaloqatigilara... kiinaa isigalugu..."

"Naalagaq, suli nukittunngilatit!"

"Nukittoreerpunga... tassunga..."

Harry misigilerpoq soorlu Diaavulup naasuata tigoqqissimagaani aalariarsinnaajunnaarsilluni.

Aalariarsinnaajunnaavippoq.

Amiilaammerujussuarluni takulerpaa Quirrelip turbanini siaaleraa. Qanoruna pisoqartoq? Turbani nakkarpoq Quirrelillu niaqua nasaqanngitsoq mikerpaseqaaq. Taava Quirrelip Harry kigaatsumik tunukkiartuaarpaa.

Harry nillerniaraluarpoq nillersinnaananili. Quirrelip tunusussaraluanippooq kiinaq - kiinnat Harryp takusarsimsaanit ersinarnersaralugulu amiilaarnarnersaat. Kiinaq qarmatut kalkerneqarsimasutut qaqqoritsigaaq aappaluttunik aamaartunik iseqarluni toqusullu kinaata sorluanik sorloqarluni.

"Harry Potter..." isussuppoq.

Harry tunummut alloriaraluarpoq niuili aalariarumann-gillat.

"Takuuk qanoq isikkoqalersimasunga!" Kiinaq oqarpoq. "Tarraannanngorsimavunga nallinnartoq... aatsaat inuk alla timaanik avitseqatigigaangakku takuneqarsinnaanngortarpunga, qujanartumilli inoqartuarpoq uummataannut anersaavinullu iseqqusisunik. Enhjørningip aavata sapaatit akunerini kingullerni nakussassarpaanga... nammineq takuat Quirrelip ilumoortup orpippassuarni uanga sinnerlunga aak imeraa. Kisiannili aatsaat Inuunerup Najoqqagassaa Allann-gornartoq pigilerukku nammineq kiatissannik sanasinnaa-

vunga. Taava sooq Ujarak kaasarfinniittoq uannut tunniutinnarnianngiliuk?"

Tassa nalunngilaa Ujarak kaasarfimmiorigaa. Harry aalariarsinnaaqqilerpoq tunumullu uppeqqajaalluni.

"Sianiilliussanngilatit," kiinaq kamattorsuulluni oqarpoq. "Imminut annaanniarit uannullu ilanngullutit.

Taamaaliunngikkuit angajoqqaattulli pineqassaatit... taakku toqupput nallittuuteqqullutik qinnuvigiitigalunga..."

"SALLUTOOQ!" Harry kamaqaluni nillerpoq.

Quirrel kinguporsorluni tungaanut ingerlavoq Voldemortip Harry isigisinnaaniassammagu. Kiinaq ajortoq qungujuppoq.

"Killitsisimanaq," kiinaq isussuppoq. "Sapiissuseq ataqqiuarsimavara. Aap nukappiaraq, angajoqqaatit sapiitsuupput. Ataatat siulliullugu toquppara oqarsinnaavungalu sapeeqaaluni akiuukkaluartoq. Akerlianik anaanat toqusariaqarsimanngikkaluarpoq serniginiarmatilli toquppara. Ujarak tunniunniaruk anaanat asuliinnaq toqunnginniassooq."

"NAAMIVIK!"

Harry matumut ikuallattumut arpappoq Voldemortili nillerpoq. "TIGUJUK!" kinguninnguagullu Harryp malugaa Quirrelip talimigut tigugaani. Harryp qileruni assut anniari-lerpaa, misigivoq soorlu niaqqi marlunngorluni qupilersoq. Nilliavoq sapinngisanilu tamaat akiuulluni, tassanngaannarlu tupaatigeqisaminik malugilerpaa Quirrelip iperaraani. Anniarpallaarunnaarpoq - paatsiveerulluni eqqani qinerpaa Quirrel sumut pisimanersooq paasinia-rlugu paasillugulu nammineq anniarnermik natermi paarmorluni. Aamma takulerpaa Quirrel issiasooq assammilu inuai misissorlugit sunaaffa assai uutitersimangaaramik qaanneri puttussuutilersut.

"Tigujuk! TIGUJUK!" Voldemort nilliaqqippoo Quirrelilu pissippoq. Harry uppittippaa sakiaanullu ingeriarluni toqqusassillugu. Harryp qileruni anniari sorujussuanngoqqippaa anniangaaramilu paatsiveerukkaluarpoq, taamaakkaluartorli nalunngilaa Quirrel aamma sunnerneqartoq. Quirrel nillia voq: "Naalagaq najummisinnaanngilaa - assakka - assakka!"

Quirrelip Harryp qungasia iperartariaqarpaa naak Harryp qaavani suli issiagaluarluni. Paatsiveerulluni itummani nakkuppai Harryllu takusinnaavaa uutitersimanermik amia katassimasooq.

"Qaa toqunniaruk, sianiitsoq-aa. Naammassiniaruk!" Voldemort qataajaqivoq.

Quirrelip assani kivippaa Harryp toqussutissaanik angakuarniarluni, kisiannili Harryp eqqarsaatigeqqaarnagu akeqqani kiinaatigut tiguaa -

"NA'-AAAA!"

Quirrel illuarpoq kiinnani uutiternermik ulikkaartut. Maanna Harryp paasivaa susoqarnersooq. Quirrelip amia attoraangamiuk Quirrel naalliorujussuuartarpoq - taamaattumik annanniaruni Quirrel tigumiartuaannartariaqarpaa annitittuarlugu taamaalillunilu angakkuarnaveersaartillugu.

Harry pissippoq Quirrelillu talia tigullugu sapinngisanilu tamakkerlugu najummilerlugu. Quirrel anniarnermik nillia voq Harrylu iperartinniarsarlugu. Harryp niaqqumigut anniarnera sakkortusiartuinnarpoq - anniangaarami isigisauruppoq Voldemortillu anniarluni nillianera taamaallaat tusaasinnaallugu. "TOQUNNIARUK! TOQUNNIARUK!" Aamma nipit allat tusaasinnaasorai ima nilliasut: "Harry! Harry!" Kisianni ilimanaannaavoq tusaasaqarsoriinnartoq.

Maanna Quirrelip talia Harrymik najumminnittoq peer-sinneqarpoq. Harryllu paasivaa tamanna qanoq isumaqartoq: Suut tamaasa annaavai. Taartuinnarsuarmut nakkariartorpoq, samunga... samunga... samunga...

Suunersoq kuultitut qalipaaticilik qulaani qillaallappoq. Innaallagialq kuultiusoq! Tigoriaraluarpaa talinili oqimaangaarmata kivissinnaanngilai.

Ataasiarluni uisorerpoq. Innaallagiaanngilaq. Takusai tas-aapput isarussat qaamanermi qillaallattut. Eqqumiik.

Uisoreqqippoq. Maanna takulerpaa Albus Dumbledorep kiinaa qungujulalluni qanilliarortoq.

"Kutaa, Harry." Albus Dumbledore oqarpoq.

Harryp nakkuppaa taavalu suut tamaasa eqqaalerpai: "Professori! Ujarak! Quirrellip Ujarak tigumiarpaa! Professoriaa tuaviornepaamik..."

"Eqqissiinnarit nukappiaraatiga. Pisimasunut malinnaanngilatit," Dumbledore oqarpoq. "Quirrelip Ujarak tiguminnngilaa."

"Kiammi tigumiarpaa? Professori, uanga..."

"Harry eqqissilaarit eqqissinngikkuit madam Pomfrey aggeqinaaq anisillungalu."

Harry eqqissivoq eqqanilu qimerluulerlugit. Paasilerpaa atuarfiup napparsimavittaaniilluni. Siniffimmi qaqortunik tungilinni nalavoq sanianiipporlu nerrivik mamakujuttunik ulikkaartoq.

"Ikinngutinniit ilinnillu alutorinnittunit pissatit," Dumbledore qungujorujussuarluni oqarpoq. "Illit professor Quirrelillu akunnissinni iliveqarfiliap ataani pisut isertugaapput taamaattumik atuarfimmi atuartut ilinniartitsisullu pisut tamaasa ilisimavaat. Ikinnguutit Fred aamma George

Weasley ima ingasatsigaat allaat anartarfiup matuanik nas-sinniarsimagaluarlutit. Isumaqarsimagunaraluarput taa-maattumik tunissutisinissat nuannarissagit Madam Pom-freylli kusaginnginnamiuk unitsissimavai.

"Qanoq sivistigisumik maaniikkama?"

"Ulluni pingasuni. Ronald Weasley Hermione Grangerilu eqqissiallassapput paasigunikku ilisimmarsima-sutit. Tamassa ernumasorujussuupput."

"Kisiannimi professoriaa Ujarak..."

"Takusinnaavara suna tamaat paaserusukkit. Aap, pro-fessor Quirrelip Ujaraatinnik arsaanngitsoorpaatit. Suli arsaarianngikkaatit takkuppunga naak illit nammineerlutit ingerlalluaraluartutit."

"Kingsinaarnak angerlamut apuussimavutit?
Hermione uppia ilinnut takkupa?"

"Angumerinngitsoorpara. Londonimut pigama ingerlaan-naq paasivara aallartussaasimananga tuaviinnarlu uteqqip-punga. Soorlu oqareersunga kingsinaarnanga Quirrelimit annaappakkit..."

"Tassa illiusimavoq?"

"Annilaangaleraluarpunga kingsinaarsimassasoralunga."

"Aammami kingsinaangajapputit. Utaqqinerusimasuu-galuaruma Ujaqqamik arsaarsimassagaluarpaanga."

"Ujarak eqqartunngilara, nukappiaraatiga. Illit pivakkit – naalliunnerpit toqungajappaatit. Isumaqaleraluarpunga ikioriarfeerusimasutit. Ujarak eqqarsaatigigukku taanna suujunnaarsinneqareerpoq."

"Suujunnaarsinneqareerpa? Harry oqarpoq."

"Ikinngutimmi – Nicolas Flamel..."

"Sunaaffa aamma Nicolas Flamel tusaamavat? Albus Dumbledore nuannaarluni oqarpoq. "Paasiniaalluavissi-

mavutit. Aap, Nicolasilu oqaloqatigiippugut. Marluulluta isumaqatigiippugut pitsaanerpaassasoq Ujarak suujunnaar-sinneqarpat.”

”Tamanna ima paasisariaqanngila Nicolas Flamel nulialu ernüinnaq toquussasut?”

”Qujanartumik Inuunerup Isseranik naammattumik peqaramik isumagisassatik isumagaat. Taava piffissanngorpat toqujumaarput.”

Harry tupaallannera takugamiuk Dumbledore qungujuppoq.

Illit inuusoqigavit immaqa tamanna annilaarnartutut isigivat kisiannili Nicolas Perenellilu misigissapput ullup sivi-soorsuup kingorna sinilerlutik. Ilumut oqassagaanni toqu tassaaginnarpoq paasisassarsiorluni angalanerujussuaq – isumaliortaaseq eqqortoq pigigaanni taamaappoq. Piviusoq isigissagaanni Ujarak Inuunartoq alutornartorsuartut oqaatigisariaqanngilaq. Aningaasat piumasat tamaasa inuunerlu qanorluunniit takitigisoq! Taakku marluk inuit pingaartin-nerujuassavaat – kisiannili inuit ajornartorsiutaat unaavoq namminerminnut ajornerpaaq qinerniartaramikku.”

Harry nipeqarani siniffimmi nalavoq. Naluaa qanoq oqassanerluni. Dumbledore niperujoorpoq qilaamullu isigii-tigaluni qungujulluni.

”Professoriaa?” Harry oqarpoq. ”Una eqqarsaatigaara – naak Ujarak peerutereeraluartoq Volde.. 'Illit-nalunngilat-kinaasoq' imaattorsinnaanng....?”

”Voldemortimik taaginnaruk, Harry. Oqaatiginiakkat tamarmik ativimminnik taaneqartariaqarput. Atiata taanis-saa ersigigaanni pineqartoq aamma ersigineqalersarpoq.”

”Aap, professori. Voldemort allatut ililluni uteqqinni-arsinnaanngila? Tammavinngilarmi, ilaa?”

"Aap, Harry, tammavinngilaq. Suli arlaanniippoq. Immaqa inummik allamik pulaffigisinnaasaminik ujarlerpoq. Inuuneqavinnginnami toqunneqarsinnaanngilaq. Quirrel toqummat qimaannarpaa, kiffaminut naakkittaap-poq soorlu aamma akeqqaminut taamaattoq. Ataatsimut oqaatigalugu immaqa kinguaattoortilaaginnarpat tassami nukini tamaasa pigileqqittussaavai. Kisianni immaqa taamanikkussamut naapitsissaaq killissaa tikillugu unammillertusamik – aammalu taamatut pisoqartuassappat, tassa unammillerneqartuassaguni, immaqa uteqqinnissaminut periarfissinneqaqqinngisaannassaaq."

Harry sikisaarpoq erniinnarli taamaatilluni niaqquni annernarmat. Taava oqarpoq: "Professoriia, alla annertunerusumik paasisaqarfigerusukkalarpara... immaqa ilumoor-tumik oqaluttuussinnavarma..."

"Ilumoortoq..." Dumbledore anersaamivoq. "Oqaaseq taanna kusanartuuvoq sioreanartuullunilu taamaattumillu mianersortunnguamik iliuuseqarfigineqartariaqarluni. Kisianni apeqqutitit akiumaarpakka akiumannginnissaannut pitsassuarmik pissutissaqanngikkuma – taamaassappat isumakkeerfigissavarma. Neriorsussavakkit salluniarnanga."

"Paaserusutara unaavoq... Voldemort oqarpoq tigungiarsimagaluarlunga tamannali anaanama pinngitsoortimmagu toqussimallugu. Kisianni sooruna toqunniarsimagaanga?"

Dumbledore tamatumuuna anersaamerujussuarpoq.

"Utoqqatseraluarpunga kisianni apeqqutit siulleq akisinnaanngilara. Ullumikkuunngitsoq, massakkuunngitsoq. Arlaanni suna tamaat paasiumaarpat... kisianni massakkut sussa eqqaaqqinnagu, Harry. Utoqqaaneruleruit... nalunngilara tusassallugu nuannarinngikkit, kisianni kingusinnerusukkut ilumoortoq tusassallugu piareeruit tusarumaarpat."

Harryp nalunngilaa akerlilersoraluaruniuk iluaqutaana-vianngitsoq.

"Kisianni sooq Quirrelip attorsinnaanngilaanga?"

"Aanaavit inuunini illit pillutit pilliutigaa. Voldemortip paasisinnaanngisaasa pingaarnersarigunarpaat asanninneq. Voldemortup paasinngitsoorpaa aanaavit ilinnut asannin-nera sakkortungaarmat ilisarnaaserneqartutit.

Qileruungitsoq, ilisarnaataanngitsoq ersittoq... ima asane-qartigigutta allaat uumajunnaareersumit asaneqarluta ajortumut naassaanngitsumik sernissorneqartuassaagut.

Kisianni Quirrel ima uumissuitigaaq, piumatussuseqartigaluni angusaqarusussuseqartigalunilu allaat akuerisinnaal-lugu anersaaminik Voldemortilu aveqatigiüssinnaanissartik. Tamannarpiaq pissutigalugu attornissat saperpaa. Inuk pitsaasoq taamatullu ilisarnaatilik attoruniuk naalliungaaler-sussaavoq."

Dumbledorep qarmap anillanganerani timmiaq mitsima-soq isiginnaalerpaa, Harryllu qullini allarterpai. Nipini naa-lakkersorsinnaanngoqqikkamiuk aperivoq: "Uligarmi atil-lugu ersigunnaarsitsisartoq? Kiap taanna uannut nassiup-paa? Nalunngiliuk?"

"Ilaana. Ataatavit uannut paarisassanngortillugu qimap-paa, uangalu eqqarsarsimavunga piffissanngorpat illit ator-nissaa paasiumaarit." Dumbledorep isai qulliliulerput.

"Atisaq pitsassuaq atorfissaqarluartoq. Ataatavit qanga atorerusarpaa igaffimmut sikaavinni nerisassanik tillinnia-leraangami."

"Aamma allamik paaserusutaqarpunga..."

"Takanna aperiinnarit."

"Quirrel oqarpoq Snape..."

"Professor Snape, Harry."

"Aap, taanna - Quirrel oqarpoq taassuma qinngarso-raanga ataataga qinngarsugarigamiuk. Ilumoorpa?"

"Aap, taakku imminnut akaareqatigiinngisaannarsimap-put. Soorlu illit Malfoyilu taamaattusi. Kisianni taava ataat qanoq iliuuseqarpoq, ataatavilli iliuuseqarnera pissutigalugu Snapep ataatat isumakkeerfigisinnaannngisaannarpaa."

"Sugami?"

"Snapep inuunera annaakkamiuk."

"Qanoq?"

"Aap..." Dumbledore eqqarsarpalulluni oqarpoq. "Inuup eqqarsaatai paasiuminaatsuusinnaapput, ilaa? Professor Snapep ataatannut akiitsoqarnini artorpaa. Qularinngivippara ukioq taanna paariniarluarsimassaqaatit ataatannut akiitsuni akilerniarlugu neriullunilu taamaalioruni ataatallu naliigülerumaarlutik. Eqqarsarsimassaaq taamaalioreeruni eqqissilluni ataatat uumissoqqissinnaalerumaarlugu..."

Harryp oqaatsit kingulliit paasiniarsarigaluarpai, kisiannili paasiuminaatsingaaramigit kaattartorsuarmik niaqorluleroq. Maannakkuugallartoq eqqarsaatigiunnaarallarpaa.

"Aamma suli ataatsimik paasisaqarusukkaluarpunga..."

"Ataasiinnarmik?"

"Qanoq ilillunga Ujarak tarrarsuummit anisippara?"

"Aha, nuannaarutigeqaara apeqqut taannarpiannguaq apeqqutigigakku. Tassaana isumassarsياما pitsaanerit ilaat, uangalu oqaatigissagukku tamanna imaannaanngeqaaq. Tusaassaatit, Ujaqqamik nassaarusulluni kissaateqartup kisimi - nassaaralugu kisianni atornagu - Ujarak pissarsiarisinnaavaa. Taamaanngippammi qanorsuaq kuultiliortoqarsinnaavoq Inuunerullu Isseranik naassaanngitsumik imertoqarluni. Uanga nammineq nassaarsiullaqqissutsima ilaannikkooriarlunga tupigusutsittarpaanga... kisianni ullu-

mikkumut naammatunik apeqquteqareerputit.
Siunnersuutigissavara mamakujuutitit maanna soqutigilissagitit. Aah, Bertiep certaatai assigiinngitsunik mamassusillit! Inuusukkallarama iluatitsitsillunga meriaarsunnitsumik usseramali usseqqinnissaat qunugilernikuuakka – kisianni maannakkut karamelitut qalipaatilimmik misiliiniarpunga. Taanna ernumananngilaq, ilaa?”

Qungujulalluni eertaq kajortumik qalipaatilik oqummerpaa ingerlaannangajallu ipingajalluni. ”Puuha, mamaak! Minissunnitsoq!”

Madam Pomfrey inugissuuvoq mersernarlunili.

”Minutsit tallimaannaat,” Harry qinuvoq.

”Naamerluinnaq!”

”Kisiannimi professor Dumbledore isertippat...”

”Aap, kisiannimi taanna atuarfiup pisortaraa. Tamanna allarluinnaavoq. Maanna illit eqqissisimasariaqarputit.”

”Kisiannimi qasuereerpunga. Takuuk, nalavunga eqqissisimaqalunga. Aah, minutsit tallimaannaat, madam Pomfrey...”

”Ajunngilarmi,” oqarpoq, ”kisianni minutsit tallimaannaat isersimaffigisinnaavarsi.”

Taava Ron Hermionelu isertippai.

”Harry!”

Allaanngivippoq Hermionep Harry aappassaa eqinniara-luaraa Harrylu eqqissiliallappoq eqeqqinngitsoormani sulimi niaqua annernaqaaq.

”Harry-aa, qularinngilluinnaraluarparput ajortumik pisoqassasoq – Dumbledore ernumaqaaq...”

”Pisimasoq atuarfimmi tamarmik oqaluuseraat,” Ron oqarpoq. ”Susoqarpiarami?”

Pisimasoq una pisimasut qaqutigoortut ilagaat, tassami oqaluttuaq eqqortoq tusatsiakkanut naleqqiullugu pissanganarnerujussuuvoq. Harryp suna tamaat oqaluttuaraa: Quirrel, tarrarsuut, Ujarak Voldemortilu. Ron Hermionelu tusarnaarluavippu; piffissanngoraangat pissanganermik anertikkalersarput, taavalu oqaluttuummatik Quirrelip turbaniani suna toqqortaanersoq Hermione nipitoorsuarmik nillerpoq.

"Ujarak tammarpa?" Ron oqarpoq. "Taava Nicolas Flamel toquinnassava?"

"Aamma uanga taama aperivunga, kisianni Dumbledore isumaqarpoq – qanormaanna oqarpa? Aap, Dumbledore isumaqarpoq eqqortumik isumaliortaaseqaraanni toqu tas-saaginnartoq paasisassarsiorluni angalaneq pissanganartoq."

"Qangali oqartarpunga silaqarluanngitsuusoq," Ron oqarpoq tupigusulerlunilu eqqarsaatigileramiuk angut taanna alutorisani taama silanngajaartigisoq.

"Kisiannimi ilissi marluullusi qanoq pivisi?" Harry aperaaq.

"Uagut ajorata utimut apuuppugut." Hermione oqarpoq. "Uanga Ron itersarpara – itertinniarnera sivisulaarpoq – taava tuaviinnaq uppinnukarpugut Dumbledore atassute-qarfiginiarlugu qujanartumilli isaarissap torsuusaanukarluta naaperiataarparput. Sunaaffa nammineq qanoq pisoqarnera paaseriikatassimagaa. Oqaannarpoq. "Harryp malersorpaa, ilaa?" Taava tuaviinnaq torsuusamut iserfigeqqusaanngitsumukarpugut."

"Isumaqarpit qangali nalusimanngikkaa suniarnersutit?" Ron aperaaq. "Taassumammi ataatavit uliguaa atillugu inuttaminik tammartitsisartoq ilinnut nassiuppaa?"

"Naagga, aatsaat taama ingasatsigisumik..." Hermione

kamaqaluni oqarpoq. "Sunaana eqqarsaatigisimagaa – tassa taannaasimaguni – toqutaasimasinnaagaluarputit!"

"Taama ajortiginngilaq," Harry eqqarsarpalulluni oqarpoq. "Dumbledore angutaavoq eqqumiitsoq. Isumaqarpunga arlaannik naammassisaqarnissannik periarfissikkaanga. Isumaqarpunga maani susoqarnera tamanga-jaat nalunngikkaa. Aamma isumaqarpunga qanoq iliorniar-nissarput naatsorsuutigereersimagaa; unitsinniaannarnatali suliatna naammassinissaanut atorfissaqartitatsinnik tunivaa-tigut. Ikiorpaatigut. Upperinngilara Tarrarsuut nalaatsor-nerinnarmik nassaarigiga, uannununa nassaaritikkaa qa-norlu atorneqartarnersoq ilinniartitsissutigalugu. Allaan-ngivippoq eqqarsarsimasoq Voldemortip naapinnissaa pisussaaffigigiga.

"Aap, Dumbledore silanngajaavissuuvoq," Ron alutorsarpa-lulluni oqarpoq. "Tusaagit, aqagu nalliuttorsiornissatsinnut ajorunnaartariaqarputit. Pointit tamarmik kisinneqareerput soorunalumi Slytherin ajugaavoq. Ukioq manna Quidditchimik unammineq kingulleq peqataaffiginngitsoor-pat Ravenclawip ajugaaffigerujussuarpaatigut. Illit arsaate-qataanngitsooravit ajorsarpugut, soqutaanngilarli aqagu nalliuttorsiorluta nerersuarnissarput nuannissaqaaq."

Taava madam Pomfrey iserpoq.

"Maanna minutsit 15-ingajaat isersimareerpusi. ANINI-ARITSI," aalajangersimarpalulluni oqarpoq.

Unnuaq naallugu sinilluareerami Harry qangatut peqqit-sigaluni misigisimavoq.

"Ukioq manna nalliuttorsiornissamut peqataarusuppunga," madam Pomfrey nerriväaasoq oqarfigaa.

"Peqataasinnaavunga?"

"Professor Dumbledore oqarpoq peqataasinnaasutit," mamiatsappasilluni oqarpoq soorlu isumaqartoq Harryp nalliuttorsiortunut peqataanissaa inuuneranik ulorianartorsiortitsissasoq. "Usi pulaartut qamani silatitsinni utaqqivoq."

"Torrak," Harry oqarpoq. "Kina?"

Madam Pomfrey suli akerianngitsoq Hagrid iseriikatap-poq. Hagrid illup iluaneeriarami allaanngivippoq annerulersimasoq. Harryp sanianut ingippoq isigilluariarlugulu qissaserpoq.

"Uangaana – sunut – tamanut – pisuusunga!" Kiinni assassuarminik toqqorlugu manittorpoq. "Inupilussuaq taanna oqaluttuuppara qanoq ililluni Fluffy saneqqussinnaaga! Isertugaq oqaatigisoorpara! Taassuma paasinissaa kisiat amigaatigaa uangalu eqqarsaqqaaranga oqaluttua-raara! Kanngusungaarama toquinnarsinnaavungaluunniit! Uumasorujuup mannia pissutiginnarlugu taamaalior-punga! Kingorna imigassamik aalakoonartulimmik attueq-qinnianngilanga! Anisitaasariaqaraluarpunga Muggleritullu inuutitaallunga!"

"Hagrid!" Harry Hagridip isumatsangaarnera annilaarutigeqalugu oqarpoq. Hagridip qullii umiunut kuupput masatseqalugit. "Hagrid, qanorluunniit pisoqaraluarpat paasereersimassagualarpaa. Voldemortuuna pigipput. Illit oqaatiginngitsuugaluarukku allatut iliorluni paasisimassagualarpaa."

"Kisiannimi illit toqutaasimasinnaagualarputit!" Hagrid qiavoq. "Aamma ateq taanna oqaatigissanngilat!"

"VOLDEMORT!" Harry tamaviannguut nillerpoq Hagridilu uissuummingaarami qiajunnaarpoq. "Uanga

naapinnikuuara atiatalu oqaatiginissaa qunuginngilara. Qümmanniarit, Hagrid. Ujarak annaapparput. Peeruppoq, maannalu inupiluup iluaqutiginnaajunnaarpaa. Sukku-laammik piniarit. Peqaqaanga...”

Hagridip qinngani assammi itumaanik allarterpaa oqarlunilu: ”Usi tunissutissaqarpunga.”

”Neriuppunga hermelinsandwichiussanngitsoq!” Harry ernumalluni oqarpoq. Hagrid kiisami qungujussinnaanngorpoq.

”Naagga, naagga, suliariniassagakku Dumbledorep ulloq naallugu sulinngiffeqartippaanga. Akerlianik soraarsissimassagaluaraminga, kisiannili taamaaliunngilaq. Kisianni aajuna...”

Paasinarsivoq tunniussaa tassaasoq atuagaq kusanarteq amerimik ungalulik. Harryp alapernaalluni qupperpaa. Atuagaq angakktut assinginik assilisanik ulikkaarpoq. Assit qungujupput quppernernilu tamani aalateriffigaat. Tamarmik ataataata anaanaatalu asseraat.

”Uppiit aallartikkakktut atuartut tamaasa angajoqqaavinut aperalugillu angajoqqaavit assitoqaannik pigisaqarnersut, nalunnginnakku illit peqanngitsutit. Nuannaraagit?”

Harry oqarsinnaanngilarluunniit, Hagridillu paasivaa.

Unnuk taanna Harryp kisimiilluni nalliuttorsiortut ornippai. Madam Pomfreyip oqaaqqissaarineri aammalu naggammik qanoq inneranik misissuiniarnera kinguaattoorutigisimavai. Apuummat Inersuaq ulikkaareersimavoq. Inersuaq Slytherinip qalipaataanik pinnerarneqarsimavoq - kuultimik sölvimillu - ukiut arfineq aappassaa ingerlatiinarlugu pokalimik pissarsinera nalliuttorsiutiginiarlugu. Erfalasorujussuaq katinngat Slytherinip pulateriaarsuanik

pinnerasaasigaq ilinniartitsisut nerriviata tunuani iikkami
nivinngarneqarsimavoq.

Harry isermat nipiliorneq illarpalunnerlu annikilliallap-
poq kinguninnguali isersimasut suli nipitunerullutik immin-
nut oqaluutilerput. Harry Gryffindorip nerriviani Ronip
Hermionellu akornanni issiavissippoq maluginaveersaar-
paali inuit tamarmik takulluarumallugu nikutsernerat.

Qujanartumik Dumbledore isernerata kinguninngua tak-
kuppoq sunalu tamarmi nipaaruppoq.

"Ukioq aasiit qaangiuppoq!" Dumbledore qümalluni aal-
larniivoq. "Nerisassagullu mamarunartut nerilersinnagit
utoqqaat oqaaserisartagaannik pisarissersorniarpassi. Ila
ukioq qaangiuttoq pisoqarfioqaaq! Neriuppunga ukiup atu-
arfiup aallartinneranut naleqqiullugu ukiup ingerlanerani
niaqqusi immernerusimassagisi... aammami massakkut
asaq naallugu puigornissaannut periarfissaqalerpusi ukiup
ituarfiusup aallarteqqinnissaata tungaanut!

Ukiorli qaangiunneq ajorpoq unamminerit inernerit naat-
sorsorneqartinnagit. Paasisakka malillugit maanna inissisi-
manersi imaappoq: Normu 4-nngorpoq Gryffindor 312
pointinnattoq; normu 3-nngorpoq Hufflepuff 352 pointin-
nattoq; normu 2-nngorpoq Ravenclaw 426 pointinnattoq
kiisalu ajugaasoq tassaavoq Slytherin 472 pointinnattoq."

Slytherinip nerrivianiit ajugaasimaarluni nilliarpalunner-
suaq tusarsaalerpoq. Harryp takusinnaava Draco Malfoyip
imertarfini nerriviup qaavanut anaarluterujussuaraa.

Takullugu merianngunaannarpoq.

"Aap, aap, Slytherin torrallaavoq," Dumbledore oqar-
poq. "Kisiannili allanik aamma pisoqarpoq ilanngunneqar-
tariaqartunik."

Inersuaq nipaallerujussuarpoq. Slytherinip kollegiaani

najugallit qungujulavallaarunnaarput.

"Hmmm, takulaariarlara," Dumbledore oqarpoq.

"Maanna naammassilivinnitsinni suli pointinik agguaassas-saqarpunga... Siullermik - Ron Weasleymut oqaasissaqarpunga..."

Ronip kiinaa aappillerujussuarpoq.

"... Hogwartsip oqaluttuarisaanerani skakkerluarnerpaasutut nersorusuppara taamaalillungalu Gryffindor 50 pointinik tunissavara."

Gryffindorermiut nuannannerisa qilaap ulloriai angakku-akkt aalatingajappaat. Percy nipitunersaavoq oqarami:

"Uangaana qatanngutiga! Qatanngutiga nukarleq! McGonagallip skakkimik illersagai angisuupilussuit ajugaaffigai!"

Kiisami Inersuaq nipaalleqqippoq.

"Tulliullugu Hermione Granger immikkut taarusuppara... ikuallattoq naammattooramiuk periataarnera pillugu nersualaaruppara, taamaattumillu Hermione Granger sinnerlugu Gryffindor 50 pointinik tunissavara."

Hermionep kiinni assamminik asserpaa. Harryp ilimagil-luinnarpaa nuannaarnermik qiasoq.

Gryffindorip atuartui nuannaangaaramik paatsiveerutingajapput - maanna angusaat 100 pointinik ilaqqipput.

"Suli pointinik agguagassaqaqqippugut - Harry Potter"...Dumbledore oqarpoq. Inersuaq nipaarutingaarmat meqqut natermut tuttoq tusaaneqarsinnaanngorpoq.... "nersorniarpara anusinngujaallunilu sapiitsuliortarneranut. Harry Potterip sapiitsuliorneranut Gryffindor 60 pointinik nersornaaserniarpara."

Nipersuaq qoqianngunaannarpoq. Kisitsisinnaasortaat nuannatiitigalutik naatsorsuigamik paasivaat Gryffindor

maanna 472 pointeqalersimasoo, tassalu Slytherinip pointiisa amerlaqataanik pissarsisimalluni. Ajugaasimassagaluarpot Dumbledorep Harry pointimik ataasiinnarmik tuneqqissimasuugaluarpagu.

Dumbledorep talini qullarpaa Inersuarlu kigaatsumik nipaarukkiartoqqippoq.

"Sapiitsuliornert assigiinnngitsuupput," Dumbledore quingujalluni oqarpoq. "Akeqqanut sorsunniaraanni sapiisuseqartariaqarpoq sapiissutsillu minnerpaamik angeqataa atortariaqarpoq ikinngutigut illersorniarutsigit. Taamaatumik Neville Longbottom 10 pointinik tuniniarpara."

Tamatuma nalaani Inersuup silataani inoqarsimasuugaluarpot taakku isumaqarsimassagaluarpot Inersuarmini qartoortoqartoq – Gryffindorip nerriviani nipersuaq taama sakortutigaaq. Harry, Ron Hermionelu ersaartaanniartut nikuipput Neville asingalluni tupigusullunilu atuartut allat namminermik eqitaarinninniartut akornannut pulasorlu. Manna tikillugu kollegiaminut ataatsimilluunniit pointinnatsisisimannngilaq. Harryp sulipersuarsiortup Ron saneraatigut toorpaa Malfoyilu ajuusaarnerorpasinnerusinnaannngitsutut isikkulik tupassimaqisorlu tikkuarlugu. Allaannngivippoq arlaata timaa parnaarlugu angakkuarsimagaa.

"Tamanna isumaqarpoq," nipiliuleruttortut Dumbledore nillerpoq, tassami Ravenclawimiut Hufflepuffermiullu nuannattorsuupput Slytherin kiisami ajugaaffigineqarmat, "tununni iikkap pinnersaatai allannngortuttariaqarigut."

Assani pattappai taavalu sekundiunngitsulluunniit ingerlanerani erfalasoq ilisarnaat qorsuusoq aappillarissumik taarserneqarpoq qalipaallu sölvi kuultinngorluni; Slytherinip pulateriaarsorujussua tammarpoq Gryffindorillu lövianit taarserneqarluni. Snapep professor McGonagall ornittaria-

qarpaa assammillugu pilluaqqujartorlugu, kisiannili kiinaatigut takuneqarsinnaavoq pilluaqqusiniarnini ajornartorsiutigigaa. Snapep qissimimmani Harryp paasivaa Snapep namminerminut misigissusai allanngorsimanngivissut.

Tamannali Harryp soqutiginnigilaa. Tassami paasinarsivoq suut tamarmik pisarnermissut ittut aappaagulu atuarnissaq nalinginnaajumaartoq – atuarfimmi Hogwartsitut ittumi atuarneq nalinginnaasutut oqaatigineqarsinnaappat.

Unnuk taanna Harryp inuunerani unnuit nuannernersaraat; Quidditchimik arsaalluni ajugaanermit imaluunniit qaqqap torullianik ilisimajunnaarsitsinermi nuannerneruvoq – aap allaat juulliaqqap unnuaanit nuannernerulluni... unnuk taanna puigunngisaannassavaa.

Soraarummeeramik angusamik saqqummiunneqartussaane rat Harryp puiguissimagaluarpaa. Tamarmik tupaallaatigegisaannik Harry Ronilu angusarissaarput. Soorunami Hermione ukioq taanna atuartut angusarissaarnerpaartaat, kisianni Neville aamma angusivoq – Naasulerinermi angusarissaarnerata annaappaa tassami nakorsaatinik akuutissiornermi angusaluttupilussuusimagami. Neriussimagalu arput Goyle, ajussutsimisut sianiitsigisoq, anisitaajumaartoq, taannattaarli angusivoq. Tamanna ajuusaarnaraluaqaaq kisiannili soorlu Ron oqartoq; inuunermi maani suut tamaasa pineq ajornaqaat.

Ullulli ilaanni sikaavii imaarneqarsimapput kuffertiilu poortorneqarsimallutik. Neville narasia anartarfiit ilaata tunuani nassaarineqarpoq atuartullu tamarmik immikkut allaffigineqarput aasaanerani atuanngiffiup nalaani angakkuarneq inerteqqutaasoq ("Ukiut tamaasa neriuttaraluarpunga taamatut allaffigissanngikkaatigut" Fred Weasley nakangal-

luni oqarpoq). Hagridip umiatsiaaqqanut tatsimik ikaarussi-sussanut ingerlappai Hogwartsillu qimuttuitsui unittarfimmi utaqqipput. Inissatik nassaaraat, oqaloqatigüppullu illarlutil-lu qimuttuitsut igalaavisa silataani nuna isigisaat qorsooqqis-siartuaartillugu. Bertiep eertaliaanik assigiinngitsunik ma-massusilinnik nerripput, Mugglerit illoqarfii sanioqquttarlu-git angakkutullu uliguatik poortorlugit taakkunungalu taarsiullugit jakkitik kavaajatillu atillugit. Naggataatigut qimuttuitsut unittarfiannut King's Crossimut perron 9 tre kvartimut unipput.

Atuartut amerlaqigamik tamarmik unittarfimmiit anilla-kaanniarnarat sivisuvoq. Nakkutilliisup utoqqaap ittanneru-sup qarmakkut anillappata stationip isertarfiani inunnit malugineqannginneruniassammata marlukkuutaarlugit ima-luunniit pingasukkuutaarlugit qarmakkut anillatsittarpai. Taamaanngippat Mugglerit annilaartinneqarpallaassa-qim-mata.

"Aasaru pulaarusukkutsigut pulaarniarisigut," Ron Harrymut Hermionemullu oqarpoq. "Marluullusi - uppi-mik nassikkumaarpassi."

"Qujanaq," Harry oqarpoq. "Qiimmassarneqalaarnissara atorfissaqartissavara."

"Atuartut allat akornanni ingerlapput Mugglerit silarsu-aannut appakaakkiartorlutik. Ilaat nilliapput: "Inuulluarna, Harry!"

"Takussuugut, Potter!"

"Suli tusaamasaavutit," Ron oqarpoq illarlunilu.

"Ornitassanni taamaanngilaq." Harry oqarpoq.

Harry, Ron Hermionelu ataatsikkoorlutik isaariaq putoq-quppaat.

"Aajinnga, anaana! Takuuk, aajinnga!"

Tassaana Ginny Weasley, Ronip najaa Ronimik tikkuar-tuisoq.

"Harry Potter!" Qataajaqilluni nilliavoq. "Anaana ta-kuuk! Maaniippoq..."

"Nipangerniarit, Ginny. Tikkuartuisoqarneq ajorpoq." Arnaata qungujffigai.

"Ukioq manna ulapippisi?" Aperivoq.

"Assorsuaq," Harry oqarpoq. "qujanarlu karamelinut tu-juulummullu, Weasley."

"Suunngilaq, ikinngutinnguara."

"Kiisami takkupputit. Piareerpit?"

Tassaana akkaa Vernon takkuttoq. Kiinaa suli aappalup-poq sulilu kakkivissamigut umissuaqarpoq. Aamma suli kamaatigaa Harryp uppimmik timmissat inaaniiitaminik tigumiaqarnera, naak qimuttuitsut unittarfianini inuppasuit akornanniikkaluarluni. Tunuaniipput aja Petunia Dudleylu. Dudley Harry takullugulu annilaarujussuarpoq.

"Harryp ilaqutarisimassavaasi!" Ronip arnaa pilerpoq.

"Taamatukanneq oqartoqarsinnaavoq," akkaa Vernon oqarpoq. "Qaa, tuaviorniarit, nukappiaraq-aa. Ulloq naal-lugu piffissaqanngilagut." Pisulluni aallarpoq.

Harry uninngaqqaarpoq Ron Hermionelu naggataaru-taasumik oqaloqatigilaarniarlugit.


"Taava aasap ingerlanerani takoqqissaagut, ilaa?"

"Neriuppunga illit.... eeh, atuanngiffeqarnerit aallartil-luassagit..." Hermione oqarpoq akkaa Vernonilu nalorner-pasilluni isigalugu. Tupigutsaatigaa inummik taama iluan-ngitsigisoqarsinnaammat.

"Ilimagilluinnarpara," Harry qungujorujussuarluni oqar-poq. Ikinngutaasa marluk tupigusullutik isigaat.

"Naluaammi aasami atuanngiffiup nalaani angerlarsimaf-

fimmi angakkuartoqaqqusaanngitsoq. Ilimagaara aasaq
manna Dudley quianartorsiffigissallugu."



J. K. ROWLING

kisermaajulluni anaanaatilluni una atuagaq siulleg
allappaa. Ilungersuutai akilerneqarpullusooq
ilimaginngisaminik Skotlandimi Arts Councilimit
(Eqqumiitsuliornermik Siunnersuisoqatigiinnit)
akissarsisinneqarami atuakkiani naammassisin-
naqqullugu. Kingorna atuakkiaqqaataa taanna
saqqummermat nunarsuatsinni tamarmi nuanner-
luinnartutut tusaamaneqalerpoq, akissarsisin-
neqartarluni Tuluut Nunaannilu ukioq taanna
meeqqanut atuakkiallammasutut toqqarneqarluni
Smarties Prizemillu akissarsisinneqarluni.

J. K. Rowling massakkut Skotlandimi
Edinburghimi pannilu najugaqarpoq.



ATUAKKIORFIK

Hans Egedesvej 3 • 3900 Sisimiut

ISBN 87-558-1768-8

